



Хотин-қизларнинг ижтимоий ҳимояси

Аёл



Зулфия ҚУРОЛБОЙ қизи

40	2020/110-
47899	\$75
3	

Задание буровой бригады
№ 1 Т. 2019. - 3200.

2020/110- \$75



Зулфия
Куролбай қизи

5 ташаббус
қитоб

АЁЛ

Ҳикоялар

Гафур Гулом номидаги
нашриёт-матбаа ижодий уйи
ТОШКЕНТ - 2019

уўК 821.512.133-3

КБК 84(5Ў)6

3 - 91

у́збек арабиёти.
Сирохиддин Сайид (ҳайъат раиси), Акмал Саидов,
Аҳмаджон Мелибоев, Анвар Обиджон, Усмон Азим,
Эркин Аъзам, Баҳодир Карим, Шавкат Юсупов.

к 82

Таҳрир ҳайъати:

Лойиҳа раҳбари:
Носиржон Жўраев

Гоя муаллифи ва нашрга тайёрловчи:
Санжар Турсунов

Зулфия Қуролбой қизи.

Аёл: ҳикоялар / Зулфия Қуролбой қизи. – Тошкент:
Ғафур Ғулом номидаги нашриёт-матбаа ижодий уйи.
2019. – 320 б.

«Беш ташаббус – беш китоб» лойиҳасининг навбатдаги китоби Зулфия Қуролбой қизи асарларидан тартиб берилди. Тўпламга ўн бешга яқин ҳикоялар жамланган. Тўпламдаги ҳар бир ҳикояда аёлларнинг – меҳрибонлиги, севгиси, орзую армони, изтироби, вафою ҳаёси, эр олдидаги бурчи, фарзанд олдидаги хизмати моҳирона қаламга олинган. Аёл деган номни бўй-басти билан кўрсатган бу ҳикоялар ҳеч қачон қадрини йўқотмайди.

уўК 821.512.133-3
КБК 84(5Ў)6

20/110 Alisher Navoiy
nomidagi
A 75 O'zbekiston MK

ISBN 978-9943-5953-2-3

© Ғафур Ғулом номидаги
нашриёт-матбаа ижодий
уйи, 2019

10 44899
391

АЁЛ

Деворлари оппоқ хона.

Дераза ойнасидан тўкилаётган оппоқ нур аёлнинг юзида жилва қилди, юмуқ қовоқларини қизартириди, ёноқларига илинган марварид томчиларида ва бармоқларидаги узукнинг олмос кўзчаларида акс этди.

Аёл кўзларини хиёл очди. Шуъла энди унинг қорачикларида аксланди.

“Қандай ёқимли... Тирикликнинг яна бир тонги отди, – аёл кўзларини юмиб, қуёш нурларини симирди, кейин яна оҳиста пи chirлади: – Сени қанчалик яхши кўраман қуёш!..”

Куёш нурларини мўл-кўл тўқди. Аёл буткул офтоб нурига ғарқ бўлди...

* * *

Кейинги ҳафта сурункасига Назокатнинг ҳарорати кўтарилиб, тушиб турди...

Даволовчи шифокор Шавкатни хонасига чакирди.

– Назокатнинг аҳволи яхши эмас. Ҳозирлигингизни кўраверинг.

Шавкат бошини чанглаб қолди.

– Оғир бўлинг. Бўшашманг. Ҳали у кўп азоб тортиши мумкин. Булар ҳали ҳолва... – дўхтиржимиб қолди.

Шавкат илкис бошини кўтарди.

— Наҳотки... Шунча қийналгани етмайдими?...
— Кўп азоб турибди олдинда, — деди дўхтири,
сўнг маҳзунлик билан хайрлашди.

Шавкат касалхона ҳовлисида анча вақт айланиб юриб кейин палатага кирди. Назокат ухлаб ётарди. У жуда озиб кетганди. Қовоқлари ичга ботган, ёноқ суюклари туртиб чиққан, лабларининг четида чуқурча пайдо бўлган, чекка томирлари кўм-кўк бўлиб бўртиб турарди.

Дунёдаги барча касалликларга лаънат ўқиди Шавкат.

Назокат тикилиб турган нигоҳларни ҳис этди шекилли, аста кўзларини очди.

— Яхшимисан?..

— Тузук, — ўрнидан қўзғалди Назокат. — Ҳовлига чиқиб келсамми, девдим.

Шавкат унга қўлинни узатди.

— Ҳали кучим бор, ўзим юра оламан, — деди Назокат ғалати қараб.

Шавкат беихтиёр чуқур хўрсинди.

Улар ҳовлига чиқишиди.

— Дўхтири сизга бир балоларни вайсаган шекилли, — деди Назокат ташқарига чиққанларидан кейин эрининг қовоқлари салқиган, кайфиятсиз юзига зимдан тикилганча. — Лекин улар янгишяптилар. Афт-ангоримга қаранг, яхшилаб қаранг, мен яқин-ўртада ўладиган одамга ўхшайманми? Ўзимни ҳар қачонгидан яхшироқ ҳис этяпман. Яшаш учун бундан ортиқ яна нима бўлиши керак? — Аёл юришдан тўхтади. Ҳаво совуган, осмонда увада булутлар кезинар, қуёш хирагина нур сочар, қорнинг ҳиди келарди. — Мен ойнага бокиб, қайта-қайта тикилдим ўзимга, ўладиган одамнинг юзи бунақа бўлмайди. Сиз ҳам эшитганмисиз шу гапни?

— Ҳа, эшитганман, — деди Шавкат шубҳага ўрин колдирмайдиган оҳангда.

— Ана, кўрдингизми, — Назокатнинг аллақандай ички нурдан юзи ёришди. У нарироқ бориб кунгай ерда турди, аёлнинг қорачиқларида олов аксланди. — Ҳалиям ҳаво булут, — деди у, — ёруғлик тиниқ эмас. Бу ҳаво одамнинг рангини очмайди, бўғиб қўяди!

Ҳақиқатан ҳам очиқ ҳавода унинг юзида касаллик нуқси сезилмас, эгнига тўкилган упағубори, ҳавога таралаётган ёқимли ҳид унинг ўзига оро берганини билдириб турарди.

Бирдан кутилмаган ҳол юз берди. Назокат югуриб келиб Шавкатнинг қучоfigа ўзини отди. Авваллари ҳеч ҳам бундай қилмасди.

— Биз фақат эр-хотин эмас, ундан ҳам яқинроқ бўлиб кетганмиз, а, дадаси? — деди у эрининг кўксига юзини босиб.

Шавкат кучли ҳароратни ва кўз ёшларни туйди. У қимир этолмай қолди.

Шавкат нимадир дейишни, хотинининг кўнглини кўтаришни истади, аммо тили айланмади. Кўксидан беихтиёр яна оғир хўрсиниқ отилиб чиқди.

Назокат эрининг юзидан ўпди, авайлаб, назокат билан ўпди. Шавкатнинг танасига титроқ кирди. Хотинининг қовжираган лаблари иссиқ эди. Юзи иссиқ эди. Нафаси иссиқ эди. Юзига тегиб турган соchlаридан-да ҳовур сачраётгандек эди.

— Сенга нима бўлди?.. — дея олди Шавкат.

Назокат жилмайди. Бир вактлардагидай... Аммо бу кулгу эмас, оғриқ, армон тўла шодмонлик эди.

Шавкат уни бағрига босди, нигоҳларини яширеди. Назокатнинг юзига қарашга ортиқ бардоши етмади.

– Мана кўрасиз, икки-уч кун ўтсин, яна аввалидай бўлиб кетаман. Шундай бўлишини кўнглим сезиб турибди, – шивирлади Назокат.

Шавкатнинг кўзига дунё қоронғу бўлиб кетди.

* * *

Кечаси Назокатнинг яна иссиғи кўтарилди. Алаҳсиради. Болаларини сўради.

Шавкат навбатчи врачни чақирди. Уколдан кейин Назокат тинчланиб ухлаб қолди.

Эрталаб одатдагидай вақтли уйғонди.

– Қаттиқ ухлаб қопман-а? – деб сўради алларсадан ҳадиксирагандек бўлиб.

– Чарчагансан, – деди Шавкат.

– Радиони нимага ўчириб қўйдингиз?

– Сенга тинчлик керак. Дўхтир айтди.

– Мен атай радиони ёқиб қўйгандим. Фингиллаб турса қаттиқ ухлаб қолмайман...

– Бугун ҳам ҳаво жуда яхши, ҳовлига чиқсанми? Ёзга ҳам, кузга ҳам ўхшамайди сира, – деди Шавкат.

– Чиқаман, албатта. Эрталабки тоза ҳавони яхши кўраман.

Назокат адёлни устидан олиб ташлаб, оёқларини каравотдан пастга туширди. Бирдан оёқларига кўзи тушган аёлнинг юзи ўзгариб кетди. Иккала оёғи ҳам шишиб, пўрсиллаб турарди. Бир кечада-я...

– Кейинроқ чиқарман... – Назокат бўшашганча ўринга чўзилди. Оёқлари устига адёлни ташлади.

– Нонуштани шу ерга олиб кела қолай. Иккаламиз ўтириб чой ичамиз, кейин болалардан,

ишдан хабар оламан, – деди Шавкат хотинининг бирдан авзойи ўзгарганидан таажжубланганини сездирмай.

– Майли...

Шавкат ғилдиракли столда нонушта олиб келди. Назокат оёқларини адёл билан ўраб ўтириб чой ичди...

Кечга бориб Назокат болдиrlари ҳам шишиб, кўпчиб турганини кўрди. Унинг ҳафсаласи пир бўлиб кетди. Кечаси яна иситма тутди.

Эртасига саҳар уйғонганида қорин қисмида аллақандай ғашни келтирувчи оғирликни тыйди. Қоқсуяк қўлинини қорни устига қўйди-ю, шу заҳоти тортиб олди. Шиш энди қоринга ўтган, у ошган хамирдай кўпчиб турарди.

– Дўхтир! – қичқириб юборди Назокат. Лекин буни ўзи сезмади.

Салобатли кекса дўхтир, унинг кетидан озғин ҳамшира ичкарига киришди.

– Қалайсиз, қизим, иситма безовта қилмаяп-тими энди? – табуреткага ўтирди дўхтир.

Назокат маҳзун жилмайди, кўзларининг остида ажин ғужуми пайдо бўлди.

– Яхшиман.

– Ҳароратини ўлчанг, – деди дўхтир ҳамширага қараб. Кейин яна Назокатга юзланди. – Менда гапингиз бор экан. Эшитаман, қизим.

– Шиш масаласида... – Назокат гапиролмай қолди.

– Хўш.

– Қорниимда яна сув тўпланган шекилли? Қаранг... Шу суюқликнинг ҳаммасини бирдан олдирсам, шиш қайтадими?.. – Назокатнинг кўзлари ғилтиллади.

– Шиш қайтади, – деди дўхтир вазминлик би-

лан. – Лекин менимча... Сизга дўхтир сифатида эмас, оддий бир одам, отангиз қатори бир одам сифатида айтадиган бўлсам... буни маслаҳат бермайман.

– Нега?

– Энди... шуниси маъқул... – Дўхтир нигохларини қаерга яширишни билмасди.

– Бу гал жудаям қийин бўлса керак-а? Қаттиқ азоб тортсам керак. Қайсиdir палатада бир аёл кечадан бери чинқириб ётибди-ю, шунга ўхшаб. Лекин буни қаранг, қорним соат сайин катталашиб кетяпти. Ҳадемай дўмбирадай бўлиб қолса керак. Мен бундай хунук алфозда... – Назокат юзини девор томонга бурди. Ёстиқ нам тортди.

Тоғдай дўхтир бирдан кичрайиб қолгандек хис этди ўзини.

– Тушуниб турибман... – деди бир оздан кейин овози хириллаб. – Биз керагини олдик суюқликнинг... Аммо ортиқча азобнинг нима кераги бор?

– Майли, мен чидайман... – деди Назокат терс қараб ётган кўйи. – Ҳаммасига чидайман.

Дўхтир ўрнидан турди. Назокат жон ҳолатда дўхтирганинг қўлидан ушлади.

– Биламан, оз қолганини биламан. Лекин бундай хунук алфозда ўлишни истамайман. Истамайман!..

Дўхтир қўлини авайлаб тортиб олиб, хонадан чиқди...

* * *

Тун.

Шавкат тезда ухлаб қолди. Аммо Назокат ёта олмади. У оёқларига илашган енгил кўрпани нари суриб, қийинчилик билан тиззаларини қучоқ-

лаганча түшак устида ўтиromoқчи бўлди, аммо бу нокулай эди. Тўғрироғи жуда ўнғайсиз эди. Хипча белида осилиб турган ёқимсиз оғирлик ўтиришга халақит берарди. Аёл ўрнидан туриб дераза олдига келди. Унинг уйқуси ўчган, бутун оламни нигоҳлари билан қамраб, унга жойлаб олмоқчидек, очиқ деразадан унсиз осмонга тикилар, ҳайратомуз манзарадан донг қотарди. Зеро бу вақтда ҳад-худудсиз осмон нурафшон, тилларанг ёғдуга ғарқ бўлиб ётарди. Уфқ тепасида осилиб турган ой, жимири-жимири қилаётган юлдузлар яқинлашиб келаётган тонгга ўрин бермасликка, аста-секин хира тортиб, сўниб йўқ бўлиб кетмасликка тиришаётгандай янада ёрқинроқ жилва қилишарди.

Тун ва тонг ўртасида кескин кураш кетаётган бир вақтда борлиқда теран сукунат ҳукм сурарди. Аёл бутун жисму жони қулоқقا айланиб аллақандай эшитилмас товушларга, сирли оҳангларга ғарқ бўлди, ой нурида ялтираётган япроқларнинг сехрли титрофини ҳис этди... Кейин чукур нафас олиб ўпкасини тоза ҳаво билан тўлдирди. Лабларини қаттиқ қимтиб, нафас чиқармай турди.

Аста-секин борлиқقا кумушранг оқим ёйилди. Кушлар чаҳ-чаҳлаб юборди...

Назокат чукур хўрсинди. Кўзлари ёшланди.

Шавкат безовталаниб, қимирлаб қўйди.

Назокат ўринга чўзилди. Бошини кўрпа билан буркаб олди. Зум ўтмай адёл силкина бошлади.

Аёл йиғларди, унсиз йиғларди...

* * *

Кечга бориб Назокатнинг нафаси сиқа бошлади. Боши ёстиқقا тегиши ҳамон ҳаво етишмай қолгандек бўларди. Корни яна бир оз катталашгандек эди.

Врач Назокатга ёстиқقا суюниб ўтирган күйи ухлашни тавсия қилди. Ётган пайтида қорин бўшлиғида пайдо бўлган суюқлик ўпкани сиқиб қўярди, шунинг учун Назокат нафас олишга қийналаётган эди...

Палатага ҳамшира кирди.

– Эрим келса ичкарига киритманг, илтимос, – деди Назокат унга.

– Нега? Дўхтир кечаси ёнингизда одам бўлишини тайинлаган, – деди ҳамшира.

– Вақтинча киритмай туриング, илтимос.

– Лекин у хавотирланади...

– Бирор баҳона ўйлаб топарсиз! – Назокат ҳамширининг чўнтағига пул солди.

Ҳамшира иккиланганча чиқиб кетди.

Назокат деразага тикилди. Унинг кўз олдида ўғиллари пайдо бўлди.

Аёл ўкириб юбормаслик учун лабини қаттиқ тишлади...

Шавкат ишдан чиқиб тўғри касалхонага келди. Лекин уни палатага киритишмади.

– Мумкин эмас! – деди ҳамшира дарчага энгашиб.

– Аҳволи оғирлашиб қолдими?!.. – даҳшат ичида сўради Шавкат. Бирдан унинг юзи кўкариб кетди.

– Аҳволи ёмонмас, лекин...

– Врач билан гаплашсам бўладими?

– Врач кечки обходда!

Шавкатнинг юраги хавотирли увишди. Назарида атай врачлар уни ичкарига киритишмайтгандай туюлди. Аллақандай қора хаёллар бирдан бостириб келди ва у ўзини боса олмай қолди.

– Эшикни очинг! Очинг, деяпман! – дея қичқирди у эшикни муштлаб. – Врач билан гаплашишим керак! Хотинимни кўришим керак!

Ичкаридан жавоб бўлмади.

Шавкатнинг хавотири кучайди. Дунё кўзига коронги бўлиб кетди.

– Эшикни очинг! Очинг! – дея қичқирди у жони бўғзига тиқилгудай бўлиб. Кейин эшикни бир-икки тепди ҳам.

– Нима гап, тинчликми? Нега тўполон қиляпсиз? – деди бир маҳал кекса навбатчи врач эшик олдида пайдо бўлиб.

– Дўхтири, хотинимни кўришим керак... Кўришим керак... Лекин улар мени ичкарига киритишмаяпти! – деди Шавкат ҳовлиқиб.

Эшик очилди.

– Ортимдан юринг, – деди кекса доктор.

Шавкат унга эргашди.

Кекса врач уни Назокат ётган палатага бошлаб борди. Лекин ичкарига киришга рухсат бермади.

– Ана, хотинингиз ухляяпти, энди кўнглингиз тинчидими? – деди кекса врач эшикни қия очиб.

Шавкат қия очилган эшикдан ичкарига бош сукди. Ҳа, ҳақиқатан ҳам дераза остидаги каравотда Назокат ухлаб ётарди. Қуюқ қора соchlари оппоқ ёстиқ устида паришон сочилган... Кўрпадан сал чиқиб турган елкасида ой нури жилва қиларди. Шавкат сал хотиржам тортди. Аммо дилидаги гашлик ва қўркув тарқамади.

– Нега мени ичкарига қўймаяпсиз? – деб сўради у кекса врачдан. – Ахир ўзингиз айтгандингиз-ку, кечасига олдида одам бўлиши керак, деб.

– Тўғри, ўзим шундай дегандим. Лекин бу беморга ёқмаяпти. У тинчликни истаяпти чоғи. Майли, кўнглига қараймиз.

– Мен нима қилай унда?

– Сиз? Истасангиз уйингизга бориб, болаларингиздан хабар олиб келинг. Дарвоқе, уларни эртага

олиб келсангиз ҳам бўлади. Фақат дераза ортидан гаплашишади, хўпми?

– Хўп...

Кекса врач уни эшик олдигача кузатиб қўйидида, кейин хонаси томон кетди.

Шавкат касалхона ҳовлисида анча вақт туриб қолди. Унинг кетгиси келмаётганди. Бирдан унинг хаёлига дераза томондан борсам-чи, деган ўй келди. Кейин касалхонани айланниб ўтиб, Назокат ётган палата деразаси тагига келди. Аммо ичкарини кўриб бўлмасди. Дераза ойналари ярмигача тўсиб қўйилганди.

Шавкат ерга чўк тушди. Кейин бу ердан бир қадам ҳам жилмади...

* * *

Азоб эди...

Ёта олмасди. Ўтириш ҳам анча ноқулай. Икки-уч қадам юрмасдан ҳарсиллаб қоларди. Ҳолдан тойган вужуди ортиқча юкни кўтаролмай қийналарди.

Кечга бориб Назокатни ҳиқичоқ тутди. Икки-уч марта “ҳиқ-ҳиқ” этди-ю, бирдан ичидан қандайдир суюқлик отилиб чиқди...

– Ҳамшира! – хирқироқ овозда қичқирди Назокат.

Зум ўтмай врач етиб келди.

– Энди сувни олмасликнинг иложи йўқ, а? – деди Назокат врачга қараб.

Врач жавоб бермади.

– Дўхтир... – Назокат бармоғидаги тилла узугиги врачнинг чўнтагига солди. – Сувни олинг, илтинос. Фақат охиригача!

Врач яна жавоб бермади. Ҳатто қараб қўймади. Аёлнинг қўли чўнтагига кириб чиққанидан кейин ҳам юзига қарамади. Бироқ...

— Ҳамшира! — дея чақирди йўлакка қараб.

Назокат жилмайди. Кейин ёстиғи остидан упа-
эликни олди...

* * *

Тун чекинди.

Дераза ойнасига кумушранг ёғду ёпирилди.

Кейин уфқ қизариб, аста қуёш бош кўтарди. Қуёш нурлари хира ва кучсиз эди, аммо у тез кўтарилилди. Ҳар ер-ҳар ерда уни увада пардалардек кулранг булатлар тўсди, лекин қуёш юришини тўхтатмади. Бирдан қуёш кўзни қамаштирадиган даражада оппоқ бўлиб порлаб бепоён осмонни ёритди, сўнг юришини секинлаштиргандай бўлди ва касалхона тепасига келганида бор шувласини деразаси очиқ хонага туширди, шуъла шу лаҳза каравотда ётган хушбичим ва гўзал аёл юзида жилва қилди, қовоқларини қизартирмоқчи бўлди, лекин тош қотган қовоқлар қилт этмади, шуъла ўзига қадрдон қорачикларда аксланмоқни истади, аммо уларни топа олмади, у фақат аёлнинг бармоқларида пайдо бўлиб қолган узукнинг олмос кўзчаларидагина акс эта олди.

Бу кун қуёш қанчалар порлоқ ва нурафшон бўлмасин, унга ҳеч ким муҳаббат изҳор қилмади, мулойим нурларини симирамади...

Барibir қуёшнинг бу ердан узоклашгиси келмади, у сахийлик билан нурларини мўл-кўл тўқди, жимгина ётган аёл вужуди кўзни қамаштириб, ярқираётган оппоқ нурларга омухта бўлиб кетди...

ТАФАККУР

I

Бу ерларнинг ёзи иззатталаб бўлади, кечикиброқ келади-ю; вақтлироқ кетишга шошилади, гўё кутгувчиларнинг бадига уриб кетмай дегандек; ёз гирд атрофини тепаликлар-у, ундан нариси пурвиқор тоғлар билан қуршалган дашт қишлоқни бир қур кўздан кечиради-да, баҳор пойига илашиб қолган яшил этакларини йиғиб олиб олисларга кетиб қолади. Куз келар-келмас олтиндек товла-наётган бийдай далалар ёзниң ортидан унсиз қараб қолгандек туюлади.

Кеч кузакдан то баҳор оёқлагунга қадар ярми-гача захлаб ётган гувала уйларнинг деворлари селгишга-да базўр улгуради. Қишлоқдан бир неча чақирим нарида яна бир овул бор. Ундан наридаги қияликдан сўнг яна биттаси... Лекин уларни қишлоқ деб ҳам бўлмасди. Аҳолиси кўпи билан ўттиз-қирқ хўжалик чиқар.

Сиртдан қарагандаёқ зерикарли эканлиги кўриниб турган бу қишлоқдаги ҳаёт тарзи ўша қишлоқ деб атаб бўлмайдиган – қишлоқчалардан кўп ҳам фарқ қилмасди. Бунда ҳам томи шиферланган уйлардан кўра лойсувоқ томлар кўп учраганидан ташқари уйларнинг бири тепароқ-да, яна бири пастликда, тағин биттаси қиялик-да жойлашувлари ҳам бир-бирларига ўхшаб ке-

тарди. Қишлоқ гирдида қад кўтарган тепаликлар бағрида бир вақтлар шарқираб оққан булоқларнинг кўзи аллақачон бекилган, фақат биргина чалажон булоқдан нимдошгина сув сизб чиқар, аммо қишлоққа етиб келар-келмас, чўпон-чўлиқларнинг бўғовига дуч келиб, ярим йўлда кўлмак ҳосил қилганди. Кўлмакки, ичида курт-қумурсқа,чувалчангурбақалари бисёр. Подага қўшилган сигирларнинг тез-тез зулуклаб туриши ҳам шундан. Ҳар бир ҳовлида кудук бор эди. Қадимда битта қудукнинг суви камида икки авлоднинг чанқоғини қондирган бўлса, эндиликда сув тортилиб, ер остига тушиб кетаётгандек қудуклар тез-тез қуриб қоларди.

Дов-дараҳт камчил эди, кўкламда унган гиёхлар бир лаҳзалик саратонга ҳам етиб бормасдан қуриб-қовжираб қолганидан, ҳовлилар тақир бўлиб ётарди. Экин-тикинларнинг баракаси учган, аммо лалми ерга экилган буғдой гуркираб ўсади.

Қишлоқ одамларининг тили қарлук лаҳжасида эди. “Соф жўқчи”лар деб бир вақтлар шу ернинг одамларини айтишарди. Лекин ҳозир “соф”ликка ҳам андак путур етган, етмиш яшар чолу кампирлар тилида “сапсим”, “не тўлка” каби сўзлар тез-тез учраб турарди.

Фақат биргина истисно мавжудки, бу нарса ушбу қишлоқнинг нуфузини бошқаларга нисбатан анча юқорилаб қўйганди. Атрофида тўртта қишлоқни бирлаштирган хўжалик маркази шу ерга жойлашган эди. Марказ бўлгандан кейин хўжалик идораси, мактаб, кутубхона, қишлоқ кексаларининг унчалик тили келишмайдиган “амбулатория” ҳам шу ерда эди-да.

“Ойнаи жаҳон” деб аталмиш мўъжиза бундан ўн-ўн беш йил муқаддам қишлоқда пайдо бўлганди.

Қаҳрамонимиз қишлоқ тегирмончисининг түнгичи Тангриберди худди ўша ойнаи жаҳон деб аталмиш мўъжизани кўриб катта бўлганди.

Ёши олтмишлар атрофида, юзига кексалик нуқси урган бўлса-да тутиб чиқсан мушакларидан куч-қувват ёғилиб турган чағиркўз, барваста тегирмончи биринчи марта дунёда еру-осмон ва тегирмондан ташқари “дилбузар” деб аталмиш мўъжиза борлигидан боҳабар бўлишига мана шу түнгич ўғлининг бехосдан йўқолиб қолгани сабаб бўлганди. Тегирмончи ўғлининг йўқолиб қолгани эсига тушганида айни ушбу воқеадан кўра, воқеага тааллукли бошқа бир манзара ҳақида андак ғурур, кибру ҳаво билан гапиришни хуш кўради:

“Пешин бўлиб қолувди-ёв.

Хотин дод-вой қилиб олдимга келди. Тангир ҳеч қаерда йўқ, дийди. У томон қир, бу томон қир, қаерга кетайди, десам ҳам сира кўнмайди. Кўзини ёшини селдай оқизайди. Хотинди дийирмонга ташлаб, изғиб кетдим. Еу қисталоқ осмонга учдими, ерга кирдими, бирор кўрдим, демайди. Кирмаган эшигим биргина Эшбоевнинг ҳовлиси қолувди. Мендан нима кетди, ака-уқадай бўп кетган бўлсак, қисиниб ўтиридимми деб райиснинг эшигини тақиллатдим. Кириб нени кўрдинг денг? Чоғроқ қутидай бир нарса. Симини тўкка сукса ичиди одами кўринайкан. Тағин денг, бийронбийрон қилиб ўзимиздинг тилда гапиришади. Икки қўлим ёқамда!.. Синграйиб қопман... Эшбоев уйида экан. Манзиратли одам-да. Тўрга ўтинг, Довулбой, деди. Ўтмадим. Қисиндим. Хотини ола қараб тургандай кўринди. Уст-бошим ҳам ҳалиgidай... туври дийирмондан чиқиб келяпманда. Шунда Эшбоев бир гап айтувди, ҳеч эсимдан чиқмайди: “Паланчи ака, дунёning янгиликлари

биздинг қишлоғимизга ҳам кириб келяпти. Худо хоҳласа, яқин беш-олти йил ичида хўжалигимдаги одамларнинг ҳаммасида мана шундақа дилбузар бўлади. Унгача бола-чақангиз минан ҳар замонда бўлсаям келиб дилбузар кўриб кетаберинг. Бу матаҳ ейилиб қолармиди!"

Кўнглим бир гупирди, бир гупирди...

Эшбоевдай одам дунёга бир келади-да, лекин айтдим, кўнглимда борини айтдим. Тоза ўлиб турганакан демасин, дедим-да. Қўйинг, раис бова, хўжаликда одам кўп бўлса, уларди ҳар бирига дилбузар оббериб, нима... Қўйинг, бизга шу яхши гапингиз ҳам етади. Биз дилбузарсиз ҳам яхши яшаяпмиз. Бир райислар бор, савлатидан от хуркади. Лекин халқини мирламайди. Бу гапни олдингизда эмас, орқангизда ҳам айтамиз, не тўлка мен, бутун халқ сиздан рози. Мингдан минг рози, дедим.

Эшбоев онграйиб қолди. Бир қизиқ қилиб қараб қўйди. Гапларим мойдай ёқди, лекин кўпни кўрган-да, билдиргиси келмади. Мендан нима кетди, дедим-да, мақтайбердим. Дийирмонда, ун ичида ўтириб унга зорман-ку, аслида. Ке, қўй, дедим-да. Эшбоев гапларимга чиппа чин ишонди. Сизга ўхшаган халқнинг ичидан чиқкан одамларнинг гап-сўзларидан биламизда халқнинг аҳволини, деди димоғи чоғ бўлиб. Ҳа, деб қўйдим-да қўлтиғига сув пуркайбердим, пуркайбердим. Аслида бошқа бир гапди айтсам ҳам бўлайди. Қишлоққа иккита, тоза бўлмаса, битта артезан қудук керак, демоқчийдим. Тунов куни десангиз, муздай сув ичгим келиб, қудукқа пақир ташлаб, шундай тортиб олсан, нени кўрдинг денг? Ярим пақир сув... ичи тўла қурбақа! Катталари нақ пиёладай келайди. Майдан

чуйдалари ҳам боракан, нуқул Эшбоевнинг “вилис”ига ўхшайди. Ҳай, тилим қичиди, лекин айтмадим. Турсунбой малим гапга уста, шу айтсин, дедим. Унинг қудуғидан зулук чиқкан экан, кўмиб ташлабди. Турсунбой ҳар қалай муаллим одам, гапирса ярашади. Бу гап мендан чиқса, Эшбоев ўпка-гина қилиши турган гап. Оғайин бўлмасак ҳам, оғайиндай бўп кетганмиз, ахир! Кейин давленаси борлиги эсимга тушиб қолди. Диққати ошиб, ўлиб-нетиб қолса, не бўлади? Раҳбар одам, териси юпқа... Тўрт-беш кун қурбақадан қолган сувдан ичсак-ичиббиз-да, дедим...”

Кимдир бирор: “Улингизди товдингизми, ишқилиб?” дея луқма ташлагандан кейингина тегирмончи раиснинг уйига нима учун борганлигини эслайди. “Бу энағар Эшбоевницида дилбузар кўриб ўтирганакан. Шу боламиз райисникида дилбузар кўриб катта бўлди ҳисоб. Шунинг учун анча истил бўлиб қолган. Шоҳмот деган балони дилбузарда кўриб, дувона бўлган-да!..”

* * *

Дарҳақиқат, тегирмончининг тўнғичи шахмат ишқибози эди. Ундаги қизиқиши ни оддий ишқибозлик деб бўлмасди. Бу қандайдир бошқача туйғу эди.

Эшбоевнинг юзидан заҳар томиб турадиган хотини очиқдан очиқ тўсройса-да (баъзида уришиб ҳайдаб юборарди), болаларча сурбетлик билан куннинг истаган вақтида яланг оёқ кириб бориб, раиснинг болалари қаторида (гоҳида улар туриб кетишарди) қимир этмай ўтирганча соатлаб телевизор кўрадиган болакай бир кун келиб кўрсатилаётган киною томошалар ичида “Шахмат мактаби” деган қисқагина кўрсатув ўзига маъқул

келганини фаҳмлаб қолганидан кейин тупроқ күчани чангитиб уйига югуаркан, эндиғина тегирмондан қайтган, уст-бошидан тортиб, қошу-кипригигача оппоқ гард қўнган отасининг белбоғига осилиб: “Менгаям шохмот ясаб беринг”, дея жанжал қилган кундан бошлаб унинг ишқибозлиги аён бўлган эса-да, бунга на ота, на она эътибор берди.

Отасидан: “Пишт-е, сендан бошқа дарди-касалим йўқми!” деган силтовни эшитган бола мактабга, арифметика муаллимининг ҳузурига борган ва ҳаяжондан бир оз довдираган кўйи: “Менга шахмат ясаб беринг!..” дея илтимос қилган.

Муаллимнинг ўша вактда иши тифизмиди ёки қунт қилмадими, бирдан болакайнинг ҳаф-саласини пир қилиб, рад жавоби берган бўлса-да, кейин кўнгли бўшлиқ қилиб умидбаш ваъдаларни бериб юборган, айтганки: “...яқин-ўртада шаҳарга борсам сенга давлат ишлаб чиқарган шахмат таҳтасидан опкеб бераман. Уни папкангга солиб юрсанг ҳам, чўнтағингда олиб юрсанг ҳам бўлади!..”

Хурсанд бўлиб кетган бола нақ уч ой арифметика муаллимининг оғзини пойлади, дарсга кирганларида қўлларига умидвор тикилди.

Шовқи муаллим ўша ваъдасидан кейин бир эмас, бир неча марта шаҳарга тушган бўлса ҳам кичкина шогирдининг илтимосини унутган эди.

Умидлари пучга чиқса-да, ишқибозлиги сўнмаган бола бир куни Эшбоевнинг ҳовлисида тўйнарилиб ётган қофоз қутилардан бирини олиб муаллимнинг уйига борган: “Муаллим, мана шу картонга шахмат катакларини чизиб беринг!..”

Мулзам бўлганидан андак қизаринқираган Шовқи муаллим ўша куниёқ картон қутининг бир бўлагига шахмат катакларини чизиб, оқ ва

қора рангларга бўяб берганди. Кейин касбиға хос фидойилиги тутиб, болага шашка ўйнашни ўргатмоқчи бўлади. Лекин бола кўнмайди. Фақат шахматни ўрганаман, деб туриб олади.

Қалбida ҳавасу қизиқиш кучли бўлган бола муаллим ёрдамида олтмиш тўрттадан иборат оққора катаклар нима, шахмат доналарининг номланиши, уларнинг жойлашувию ҳаракат йўналишларини... жуда зийрақлик билан тезда ўрганиб олади.

У жуда секин, лекин ўжарлик билан ўйнаб муаллимни доғда қолдиради. Айниқса, унинг шахмат доналарини сеҳрлаб олмоқчидек уларга қатъият билан унсиз тикилиши, сабр-тоқат билан соатлаб жим ўтириши Шовқи муаллимни ҳайратга соларди. Ахир, унинг ёшидаги болаларга бундай узоқ сукут сақлаш умуман ёт нарса-ку!

Буюрилган ишни чала-чулпа бажариб қўйиб картонини қўлтиғига қисиб, шахмат доналари ҳисобланмиш – оқ ва қорага бўялган турли шаклдаги тошлару ошиқлар солинган халтасини тутамлаганча муаллимникуга юргурган болакай отасидан тез-тез калтак еб турарди. Бироқ қизариб кетган юзидағи тарсаки тафти совимасдан туриб у бирор пана-пастқамга ўтиб олиб яна картон-тахта устига мук тушарди.

Олтинчи синфда ўқиб юрган кезлари у ўқувчилараро шахмат мусобақасида қатнашиб, кетмакет ғолибликни қўлга киритди.

Биринчи йирик мусобақага у тўққизинчи синфда ўқиб юрганида қатнашиши лозим эди. Аммо Довул тегирмончи розилик бермади. Бу вақтга келиб Тангриберди қўлидан иш келадиган дастёр бўлиб қолгани учун отаси уни ёнидан жилдиришни истамади.

– Шохмот сенга ош-нон бераймиди?! – деб бақиради у жазаваси қўзиганидан шахмат таҳтаси-ю доналарини дуч келган томонга улоқтириб юбораркан. – Қаёқдаги бекорчиларнинг ўйинига ишқи тушгани-чи! Артисликка қизиққанингдаям майлийди. Бир тўйга борсанг дунёниг пулини топасан-ку, зангар! Савлатинг ҳам артисларга мос...

Ёшига нисбатан бўйи бир оз новча, бунинг устига жудаям ориқ-озғин бўлган Тангриберди дала ишлари тугул уй юмушларига ҳам уқувсиз эди. Унга бирор ишни ишониб топшира олмаслигидан отасининг хуноби ошарди.

– Ким айтади, сени Довул дийирмончининг ули деб. Кундан-кунга ийна еган итдай бўп боряпсан-ов. Шохмот сенинг жонингни олиб боряпти. Хадемай, сочинг тўкилиб кал бўп қоласан, бола!

Бундай хавфли дақиқаларда Тангриберди ерга қараганча мум тишлаб ўтирас, ич-ичидан эзилсада, отасига қарши бир сўз демасди. Буни безбетлик деб тушунган ота атай унга алам қиласиган сўзларни қалаштириб ташларди.

– Сен, бола, барибир, гўр ҳам бўлмайсан-ов. Мени давримда-ку гариллаб юрарсан. Битта жувдирчоч билан қолганингдан кейин... ҳай билмадим. Лекин!.. – мана шу кетидан ундов қўйилган сўзни ота алоҳида таъкид билан айтарди. – Лекин Эркабой!.. Худо хоҳласа, новвосдай жигит бўлади!

Кўз ёшлари юзини юваётган ўсмир овоз чиқармасдан йифларди... Катта-катта, серкиприк қўйкўзларини бир нуқтага қадаб тек қотганча... юмюм йифларди.

– Отангга тик қарама! – деб дўқ уради жаҳли чиқиб кетган ота.

Тангриберди қаттиқ сесканиб кетиб нигохларини “нұқта”дан узиб, ерга қарап, күз ёшларитийилиб, вазмин тортиб қоларди. Унинг жисмида ақлига нисбатан нұқсон (озғинлиги, нимжонлиги) сезилса-да, қайсиdir авлодидан ўтган фавқулодда иқтидори, куч-қуввати ана шу сукутида мужассамлашгандек эди.

* * *

Шундай қилиб, Довул тегирмончи ўғлига мусобақада қатнашиш учун рухсат бермади. “Дам олиш куни Қўзибойнинг маккасини тортиб беришимиз керак”, деб туриб олди. Тангрибердини мактабга ҳам юбормай қўйди.

Мусобақа бошланишига бир кун қолганда...

Тепаликдаги тегирмоннинг эшиги олдига курсича қўйиб ўтирган Довул тегирмончи пастликдан бир-бир босиб юқорилаб келаётган Шовқи муаллимни кўриб энсаси қотди. “Оббо, ана, далолчиликка ҳам келяпти! – деди у ўзига ўзи. – Энди бир соат бошни қотиради”.

Довул тегирмончи ўзини иши тифиз одамдек кўрсатиш учун ичкарига қараб бақирди:

– Тангир! Сийпаланмай бўл тезроқ! Бир тонна маккани қачон тортиб бўламиз?!

Муаллим гўё унинг овозини эшитмагандай, иши тифизлигини сезмагандай хотиржам тутди ўзини. Худди айланниб юриб келиб қолгандай у ёқ-бу ёқдан гаплашиб ўтиреди. Нарх-наво, экинтикин, об-ҳаво, ҳатто ўриклар довча бўлган пайт бирдан бўрондек бостириб келиб, дараҳтларни қарсиллатиб синдириб, довуччаларни тўкиб кетадиган шамол ҳақида ҳам сўзлашиб ўтиреди.

Довул тегирмончининг хаёли чалғигандек бўлди.

Бир маҳал эътибор берса... муаллим шахмат ҳақида оғиз кўпиртиряпти!

Тегирмончи қошу-қовоғини уйиб, тиконларини отишга шайланган жайрадек ҳурпайиб олди.

Муаллим ўзи эшитган буюк шахматчилар ҳақида билганларига озгина қўшиб-чатиб, кўпиртириб гапиракан, усталик билан гап жиловини Тангриберди томон буриб юборди. Айтдики, ажабмас, бир қун келиб мана шу жиккакина бола сабаб бўлиб, мана шу тоғлар орасидаги дўппидек қишлоқнинг номи бутун дунёга таралса, балки кейинчалик...

Шу ерга келганда тегирмончи чидаб туролмади.

– Сен мени бошимди айлантирма, – дея муаллимнинг гапини чўрт кесди у. – Қишлоқди дунё таниди нима, танимади нима? Бирор келиб қурбақа босган қудуғимга тоза сув қуйиб бераймиди? Ё улимни мусобақага юборганим учун давлат менга бир сўм бераймиди? Шохмотнинг кетидан ким бойиб кетди ўзи, а, ким?.. Қани, айт, ким бойиди? Бизди анди деб ўйлаётган бўлсанг адашасан!

Арифметика муаллим оғрингандек бўлди.

Ўрнидан қўзғолиб, кетишга чоғланаркан сўнгги чорани қўллашга қарор қилди.

– Мабодо Тангир мусобақада ғолиб бўлиб, ҳаммадан зўр чиқса... пул берилиши ҳам мумкин!

Довул тегирмончи гангиб қолди. Янгиш эшитмадимми, дегандек муаллимга синовchan назар ташлади. Сўнг гир айланаси ёғ сурилгандек ялтираб кетган дўписсини қўлига олиб, чангини қоқиш асносида ўзича алланарсаларни ўйлади: “Дарров хўп десам ўлиб турган экан дийди. Яна бир оз оёқ тирасам, балки кўпроқ нарса билиб оларман!” Шовқи муаллим ҳам шу қишлоқнинг одами эмас-

ми, тегирмончининг ҳийласини аллақачон пайқаб улгурган, қанча кўп ялтоқланса сухбатдоши ўзини тарозига солаверишини ўйлаб қовоини солди, кетишга чоғланди.

Нихоят, тегирмончининг ўзи биринчи бўлиб гапиришга мажбур бўлди.

– Биз минг гариллаганимиз билан барибир оми одаммиз. Мен боламни жўнатдим ҳам дейлик, у ёқдагилар тағин... ҳалигини... ўзлари олиб...

Тегирмончи кўзларини жавдиратиб муаллимга боқди.

– Ҳақиқат бор, ака! – деди лабларида истеҳзоли табассум жилва қилаётган муаллим.

– Ҳақиқатингни бошимга ураманми? Мен дийирмонди ўйладяпман. Тангир у ёқقا кетса дийирмон ишламайди. Халқ бувдойини орқалаб қаерга боради? Менам энди қаридим. Аввал-гидек куну-тун ишлашга ярамайман. Эшбоевга хўп ялиндим, битта ёрдамчи бер, деб. Бермади. Улингиз бор, сизга ёрдамчи не керак дийди! – Охирги гапни тегирмончи атай ўзидан қўшиб айтди. Муаллим эл ичидаги юрган одам. Бу гапни дарров оёқлатади. Қарабсизки, Довул тегирмончига пинҳона тиш қайраб юрганлар (улар бор, тўртта одамнинг бири албатта тегирмончининг душмани ҳисобланади) чапак чалиб қолаверишади. Айтишадики (балки ўйлашар), Довул дийирмончи анойи эмас. Аллақачон райис билан ишни пишитиб қўйибди. Энди дийирмондан умидимизни (умидимни) узсак бўлади!

– Тангир голиб бўлса албатта пул билан келади!

Муаллимнинг сўzlари тегирмончининг қулоғига булоқ сувининг жилдирашидек ёқимли эшитилди...

Дам олиш куни Тангриберди мусобақага кетди. Довул тегирмончининг бутун хаёли, фикри-зикри

мусобақага кетган ўғлида бўлди, илҳақ бўлиб унинг йўлига кўз тикди.

Тегирмончининг мақсади тегирмон талаштортиш бўлиб қолмасдан уни ўғлининг қўлига топшириш эди. Вақт-вужуд либосини эскиртиряпти. Соч-соқоли гард қўнмаса ҳам оппоқ бўлиб боряпти. Бугун бўлмаса эртага “тиш қайраб” юрганлар отилиб чиқиши ё ими-жимида Эшбоев билан тил бириктириб жиловини қўлидан олиб қўйиши мумкин. Лекин тегирмончи бунгача кутиб турмайди. Ўғли мактабни тамомлаши билан барча расм-русумларни адо этиб, “мерос”ни эгасига топширади-қўяди! Ана шунда, тиш қайраганлар (уларнинг борлигига тегирмончи шубҳа қилмасди, бирор келиб ёқасига ёпишмаган бўлсада кимлардир, қаердадир унга қарши фитнатайёрлаётгани аниқ) тишларини қайраганча қолаверишади. Тегирмончилик улуғ мартаба. Шунинг ортидан саккиз жон кавшаниб турибди ахир!..

Хуллас, шу куни вақт тушдан оғгач, тегирмончининг ҳафсаласи пир бўла бошлади: “Дийирмончининг боласи-да, гўр бўлармиди?!” деган хаёл кўклам осмонини қоплаган қора булатдай дарди-дунёсини зимистон қилиб юборган бўлсада, кўнглининг туб-тубида мудраб ётган чалажон умид ҳам ора-сира бош кўтариб қоларди: “Биламан, Худо бу боланинг куч-қувватини миясига берган. Ҳадемай қўйни-қўнжи тўлиб келиб қолади!”

Довул тегирмончи синиклик билан илжайиб қўйди. Тасаввурида ўғли бир дунё пул ёки... ёки телевизор-меливизорга ўхшаш каттакон совға билан кириб келаётгандек бўлаверди.

Дарвоқе, телевизор...

Худди Эшбоевнигига ўхшаш “дилбузор” олиш истаги тегирмончининг кўнглида айнан ўша Эш-

боевнинг уйида қутига ўхшаш нарсани кўрган кунидан кейин туғилганди.

Гарчи Эшбоев “хўжалигини телевизор билан таъминлаш”ни бўйнига олган бўлса-да...

Гарчи айтилган муддатдан ўтиб кетилган бўлса-да...

Тегирмончи барибир, телевизор кутиб яшарди. Назарида, Эшбоев бугун бўлмаса эртага, эрта бўлмаса индинга одамларни телевизор билан таъминлаб қоладигандек туюлаверарди. Балки бу гап Эшбоевнинг эсидан чиққандир. Чунки ўшандан кейин у бундан бошқа-бошқа ваъдаларни ҳам бериб юборган. Қай бир йили тўхтовсиз эзиз ёқсан ёмғирга дош бера олмай қулаб тушган деворни қайта тиклаш учун пой деворига тош тераётганида йўлдан ўтаётган “Виллис” тўхтаб, ундан икки юзи хўрозвнинг тожидай қип-қизил Эшбоев тушиб, кулимсираганча шу томонга юрди. Тегирмончи ҳали оғзини ҳам очгани йўқ эди.

- Ҳали бу уйларингиз ўрнида пойdevori бир яrim метр келадиган ҳақиқий кошона қуриб берамиз, Довулбой!

Эшбоевнинг дўрдоқ лабларининг бир четидан учаётган сўзларни эшигтан тегирмончи хушидан кетиб қолаёди.

Ундан сал олдинроқ эса...

Тегирмончи ҳали ўғлининг қўлини ҳалоллагманган эди. Эрта, деди... Индин, деди... Чоғим келсин, деди. Бир кун қарасаки тўнғичи бу ёқда турсин, кенжатой ўғлининг-да бўйи чўзилиб қолибди. Чамалаб кўрса, чоғи ҳали ҳам келмабди. Шартта юзини сидириб ташлаб, хўжалик идорасига борди. Минғирлаб аҳволини тушунтира бошлаган ҳам эдики Эшбоевнинг гулдираган овози гапини чўрт кесди:

— Қанча керак? Ўн минг!.. Йигирма минг!.. Етадими?

Тегирмончи ўзига келиб олгунча жавобни ҳам раиснинг ўзи қайтарди.

— Сиз тўйни бошлайверинг. Харажати биздан.

Шошилинч тўй куни белгиланди. Тегирмончи раиснинг мурувватидан баҳраманд бўлиш учун идорага борганида... Эшбоевни зудлик билан Тошкентга кетиб қолганини эшитди! Ёрдамчилар эса ҳеч қанақанги “харажат” ҳақида гап бўлганлигини эслаша олмади.

Тўйни бир амаллаб ўтказди.

Лекин... кўнглида бир тугун қолгани ёмон бўлди-да.

Тугунки на учи бор, на...

Бироқ кўп ўтмасдан “тугун” ўз-ўзидан ечилиб кетди.

Ўша куни тегирмончи тенг-тўшлари билан кимнингдир худойисидан келаётган эди. “Виллис”да ўтиб кетаётган раис кўчани тўлдириб келаётган халқнинг ёнидан беписанд ўтиб кетолмади чоғи, машинани тўхтатди. У Тошкентдан нақ бир ойдан кейин қайтганди.

Юзидаги қизиллик янада тиниқлашган... кўркамлашган...

У ойдай тўлиб, ойдай кулиб, сахийлик билан ўзидан нурафшон шуълалар таратиб... халқقا пешвоз юрди.

Умидбахш сўзларини ўнгу-сўлга сахийлик билан улашди.

Нигоҳлари самимиятни “қарз”га улашаётган бўлса-да муомаласи самимий эди. Айниқса, Довул тегирмончига алоҳида лутф кўрсатди.

Тегирмончига шунинг ўзи кифоя қилди.

Боши узра ёрқин шуъла сочаётган ойга тош отишга ботинолмади...

Эшбоев ойга ўхшаб одамларга ярқироқ томони билан күринарди. Қоронғұ, ёришмайдиган томонига эса шу пайтгача ҳеч кимнинг күзи тушмаган...

Мана, энди, тегирмончига ҳам Худо “ол, қулим” дейдиган күн келиб қолди-ёв,

Довул тегирмончи умрида илк бор ўғлининг иқтидорига тан берди.

Бир маҳал қиялиқда юргилаб келаётган қизига күзи тушган тегирмончи ўрнидан туриб кетганини сезмай қолди.

– Ота!.. А-акам келди. Биrinчи ўринни опти! Икки кундан кейин яна бораймиш!..

Довул тегирмончи қалтираб кетди.

“Дийирмончининг боласи ҳам юртга танилибди!” деган ўй яшин тезлигида хаёлидан ўтди. Бир лаҳза... атиги бир дақықа фахрланиш туйғуси юрагини қамраб олди. Кейин туйқусдан бир дунё пул... телевизор ҳақидаги орзуси эсига тушди-ю шоша-пиша энги-бошининг чангини қоқа бошлади.

– Сен дийирмонда ўтира тур. Битта-яримта кеп қолса, айтгин, отам насияга ун тортмас экан, де. Күнгли бүшлик қымагин тағин, нақ кунингни күрсатаман-а! – Тегирмончи муштини дўлайтириди, ҳовлиққанча икки-уч қадам одимлади-ю дарҳол изига қайтди, гард қүнгап сийрак киприклини пирпираттанча қизига юзланди. – Акангди... қўлида у-бу бормиди?..

Қиз елка қисди-да:

– Билмадим, – дея жавоб берди бир оздан кейин.

* * *

Уйга яқинлаб қолғанларида муқовасига зарҳал ҳарфлар билан ёзилган “Ёрлик”ни кўксига

босганча кўзлари ёниб келаётган Тангрибердини Шовқи муаллим енгидан тортиб тўхтатди. Бир зум тараддуланиб турди-да, йигитнинг озгинлигидан сузма халтадай осилиб турган шими чўнтағига нимадир солиб қўйди.

– Боргандан кейин отангга бер. Қувониб қолади...

Тангрибердининг нафақат юзидан, ҳатто кўзларининг ичидан иссиқ чиқиб кетди.

– Керакмас!.. Керакмас!.. – дея хитоб қилди у овози қалтираб. Пулни олиб эгасининг чўнтағига солиб қўйди. – Отам ўзи... сал шунаقا... Пулни яхши кўради!..

– Ахир, қандай қилиб... Нима дейсан?..

– Ҳозирдан пул олиб боришимга ўрганса, кейин нима бўлади?

Муаллим пулни чўнтағига солди, аммо кўнгли гаш бўлиб қолди...

Кўчага қараган дераза олдида тик турган Тангриберди отасининг ҳовлиқиб ўтиб кетганини кўриб... ичидан зил кетди.

Калтак зарбини ҳис этган вужуди жимиirlади...

Аммо отаси рўпарў келганида ростини айтди.

– Биринчиликни олдим, ота. Лекин бир тийин ҳам беришмади. Бунаقا мусобақаларда пул тўланмас экан.

– Қанақасида тўланаркан?.. – анқовликка олди ота ўзини.

– Катта-катта халқаро турнирларда...

– Нега ўша катта-кattасига қатнашмадинг?

– Ота, ахир...

Йигитча қўққисидан юзига тушган тарсаки зарбидан девор ёнига учиб тушди. Ҳирсадай тегирмончи бақувват қўллари билан силтаб ўғлини ўрнидан турғазди-да иккинчи юзига ҳам тарсаки туширди.

— Бир сўм бермаса ... ни еб юрибсанми?

Эшик зарб билан ёпилганда уй деворлардан тортиб дераза ромларигача зириллаб кетди.

Шифтдан бир ҳовуч тупроқ тўкилди...

Довул тегирмончи тупроқ кўчани чангитиб, ёнверига ҳам қарамасдан ғизиллаб тегирмон томон кетаркан ичида ҳадеб ва ҳадеб Шовқи муаллимни бўралатиб сўкарди.

Орадан кўп ўтмасдан, отасининг “иситмаси” тушиб улгурмай Тангриберди яна мусобақага бориши учун рухсат сўради. Тегирмончи миқ этмади. Ўғлининг юзига ўқрайиб қараб қўйди-да, индамай уни қўлидан етаклаб бориб ертўлага киритди. Сўнг отнинг калласидай қулфни ертўла эшигига осиб қулфлаб қўйди...

Ўша мусобақага Тангриберди бора олмади.

Бироқ кейин йўлини топди. Мусобақа бўладиган куни турли баҳоналар билан уйдан чиқишининг ҳадисини олволди. Ўнинчи синфни тамомлагунча у туман, вилоят чемпионлигига кўтарилди. Бир қанча фахрий ёрликлар билан тақдирланди, лекин бирортасини ҳам на отаси, на онасига кўрсатди.

Кейин эса армияга кетиб қолди.

Шундан кейин шахмат деган бало Довул тегирмончининг оромини ўғирлаб, хаёлини банд этмай қўйди.

Оилада хотиржамлик хукм сура бошлади...

II

Бўйи ёшига нисбатан анча дароз, озғинлигидан эгнидаги кийимлари мисол йирик мускулларини ўраб турган пуштиранг териси осилиб қолган, қорачиклари юлдуздай порлаб, зийраклик

билан бокса-да, отасининг зулмидан кўркиб пана-
панада дув-дув кўз ёши тўқадиган йигитча икки
йилдан сўнг ҳарбий формада қишлоқقا кириб
келганида уни кўпчилик танимай қолди. Сочлари
тепага таралганидан кенг пешонаси ярқ этиб
кўзга ташланган, истараси иссиқ, барваста йигит-
ни кўриб Довул тегирмончининг ўзи ҳам бир
сесканиб тушди.

Бир ҳафтача келди-кетди бўлиб турди.

Ота-бала ёлғиз қолишдан, бақамти келишдан
чўчиётгандек туяларди.

Нихоят, саккизинчи кунмиди ё тўққизинчими,
ота-бала ширчойли дастурхон атрофида ёлғиз
қолишиди. Тангриберди ҳафсала билан дазмоллан-
ган кийимлари ғижим бўлмаслиги учун омонат
ўтиради.

– Военкомгами? – деб сўради тегирмончи чети
учган пиёладан чой хўпларкан.

– Шаҳарга бориб келишим керак. Бирорга теле-
фон...

– Дийирмонди қачон қўлга оласан?

Тангриберди ерга бокди. Бир муддат ўйланиб
турди-да, сўнг отасига тик қаради.

– Ота, мен яна кетишим керак!

Тегирмончининг ширчойли косага узалган қўли
тек қотди.

– Нима дейсан? – деб сўради у гарангсиб.

– Ҳарбий бўлсам девдим... Хизмат қилган
еримга яна қайтиб боришим керак. У ёқдагиларга
ваъда бериб келганман...

Довул тегирмончи одатига кўра ўзини овсар-
ликка солди:

– У ерда нима қиласан, болам?

– Бормасам бўлмайди... – чайналди йигит.

– Ҳов, бола, ўйлаб гапиряпсанма? Дийирмон
нима бўлади?

— Нима энди... Тегирмончининг боласи тегирмончи бўлиши керак, деб шу тоғлар орасида ўтиб кетаверамизми?!

— Дийирмончи бўлиб бирордан бир бурда нонни кам едингма?

— Қора нонга обдон тўйғанмиз!..

— Ношукр бўлма, бола. Тилингни узиб оламан!

— Кетмасам бўлмайди, ота!

— Нима бало, битта-яримта санқи хотинга илакишиб қолдингма?

— Э!..

— Гап шу, ҳеч қаерга кетмайсан. Ота-бовамизнинг касбини қиласан!

— Мен бутунлай кетаман деяпганим йўқ... — деди Тангриберди энди зорланиб. — Армияда шахмат билан кўп шуғулландим. Мусобақаларда қатнашдим. Ишимни яна давом эттиришим керак. Тренерим Алмаз аканинг ўзи бирга келмоқчи эди. Мен йўлдан қайтардим...

— А-ҳа, ана энди ичингдагини айтдинг! — Тегирмончининг кўзлари ялтираб кетди. — Кўнглим сезиб турувди. Шу ёқларда ҳам тинч юрмабсан-да!

— Ота...

— Хўш, неччи марта ютдинг-у неччи марта ютқаздинг?

— Ана, қофозлар дипломатда турибди.

— Кўзибойди боласи армиядан битта мотосеклди пулини ишлаб кепти. Сен!..

Эски фишава бошланаётганидан безган йигит чидаб тура олмади:

— Пул йўқ! Пул йўқ! Бир сўм ҳам беришмади. Ўзим ёнимдан пул тўлаб қатнашдим.

— Ҳай, аттанг!.. — Тегирмончи каппадай калласини чангллаган кўйи жим қолди. Анчадан

кейин бошини күтариб қааркан, фавқулодда хотиржамлик билан сўради: – Қани ўша қоғозларинг? Кўрсам бўладими?

Тангриберди яп-янги, залворлигина сумкасини ичкари уйдан олиб чиқиб, жимитдай калит билан уни очди. Бир қанча қалин муқовали ёрлиқларни отасига узатди. “Отам ўқиган билан тушумайди. Шунчаки кўрмоқчи шекилли”, деб ўйлади йигит.

– Анови нима? – ялтироқ қоғозга ўроғлик нарсага имо қилди ота.

– Буми... – Тангриберди бир оз иккиланган ҳолда ялтироқ қоғозни очди. – Бу шахмат тахтаси. Яп-янги! Бунда бир қўл ўйнаганман, холос.

– Бу ёқقا бер!..

Довул тегирмончи керакли нарсаларни йиғиб олди-да, ўрнидан турди. Тўғри ўчоқ бошига борди. Кули олинмаган тандирга қўлидаги нарсаларни тиқди-да, устидан керосин қўйди...

Қоғозлар гуриллаб бир зумда ёниб битди.

Шахмат тахтаси эса... бир ловуллади-ю, кейин нимагадир тутай бошлади.

Оқ ва қора “Шоҳ”лар ўз сипоҳлари билан ерда сочилиб ётарди.

Тегирмончидан чиқсан шахматчи эса ранги бўздай оқарганча ҳайкал бўлиб қолганди...

Тегирмончи ҳеч нарса бўлмагандай жойига келиб ўтириди. Гапини тўхтаган еридан давом эттира бошлади:

– Отам отасини боқди, саксондан ошиб қазо қилганида иззат-икромминан қўмди. Вақти келганида менам отамнинг қўлидан ишини олдим, боқдим, ўлганида ўзим қўмдим. Лекин мен ўлсам ўлигим эгасиз қоларкан...

Довул тегирмончи бирдан жимиб қолди. Ди-моғи ачишиб, милклари намланди. Бу ҳолдан

негадир ийманмади. Кўзларидан думалаган икки томчи ёшни атай ўғли кўрсин учун... артиб ташламади.

Тангриберди ўрнидан тура солиб эгнидаги оҳорли кўйлагини ечиб уй тўрига улоқтириб юборди. Кейин майкачан ҳолда шахт билан юриб ташқарига чиқиб кетди.

Эшик ёпилган асно тегирмончи ошхона дерасидан мўралаб турган хотинини имлаб чақирди.

– Қариндош уруғданми, бегонаданми, тузувроқ қиз топ! Уйлантириб, бу боланинг оёғига тушов солиб қўймасак қочиб кетишдан ҳам тоймайди. Лекин қиз ҳаддин чиройли бўлсин!..

Турмуш икир-чикирлари тўлиб-тошган миясида бехосдан пайдо бўлган янги сўз, янги фикр тегирмончини ҳайрон қолдирди. Одатда, у аёлларни хуснига қараб фарқламасди. Ош-овқатингни қилса, бола туғиб берса бўлди-да. Бу дунёда ҳамма нарса ўз ҳолича қолмайди. Янги лаган ҳам бир кун келиб эскиради, сири кўчади, оҳори кетади...

Довул тегирмончи ўйлай-ўйлай охири “истил” бўлиб кетган ўғлининг тақдирини Эшбоев билан биргаликда ҳал қилишни кўнглига тутди.

Қолаверса, Тангриберди саркашлиқ қилгани учун унга атай тегирмонни тиқиширгани билан аслида нияти бир оз ўзгарган эди. Басавлат, башанг ўғлини мудом чанг-тўзон аримайдиган тегирмонга раво кўрмай қолганди тегирмончи...

* * *

Раис тегирмончини хушламайроқ кутиб олди. Тегирмончи буни дарҳол сезди, бир зумда кўнглидан не тусмоллар ўтмади, аммо бирори ҳам думини тутқазмади.

Шунинг учун эски усули мақтовга зўр берди. Мақтаса Эшбоев қуруқ қўл билан чиқарип юбормаслигини биларди. Айтмоқчи бўлдики, одамларга бош бўлиш ҳам осонмас, лекин илож қанча, бирор тегадан бошқарип турмаса одамзод хом сут эмган банда, тентак қўйдай боши оққан тарафга улоқиб кетиши турган гап, ...шунга ўхшаш бир оз дудмол, бир оз чучмал, бири бошидан, бири кетидан, тумтароқ, аммо бир неча кундан бўён содда қалбини ҳаяжонга солган (тумтароқ бўлсада жумла тузиш осонми) сўзларни батафсил баён қилгандан кейингина асосий мақсадга ўтди.

– Улимиз ҳарбийдан сал бебошроқ бўлиб қайтиди-ку, райис бова, – деди у бирдан тўлиқиб кетиб. – У десам, бу дийди, бу десам у... Келганидан бери қитиқ патимга тийиб юрибди-да. Ўзингиз тартибга солиб бермасангиз бўлмайди.

Эшбоевнинг юзи ой баркашидек ялтираб турса-да, ёғдуси хиралашган, хўroz тожидек қипқизил ёноқларида қорамтири доғчалар кўзга ташланиб турарди. Пешонасида ажинлар ҳалинчаги пайдо бўлганди.

– Дангал гапиринг, нима дийди ўзи?! – Раиснинг авзойидан тегирмончининг минfir-минfirлари асабига текканлиги сезилиб турарди.

– Ҳарбий бўламан дийди. Шохмот ўйнайман дийди.

– Ҳарбий бўламан деса жўнатиб юбораверинг!

Тегирмончи бир қалқиб тушди. Оғрингандек эски “ошна”сига ўпкали нигоҳ ташлади. Ўзидан ўзи норозиланди ичиди, бемаврид келганини фаҳмлаб. Бемавридки, ой юзини қора булут тўсган бир замон...

Лекин паст тушгиси келмади. “Мен қўли қабарган меҳнаткаш бир одамман. Унинг ҳузури

билан не ишим бор!..” Ўйлари далда бўлиб қаддини тиклади.

– Мен-ку эркак одамман, не ўтса ичимда. Лекин энасига қийин бўляпти-да. Ҳаммамиз ҳам энадан бино бўлганмиз...

“Эна” сўзини эшитиб раиснинг қарашлари маҳзунлашди. Яқинда тўқсонга кирган онаси қазо қилганди. Раис онаси жон берар чоғида тепасида бўлолмаганидан армонда эканлиги тегирмончига маълум эди.

– Сизга қандай ёрдам беришим мумкин?

Тегирмончига айнан шу жавоб керак эди.

– Идорадан иш товиб берсангиз дебидим, – деди у бирдан жонланиб. – Ҳисоб-китобга калласи зўр ишлайди!..

– Бўпти. Бир ҳафтадан кейин келсин. Гаплашамиз.

Эшбоев шу билан қутулдим деб ўйлаб олдиаги қоғозларни титкилай бошлади.

Довул тегирмончи эса кетишга шошилмасди. Ниманидир айтишга ботина олмаётгандек Эшбоевга мўлтираб тикилди.

Эшбоев қоғозлардан бош кўтаришга мажбур бўлди.

– Нима гап яна?

– Улимга қанча... ойлик берилади?

Эшбоев ғалати қараш қилди, чоли қурғур ҳеч қандай ҳужжати бўлмаган боласини ишга олишга рози бўлиб қанчалик мурувват қилганимни тушунмаяпти чоғи, дегандай...

Тегирмончи учлари оқара бошлаган киприкларини пирпиратганча раисга умидвор тикилиб тураверди.

Эшбоев энсаси қотганини сездириш учун илкисроқ жавоб қилди:

– Бораверинг-чи, қолганини улингиз билан гаплашамиз.

Довул тегирмончи идорадан таъби хира бўлиб чиқди. Гоҳ тепага ўрлаб, гоҳ пастга эниб кетган йўл четидан қўлларини орқага қилганча ўй суреб бораркан, раиснинг ўзгариб қолганини ич-ичидан хис этди. Авваллари бундай эмасди, деб ўйлади тегирмончи. Қишлоқнинг итини ҳам кулиб қарши оларди. Раислик курсисида узок ўтириб қолганига мана шу самимийлиги кўпроқ сабаб бўлгандир. Энди бўлса... Эшбоевнинг ўзгариб қолишига балки “тегирмон даври” ўтгани сабабдир...

Довул тегирмончи юришдан тўхтаб, калиши ичига тўлган тупроқни тўқди. Шу баҳона ортига, хўжлик идораси томонга қаради. Шу пайтгача раисдан бунчалик кўнгли оғримаганди...

Тегирмончи юришда давом этди.

Йўлда бир-бири билан қучоқлашиб, оғиз-бурун ўпишаётган пиёнисталарга кўзи тушиб “тегирмон даври” ҳақидаги ўйлари эсига тушди.

Яқин уч-тўрт йилдан бўён хўжаликда буғдой экиладиган ерлар кескин камайтирилган, унинг ўрнига турли навдаги ток кўчатлари ўтқазилиб, гектар-гектар ерлар узумзорга айлантирилмоқда эди. Бундан қишлоқ аҳли ишсиз қолгани йўқ албатта. Буғдойзорда ишламаса, узумзорда ишлашади. Лекин узум буғдой эмас-да! Узумзорнинг меҳнати кўп-у, меҳнат пули кам эди. Майиз қилиб бўлмас экан. Бола-чақанинг бир тўйганини айтмаса. Буғдой ўз оти билан буғдой-да! Буғдой уни одамларни тўйдирса, сомони мол-ҳолнинг кунига яраб турарди. Ўрим вақтида улдабуронлар тонна-тонналаб буғдой ғамлаб олишарди. Эпсизлар ҳам буткул қуруқ қолиши масди, бошоқ териб қишлигини ғамларди. Бундан ташқари йиллик даромад эвазига ҳам кўпинча буғдой бериларди.

Узумдан күнгли тўлмаганлар оғзи ботир деб тегирмончининг эски ошнаси Кўзибойни раис билан гаплашгани юборганида, Эшбоевнинг ранги ўчиб кетибди. “Нафсингни катта қўйсанг, тўйганингни билмайса-да. Нимангга етмаяпти ўзи?” деб Кўзивойни анча сиқувга олибди. Кўзибой дегич ҳам тап тортмабди: “Раис бова, эмасам узумди биз бопидан эктиринг. Бунингиз олчадай тирсиллаб тургани билан мийиз қилиб бўлмаса, ширасининг ҳам мазаси йўқ. Ҳеч нарсага ярамайди!..”

Шунда Эшбоевнинг жаҳли чиқиб кетибди.

“Бу узумларнинг навини Грузиядан опкелтирганман. Грузиядан! Бундан зўр вино ишлаб чиқарса бўлади. План тўлганидан кейин ортган узумлар ириб-чириб ётмасин, силар ҳам бир ўзларингни синаб кўринглар. Бу ёгини сўрасанг, грузинлар вино ишлаб чиқариб бойиб кетган халқ! Ўзларинг дангасасилар, Кўзибой, дангаса!..”

Кўзибой ўша куни ўзини илҳақ кутиб турганларга Эшбоевнинг бу сўзларини айтмади. Ичидаги олиб қолди. Биринчи бўлиб ўзи мусаллас тайёрлаб, татиб кўриш истаги юрагига кутқу солаётганди.

Яширинча тайёрланган мусалласни бир ҳафта давомида ўзи ичиб юрди. Кейин нимагадир зерикди. Бирорга сотиш эсига келмади. Ёлғиз ичиш бўлмас экан, деган фикрга келиб невараларидан бирорини юбориб Довул тегирмончини чақиртирди. Тегирмончи мусалласдан бехабар, иши тифизлигини баҳона қилиб бормади. Кўзибой неварасини бошқа бир ошнасиникига ғизиллатди.

Шундай қилиб, сир ошкор бўлди. Энди билганинг ҳам, билмаган ҳам мусаллас тайёрлаш билан андармон бўлиб қолганди. Энди одамлар кечкурунлари уч-тўртта бўлишиб бир ерда тўплани-

шар, мусаллас солинган идишнинг таги кўриниб қолгунча ичишар, кейин... кейин эса... чексиз баҳтиёр кимсалардек ширақайф қўзлари сузилганча... қартабозлик қилишарди. Ютқизган бир шиша вино опкелади.

Қартабозлик қизигани сайин ҳангома ҳам авж оларди: кимнинг виноси зўрлиги-ю кимникига сув аралашгани, кимнинг томорқасидаги картошка қанча ҳосил бергани-ю, кимнинг картошкасига қурт тушгани ва яна... яна кимнинг қизини оёқ олиши чатоқ экани-ю, кимнинг хотини нимага жерик бўлганлиги ҳақида соатлаб оғиз кўпиртиришарди. Баъзида ҳангома тортишувга айланар, тортишув авжига чиқиб жанжал-тўполон бўлиб кетарди.

Фақат Довул тегирмончи бундай давралардан ўзини четга олиб юрарди. Иштиёқ йўқлигидан эмас, асло. Тегирмондан айрилиб қолишдан чўчирди. Ичиб-нетиб юргани Эшбоевнинг қулогига етса кўнгли қолади. Жаҳли чиқса... ким билади, Эшбоевга тегирмончи қаҳатми? Нон бўлса нонхўрак топилади.

Довул тегирмончи аллақандай шовқин-суронни эшлиб, хушёр тортди. Қараса, қишлоқ дўкончаси олдида турибди. Хаёли қочганлигини пайқади. Шовқин-сурон сабабини ҳам англади. Дўконга ун келган экан!

Яқингача дўкондаги унни қимматсиниб, қоп орқалаб тегирмонга зир қатнаган одамлар энди бир қоп ун учун дунёни бошларига кўтаришарди. “Тўрт кило ун нима бўлади? Касалманд энамнинг овқатига ҳам етмайди-ку!..” деганга ўхшаш жириллашлар анча ергача тегирмончининг қулогига эшитилиб турди.

Довул тегирмончи ичида жиртак чалди. Шунинг баробарида хаёлига ярқ этиб бир фикр келди.

“Турсунбой муаллимга айтиб Эшбоевнинг устидан ўхшатиб жалоба ёздирысаммикан? Тангирни ишга олмаса устолига тўқ этказиб қўяман шуни!..”

Фикри ўзига жўяли туюлди.

Йўлни қияликдаги Турсунбой муаллимнинг уйи томон бурди.

Турсунбой муаллим уйда ухлаб ётган экан.

Хотини: “Дийирмончи акам келди, туринг”, деб қанча турткиласа ҳам уйғонмади. Ёнида думалаб ётган мусаллас юқи банкани кўрган тегирмончи сирғалиб уйдан чиқди.

* * *

Кунлар ўта бошлади.

Тегирмончи: “Бир ҳафтадан кейин Эшбоевнинг идорасига борасан”, дея ўғлига тайинлаб қўйганди.

Аммо Тангриберди идорага боришни хаёлига ҳам келтирмади. Бўш қолди дегунча аллақаердан топиб келган шахмат тахтаси устига мук тушарди. Соатлаб шахмат доналарига тикилиб ўтиради. “Қилт” этмасди. Бир ўзи ҳам “оқ”лар тарафда, ҳам “қора”лар томонда туриб ўйнарди. Одати бўйича жуда секин ҳаракат қиларди. Аҳён-аҳёнда от ёки филни суриб қўйиб яна “қилт” этмай ҳаракатсиз қотарди. Ташқи дунёни буткул унutarди гўё. Егулик келтирган онаси Бувзилол байча ҳайрон бўла-бўла чиқиб кетарди. Тирикчилик ташвиши, ўйин-кулги йигитни қизиқтирмасди. Гўё ҳамма орзу-ҳаваслари йитиб битган-у, олдидаги шахмат тахтасидан бўлак ҳеч нарсаси қолмагандай. Авваллари писанд қилмаган бўлса-да, ҳарбийдан келганидан буён ҳаворанг футболкасини кийиб мускуллари тирсиллаб юрган йигитни кўрган қизлар

бу гал ўзлари кўз сузаётган бўлсалар-да, Тангрибердининг хаёлини чалғита олмасдилар.

Тангриберди учун оқ-қора катакларда дунё бор бўй-басти билан намоён бўлар, ғам-ташвиш, кувонч-шодлик, ҳаяжону эҳтирос – ҳамма-ҳаммаси айни ўша олтмиш тўрт катакка жо бўлгандек гўё. Теварагини қуршаган борлиқнинг золимона бир хиллиги, зерикарли оҳангги бадига ургандек, барча-барчасига қўл силтаганди.

Фақат... Толиқдан кезлари шахмат тахтасини қўлтиғига қисиб аста уйдан сирғалиб чиқиб, Шовқи муаллимникига йўл оларди.

Ҳарбийдан келганидан кейин биринчи марта йўқлаб борганида муаллим хурсанд бўлиб кетганди. Қайта-қайта қучоқлашиб кўришиб, тўрга ўтқазаркан муаллим хижолатли кулимсираб “чой”га чақира олмагани учун узр сўради. Ва хотини ёзган ғарибона дастурхон устига ўғли келтирган сопол идишдаги мусалласни қўяркан:

– Бугун бир отамлашайлик, – деганди.

Кейин муаллимлиги эсига тушибми, бир оз қизаринқираган ҳолда:

– Бизда ҳозир шунаقا... – деб қўйди.

Ўртага ўнғайсиз сукунат тушди...

Сукунатни Тангрибердининг овози бузди:

– Келинг, шуни ҳангомага қўшмайлик, Шовқи ака, – деди у ва сопол идишни четга олиб қўйди.

Шундан кейингина ўртадаги ўнғайсизлик кўтарилиб, гап-гапга қовушди.

Лекин “сопол идиш” муаллимнинг эсидан чиқмаган экан. Кетиш тадоригига тушган Тангрибердига истиҳолали назар ташларкан:

– Ановини бекор олиб қўйдинг. Отанг эшилса хафа бўлади. Улимни одам ўрнида кўрмабсан деб!.. – деди.

– Парво қилманг, жуда бўлмаса, отамга Шовқи аканикида ичабериб, бўкиб қопман, дейман, – деди Тангриберди қулиб.

Шундан кейин улар тез-тез учрашиб турдилар. Суҳбатлари асосан ҳарбийлик даври ва шахматга оид янгиликлар ҳақида бўларди. Фақат бир марта ҳангома сал бошқача тус олди. Кўзлари киртайиб, ранги кетиброқ қолган йигит одатдагидан фарқли равишда, анча вақт ерга қараб ўтириб-ўтириб, охири ийманиб кўйлагининг кўкрак чўнтағига қўл солиб, у ердан қандайдир сурат олиб муаллимга кўрсатаркан:

– Музайяна деган қиз... – деди пи chirлагudек бўлиб.

Кейин муаллимнинг юзига зимдан назар ташларкан изоҳ берди:

– Алмаз аканинг қизи. Тренерим у киши. Отамнинг олдига келиб ўзи рухсат сўрамоқчи эди. Мен кўнмадим. Қайтиб келаман дегандим...

Муаллим киртайган кўзлар тубига чўккан мунг соғинч эканини пайқаган. Лекин бирор йўриқ беришга истихола этган. Эҳтимолки, Довул тегирмончининг ғазабидан кўрқсан...

Орадан икки кун ўтгач қишлоқда Довул тегирмончининг ўғли қочиб кетибди, деган миш-миш тарқалди. Кечга бориб миш-миш бошқача тус олди, эмишки Довул тегирмончининг ўғли узоққа кета олмабди. Поездга билет олиш учун навбатда турганида отаси билан яна бирор бориб тутиб олишибди. Довул тегирмончининг жаҳли чиқиб ўғлини ертўлага қамаб қўйибди.

Бу гапларни ҳаммадан кейин эшитган Шовқи муаллим юраги така-пука бўлиб, хабар олгани борганида... Тангриберди чиндан ҳам ертўлада эди!..

Муаллимнинг барча уринишлари зое кетди.

Довул тегирмончига гап уқтириб бўлмади.

– Менинг оғзим бадрапдан ҳам баттар. Аби-йирингизни борида жўнаб қолинг! – дерди тегирмончи ғазабдан қалт-қалт титраганча. – Сизди шаропатингизминан улимдан айрилиб қолишимга сал қолди-ку! Яна ҳовлимга изингизни боссангиз... қарғайман. Ўнгмайдиган қилиб қарғайман!..

* * *

Довул тегирмончи бир вақтлар, қарчиғайдек йигитлик даврида уйланмасдан олдин бир уй, бир даҳлиз солган эди. Ошхона ва яна бошқа бало-баттарлар ҳали йўқ эди унда. Даҳлиз ошхона вазифасини ўтарди. Эрта-индин келин келаман деб турибди-ю, тегирмончи (ўшанда ҳам тегирмончи эди) даҳлиз остидан ертўла қазиган. Ният шундай эди: “Тангрим мениям ватанини қилса энг аввал ертўла қазийман. Ичини дондунга, ёғ-мойга тўлдираман. Қачонки, бир кун келиб уруш ё очарчилик бошлангудек бўлса, ҳеч қачон оч қолмайман!..” дея ният қилганди... кимсасиз даштда, туяқорин панасида инига кириб кетган каламушнинг қайтиб чиқишини пойлаб ўтирганида!..

Эҳ-ҳе, у пайтлар уруш даври эди.

Отаси беш ака-ука эдилар. Бешови ҳам урушдан қайтмади. Кетиш олдидан отаси кичкина Довулбекни қучоқлаб хайрлашаркан: “Армияга кетяпман, улим. Тезда қайтаман”, деганди. Лекин отаси ваъдасини бажармади, армиядан қайтмади...

Онаси, акаси, иккита синглиси очлиқдан шишиб ўлди. Довулбек уларнинг қаторига кириб қолмаслик учун қўлига нима илинса оғзига тикди. Бир гал даштда изғиб юриб қилтириқкина

каламушни кўриб қолиб, роса қувлаб ета олмаган, каламуш қандайдир тешикка кириб кўздан ғойиб бўлганди. Шунда кичкина Довулбек тяяқорин панасига ўтиб икки кун каламушнинг инидан чиқишини пойлаган, кутган, оғзининг сўлаги оқиб-оқиб кутган. Каламуш қайтиб чиқмаган. Шунда... қорни оч, силласи қуриб бораётган Довулбек бир этак тош териб олиб, уларни биттабитталаб ғажий бошлаган.

Тошни еб бўлмаслигини била туриб... иштаҳа билан тош ғажирди!

Ковурғаларига ёпишиб, бор-йўқлиги билинмай кетган ошқозонини сўлак билан алдамоқчи бўларди: ана!.. ана, овқат!.. Ҳозир... Мана ҳозир!.. Сўлак билан қовзанган ошқозон зум ўтмасдан яна буралиб оғрирди. Болакай қўллари қалтираганча тағин тош ғажишга тушарди...

Бу ҳол тош бехосдан қаттиқ тегиб, озиқ тишлиридан бири ярмидан синиб тушганидан кейингина барҳам топди. Аммо орадан йиллар ўтган бўлса-да, тегирмончи ҳали ҳамон тушларида тош ғажийди. Тонг саҳардами ё ярим кечасими чўчиб уйғониб кетади. Қалт-қалт қилаётган вужуди ўзига келгач англайдики, уйқусини бузган нарса, ғажиган тошларининг ғижирлаши эмас, синган озиқ тишининг лўқиллиб оғриши экан. Синиб, яримта бўлиб қолган, бунинг устига кўкариб кетган тишининг “умри” узун чоғи, бошқа, қилт этмаган тишлари тўкилиб боряпти-ю синиқ тишқимир этмайди.

Уйланмасдан олдин ертўла қуришининг сабаби шу эди. Оч қолмаслик! Тегирмончига умр бўйи кўлтиқтаёқ бўлган шиори шу эди.

Унинг миясида очлик йилларидан қолган “ғовак” ҳеч қачон тўлмасди.

Яна қачондир очарчилик бўлади-ю... Яна қачондир...

Бу сафар ҳаёт тегирмончини доғда қолдира олмайди. У аллақачон келажак тадоригини кўриб қўйган. Ертўлада темир бочкаларда камида икки йилга етадиган буғдой, бидонларда эритилган ёғ-мой ғамланган. Рўзғорда ёғ тугаб қолса иккичун кунлаб овқат қилинмаса қилинмайдики, ертўладаги ёғга ҳеч ким тегинмайди. Бир маҳаллар эмизикли Бувзилол байча ертўлага тушиб бидондан ёғ олганини билиб қолган тегирмончи кетмондаста билан уриб аёлини беланги қилиб қўйишга сал қолганди. Шу-шу, Бувзилол байча ертўлага яқин йўламайдиган бўлди.

Довул тегирмончи борлиқ тинчиб, одам оёғи тийилгач мойчироқни ёқиб ертўлага тушади. Йиғнаган “хазина”ларини бирма бир кўздан кечиради. Буғдойга каламуш тегмадими? Ёғ бидон очилмадими? Ертўланинг бир бурчида, буғдой бочканинг орқасидан қўл узатса етадиган бир ёриқ бор. Тегирмончи орттирган тўрт-беш сўмини тамаки дони солинган рўмолчага тугиб, устидан селофанга ўраб ип билан чирмаб, кейин ўша ёриққа тиқишириб қўярди. Тутаб ёнаётган мойчироқ ёруғида эринмасдан пулларини санаради. Чолворининг липпасига ва ундан ҳам ичкарироқ ерга яширган пулларини олиб, рўмолчадагисига қўшиб бир бошидан қайта хисоблайди. Кейин муштдайгина бўлиб қолган тугунни яна аввалги жойига тиқиб қўяди...

Ертўлада заҳ, моғор ва яна қандайдир ёқимсиз уфунат уфуриб турарди. Кичикроқ темир эшиги зичлаб ёпилса ичкарига бир тутам нур ҳам тушмасди.

Калтак зарбидан аъзойи-бадани моматалоқ бўлиб кетган Тенгриберди шу ертўлада икки кун

қимир этмай ҳушли-хүшсиз ётди. Қолаверса, бу ерда ўрнидан туришга ҳожат ҳам йўқ. Барибир ҳеч нарсани кўриб бўлмайди. Эшик шундай зич-лаб ёпилгандики, бир тутам ёруғлик тушмасди. Тундай зим-зиё қоронғулик ютаман дейди... “Ўлсам ўларман, лекин аҳдимдан қайтмайман! – дерди у ўзига ўзи ҳушига келган пайтлари. – Ертўлада ириб-чириб кетсам ҳам отамга ялин-майман!..”

Бироқ учинчи кунга бориб ўрнидан турмасликнинг иложи бўлмади. Ошқозони бураб оғрий бошлади. Бу камлик қилгандай, ўнг томонда қовурғасининг остида санчиқ пайдо бўлганди. Бир... икки... учига чидади йигит. Лекин кейинги кучли оғриқдан ларзага тушган йигит инқиллаб ўрнидан турди. Турди-ю ўша заҳоти кўнгли озиб ўхшиб юборди. Шу пайт ташқаридан Бувзилол байчанинг овози келди.

– Тангиржон... болам...

Тангриберди кафти билан оғзини тўсди. Оҳвоҳини онаси эшитишини истамади.

– Калит отангда, бермаяпти ҳеч. Ҳеч еринг оғримаяптими, болам?.. Қулфни бузай десам кучим етмаяпти...

Тангриберди дош бера олмади. Кўнгли озиб, қаттиқ ўхшиб юборди. Кейин мадорсизликдан йиқилгудек бир алфозда эшик олдига келди.

– Оғримаяпти... энажон, оғримаяпти... – деди ихраниб зўрға. Жарангдор овози лат егандек бўғиқ ва жуда паст чиқди.

– Қорнинг очмадими, болам-а?.. Икки кундан бери... ошқуяринг оғримаяптими?..

– Қорним очгани йўқ... Хавотир олаверманг... – деди Тангриберди хирқираб. Ва оғзини қаттиқ юмди.

Она изиллаб йиғлаганча нари кетди-ёв, шипшип этган қадам товуши эшитилди.

Оғриқ кучайиб кетди.

Аъзойи-бадани қалтираб, тишлари такиллаёт-ган Тангриберди ғужанак бўлиб ётиб қолди. Совуқ тер босган баданига кийимлари чиппа ёпишди. Азобга чидай олмади у. Бақириб юборди: “Эй, Худо, жонимни ол!.. Бундан кўра ўлиб кетганим яхши...”

Афсуски, оҳ-воҳ, ғужанак бўлиб у ёқдан бу ёққа ағанашлар ёрдам бермади. Оғриқ кучайгандан кучаяверди. Ҳушидан кетди. Туман ичида қолган шуурида: “Ўляпман...” деган ожизона фикр “йилт” этди-ю сўнди.

Аслида ақл-идрокнинг ҳаётга ишқи сўнган, ўрнини ўлим ихтиёрига топшириб қўйган бўлсада, энди вужуд ва томирларда оқаётган қон ўлим билан олишиб, унга қаршилик кўрсата бошлага-нини йигит сезмасди...

Тўртинчи куни пешин чоғи ертўлани бирдан ёқимли ва қадрдон ҳид тутиб кетди. Бу нон ҳиди эди.

“Онам нон ёпяпти”, – деб ўйлади сулайиб ётган йигит. Кейин инграниб, инқиллаб ўрнидан турди. Гандираклай-гандираклай, тусмоллаб эшикни топди. Оёқда туришга ҳоли келмади, чўккалаб қолди. Темир эшикка суюнаркан, беихтиёр... оғзини очди...

Кейин нима деди? Жазавага тушиб нималар деб бақирди, Тангриберди эслашга-да уялади...

Шу куни кечкурун Тангриберди озод қилинди.

Унинг афтига қараб бўлмасди. Кийимларидан моғор ҳиди анқирди.

Дарвоқе, нон ҳиди...

Янги ёпилган бир жуфт нонни Довул тегирмончи ертўла эшиги ёнига қўйиб кетганди...

Тўй ўтди.

Келин ўзларидан, Довул тегирмончининг хешларидан бирининг қизи. Юмалоқ юз, икки яноғи туртиб чиққан, дурқунгина келинчак дастлабки кунларданоқ қайнона-қайнотасига ёқиб қолди.

Тўйдан кейин Довул тегирмончи ўғлини Эшбоевнинг идорасига бошлаб борган эди. Келишувга биноан раис унга идорадан иш берди. Ҳисоб-китобга усталиги туфайли бўлим буғалтерларининг бирига ёрдамчи этиб тайинлади.

Эшбоев: “Хозирча шу ишда айланишиб турсинчи, кейин яна ўйлаб кўрармиз”, деб қўйди.

Бу мурувватдан тегирмончининг боши осмонга етди. Раис билан ўз-ўзидан, сабабсиз совуклашган муносабатлари яна ўз-ўзидан илиқлаша бошлаганидан хурсанд бўлиб кетди.

Ер чизиб ўтирган ўғлининг ёноқлари пир-пир учайданлигини сезмади...

Кейинчалик сўраб-суриштириб ўғлининг маоши қанча эканлигини билиб олди. Ундан олдин Тангриберди айтганида ишонмаганди.

У ўғлининг ёнида ортиқча пул бўлишини истамасди. Маошини тийин-тийинигача ҳисоблаб оларди. Токи, ўғлининг чўнтагида шамол ўйнаб турса у ҳеч қаерга кета олмайди!..

Шу йили куз беайла серёғин келди.

Кун аро ёмғир томчилайди.

Узум чириб кетишидан ваҳимага тушган Эшбоев ҳар куни идора ходимларини ғазаблайди. “Одамларни ишлатишни билмайсанлар! Халқни тепасида туриб ишлатиш ўрнига идорада тухум босиб ўтирибсанлар!.. Давронқул, буғалтирман деб керилиб идорада ўтирганингни кўрмайин. Ўлсанг, жасадинг даштда қолсин!”

Кун бўйи далада изғиган ходимлар миқ этмайди. “Миқ” этиш ниятлари ҳам йўқ.

Ҳар куни кечқурун раиснинг сўкишлари билан бошланиб, ярим кечаси яна раиснинг болохонадор сўкишлари билан тугайдиган бундай мажлислар ходимларнинг жонига тегиб кетганлиги уларнинг лоқайд ўтиришларидан сезилиб турарди.

Тангриберди Эшбоевнинг сўконғич эканлигини идорага ишга ўтганидан кейин билди. “Унинг оғзи бадрапхонадан ҳам сассиқ экан-ку! – дея ҳайратга тушарди Тангриберди. – Бор ахлатини ходимларининг бошига тўкиб, халқقا саҳийсўз бўлгани қизиқ!..”

Шундай кунларнинг бирида Тангрибердининг номига қайсиdir ҳарбий қисмдан мактуб келди. Унда нималар ёзилгани номаълум, хатни ўқиб бўла солиб йиртиб ташлади, лекин ўша кундан эътиборан юзи докадек оқариб юрди. Шахмат ўйнашни ҳам йифиштириди. Ҳатто шахмат тахтасини бекитиб қўйди. Ўйин хумори тутмаслиги учун раиснинг топшириғини ўзига ўзи рўкач қилиб, эртадан кечгача далада, узумзорда изғиб юрди. Кўнглидаги иштиёқни ўлдиromoқчи, шу йўл билан ҳамма, ҳаммасига барҳам бермоқчи эди. Ўзини хиёнаткор санаарди. Юзига қора суртгандек ўзидан нафратланарди. Орзуумидлари, иззат-нафси, қалб тўрида асрраган эзгу ҳислари топталди, энди уларни ўлдириш қолди. Шундай ўлдириш керакки, улар ҳеч қачон қайта бош кўтармасин, ҳайвонга айланган эгасини қайта безовта қилмасин!..

Озиб кетди йигит. Қорайди. Нигоҳларидаги маҳзунлик йўқолиб, кўзлари бефарқ бокди... Бир ҳафтанинг нари-берисида у ўзини ҳаддан ташқари толиқтириди. У ҳеч қачон ўзини бунчалик

хўрламаганди. Аёлига қарашга-да ўзида рағбат сезмасди. Тунлари тескари ўтирилиб ўзини ухлаганга солиб ётар, хотинининг бир маромда нафас ола бошлаганини ҳис этгач аста тўшакдан туриб, ташқарига йўналарди. Ой шуъласидан ёришган ҳовлида қўлларини кўксидা чалиштирганча айланаб юрарди. Ҳеч нарсани ўйламасликка интиларди. Ҳовлида шарпадек изғиб юришидан мақсад ўзини янада толиқтириш эди. Толиқса, ҳолдан тойса тош қотиб ухлайди. Айланиб юриш асносида оёқлари толиққанини ҳис этар, лекин кўзларига уйқу келмасди.

Борлиқ осмон чироқлари ёғдусидан ёришган, тун зулмати қочиб йигит қалбидан паноҳ топганди.

Зулматнинг кўнглига ингани ёмон...

Тоғдай йигит кўнглига инган зулматни даф этолмай ҳалак эди...

Бедор йигит чорбоғ этагидаги тепалик устига чиқиб, тиззаларини қучоқлаб ўтирган кўйи дўнгликлар оралаб келган, айни чоғда тун ёғдусида оқариб турган илонизи йўлга унсиз тикиларди. Кейин чуқур хўрсиниб қўяркан: “Яхшиям осмон битта...” деб пицирларди...

Кундузги югар-югарлардан толиқкан келинчак пишиллаб ухлаб ётар, эрининг тунги шарпадек бедор кезишларини сезмасди. Тонгга яқин намоз вақтидан ўтиб кетмадимикин, деган хавотир туйғусидан чўчиб уйғонар, шундагина эрининг ёнида эмаслигини билиб, мунғайиб қоларди.

Бир оқшом тескари қараб, ўзини ухлаганга солиб ётган эрининг елкасини силаркан, ботин-кирамасдан сўз қотди:

– Мендан кўнглингиз қолдими, нега терс қайрасиз?..

“Кўнглим бормиди ўзи?” дегиси келди йигитнинг. Шундан дейишта чоғланди ҳам...

Аммо...

Қапишиб ётган аёлнинг қорнида типирчилайди. Ётган гўдакнинг “тепкиси”дан йигит хушёр тортди.

– Сенга шундай туюлгандир-да...

Аёл жавобдан қониқмади. Бошқача... жудаям бошқача жавоб кутганди.

– Ота-энангизнинг ўтидан кириб, сувидан чиқсам... – иддао қилди аёл. – Қариндошларингизни бешикдаги боласигача сен демасам...

Йигитнинг гапиргиси келмади, энсаси қотди. Аммо барибир нимадир дейиш керак...

– Фазилатларинг учун яхши кўришни истамайман.

Аёлнинг уни ўчди.

* * *

Нонушта вақтида Тангрибердининг тумтайиб ерга қараб ўтирганини кўрган тегирмончи кампирига им қоқди. Демоқчи бўлдики, нима бало хотиниминан жиқиллашиб қолдима?

Она кимдандир, қаердандир ўғлига мактуб келганидан ғира-шира хабардор, юраги безовта, аммо эрига қараб: “Билмайман”, дегандай елка учирди.

Тегирмончи зимдан қараб, ўғлининг оғзини пойлади. Тангрибердидан ҳадеганда сас-садо чиқавермади. Тегирмончининг тоқати ток бўлди.

– Гўнгқарғага ўхшаб шуйтиб ўтирберасанмана?! – деб юборди охири.

– Ота! – илкис бош кўтарди Тангриберди. – Менга пул керак! Келаси ойнинг ўн еттинчисида шахмат бўйича мусобақа бошланаркан. Бораман-у

қайтаман, ишонинг, фақат шунинг учун бораман.
Турнир тугаши билан қайтаман. Сўз бераман!..

Тегирмончи ўғлининг сўзларини бўлмай охиригача эшитди. Сўнг кўзларини лўқ қилганча:

– Мен бир дийирмончи одам бўлсан. Ортиқча пул нима қилсин, – деди у.

– Топганимни олиб келяпман-ку, ахир!

– Топганингни берган бўлсанг бир ўзим еганим йўқ. Сенам бир рўзгорсан энди. Бола-чақангни боқиб ётибман-ку!

Тангрибердининг юзи аламдан бужмайиб кетди.

Довул тегирмончи хотиржамлик билан чой хўплади. У ўғли томонга қарамасликка уринарди.

– Бораман, барибир бораман! – деб бақириб юборди Тангриберди жазавага тушиб. – Пул бермасангиз берманг, ўзим топаман! Лекин билиб кўйинг, энди бутунлай кетаман!

Тегирмончи пиёлада қолган чойни ўғлининг юзига сепиб юборди. Кейин иргиб ўрнидан туриб Тангрибердининг устига бостириб келиб, хўл бўлган соchlаридан тортиб уни ўзига қаратаркан:

– Қани, кетиб кўр-чи, қарғайман, бола!.. – деди важоҳат билан. – Ўнгмайдиган қилиб қарғайман!..

– Бораман, барибир, бораман... – деди Тангриберди паст, аммо қатъиятли овозда.

– Ҳэ, энангди!..

Довул тегирмончи ўғлининг дуч келган ерига мушт тушира бошлади.

Бувзилол байча ҳай-ҳайлаб ўртага тушди. Йиғлади, бақирди, аммо ўғлини ажратиб ололмади.

Довул тегирмончи кутуриб кетганди.

Бор кучини сарфлаб бўлгандан кейингина те-

Гирмончи ҳолдан тойиб ўтириб қолди. Шундок-
кина ўғлининг ёнига...

Тангриберди бошини ҳимоя қилмоқчи бўл-
гандек қўллари билан калласини тўсиб олган, пиқ-
пиқ йиғларди...

Бир неча кун ўтди.

Довул тегирмончи раиснинг ҳузурига борди.
Уйида бўлган гап-сўзларни оқизмай-томизмай
Эшбоевга гапириб берди-да, охирида ўтинч билан
деди:

– Кўнглим сезиб турибди, улим олдингизга пул
сўраб келади. Битта илтимосим шу, райис бова,
улимга пул берманг, илтимос, уришинг, сўкинг,
ҳаққингиз бор. Керак бўлса бир-икки шапат
урсангиз ҳам майли, болани йўлдан қайтаринг!..

– Менинг олдимга келолмайди, – деди Эшбоев
ишонч билан. – Ботиниб келса, ўзим боплаймн,
сиз хавотир олманг, у ҳеч қаерга кетолмайди!
Истасам, биз истасак, қочиб борган еридан ҳам
қайтариб олиб келамиз!

Довул тегирмончи идорадан кўнгли хотиржам
бўлиб чиқди. Эшбоевга бўлган эътиқоди янада
ортди. Халқ дарди билан яшайдиган раисга ҳайкал
кўйиш керак, деган фикр хаёлини банд этганди.

Бироқ тегирмончининг хотиржамлиги узокқа
чўзилмади. Тун ярмида аллақандай шовир-шувур
кулоғига чалиниб, ҳовлига чиққан тегирмончи
ҳайратдан бир лаҳза қотиб қолди.

Ўтган йили фалон пулга сотиб олган тахталарни
Тангриберди билан яна бирор кўча эшик томон
ташиётган эди!

Шу орада Бувизилол байча чиқиб қолди-ю
шовқин-сурон кўтарилиди. Нотаниш киши кузовли
машинасига ўтириди-да, жўнаб қолди.

Довул тегирмончи ўғлини тутиб қолди, холос.

Тахтанинг ярми машинада кетди.

Тегирмончи шу куни сезди куч-кувватдан қолганини, чунки ўғли юлқиниб чангалидан чиқиб чорбоғ томон қочиб кетганди.

– Қайт! Орқангга қайт, бола! – деб ҳайқирди тегирмончи. Ҳайқириғи тун зулматини ёриб ўтиб тепаликлар ортида акс-садо берди.

Тангриберди ортига қайрилиб ҳам қарамади.

Қаҳр-ғазабдан дир-дир титраётган тегирмончи қўлларини тепага кўтариб, кафтларини очди:

– Қарғайман, бола! Ўнгмайдиган...

Бувзилол байча ўзини эрининг оёқлари остига ташлади.

– Жон отаси, боламни ерпарчин қилманг... жон отаси, мени уринг... мени тепинг... аламингиз босилади! Боламни қарғаманг, жон отаси...

Тегирмончининг кўзлари ғилтиллади.

Кўкка чўзилган қўллари бўшаши...

Оёқларидан мадор кетиб ерга чўк тушди.

Кўз олдидан ўғлининг чақчайган кўзлари нари кетмасди.

Бу кўзлар бир вақтлар юм-юм кўз ёш тўқадиган кўзларга сира-сира ўхшамасди.

Довул тегирмончининг дуоибадга очилган қўллари бошини чангаллади...

Тангриберди тунни тепалик ортида ўтказди. Унинг юзи, бўйни, билаклари тирналган, қон сизган, эгнидаги қўйлагининг тутмалари узилган, соchlари тўзғиб, “сават” бўлиб қолганди. Жон асари тарк этаётгандек аъзойи-бадани бўшашиб, ҳолсизланиб борарди.

Аммо... орзуси ҳали ҳам сўнмаган, кўнгил кирғоғида илиниб туар, “ана кетдим-мана кетдим” дегандай. Лекин буткул тушиб кетишга ожизлик қилар, чунки... илдизи бақувват эди!..

Тонг отиши билан у хўжалик идорасига борди.
Эшбоев энди келиб турган экан.

– Намунча, ғарға оғзига ... олмасдан келиб турибсан? Тинчликми? – Эшбоев Тангрибердининг шилингтан, гезарган юзидан “тинчлик” эмаслигини пайқаган бўлса-да, атай шундай деди.

– Менга бир оз пул керак, ака. Илтимос, йўқ деманг!..

– Пул керак бўлса отангдан сўрамадингми? – Эшбоев курсисига ястаниб ўтириб, йигитга бошдан-оёқ разм солиб чиқди.

– Отам... – деди-ю Тангриберди гапиролмай қолди. Шу пайтда ҳам кўнгил бўшайдими?

Раис ундан кўз узмай турарди.

Тангриберди ич-ичидан қўтарилаётган ғалаённи куч билан босди. Кейин раиснинг кўзларига тик қараб деди:

– Отамда пул йўқ экан. Илтимос, раис ака!..
Кўрқманг, еб кетмайман...

– Энди, ука, бизнинг номимиз улуг, раис деган отимиз бор, лекин пул масаласида эл қаторимиз, – деди Эшбоев зорлангандай бўлиб. – Раисда пул тиқилиб ётиби деб ўйлайсан-да ҳамманг!.. Аслида аввалги раиснинг шилтасидан ҳамон чиқолмай ётганимни ҳеч ким билмайди. Хўжаликни ўтқазиб қўйган экан, номард!

– Бу гапларни отамга айтсангиз ишонарди, – дея пичинг қилди Тангриберди.

– Ишонмасанг ўзинг биласан!..

– Пул бермайсизми?.. – Тангрибердининг кўзлари чақчайди. – Бермайсизми?..

– Бермайман десам урасанми?!

– Йўқ, урмайман, – Тангриберди хотиржам сўзлашга уринса-да овози, нафақат овози, балки бутун вужуди титрай бошлади. Қарашлари ҳам

ғалати эди. – Лекин!.. Ер сотганингизни, йўллар тўлиқ асфальтланди, деб бир миллион сўмлик акт тузиб, пулни уч-тўрт киши бўлишиб олган-ларингизни ёзиб райкомга, керак бўлса обкомга бораман. Фермадаги қўйларни сел оқизиб кетди деб акт туздирганингизни ҳам биламан. Ўн беш йилдан буён хўжаликни еб ётибсиз-ку, сизда пул бўлмайдими?!

– Хов бола, ўйлаб гапир!.. Тилим бор деб...

– Мана, манави қоғозда, – Тангриберди қўйлагининг кўкрак чўнтағидан тўрт буклоғлик қоғоз олиб, ҳавода силкитди, – барча кирдикорларингиз ёзилган. Ипидан игнасиғача! Мен бир йилдан буён идорада бекор юрганим йўқ!..

Эшбоев бақа бўлиб қолди.

Аммо тезда ўзини ўнглаб олди.

– Э, билганингни қилмайсанми! Менга деса райкомдан ҳам каттасига бор!

– Мана шу гапингизниям ёзиб қўяман. Қўрқмайсизми, ахир?!

– Нега қўрқаман, ҳақ бўлгандан кейин. Опке, ёзганингга қўл қўйиб бераман!

Кутилмаганда Тангриберди ҳиринглаб кулди.

– Аҳмоғингиз йўқ, – деди ортига тисланаркан. – Сиз билан энди тегишли жойда гаплашамиз!

Эшик тарақлаб ёпилди.

“Ана энди, Эшбоев оёғи куйган товуқдек типирчилаб қолади! – дея ичида тантана қилди йигит.

– Типирчиламай кўрсин-чи, ур-руғини қуритаман ҳали!..”

Тангриберди хўжалик идорасидан узоклашгани сайин тез-тез ўгирилиб ортига қараб қўярди. Ўйлардики, типирчилаб қолган раис орқасидан югурдакларини югутиради. Шунда... Шунда... Ана шунда!..

Тангриберди уйига яқын келди ҳамки, идора томондан бирорнинг қораси күринмади.

Кўча сокин, кимсасиз эди.

Хўжалик идораси ҳеч нарса бўлмагандек қўқ-қайиб турарди.

Йигитнинг асаблари заифлашди. Юзидаги шодиёна ифода йўқолди. Ҳалигина ғалаба наъшасини тантана қилаётган юраги ториқа бошлади. Бирдан унинг миясига: “Нега Эшбоевга ёпишиб қолдим? – деган фикр ярқ этиб урилди. – Бирорга ўтқазиб қўйган жойим борми? Бирор-да, чўнтағи тўла пул бўлсаям истаса беради, истамаса йўқ!” Ўзига ўзи шундай дейиши билан Тангрибердининг туйқусдан жазаваси қўзиб кетди. Ўзини босолмай қолди. “Эшбоевни ер билан яксон қилишим керак!” Ушбу таҳдидона фикр йигитга фавқулодда куч-куват бағишилади. Орзулардан озурда бўлган юраги ғазаб ва нафрат иссанжасида дир-дир титраса-да... ғайри-шуурий равишда руҳан енгил тортган эди. Афсуски, бу кайфиятнинг умри узоқقا чўзилмади. Қия очиқ эшиқдан уйга кириши билан хотинига кўзи тушиб асаби бузилди. Барча кўргилигу-шўришларига хотини айбордек кўзига бало-қазодек кўринди. Шунда ҳам ўзини босишга уринди. Эшбоевнинг “урруғини қуритиш” фикридан ҳали ҳам қайтмаган эди. Шунинг учун хаёлини чалғитмасликка тиришди. Қоронғу хонага кириб олиб, Эшбоевнинг устидан ўхшатиб ёзмоқчи, шу йўл билан юрагидаги заҳар-закқумларни мадда боғламасдан чиқариб ташламоқчи эди. Раисга дағдаға билан кўрсатган қоғозда аслида ҳеч вақо ёзилмаганди. “Мана энди кўради мендан!..” Тангриберди қоғозга алланималарни ёзишга киришди. Аммо ҳадеганда фикрини жамлай олмади.

Чунки хотини у ёқ-бу ёқса ўтиш баҳонасида эрининг елкаси оша кўз ташлаб “пойлоқчилик” қилаётганди. Тангриберди буни сезиб қолди.

– Нимага бунча атрофимда хира пашшадек ўралашасан?! – деб бақирди у, аъзойи-бадани яна дир-дир титрашга тушди. – Бор, йўқол, кўзимга кўринма!

Келин тахта бўлиб қолди.

– Эй, йўқол дегандан кейин йўқолмайсанми! Ҳайдаб чиқармагунимча тураверасанми қаққа-йиб!..

Доғ босган олма ёноклар аввал қизарди, кейин оқариб кетди. Сўнг ҳўнграб йиғлаганча ғоз юриш қилиб қайнонасининг уйига қараб кетди.

Бу ёғи энди маълум...

Келин ҳиққиллаб йиғлайди аввал...

Юраги ёрилган қайнона шошиб қолади. Нима бўлди ўзи, деган зардали сўров базур оғзига келади.

Келин пиқ-пиқ йиғлайди.

Йиғлаб туриб сўзланади, айтадики, ўлар бўлсам ўлиб бўлдим, жонимга тегиб кетди, мени ким деб ўйлаяпти улингиз, ҳайдаб чиқармасам кетмайсанма, деб бақиради?! Мен ўз оёғим билан келмаганман йўлдан қўшилиб, иззатимни қилиб олиб келибмидингизлар, энди беиззат бўп қолдимма? Бирорга хат ёзаётганини кўриб қолганимдан қўрқиб кетди, қўрқоқ!..

Бошига гурзи тушгандек довдираб қолган она (қайнона бўлиш ҳам осонмас) бу вақтга келиб хушини йиғиб олади, қарши хужумга ўтади, айтадики, ҳа, эси йўқ хотин! Эринг кет деса кетаберасанма? Қачондан бери у хотин ҳайдайдиган бўлиб қопти? Бу уйдинг катталари ўлганма? Қайната-қайнинна пишагингни пишт демаса, эринг

аччуви чиқиб турганда айтса-айтиби-да. Кундуз урушса, оқшом суяди, эр-хотинчилик шу-да!

Келиннинг қарашларида зигирдек иддаоми, саркашликим бордай, аммо уялганидан қайта оғзини очмайди. Лаблари қимтилганча ҳовлига чиқади, тенгсалиб, бир нимасини йўқотгандек гарангсиб у ёққа ўтади, бу ёққа ўтади, иш унмайди. Қайтиб ботинқирамасдан ўз уйига киради. Ўргамчикка ўхшаб ўз тўрига ўралиб олган анови “гўрсўхта” аёл томонга қараб ҳам қўймайди...

Келинга алам қилиб кетаверди... кетаверди...

Охири чидай олмади, апил-тапил кийимларини йиғиб тугунга тугди-да, индамай чиқиб кетди.

На бир товуш берди, на бир сўз деди.

Андак зарда билан ёпилган эшикдан “қарс” этган овоз чиқди холос.

Келиннинг кетиб қолганидан хабар топган ота-она кечга яқин Тангрибердини ўртага олишди. Бири бақириб, сўкиб, боши устида муштини дўлайтиrsa, иккинчиси йиғлаб-сиқтаб, эмраниб... йўлга солишди уни. Аммо меҳрибонларнинг бирори ҳам нима бўлди ўзи деб сўрашмасди.

Хуллас, хотинини олиб келиш учун Тангрибердининг ўзи борадиган бўлди.

* * *

Келин кутмаган экан.

Эшик олдида турган эрини кўриб кўзлари чақнаб кетди.

Кейин бирдан аразли экани эсига тушиб, дарров қовоғини солиб олди.

– Бўл, нарсаларингни йиғиштир, опкетгани келдим, – деди Тангриберди қуруқцина қилиб.

– Бормайман! – Келин терс бурилди.

– Нега?

— Айтайинма, айтсам айтайн, кўнглингиз бош-қада сизнинг! Ҳар дойим бирорни ўйлаб юрасиз!

— Осмондан олдингми бу гапни?..

— Осмондан олганим йўқ. Шовқи муаллимининг хотинидан эшитибидим!..

— Қачон?!.

— Тўйдан олдин!..

— Одамлар нималар демайди. Бир вақтлар ким-дир билиб-бilmай гапирган гапни байроқ қилиб кўтариб юриш шартми?

— Ўзингиз айтдингиз-ку!..

— Қачон айтдим? Нима дедим?..

— Айтдингиз... Ўзингиз айтдингиз... — Келин хиқиллаб йиғлашга тушди. Овози аянчли эди. Йиғлаганида, энтиkkанида атлас кўйлаги остида дўппайиб турган қорни кўтарилиб-тушарди.

— Бўлди, энди... — Тангрибердининг кўнгли бир хил бўлди. Шаштидан тушгани овозидан билинди.

— Бўла қол, уйдагилар кутиб қолиши.

Келин оёқ тиради.

— Аввал ваъда беринг, ҳеч кимни ўйламайман деб! Борларини ҳам кўнглимдан чиқариб ташладим денг!

Тангрибердининг эти сесканди. Жунжикаёт-гандек қунишиб олди.

Кўнглидаги сир-асорини билиб олмоқчилик синчиковлик билан тикилиб турган ёстиқдошидан нигоҳларини олиб қочаркан... ночорлик билан кулимсиради:

— Сен нима десанг шу...

Аёл-аёл-да... эрининг бир лаҳзалик сукутдан кейин янграган лутфидан хурсанд бўлиб кетди.

— Сиз бораберинг, мен пичак ёпиб, кейин бораман. Отам билан энам бир мазза қилиб ейди.

— Кеч бўлиб қолди-ку.

— Укам қўйиб келади.

Келин шошилганча ичкарига кириб кетди.

Ҳақиқий азоб кейин бошланди.

Қайнотасининг дарвозасидан беш-олти қадам узоқлашар-узоқлашмас Тангриберди ўзини уриб ташлагудек ёмон кўриб кетди.

Ўзини оғир тоғ кўчкиси остида қолгандек ҳис этди.

Юраги сим-сим оғриди.

Уйга боргиси келмади.

Кейинги кунларда тилга тушиб, анча танилиб қолган, пастак пештоқига “Ҳасан вино” деб тумтароқли ёзув осилган уй томон бурилди. Уйга яқинлашган сари ачиған-чириған мева-чеваларнинг қўланса ҳиди димоғига урилиб, афти бужмайған бўлса-да ортига қайтмади...

Йигит ҳамма-ҳаммасини унутишни истарди...

Алламаҳалда винофурушнинг хотини ҳайдаб соганидан кейин ўрнидан турган Тангриберди кайф зўридан бир неча марта йиқилиб тушди. Бир амаллаб ўрнидан туради, зум ўтмай яна йиқилади. Гандираклай-гандираклай кўчага чиқиб олди. Тунги саррин шабада мисдай қизиётган лоҳас вужудга хуш ёқиб, бир неча дақиқа йўл ўртасида туриб қолди. Оғзини катта-катта очиб кўксини тўлдириб нафас олди. Муздай ҳаво гумираётган юрагининг тафтини босгандай бўлди. Кейин уйини мўлжал олиб йўлга тушди. Ўзича нималардир деб ғудранар, йиқилиб-суринар, йўлнинг гоҳ у томонига гоҳ бу томонига ўтиб гандираклаб бораркан орқасидан изма-из келаётган иккита барзангидай йигитни пайқамасди.

Бир оз юргач сойлик бошланди.

Сойлик хилват эди.

Навбатдаги уй нариги тепалик бағрида эди.

Тангриберди сойликка энаётганда йигитлардан бири етиб келиб уни туртиб юборди. Зўр-базўр оёқда келаётган йигит “гуп” этиб йиқилди.

Сойлик қоронфутоб эди. Сарғимтири ойнинг сарғиши шуъласи бу ерни ғира-шира ёритарди.

– Кўзингга қараб юрсанг ўласанми! – Бирдан дағдаға қилди ўша йигит. – Нега туртасан мени?.. Сенга осилдимми?!

Тангриберди инқиллаб ўрнидан туаркан:

– М-мен т-ту-туртмадим. Ўз...зинг-ку... – дея гўлдиради.

– Ие, ҳам гарлик, ҳам пешгирилик де. Ҳов бола!.. Йигит Тангрибердининг ёқасидан олди: – Тухмат қилсанг каттароғидан қил, билдингми?!

– Ўзинг... – дейишга улгурди Тангриберди, барзанги асабийроқ эканми, уни ёқасидан тутиб, биринки сиқди-да кейин итариб юборди.

Тангриберди орқаси билан ерга ўтириб қолди.

Тангриберди сўкинганча ўрнидан турганида барзанги муштини ишга солди. Тангриберди чап бермоқчи бўлди, лекин эплай олмади, кайфининг зўридан боши ҳамон гаранг эди. Мушт Тангрибердининг қуи жағини шишириб юборди.

Жаҳли чиқиб кетган Тангриберди қаттиқ теккан зарбдан ва ғазабдан афти бужмайганча қарши ҳужумга ўтаркан, нега бу одам менга тўппа тўсиндан ташланиб қолди, деб таажжубланарди. Ғираширада у барзангининг кенг, япасқи юзи-ю қаҳр-ғазабдан ёниб турган кўзларинигина кўрарди. Бундай башарани у қишлоқ ичидаганидан уни таний олмади.

– Энангди!.. Пишагингни пишт демасам, нега мени итарасан?! – Тангриберди қорувли эди, йигитнинг елкасига, биқинига бир-икки мушт туширди. Барзангининг лаби ёрилди шекилли,

Тангрибердининг қўли шилимшиқ нарсага тегди. Бундан рухланиб кетиб муштига зўр берди у. Биқинига, кўкрагига тушаётган зарбалардан бадани зирқираб оғриётганини ҳис этса-да у бор кучини тўплаб уришарди.

Барзанги қалқиб кетиб, йиқилишига сал қолди. Шунда иккинчи барзанги шеригига ёрдамга келди. Тангрибердининг муштлари зарби заифлаша бошлиди. У иккала томондан тўхтовсиз урилаётган муштларга чап бера олмай қолди. Унинг биқинлари, бели, елкалари зирқираб оғрирди. Иккинчи барзангининг қақшатқич тепкисидан кейин боши худди қўрғошин қуйилгандай оғир бўлиб қолди. Ҳолдан тойган йигит йиқилиб қолганда ҳам барзангилар аяб ўтиришмади. Энди улар Тангрибердининг дуч келган ерига тепишарди.

– Теп! Теп! – дейишарди улар ҳансираф. – Ўнгмайдиган қилиб теп!

Не кўргулик юз бераётганига ақли бовар қилмаётган Тангриберди жон аччиғида бақира бошлаган эди, йигитлардан бири кафти билан оғзини тўсди-ю елкаси аралаш бўйнига зарб билан тепди. Иккинчиси мўлжаллаб туриб белига тепди...

Тангрибердининг кўзлари даҳшат ичра “ярқ” этиб очилди, гавдаси бир кўтарилиб тушди-ю юзтубан йиқилди...

Барзанги йигитлар шундан кейин баттар қутуриб кетишди.

Улар Тангрибердининг боши-кўзи демай тепаверишди, тепаверишди...

Касалхона.

Жой танқислиги сабаб олти кишилик палатанинг кираверишида, эшикка яқин ерга қўйилган каравотда Тангриберди юзтубан ётарди. Унинг умуртқа поғонаси уч еридан синган, синганда ҳам

унча-мунча эмас, суюклари майда-майды бўлиб кетганди. Тўрт ойдан буён жароҳати битмас, дўхтириларнинг ўзаро эътирофича, ҳали-вери битадиганга ўхшамасди. Бундан ташқари бош мияда ҳам андак ўзгариш юз берган чоғи, йигит тез-тез иситмаси кўтарилиб, ҳушдан кетиб қоларди. Ҳушига келгандан кейин ҳам кўз олди қоронғулашиб, қулоқлари шанғиллар, юзи докадек оқариб, оёқ-кўллари музлаб қоларди. Кўп терлаганидан кийимлари хўл бўлиб кетар, томир уриши сустлашиб, қисқа-қисқа нафас олиб ётарди.

Тўрт ойдан буён аҳвол шу...

Тўрт ойдан буён у тахтакаравотда ётарди...

Озиб, чўп бўлиб қолганди.

Тўрт ойдан буён ўғлининг ёнида ўтирган она ҳам адойи-тамом бўлганди. Қовоқлари чуқурлашиб, кўзлари ўйилган гўрдай бўлиб қолганди.

Ўғлини ҳар гал операция хонасига олиб кириб кетишаётганида: бу довургисига чидай олмайди, нима жони қолди ўзи, деган ўйдан жинни бўлиб қолай дерди. Икки... уч... баъзида тўрт соатлаб чўзилган операциядан кейин ўғлини яна тирик ҳолда кўриш насиб қилганида она дунёга қайта келгандек бўларди...

Бирдан елкаси гудрайиб, алпдай қомати дол бўлиб қолган Довул тегирмончи кунора касалхонага қатнайди. Ўғлининг ўнгланмаётганидан хавотирга тушиб, кўнглига бир шумлик келди: “Дўхтиrlар бир нарса мудигар бўлаётган бўлмасин, тағин!..”

“Қора кун”га деб асраб қўйганидан қисиб-қимтиб бир қисмини олиб бориб катта дўхтирилнинг шахсан ўз қўлига тутди. Тўғри, орага одам қўйса ҳам бўларди, лекин ўртадаги одам қаллоблик қилиб, пулни катта дўхтирга бермаса-чи! Берсаям

аввал ўзини улушини олиб, ортганини оборса-чи. Кўлма-кўл бўлгандан кўра ўз қўли билан бергани маъқул. Катта дўхтир у-бу дейдиган бўлса, “биз бир оми одаммиз”, деб тураверади. Ҳозир пул олмайдиган дўхтир борми, ҳаммаси ҳам шу сариқ шайтонни кўрса шайтонлаб қолади.

Афсус...

Тегирмончи хом ўйлаган экан.

Катта дўхтир ранглари ўчиб, титилиб кетган, захнингми, моғорнингми ҳиди анқиб турган, жамиси майда пуллардан иборат боғламни тегирмончининг қўлига қайтариб бераркан:

– Ўғлингиз тузалаверсин, бундан каттароғига эрийсиз, ҳали, – деди.

– Кам бўлса яна опкламан...

– Кам деяётганим йўқ, ум-муман керак эмас, деяпман. Очиини айтсан, раисингиз бизга шундай топшириқ берган!..

– Йўғ-е, Эшбоев келдима?.. – Ишонқирамасдан дўхтирганинг кўзларига тикилди тегирмончи.

– Ҳа, келди, ўғлингизни кўрди, айтадиганини айтди бизга. Хуллас, “золотой” раисингиз бор экан!..

– Эшбоевни икки-уч марта кўрдим... – деди тегирмончи ўзига ўзи гапиргандай ўйчанлик биллан. Аммо... Эшбоев бу ерда нима қилиб юрибди, деб ўйлаш хаёлига келмади.

– Эшбоевга ўхшаган одамлар яхшиликни билдирмасдан қилишади, – деди катта дўхтир.

У самимий сўзладими ёки кесатиб гапирдими, тегирмончи ажратади, дўхтирганинг гап оҳангиги тушуниксиз эди.

Барибир, нима бўлганда ҳам дўхтирган эшитган янгилик тегирмончига хуш ёқди. Эгилган қадди кўтарилиди. Эшбоев аралашдими, демак

улим тузалади, деган ишонч билан қайтди касалхонадан.

Хўжалик идораси қаршисидан ўтаётиб ичкарига киргиси келди. Аммо ботинолмади, тўғриси оёғи тортмади. Кирди ҳам дейлик, нима дейди? Яххиси, ўғли тузалиб кетганидан кейин уни етаклаб идорага боради, икковлашиб миннатдорчилик билдиришади.

Фикри ўзига жўяли туюлди.

Кампири бўшаган идишларни солиб берган сеткани саланглатганча йўлида давом этди. Икки қадам ташламасдан ортига ўгирилди. Назарида, идора деразаларининг биридан кимдир қараб тургандек, тегирмончи ўгирилиши билан ўзини панага тортгандек туюлди...

Уйга келиб биринчи қилган иши, оғзидан боласи чиқиб кетгудай бўлиб юрган келинини отасиникига олиб бориб қўйди. Бувзилол байча шуни қаттиқ тайинлаганди.

Келин... камзулининг ёқасини кўзига босганча йиғлаб қолди.

Довул тегирмончи қудасининг уйидан чиқиб тегирмонга борди. Бироқ кундалик машғулотига қўл ургиси келмади. Илк бор ишдан кўнгли совуганини ҳис этди.

Эшик олдидағи курсичада узоқ ўтирди.

Қуёш пушти ранг уфқ устида осилиб турарди.

Қуёш нурларидан тегирмончининг кўзлари қамашди, у худди кўзи оғриган одамдай ёруғликка тик боқолмай қолди.

Бошини кўйи солиб, кўзларини чирт юмди. Шундай қилса унга осондай туюлди.

Бирор соат ўтиб қуёш кўринмай қолди.

Уфқда пушти ранг излар жилоланди.

Тегирмончи бошини кўтарди, кўзларини баралла очди. Ухладим, деб ўйлади. Лекин у ухла-

маганди. Курсичада қимир этмай ўтирганча, ҳеч нарса ҳақида ўйламаган, мушоҳада қилмаган эди.

Қалби ҳам, мияси ҳам бўм-бўш, ҳувиллаб қолганди.

Бир маҳал у бирдан сесканиб кетди, аланг-жаланг қилиб ён-верига қаради. Атрофда ундан бошқа ҳеч ким йўқ эди. Кейин билдики, безовта қилган нарса синиқ тишининг зирқираши экан. Тегирмончи тишини ушлаб кўрди. Сал қимиirlаб қопти. Тушиб кетганида қутилардим, деб ўйлади у.

Уфқдаги пушти ранг излар йўқолган, қош қорая бошлаганди.

Тегирмончининг ҳувиллаб қолган қалбига астасекин изтироб ина бошлади. Оқшом борлиқни айланиб ўтиб, унинг қалбига оқиб кираётганди...

Ўмровини кўтара олмай, ўсал ётган ўғлини кўз олдига келтиаркан ўзини босиб тура олмади: “Занғар!.. Ичишга бало бормиди?! Мен энди кимнинг ёқасига ёпишаман, боламни нега майиб қилдинг деб!..”

Кейин шахт билан ўрнидан турди-ю, Қўзибой ошнасининг ҳовлиси томон юрди.

Ошнасининг бир уйига қамалиб олиб, ярим кечагача бўкиб ичди. Аввалига чарчоғи чиққандай тетикланди, фикрлари тиниклашди. Хотирасида олис ўтмишдаги узук-юлуқ хотиралар жонланар, аммо зум ўтиб, бу манзаралар айқаш-уйқаш бўлиб кетар, кўз олдидан ўғли билан боғлиқ воқеалар бир-бирига эргашиб ўта бошларди. Нимагадир камзулининг ёқасини кўзига босганча йиғлаб қолган келини ҳадеб кўзига кўринаверарди.

Нимадир алам қилиб кетаверди. Нималигини ўзи ҳам билмасди. Яна ва яна қўйиб ичиб бир неча сопол идишни бўшатди. Кейин ўзини бошқара олмай қолди. Лоҳас бўлганидан уй ичига сифмай

кетаётгандек ўзини гоҳ у ёқقا, гоҳ бу ёнга ташлар, тинимсиз “үх” тортар, бўғзига нимадир тиқилиб қолгандай иягини тепага кўтариб, ҳадеб томоғини силарди.

Бир маҳал хабар олгани ошнаси Қўзибой кириб қолганди, сенам ич, дея унга ёпишди-қолди. Қўзибой ошнаси: “Ичмайман, ичишни ташладим, сотган одам ичмайди, галварс”, дея ўзини четга тортса ҳам кўнмади. “Ичасан, мен минан ичсан”, дея тирғалаверди. Ўртага Қўзибойнинг хотини тушди. Эр-хотин бир амаллаб тегирмончини уйдан чиқариб юборишга зўр бериб уринишарди.

Аммо...

Довул тегирмончи кетишини хаёлига ҳам келтирмас, ҳадеб бошмолдоқдай нарса тутиб чиққан томоғини силаганча:


– Мана шу еримда нимадир турибди-да, ошна. На ичга тушади, на сиртга чиқади... – дея йиғламсиради.

Орадан икки ҳафта ўтиб келиннинг кўзи ёриди, ўғил кўрди.

Довул тегирмончи қудасиникига бориб неварасининг қулоғига аzon айтиб, исм қўйиб келди.

Отасига йўлдош бўлиб юрсин деб неварасининг исмини Йўлдош деб атади.

Тангриберди эса ҳеч нарсадан бехабар, ҳамон қимир этмай дустаман ётар, яқинда бўлиб ўтган бош мия операциясининг оқибати шекилли, кунуззукун пиш-пиш ухларди. Охирги операцияга олиб кетишаётганде Бувзилол байча... очиги, умидини узганди. Озиб кетганидан қуриган чўпдай бўлиб ётган, дока билан ўраб ташланган юзи бир бурда бўлиб қолган ўғли операциядан тирик чиққанини кўриб кампир изиллаб йиғлаб юборди.



“Чибиндай жонинг тошдан қаттиқ экан, болам...”
дерди у хиқиллаб.

Куну-тун пишиллаб ухлаётган Тангриберди аста-секин ўзига кела бошлади. У онда-сонда уйғониб кетгандек бўлар, изтироб ифодаси қотиб қолган, ёстиққа босиб ётаверганидан эгри-бугри чизиқчалар пайдо бўлган юзи бир турлиkkандек, қотиб қолган қорачиклари ҳаракатлангандек бўларди-ю илҳақ ўтирган она “ҳа”, дегунча бўлмай яна ухлаб қоларди.

Бир оқшом унинг тағин иситмаси кўтарилиб кетди. Аъзойи-бадани темирдек қизиб, алаҳлади, алланималар деб қичқирди. Ҳатто ўрнидан турмоқчи бўлиб бошини кўтарди, аммо жароҳати оғриб кетди чоғи, бошини кўтарган заҳоти азобдан афти бужмайиб кетди.

Шу охиргиси бўлди.

Шундан кейин Тангрибердини жазавага со-
лувчи ғайритабиий иситма безовта қилмади.

Кундан кунга юзи сокин тортиб, ўнглана бошлади. Гапирмаса-да ётган ерида ён-верини кузатарди, қорачиклари у ёқдан бу ёққа бориб-келарди.

Бошида парвона бўлаётган аёлга қизиқсиниб қараб қўярди.

Нихоят кунларнинг бирида Тангриберди тилга кирди:

– Қорним оч... – қуруқшаб, ёрилиб кетган лабларидан учган дастлабки сўз шу бўлди.

Бувзилол байчанинг юраги ёрилаёзди.

Топган-тутганини ўғлининг оғизига тутди.

Бирор соат ўтиб яна Тангрибердининг шикаста овози эшитилди:

– Овқат... борми?..

– Болам бечора... – Онанинг кўнгли вайрон бўлди. – Индиги куриб кетган-да.

Бироқ...

Кўп ўтмасдан ўғил тағин овқат сўради.

Бу сафар она хиёл ажабланди. “Шунча овқат қаерга кетяпти?” деди ичида ўзига ўзи. Кейин кўзи тегиб қолишидан қўрқиб кетди. Шоши-пиша ўнг оёғи билан чап оёғининг изини “кесиб” қўйди.

Тангриберди эса тағин овқат талаб қила бошлади.

Кечга бориб она ҳавотирга тушди.

– Улим эрта-мертандан бери тинмай овқат еб ётиди. Ошқуяри овриб қолмайдима? – деб сўради “обход”га кирган ҳаворанг қалпоқли, баланд бўйли дўхтирдан.

– Ҳозир нима сўраса бераверинг, – деб жавоб берди ҳаворанг қалпоқли врач. – Лекин кейин тўхтатиш керак. Буни ўзим айтаман ҳали.

Чамаси бир ҳафтадан кейин бошини кўтариб, бемалол у ёқ-бу ёққа ҳаракатлантира оладиган бўлиб қолган Тангриберди овқатлангандан кейин қаршисида мунғайиб турган аёлга миннатдорчилик билдира бошлади:

– Раҳмат, хола, овқатингиз мазали бўпти.

Бувзилол байча чала эшитдимми, деган хаёлда ўғлининг юзига ҳайрон бўлиб тикилди.

Тангриберди аёлни эшитмади хаёл қилиб яна сўзини такрорлади.

– Раҳмат, холажон.

– Нимага хола дейсан?! – қўрқиб кетган она бақириб юборганини сезмай қолди.

Тангриберди сесканиб тушди. Кўзларида ҳавотир аломати пайдо бўлди. Қаршисида гезариб, йиғламоқдан бери бўлиб турган кампирнинг айю-ҳаннос солишидан чўчиб юзини деворга бурди.

Дастлабки кунларга қараганда енгил шиппакда юришга ўрганиб қолган она палатадан чиқа солиб, дўхтирнинг хонаси томон югуриб кетди.

— Улим... Болам... мени хола деб ётибди... —
деди у врач ҳузурига ҳансираб кириб бориб.

Қандайдир қоғозларни деразадан тушаётган
ёруғга тутиб кўздан кечираётган қалпокли дўхтир
эшитмадим, дегандек онага юзланди.

— Улим мени хола деб ётибди...

— Амнезия! Ўзим ҳам ўйловдим. — Врачнинг
юзида ўйчан ифода пайдо бўлди. Кейин анқайиб
турган аёлга тушунтириди: — Ўғлингиз хотирасини
йўқотган. Лекин сиз ваҳимага тушманг, бу вақ-
тинча, албатта...

— У энди ҳеч кимни танимайдима? Боласи-
ниямми?..

— Афсуски, шундай. Лекин бу вақтинча бўлиши
мумкин. Мен ҳозир ҳамшираларга айтаман...

— Яна апараста қиласизларми?

— Оббо! Онахон, жуда бесабр экансиз-да. Энди
операция қилмаймиз. Намунча, ҳаммаларинг опе-
рациядан қўрқасизлар?!

— Апарастадан кейин шўйтиб қолди-ку!..

Дўхтирининг юзи сезиларли даражада ўзгариб
кетди.

— Агар биз операция қилмаганимизда, била-
сизми, ҳозир ўғлингиз қаерда бўларди?!

— ...

— Жиннихонада! Боринг палатага, ўғлингиз қал-
тис ҳаракат қилиб қўймасин!

... Бир ойдан кейин Тангрибердига уйга қай-
тишга рухсат беришди. Ўша куни бош врач Довул
тегирмончини ҳузурига чақириб ётифи билан ту-
шунтириди:

— Биз қўлимиздан келганча қарадик, даво-
ладик. Лекин... Умуртқа поғонасидан атиги битта
суяги синган одам қулаган дараҳтдай гап. Тангри-
бердининг бир эмас учта суяги синган. Бош мия...

озгина шикастланган... Эҳ!.. Қараб туриб... шуларнинг ҳаммаси ичкиликтининг касри, деб ўйласанг, бир қултум ҳам ичкилик оғзингга олгинг келмай қолади. Хуллас, бу ёғини энди вақт даволайди. Бир ой, бир йил, балки ундан кўпроқ муддат керакдир. Лекин аниқ кафолат бера олмайман. Балки умуман... Аммо очиғини айтишим керак, Москвага олиб борганингизда ҳам бундан ортиғи кўлларидан келмайди...

Тегирмончи лом-мим демади.

Нигоҳларини ерга тикканча нафасини ичига ютиб ўтирди.

— Лекин овқатни вақти-вақти билан бериш керак. Семириб кетса ўзига қийин бўлади.

Врач яна нималардир деди.

Тегирмончи бирини англади, бирини англамади.

Хонадан чиқаётиб эшик олдида бир зум қаловланиб туриб қолди. Сўнг шими чўнтағидан қоғозга ўралган нарсани олиб стол устига қўйида, ёв қувлагандек чиқиб кетишга шошилган эди, дўхтир йўлини тўсади.

Пулни қайтариб эгасининг чўнтағига солиб қўйди.

— Кизиқ одамсилар, сўралмаган пайтда ҳам пул берасизлар-а? — дея ҳазилга бурмоқчи бўлди гапни дўхтир. Тегирмончининг қарашларидаги тошдай оғир ифода ҳазилнинг ўрни эмаслигини таъкидлаб тургандек туюлди. Дўхтир бирдан жиддийлашди: — Яххиси ўғлингизга аравача олиб беринг!..

Вазни анча оғирлашиб қолган Тангрибердини тўрт киши кўтариб касалхонадан олиб чиқишиди. Машинанинг орқа ўриндиғига қорни билан ётқизишиди. Шалвираб қолган оёқларини орқага букиб қўйишиди...

– Бечора одам... – дея пичирлади эшик олдида турган ҳамширалардан бири.

– У одам эмас, урод! – деди ҳаворанг қалпоқли дүхтириш ва тобора узоклашаётган машина ортидан унсиз қараб қолди.

* * *

– Бу сенинг улинг!

Бувзилол байчанинг қўлида кўзлари чақнаб турган етти ойлик болакайга Тангриберди кулиб қаради, аммо унга кўл узатмади.

– Қўлингга олсанг-чи болангни... – деди Бувзилол байча ва болакайни Тангрибердининг қорни устига ўтқазиб қўйди. – Ота-бала бир искашиб олинглар, зора...

Она кўзларини олиб қочди.

Тангриберди қархисидаги аёлнинг кўнгли учун болакайнинг пешонасидан ўпиб, эркалади. Кейин уни қўлларида тутган кўйи гоҳ ўзидан узоклаштириб, гоҳ кўзига яқин келтириб юз-кўзига тикилди. Синчиклаб тикилди. Аммо... зулмат ортида муз қотган хотирасида “йилт” этган тафт, учқун сезилмади.

Балки шу боис болага нисбатан юрагида ҳеч қандай туйғу уйғонмади..

– Мени хола демагин, тагин. Эна де, энанг бўламан, – деди Бувзилол байча.

Бир муддат тараддуланиб турди-да, дўхтириларнинг: “Таниш нарсаларни кўпроқ кўрсатинг. Эслаш қобилиятини тиклашда ёрдам беради”, деган сўзларини эслади ва ёшига ярашмаган бир енгиллик билан “лип” этиб бориб қаердандир шахмат тахтасини топиб келди.

– Манави эсингдами, манави... – Бувзилол байча чанг босган шахмат тахтасини енги билан

артиб ўғлининг кўзларига яқин келтирди. – Шуни деб балога йўлиқиб қолдингма дейман-да, шўрли болам!..

Тангриберди “эна”сининг қўлидаги матоҳга парвосиз назар ташлади. Индамади.

– Манави ерга қўйдим шахматингни, керак бўлса қўлингни чўзиб олаверасан, – деди ва шахмат тахтасини ўғлининг бош тарафига тикка қилиб қўйди.

Тангриберди тағин индамади.

У қиқирлаб кулаётган болакайга андармон бўлиб қолганди.

Бир куни...

Тегирмончини Эшбоев йўқлатди.

Саҳар эди.

Эшбоев айтганидай “...ғарға овзига ... олмаган” бир пайт эди.

Эшбоев гапни аввал тегирмондан бошлади. Кимдир Довулбой кундан кун қўл ҳаққини ошириб боряпти, деган эмиш.

Эшбоев шу гапларни айтиб киприк қоқмасдан тегирмончига тикилиб тураверди.

Терговга чақирилибман, деб ўйлади тегирмончи. Энди бу кўргулик ҳам бормиди?.. Аввалига оёқлари қалтиради, кейин териси буришиб қолган вужуди титрашга тушди. Лекин барибир жавоб бериши керак! Энг осони, бошига тушган кулфатни рўкач қилиш... Шунда балки Эшбоев кўкайини кенг қилар. Довул тегирмончи кўзларини пирпиратди, елкасини қисди. Бечораҳол кўрингиси келди янада.

Айтдики:

– Боламиз... Боламизнинг бошига ташвиш тушиб... Энди унинг бола-чақасини боқиш менинг гарданимда... Тан оламан, бир-иккитасидан ошиқ-ча ҳақ олдим. Лекин ҳаммаданмас!..

– Ўша “бир-иккиталар” кимлигини яхши биламиз. Мана, ўзининг оти, отасининг отига довур аниқ-таниқ қилиб ёзиб кетишган. Ҳай, майли, мен хўжакўрсинга сизни идорага чақиртирдим. Ановиларнинг кўзига бўла... мен сизга айтсан, ошиқча пулни кимдан олишни билиш керак. Айтганча, улингиз қандай?..

– Шу... кўтарам бўлиб қолди-да.

– Хотираси ҳам яхшимас, деб эшитдим.

– Шундай.

– Бўлмаса бундай қиласиз. Мен улингизга хўжалик ҳисобидан пенсия тайинлайман. Ҳар ойда пешма-пеш олиб турасиз. Кейин... битта дилбузар билан битта аравача биздан!..

Тегирмончининг юраги ҳаприқди. Қаршисида ойдай ярқираб, тўлишган раиснинг пойига тиз чўкишдан ўзини базўр тийди.

– Раис бова... Оробани ўзимиз обберамиз... – деди у ҳаяжондан тутилиб. – Сиз аробани Қодиркулди отасига бера қолинг. Шўрли ўн уч йилдан бери тўшакда михланиб ётибди.

– Қодиркулди отасигаям арава топамиз. Фам еманг. Аравачанинг таги мўл! Айтгандай, невара қандай? Уям шохмот ишқибози эмасми, ишқи-либ?..

– Ким билади, лекин калласи каттагина отасига ўхшаб. Аммо-лекин... Раҳмат, райис бова!.. – Довул тегирмончи қўлини кўксига урди.

Ойнинг юзида табассум жилва қилди.

“Ороба керакмас дедим, дилбузар керак эмас демадим, – деб ўйлади тегирмончи уйига қайтар экан. – Шунга фаҳми етдимикан?..”

Тангриберди эса кундан кун семириб бораётганди. У энди тўлишиш фаслидан ўтиб росмана семираётган эди. Онаси ёки хотинига кўзи

түшса бас, қорним очди, деб қўярди. Улар атай эшитмасликка олиб ўтиб кетишса борми, Тангри-берди ўзини боса олмай қоларди:

– Қорним оч, овқат борми ўзи бу уйда! – деб айюҳаннос соларди.

Қўни-қўшнилардан хижолат тортган аёллар дарров унинг айтганини муҳайё қилишарди.

Тангриберди фақат овқат ейиш учун яшаёт-гандек эди. Унинг фақат ногирон вужуди ва ошқозони қолганди.

Кўп ўтмасдан у бир қоп гўштга айланди.

Идора ходимларидан икки киши келиб, тан-танали равишда Тангрибердига ногиронлик ара-вачаси билан телевизор топшириш маросимини ўtkазиши. Машина ҳайдаб келган йигит суратга туширди...

Икки ҳафтадан кейин Тангрибердининг ноги-ронлар аравасида ўтирганча телевизорни қабул қилиб олаётган ҳолдаги сурати газетада босилиб чиқди...

Эшбоев эса... Кўп ўтмасдан район катталари хузурига чақиририлди.

Айтишларича, ё ўринбосар, ё “катта” бўлай-миш...

IV

Ҳаёт давом этарди.

Бирин-кетин бўй етиб қолган қизлар жойи чиқиб узатилиб кетиши. Эркабой уйланди. Ёр-ёр садолари янграб, янгалар қуршовида келинчак кириб келганида нима учундир йиғлаб юборган катта келин “юз очди” бўлган куннинг эртасига боласини етаклаб қаёққадир отланди. Хавотир аралаш ҳайрат билан ҳаракатларини кузатаётган

Бувзилол байчадан на изн сўради, на рағбат кутди.
Боласини етаклади-ю чиқиб кетди.

Ўша куни, ундан кейинги кунлар ҳам келиндан дарак бўлмади.

Мункиллаб қолган тегирмончи қудасиникига зир қатнади. Кимларни ўртага қўймади.

Афсуски, келини қайтиб келмади.

Тегирмончининг аввалги шахти йўқ эди. Қудаси-ю-келини олдида тили қисиқдай эди. Аммо буткул ноумид қайтишни ҳам истамасди.

– Йўлдошбой бизники! – деб туриб олди неварасини қучоқлаб.

Куда ер сузди.

Лекин қудағай тилини тийиб тура олмади, жовуллади:

– Болангиз минан уй қилиб орттиргани шу болайди. Энди шугинани ҳам тортиб олмоқчи мисиз?!

Довул тегирмончи “миқ” этолмай қолди. Ичида невараисидан айрилганини тан олиб ҳам қўйганди. Энди бош кўтармай чиқиб кетиш қолганди.

Шу пайт эшик оҳиста очилиб, остоңада келин бўлмиш – Йўлдошбойнинг онаси пайдо бўлди.

– Майли, бола уники... – деди у йигламсираб, камзули ёқасини кўзига босиб. Кейин йифи аралаш сўзланди: – Фақат кейинроқ...

Довул тегирмончи келиннинг муддаосини фаҳмлади.

Тангрибердига хотинининг кетиб қолганини айтишмаганди. Ўғлига ўрганиб қолган экан, ҳадеб: “Йўлдошбой қани? Нега келмаяпти?” деб сўрайвериб онасини безор қилиб юборди. Бувзилол байча чидаб тура олмади, охири айтди. Йиглаб туриб айтди.

Тангриберди “миқ” этмади.

Онасининг кўз ёшлари юваётган юзидан кўзларини олиб қочди. Шифтга тикилди. Киприк қоқмай ётди.

Шу куни у бирор марта ҳам: “Қорним очди!..” деб бақирмади.

Эртаси куни ҳам...

Ундан кейин ҳам...

Кейинги куни у тун ярмидан оққандада онасини уйғотиб ташқарига олиб чиқишини илтимос қилди.

– Ярим оқшомда нима бор, болам. Тонг отсин...

– Олиб чиқмасангиз, ҳозироқ ўлиб қоламан!.. – юзи кўкариб кетган Тангриберди кўйлаги ёқасини тутамлади.

Бувзилол байча қўрқиб кетди.

Ҳайҳайлаб Эркабойни уйғотди.

Биргаллашиб Тангрибердини аравачага ўтқазиб ҳовлига олиб чиқишиди.

– Энди бориб ухлайверинг, – деди Тангриберди онасига. – Мен ўзим ўтиравераман!

Бувзилол байча аста юриб уйга кирди. Аммо ўринга чўзилмади. Ҳовлига қараган дераза олдига чўк тушиб, ўғлидан кўз узмай ўтирди.

Тангрибердининг нигоҳлари ҳовлини кўздан кечириб, ой шуъласига чўлғаниб ётган тепаликка тушди. Бироқ нигоҳлари бу ерда ҳам бир дақиқа “тўхтамади”, тепалик оша узоқ-узоқларга тикилди. Бири қорайиб, яна бировининг учи ялтираб турган тепаликлару-тоғлар билан юлдузлари жилва қилаётган осмоннинг туташган ерига унсиз тикилиб қолди.

Лекин афсуски, музлаб қолган шуури ҳеч нарсани ҳис этмади.

Бедарак кетган хотираси ҳеч нарсани эслай олмади.

Юраги қаттиқ санчди, холос.

Эртаси куни Довул тегирмончи эрталабданоқ тирговуч ясашга киришди. Тунда дераза олдида тиз чўккан кампирининг ёнида туриб шу фикрга келганди. Бирор соат ўтиб тайёр бўлган тирговучга шахмат тахтасини осиб, ўғлининг каравоти ёнига кўйди.

Каршисида телевизор, ёнида шахмат доскаси, бирор тегирмонга бор, деб зуғум қилмайди. Неки истагини айтса бас, ёнида мўлтираб турган онаси муҳайё қиласди.

Энди шохмат билан шуғулланиш учун барча шароит муҳайё эди!

Аммо...

Тангрибердини шохмот деган балои-азим энди умуман безовта қилмасди. У фақат телевизор кўтарди. Толикқан пайтлари деразадан кўчани, ўтган-кетганни кузатиб ўтиради.

Истаса, шундоқ қўлини узатса бас, шахмат билан шуғулланиши мумкин эди.

Айнан, ўша истак йўқ эди йигитнинг кўнглида.

У фақат бир нарсани, онаси “сени ўғлинг”, деб кўлига тутган ўша болакайни кўришни, уни яна кўлига олишни орзу қиласди.

Довул тегирмончи эса... тез-тез ўғлининг хонасига кирадиган, у билан соатлаб гаплашиб ўтирадиган бўлиб қолганди. У ўғли билан сухбатлашиш асносида шу нарсага амин бўлдики, Тангрибердининг тили равон, ҳамма нарса ҳақида бийрон-бийрон гапиради. Фақат нимагадир ёнгинасида турган шахмат доскасига қайрилиб ҳам қарамасди.

Шунда тегирмончининг мижжаларига беихтиёр ёш қалқди. Буни ўзи ҳам сезмай қолди. Ўғлининг ярми тирик, ярми жонсиз, абгор танасига зимдан

боқаркан юраги ўртаниб кетди: “Балки ҳарбийга қайтиб кетганида бу фалокатга йўлиқмасмиди?..” деган армонли ўй миясидаги ўша ғовакни тирнаб ўтгандай бўлди...

Ўша куни кечга бориб тегирмончи сирқовланиб ётиб қолди. Эртасига ҳам, индинига ҳам ўрнидан турмади. Туз тотмай қўйди.

Бешинчи куни тонгга яқин бошмалдоқдай нарса тутиб чиқсан томоғини икки-уч бора силади, кейин қўлларини қимирлатишга ҳам ҳоли келмади...

Бувзилол байча оғзига томизиш учун сув олиб келганида тегирмончи жон таслим қилиш арафасида хириллаб ётарди. Оёқ-қўллари музлаган... Кўзлари чирт юмилган, худди қайта очилиб кетмасин, дегандай... Аммо ҳамон хирқираётган бўғзидан отилаётган кўкимтири кўпик сира адо бўлмайдигандек оқаверди, оқаверди... Бувзилол байча қўрқиб кетди: бунча кўпик қаердан чиқяпти?!

Орадан олти ой ўтиб Бувзилол байча ҳам касал бўлиб ётиб қолди. Ўрнидан туролмай қолгунча ўғлининг хизматини қилди. Охирги дақиқаларда ҳам у боласига илҳақ бўлди. Щлгиси келмагандек жон талашди; жон тери чиқиб, қат-қат ажин босган пешонасидан реза-реза тер оққанида ҳам... кампир ўрнидан турмоқчи бўлар, устига ёпилган енгил кўрпани силтаб-силтаб юборар, аллақачон карахт бўлиб қолган лаблари нимадир демоқчи бўлгандай аҳён-аҳёнда сесканиб кетарди.

Бир бурда бўлиб қолган вужуд сўнгги кучкүвватини шу йўсин сарфлади...

Бакрайиб қолган кўзларни қишлоқ мулласи дуо ўқиб ҳам ёпа олмади...

Катта келин бошқа турмуш қилгачгина Йўлдошбойни отасининиг ихтиёрига юборди. Бирданыга икки ўғилчали бўлиб қолган кичик келин рўзғор юмушларига ўралашиб қолган, Тангрибердига қарап баъзи кунлари эсидан чиқиб кетарди. Эркабой кун бўйи тегирмондан бери келмасди.

Довул тегирмончи оламдан ўтиб кетган бўлсада, у умр бўйи кутган, қўрқсан “талаш-тортиш” юз бермаган, Эркабой тегирмонни ёпиш хаёлида юради.

Беморга қаровнинг мазаси қочди.

Хонадан ёқимсиз ҳид уфуриб қолганди.

Тинимсиз қашинаверганидан Тангрибердининг баданида учукқа ўхшаш бир нарсалар пайдо бўлди. Учуклар аста-секин катталалиб, йирингли ярага айланди. Бир кун келиб яралар ёрилиб, йиринг аралаш қон сачраб кийимлари доғ бўлиб қолгандан кейингина Эркабой бундан хабар топди. Тўғрироғи, бу “хабар”ни ота-онаси ўлганидан кейин Тангрибердининг олдига тез-тез кириб турадиган Шовқи муаллим айтди. Эркабойга биринки аччиқ-тизиқ гапларни ҳам гапирди. Эркабой жizzакироқ эди. Жаҳли чиқиб кетди унинг.

– Сиз! – деди у отасиникига ўхшаш чағир кўзларини чақчайтириб. – Акамминан ишингиз бўлмасин! Отамдан бир эшитгандим, аслида акамнинг бошига сиз етгансиз! Сиз!

Шовқи муаллимнинг кўзларидан тирқираб ёш отилди. Аммо бир сўз демади. Сенга гап ҳайф, дегандай Эркабойга нафрат билан тикилди-да уйдан чиқиб кетди.

Шу кетганча бадар кетди. Қайтиб бу остонаяга

қадам кўймади. Тангриберди эса ташқарида бўла-ётган гап-сўзлардан бехабар, эшикка термулиб ётарди. Шовқи муаллим келишини кутарди. Муаллимнинг сухбатлари унга номаълумлик чегарасини бузиб ўтиш учун куч-қувват бағишла-ётгандай эди.

Нимадир юз бериб, ҳаммаси тамом бўлганига бир ойлардан кейин ишонди Тангриберди. Чунки ўтган вақт мобайнида Шовқи муаллим умуман қорасини кўрсатмаганди. Тангрибердининг: “Балки кўчадан ўтганда кўзи тушиб қолар...” деган ожизона илинжи ҳам пучга чиқди.

У энди кун уззукун миқ этмасди. Ўғли ўйин боласи эмасми, кўчадан бери келмасди. Телевизор ҳам жонига текканидан баъзида кун бўйи бирор марта ёқилмасди.

Тангриберди энди “овқат!” деб бақирмасди. Келини патнис кўтариб келгунча бир парча бўлиб қолган юзининг ярмини эгаллаган кўзларини бақрайтирганча деразадан ташқарига тикилар, ахён-ахёнда ёнгинасида қаққайиб турган “икки оёкли” шахмат тахтасига қараб-қараб қўярди.

У озиб, чўп бўлиб қолганди. Худди мўмиёланган жасаддек кундан кун кичрайиб, емирилиб бораётгандек эди.

Қалбida ҳамма нарса айқаш-уйқаш бўлиб кетган... Вужудидан муҳаббат ва самимият сиқиб чиқарилган... Шуури... аёвсиз жангдан кейин ҳувиллаб қолган қўрғонни эслатарди. Совуқ шамол, елвизак хукм сурарди у ерда... У жисмонан енгилган эди.

У нақ мурданинг ўзи бўлиб ётарди.

Кунларнинг бирида...

Саҳар пайти эди.

Осмон ёришган, қушлар чаҳ-чаҳлаб тонгни хушлаётган сокин бир палла эди.

Тангриберди уйқудан чүчиб уйғонди.

Уйғона солиб, иргиб ўрнидан турмоқчи бўлди.

Бироқ жонсиз оёқлари қимир этмади. Ажабланди. Тарападек қотган оёқларига ҳайрон бўлгандек бир неча сония тикилиб қолди. Кейин олазарак бўлиб атрофга алантглади. “Эна-а!” деб бақиргиси келди. Аммо бақирмади, бақира олмади. Чунки каравотдан сал нарига солинган ўринда ўзига қуиб қўйгандай ўхшаш бир бола пишиллаб ухлаб ётарди. Кўксини ажиб туйғу қамраб олди. У болани қўлига олгиси, бағрига босиб, эркалатгиси келди. Аммо болакайнинг ширин уйқусини бузгиси келмади.

Сўнг нигоҳлари беихтиёр шахмат тахтасига қадалди. Қарашларида фавқулодда бир зийраклик ва теран маъно акс этарди.

Узалиб тирговучли шахмат тахтасини ўзига яқин сурди. Кутимаган жўшқинлик билан шоша-пиша оқ ва қора доналарни тахтага териб чиқди.

Кейин... қандайдир хаёлий куч исканжасига тушиб қолгандек қалтираб кетди. Қалтираш асно-сида... елкасидаги йирингли ярадан нимжонгина бир нарсалар учеб пастга – кўрпа устига тушди. Бу қурт эди.

Баданидаги яралар қуртлай бошлаганди.

Тангриберди бундан бехабар...

Юраги ҳеч ерга сиғмайдигандек гурсиллаб урар, олов ёлқиланаётган кўзлари тахтага қадалганча тек қотганди.

Бир маҳал...

Музлаб қолган тафаккурида “йилт” этиб учқун пайдо бўлди. Учқун аста-секин аланга олиб, зулматда қақшаб ётган тасаввур кўзгусини ёритиб, кумушдай ярақлатиб юборди.

Шундан кейингина йигитнинг кўз олдида таниш лавҳалар бир-бирини қувлашиб ўта бошлиди. Ва... Ва Тангриберди аста қўлини узатиб “ок”ларнинг “пиёда”сини бир катак олға сурди.

V

Телевизорда шахмат мусобақасига оид кўрсатув берилаётган пайт.

Жаҳон чемпиони билан жаҳон чемпионлигига даъвогар ўртасида кескин жанг бошланган. Иккаласи ҳам чуқур ўйга толиб, шахмат тахтасига тикилган кўйи ўтиришарди.

Тангриберди жаҳон чемпионининг ҳар бир ҳаракатини, ҳатто кўз қарашларини ҳам эътибордан қочирмасдан ўйинни кузатарди. Унинг бутун вужуди кўзга айланган, экран ичига кириб кетгудек бўлиб ўтиради.

Бир маҳал тош қотиб ўтирган жаҳон чемпионининг қўли ҳаракатга келди. Бармоқлари “от”-нинг бошидан тутди.

Шунда... шунда Тангриберди ўтирган ерида бир қалқиб тушди.

– Йўқ! Йўқ! – дея пичирлади у ҳаяжонланиб. – “От”ни қўя тур! “Рух”ни с 8 дан с 4 га юр! Шунда... Ана шунда!..

АЖАЛ ЧОРЛОВИ

Мулла Ашур қишлоқнинг нафаси ўткир дуохони эди. Муриду мухлислари кўп эди. Дами ўткирлигидан одамлар орасида ҳар хил шовшувли миш-мишлар юрарди. Эмишки, аллақайси бойваччанинг бир кечада, ўз-ўзидан оғзи қийшайиб қолганида уч марта “дам солиб” оттайди қилиб юборган экан. Тўқай қишлоқлик Саттор чолни қора курт чақиб олганида, бир ўлимдан олиб қолган одам мана шу Мулла Ашур эди. Ҳосил миробнинг қўрққаниданми ё бошқа сабабданми, бирдан гапиролмай, гунг бўлиб қолган беш яшар невараасини тилга киритиб юборган ҳам мана шу Мулла Ашур...

Бундай гап-сўзларнинг боши-кети йўқ эди. Уларнинг қай бири рост, қай бири лоф, ажратиш қийин. Лекин номлари тилга олинган ўша бойвачча ҳам, Тўқай қишлоқлик Саттор чол ҳам, Ҳосил мироб ҳам муллани кўрди дегунча, қўлларини кўксига қўйиб, иззат-икром кўрсатишлари рост гап. Ўткир нафасидан шифо топиб, соғайиб кетган баъзи бирорлар азбаройи ихлос зўрлигидан Мулла Ашурнинг хизматига ҳам кирган эдилар. Муллани излаб, ундан нажот кутиб ён-атрофдаги қишлоқлардан ва ҳатто шаҳардан ҳам одамлар келиб туришарди.

Мири кам дунё, деганларидек кўпнинг мушкулини осон қилган мулла... ўз дардига даво тополмай изтиробда яшарди. У – бефарзанд эди.

Аёли Хонимбуви бечорагина, мушфиққина аёл. Турмуш қурғанларига саккиз йилдан ошяптики, эрининг кўзига тик қарамайди. Уятчан, тортин-чоқ, гапга ҳам нўнокроқ. Мулла Ашур Хонимбувидан аввал ҳам уйланган, хотин кўрган эди. Кўшни қишлоқлик Усмон ҳожининг кенжаки қизи Бувражаб билан ўн беш йил яшагач, фарзанд бўлмаганлиги важидан яхшиликча ажрашишган эди. Усмон ҳожининг кенжаси мулла билан орани очди қилгач, бошқа бирорга тегиб, бола-чақали бўлиб кетди. Мулла Ашурнинг эса ҳамон дарди ичида, икки қўли бир тепа бўлиб ўтиб кетяпти.

Мулла шу ҳақда ўйлади дегунча юраги сиқиладиган бўлиб қолди. Ўзини қўярга жой тополмайди. Ётган бўлса, ҳовлиқиб ўрнидан туриб кетади. Ўтирган бўлса, отилиб ҳовлига чиқади. Ҳадемай, кўз очиб юмгунча умри поёнига етса бу ҳовлида ва умуман ёруғ дунёда ўзидан ном-нишон қолмаслигини, ота-боболари давру даврон суриб ўтган, тепалик устидаги бу кўхна қўрғон чолдеворга айланишини ўйлаб, юраги эзилади. Бу аёлнинг ҳам баҳридан ўтиб, бошқасига уйланишга яна юраги бетламайди. Буниси ҳам бошқа бирорга тегиб, болали бўлиб кетса борми, муллага ҳаёт татийдими?! Айб ўзида экан, хотинларини ёмонотлиқ қилиб юрган экан, демайдими одамлар?!

Икки ўт орасида ўртаниб юрган кунларнинг бирида мулланинг хузурига ёшгина жувон бош эгиб кириб келди.

– Тумор қилиб берсангиз, дегандим... Тирноқقا зорман...

Тўрт қават қуроқ кўрпача устида ўтирган Мулла сесканиб тушганини ўзи ҳам сезмай қолди. Беихтиёр аёлга зимдан кўз қирини ташлаганини

кейин сезди. Одатда у шифо тилаб келувчиларни ҳам, илтимосчиларни ҳам, айниқса аёл киши бўлса, чордона қурганча, китобидан кўз узмаган ҳолда арз-додларини эшитар, шу қабилда жавоб-муомала қиласр эди. Аммо бу гал... Аёлнинг юзи лоладек қизариб кетган, кўзларини ердан узмасди. Овози дардчил, лекин шу қадар ёқимли эдики!.. У қимтиниб, ерга қараб ўтирган аёлга назар ташлашдан яна ўзини тия олмади. Лекин тезда ҳушини жамлади, шайтонга хай бериб, ўзини ўнглади. Гуноҳ, тавқи лаънат бўйнига осилишидан чўчиган мулла кўзларини юмган кўйи, ичида аллақандай дуони ўқиди. Сўнг тасбех ўтирганча, китобдан кўз узмаган ҳолда, ўта жиддийлик билан сўради:

- Аввалги турмушингиз... бузилганми?
- Ҳа. Беш йил бўлди.

Аёлнинг овози яна мулланинг юрагини “қитқлади”. Мулла Ашур ўзини босишга, фикрини чалғитмасликка уринди. Алҳол, бунинг уддасидан ҳам чиқди.

Йигирма дақиқадан сўнг аёл юзи гул-гул яшнаб, кичкинагина, учбурчак туморни сиқим-лаганча... хонадан чиқиб кетди. Очиги, мулла аёлнинг қачон, қандай чиқиб кетганини сезмай ҳам қолди. Унинг ҳуши ўзида эмасди. Кечгача ғалати кайфиятда юрди. “...Лоладек қизариб кетган” аёл ҳали у ердан, ҳали бу ердан қараб тургандек бўлаверди. Аёлнинг соҳт-сумбати, юз тузилиши ҳақида унинг ҳеч қандай тасаввури йўқ эди. Ахир унга дурустроқ тикилиб қарамади-да! Фақат “лоладек қизариб” тургани ёдида...

Мулла Ашур ҳарчанд ўзини чалғитишига, фикрини жамлашга уринмасин, уддасидан чиқолмасди. Икки марта уйланган бўлишига қарамай,

мулла бундай ҳолга биринчи дафъа тушиши эди. Ўз кўнглида, қандайдир бесаранжом бўлиб қолгандай эди. Ва бу бесаранжомликнинг оқибати яхшиликка олиб келмаслигини ғайри-шуурӣ равишда ҳис этган мулла кечга бориб хонасига кирди-да, эшикни ичкаридан қулфлади.

Тўрда, қиблага қараган бурчакка ёзилган жойнамоз устида ўтириб, кўзларини юмганча тиловат қила бошлади.

Уч кун ўтгач, озиб, ранг-қути ўчган, лекин гуноҳлардан фориғ бўлган мулла ҳовлига чиқди. Уни кўриб, хурсанд бўлиб кетган Хонимбуви ошхона томонга югорди. Бироқ Мулла Ашурнинг иштаҳаси йўқ эди. Шу топда негадир бўшашиб, ланж бўлиб бораётганди.

– Жой сол, бир пас чўзилмасам бўлмайдиёв, – деди у дастурхон кўтариб келаётган хотини томонга қарамай.

– Кунботарда ётмасдингиз-ку, – деди Хонимбуви ботинмайгина. Унинг овози ингичка ва чийилдоқ эди.

Мулла Ашур беихтиёр чуқур хўрсинди. Нигоҳи узоқ-узоқларга қадалди.

– Бирровга... Бир жойга ўтиб келаман, – деди мулла салдан кейин. Сўнг аста-секин юрганча ҳовлидан чиқди.

Хонимбуви нон, қанд-курс ўралган гулдор дастурхонни бағрига босганча, эрининг ортидан тикилиб қолди.

Мулла Ашур дарвоза олдида бир зум тўхтаб, нафас ростлади. Уч кунлик тиловат – тавба-тазарру уни ҳолдан тойдирганди. Оёқлари қалтираб, мадорсизланди. Дарвозага беҳол суюнди. “Худойим, хиёнатимни ўзинг кечир, – деди ичида мулла. – Шайтон қутқусига учдим. Бир лаҳзага

бўлса-да, Сени унугтаним учун ўзинг кечир, Парвардигор!"

Мулла кўзларини юмган қўйи чуқур-чуқур нафас олди. Беш дақиқадан кейин вужудига куч энгандек бўлиб, секин ўрнидан жилди. Уйнинг орқа томонига ўтди.

Мулла Ашурнинг уйи қишлоқ четидаги кичкина тепалик устида қад ростлаган эди. Уйни бундан юз эллик йил муқаддам Мулла Ашурнинг катта бобоси Бузрук мулла қурдирган экан. Қишлоқнинг нариги бошидан қаралганда дастлаб шу уйнинг пештоқиу томи ярқ этиб кўринади. Бошқаларникига қараганда пойдевори-ю девори баланд-баланд қилиб қурилган, айвон пештоқидан тортиб кўча эшиккача нақшинкор безак берилган уй четдан қараган кишига кичикроқ кўргончани эслатарди. Бир ярим асрдан буён муллалар сулоласининг кўрки ҳисобланиб, ҳар бир авлод даврида гуллаб-яшнаган бу табаррук кўргон бугунги кунга келиб инқирозга юз тутмоқда. Мулла Ашурдан кейин бу уйнинг чироғини ёқиб ўтирадиган ҳеч кимса йўқ. Вақти-соати этиб мулла ҳам, хотини ҳам оламдан ўтгач бу ер бойқушлар маконига айланади. Ё бирорта дахрий идорага макон бўлади. У ҳолда ҳам, бу ҳолда ҳам отамерос кўргоннинг тақдирни "бойқуш"лар қўлида қолиши тайин. Ё тириклигигидаёқ бирорта мўмин-мусулмон қариндошига хатлаб берсамикин? Шунда кўнгли хотиржам тортармиди? Ё... бирорта бенавонинг боласини асраб олиш... Йўғ-е, - Уйнинг орқа тарафида ўзини қунчувоқقا солиб ўтирган мулла беихтиёр ўрнидан туриб кетди. Бундан икки йилча илгари, хотини ботинолмаган бўлса-да, тенгқурларидан бири секин қўйнига қўл солиб кўрган. Мулла Ашур унинг нима демоқчи

эканлигини билиб олгач, ўша оғайнисини жеркиб берганди. Бироннинг пуштикамаридан бўлган бола ҳар куни, ҳар сония ўзининг кимлигини, кимнинг боласи эканлигини эслатиб, Мулла Ашурга ҳозиргидан ҳам кўра қаттиқроқ ва аламлироқ азоб беради-ку! Бундан кўра беш-бегонага хатлаб бергани маъқул эмасми? Лекин... – Мулла Ашурнинг қалбини алам-қизғониш аралаш изтироб қамраб олди. Ўзини ўзи енголмай эзилган мулла хомуш, афтодаҳол бир қиёфада пастга – қалин дараҳтлар билан ўралган қишлоққа ғамгин нигоҳ ташлади. Хатлаб берган қариндоши текинтомоқ, дангаса, уқувсиз чиқиб қолса буёғи неча пулдан тушади?! Аждодлари қўлида кўз қорачифидек асраб келинаётган гўшанинг парокандаликка юз тутишига Мулла Ашур сабабчи бўлмайдими?!

Кеч кириб, қишлоқ уйларидаги чироқлар бир-бир ёна бошлаганда ҳам Мулла Ашур хаёл дарёсига гарқ бўлиб ўтиради. Бу орада хотини икки марта келиб хабар олди. Сўнгги келишида у:

– Овқат совиб қолди, – дея қисталанг қилса-да, мулланинг жойидан жилгиси келмади.

– Сен ичавер, мен кейин, сал туриб бораман, – деб хотинини жўнатиб юборди.

Хонимбуви ҳайрон бўлганча, ўгирилиб ортига қарай-қарай, ҳовлига кириб кетди. Хотини кўздан йўқолгач, мулла инқиллаб ўрнидан жилди. Одатдагидек, уй-қўрғон атрофини бир қур айлануб чиқди. Ҳар куни бўлмаса-да, уч-тўрт кун оралатиб, ён-веридан инсон қадами тийилгач, уй атрофини гир айланиб чиқадиган одати бор эди унинг. Мулла бу ишни одамларга билдирмай бажаряпман, деб ўйларди. Лекин ер тагида илон қимиirlаса билиб қўядиган ҳамқишлоқлари

унинг бу одатини аллақачон сезиб улгуришганди. Баъзи бирорлар: “Мулланинг уйида ота-бобо-сидан қолган хазинаси бор. Битта-яримтанинг назари тушиб қолмаслиги учун уйининг қай бир бурчига қўмиб қўйган. Тинч ўтиrolмай, уй атро-фини айланиб юриши ҳам шундан. Хазинасини қўриқлади”, – дея гап болалатиб юборишганди. Аслида ҳақиқатда шундаймиди ёхуд аввалига шунчаки миш-миш сифатида пайдо бўлиб, сўнг “пуфлаб пиширилган” лофими, ҳеч ким анифини билмайди. Бироқ мулланинг уй атрофини айланиб юриш одати рост эди...

Эртаси куни кечга яқин Мулла Ашур нақ-шинкор дарвоза ёнида “узала ётган” узун ва йўғон ходага кетини қўйганча, қишлоққа терму-либ ўтирганида туйқусдан пастда, шундоққина йўл четидан таманно билан ўтиб кетаётган аёлга қўзи тушиб қолди. Аёл мулланинг нигоҳини ҳис этди шекилли, ялт этиб қараб қўйди. Мулла Ашур қаттиқ сесканди. Аёл унга танишдек туюлди. Ё кимгадир ўхшатдими? Ие, ҳа, эсига тушди, бу ахир... Тунов куни: “Тумор қилиб беринг”, деб келган аёл-ку! Мулланинг аъзойи бадани жимиirlаб кетди. Ҳаяжонда кўзларини олиб қочди. Аёл нарироқ бориб, ортига ўги-рилди. Хиёл жилмайгандек бўлди-ю, яна йўлида давом этди. Мулла Ашурнинг юраги ҳаприқиб кетди. У зўр бериб уринмасин, аёлни кўздан йўқотмаслик учун унинг ортидан қараб қолмас-ликнинг иложини қилолмади. Жадал юриб кета-ётган аёл дуч келган биринчи ҳовлининг чорбоғига ўзини урди-ю, кўздан йўқолди. Шундан кейингина Мулла Ашур ўзига келгандек бирдан хушёр тортди. Шоша-пиша ёнверига қараб қўйди. Яхшиям ёнида ҳеч ким йўқ. Бўлмаса, нақ шарманда бўларди-я.

Уят ҳиссидан ҳам кучлироқ, аёвсиз, таъбир жоиз бўлса, даҳшатлироқ – гуноҳкорлик туйғуси юрагини эзib, азоб бера бошлади. Уч кунлик тоатибодат зое бўлди, ҳавога учди. Бир нигоҳ, бир жилмайиши туфайли у бир йўқотиб-топган хотиржам ҳаётидан, ўла-йита эришган ҳузурхаловатидан яна мосуво бўлди. “Ким бўлдийкин у?” деган савол яшин тезлигида хаёлидан ўтди унинг. Хаёлан аёл кириб, кўздан ғойиб бўлган ҳовли эгасини хотирасида тикламоқчи бўлди. Ва бирдан ҳаяжон билан хитоб қилди: Ахир ўша ҳовлида Оқбердининг тўнғичи Неъмат муаллим хотини ва беш боласи билан яшайди-ку! Яқинда кўчиб келишган. Оқбердининг ўзи кенжатои билан қишлоқнинг нариги четида яшайди. Демак... бу аёл Оқбердининг келини экан-да!.. Унда... Нега унда?.. Ўша кунги аёл “тирноққа зорман”, деганди-ку!”

Мияси “ғовлай” бошлаган мулла тутақиб кетди. Ҳатто ўзидан-ўзи нафратлана бошлади. Ёв қувгандек шошиб ўрнидан туриб, ичкарига кирди. Эшикни зичлаб ёпиб, тамбалади. “Энди уйдан бир қадам ташқарига чиқмайман!” – деди ўзига ўзи. Ва бирдан вужудини қамраган ҳоргинликдан шалвираб “хосхонаси”га кирди. Бу ерда у муҳлису муридларини, шифо тилаб келувчиларни қабул қиласди. Муножоту тиловат, Оллоҳга сажда қилиш онларини ҳам у шу хонада ўтказарди. Тўрт қават қуроқ кўрпача устига чўкиб, пар ёстиққа ёнбошлади. Кўзларини юмди. Лаблари қимтилди. Шу кўйи у узоқ ўтириди. Куч билан ич-ичидан кўтарилиб келаётган ғалаённи босди. Потирлаб ураётган юраги ўз маромига тушгунча сабртоқат билан кутди. Сўнг чордона қуриб ўтирганча олдида ёзиғлик турган жойнамоз устидаги эски-

риб, титилиб кетган китобни авайлаб қўлига олди. Китоб араб имлосида ёзилган бўлиб, унга раҳматли отасидан, отасига эса ўз отасидан, яъни Бузрук мулладан мерос қолган. Китоб шу қадар кўхна эдики, балки Бузрук муллага ҳам қайсиdir бир аждодидан мерос қолгандир.

Мулла Ашур китобни аввал кўзига сурди. Сўнг лабига босиб тавоф қиларкан қўллари титраётганини ҳис қилди. Аввалдан у кўхна китобни тез-тез қўлига олиб, ўқиб турарди. Жуда сиқилиб, толиқиб кетганида, ўзини ёлғиз ва... ва аждодлари руҳи олдида айбдор ҳис этганида ушбу китобни қўлига олар, бир-икки сахифалик мутолаадан кейиноқ жунбушга келган вужуди осойиш топиб, хотиржам тортиб қоларди. Айни дақиқада мулла нажот истаб, очкўзлик билан китобга ёпишган эди. Биринчи сахифани очиб, жимжимадор жумлаларга кўз югуртира бошлади. Бир, икки, ҳатто учинчи сахифани ўқиб чиқди ҳамки, қулоғига ҳеч нарса кирмади. Мияси бўшаб қолган қутидек ҳеч нимани қабул қилмасди! Мулла Ашур қўрқиб кетди. Ҳатто ваҳимага тушди.

– Ё, тангрим, – деб юборди у беихтиёр. – Бу не синоат?! Вужудимга уя қуриб олган иблиснинг ишими бу? Мен уни ҳайдайман, йўқотаман!

У пичирлаб, аллақандай дуони ўқий бошлади. Бир неча сониядан сўнг китобни қўлига олди. Бир-икки жумла ўқиди, холос. Кўз олди жимирилашиб, ҳарфлар бир-бирига қўшилиб, чаплашиб кетди. Юраги кўкрак қафасига сиғмай ураётган мулла ҳовлиқиб ўрнидан турди. Ҳовлига қараган деразани очар-очмас, ташқарига қараб бақириб юборганини сезмай қолди.

– Қай гўрдасан, Қўшанбойнинг қизи?!

Ишком остидаги сўрида олмақоқи қилаётган Хонимбуви ирғиб ўрнидан турди. Липпасига қис-

тириб олган этагини тушириб, шоша-пиша устбошини қоқди. Илдамлик билан дераза ёнига келаркан, эрининг захил башарасига кўзи тушиб, юраги орқага тортиб кетди.

– Тинчликми?!

– Покланиб, кейин менинг ёнимга кир! – деб буюрди мулла.

Хонимбуви ҳайрон бўлганча ортига қайтди.

Мулла Ашур жойига чўкиб, бошини хам қилганча хотинини кута бошлади. Лекин ҳадеганда ундан дарак бўлавермади. Сабр косаси тўлиб бораётган мулла энди ўрнидан туришга чоғланаётганда намхуш юзини силаганча Хонимбуви кириб келди. Унинг нигоҳларида аллақандай ҳадик мужассам эди.

– Ўтир! – деб буюрди мулла ва имо билан оёқ учидан жой кўрсатди хотинига.

Хонимбуви қимтиниб, омонатгина чўк тушди.

Мулла Ашур кўҳна китобни қўлига олди-да, биринчи саҳифасини очган ҳолда хотинига узатди.

– Шу еридан бошлаб ўқи!

Хонимбуви бир китобга, бир эрига қарапкан, хижолатли овозда деди:

– Мен ўқиши билмайман.

– Нега билмайсан?! – Мулланинг кўзлари чақчайиб кетди. – Ўргатган эдим-ку, уйланган йилим!

– Эсимдан чиқиб кетган... кетибди, – деди дувқизарган Хонимбуви саросималаниб.

– Бекорларни айтибсан, эсингдан чиқмаган. Ишингни қизғониб атай ёлғон гапирияпсан.

– Ўлай агар...

– Ўқийсан! – Мулла Ашур мажбурлаб хотинининг қўлига китобни тутқазди. – Ўқийсан!

Мулла Ашур жазавага тушган, хушидан айрила-ёзган эди. Нима қилаётганини, нима деяётганини ўзи хам идрок қилолмасди.

Хонимбуви китобни тутганча ҳўнграб юборди.

– Касофат! Бор, йўқол, кўзимга кўринма!

Мулла Ашур махсили оёғини узатиб, товони билан хотинининг тиззасига тепди.

Хонимбуви кутилмаган зарбадан қалқиб кетди. Китоб кўлидан учиб тушди.

– Сендан яхшилик чиқмаслигини билардим, – деди мулла кўзлари хонасидан чиққудек бўлиб, китобга узаларкан.

Хонимбуви пиқиллаганча оқсоқланиб, хонадан чиқиб кетди. Мулла Ашур ғазаб ва нафрат билан унинг ортидан қараб қолди. У китобни хотинига ўқитиб, тинчланмоқчи, шу йўл билан ғалаён кўтараётган юрагига хотиржамлик бахш этмоқчи эди.

– Шунчалик ҳам ақли ноқислик бўладими? – деди у ўзига ўзи. – Ўргатган нарсанг эсида турмаса...

Мулланинг бир дарди иккита бўлди. Ўша куни “лоладек қизариб турган” аёлни кўрганидан буён ҳаяжонданми, эҳтиросданми титраб турган юраги энди ғазаб ўтида ёна бошлади.

Бурунги хотини ҳожининг қизи бўлса-да, даҳрийлиги бор эди. Биринчи бўлиб ажralишни таклиф этган ҳам, кўч-кўронини ортиб, уйдан чиқиб кетган ҳам унинг ўзи эди. Тушкунликка тушиб, ғарибона яшаб юрганида қариндошлари: мўмин-мусулмоннинг қизи, дейишиб, мана шу Хонимбувига уйлантириб қўйишганди. Айни дақиқада ғазаб ўтида қоврилаётган мулла туйқусдан Хонимбуви ҳам ўша даҳрий кундошининг “мардлиги”ни такрорлашини истаётганини сезиб қолди. “Ё, раббий, – деди у изтироб билан. – Менга нима бўлди? Нима учун бундай ўйларга боряпман. У чиндан кетиб қолса аҳволим не кечади? Ўша...

баттол балки бироннинг хасми-ҳалолидир? Ё... у билан хуфия учрашиб, ўзимни синаб кўрсам-микин?” Хаёлига келган сўнгги ўйдан мулланинг эсхонаси чиқаёзди. Юзини кафтлари орасига олиб, узоқ тин олди. Сўнгги ўй уни даҳшатга согланди. Бундан қутулиш учун у ҳозир ҳамма нарсага тайёр эди.

Бир тутам тун минг азоб билан ўтди.

Тонг ғира-ширасида бостирмада таҳорат олиб, бир қўлида обдаста, иккинчиси билан белбоғини елкасига ташлаганча ортига қайтаётган мулла кимдир ўзини кузатаётгандек туюлиб, беихтиёр юришдан тўхтади. Ортига ўгирилди. Зингил солиб, ён-верини кузатаркан, бехосдан хув нарида, чорбоғнинг йўлга туташ ерида, ёғоч панжарарага суянганча, маъюс жилмайиб турган ўша аёлга, ўша баттолга кўзи тушиб, негадир сесканиб кетди. Орадаги масофа узоқ эмасди. Шу боис мулла аёлнинг хижолатданми ё уялганиданми, лоладек қизариб турганини кўрди, ҳис этди. Балки аёл қизармагандир, мулланинг хотирасида ўша “ҳолат” сақланиб ва ҳатто ўрнашиб қолгани учун шундай туюлгандир. Ҳовли супуришга тутинган Хонимбуви эрининг аро йўлда хуши бошидан учиб туриб қолганини кўриб хавотирланди, бир зумда хаёлидан нелар ўтмади, шусиз ҳам бир неча кундан буён унинг аҳволидаги ўзгаришдан ҳадиксираб юрганди. Супургисини девор четига итқитиб юбориб, эрининг олдига келди. Қўлидан обдастани оларкан:

– Жойнамозни солиб қўйдим, – деди оҳиста.

Мулла Ашур гарангсигандек бўлиб, хотинига маънисиз нигоҳ ташлади ва шу асно боши билан чорвоқ томон ишора қилиб деди:

– Анави... аёл Оқбердининг келиними?

Эри имо қилган тарафга қараган аёл у ерда дарахтлару, чорбоғни ўраб турган ёғоч панжарадан бошқа ҳеч нимани, ҳеч кимни кўрмади.

– Оқберди аканинг келини тонг саҳарлаб бу ерда нима қиласди? – деди Хонимбуви ажабланиб.

– Дарди бордирки... – Мулла Ашур яна ўша томонга юз буаркан, у ерда ҳеч ким йўқлигини кўриб, капалаги учди. “Хозиргина... Хозиргина турган эди-ку! Ерга кирдими, осмонга учдими? Ёки... қияликдаги йўлдан ўтаётуб қарагиси келгандир... Хонимбувини кўриб қолгач, қочиб қолгандир”. Мулла ҳаяжондан энтикли. Вужудини қамраган ёқимли ҳисдан дили яйради. Лабига табассум югурди. Ўзи сезмаган ҳолда, аёл қаршишига келиб тургандек эркаланиб нигоҳ ташлади. Хосхонасига киргунча бу ёқимли ҳис уни тарк этмади. Ичкарига кириб, тасбехини қўлига олгач, унинг учун яна азобли, ҳар лаҳзаси дўзах азобидан кўра минг карра оғир дақиқалар бўшланди...

* * *

Кунлар ўтган сайин Мулла Ашур “лоладек қизариб турган” аёлни тез-тез учратадиган бўлиб қолди. Гоҳ чорбоғ ёнида, гоҳ уй ёнида, йўл устида... Аёл майин табассум ҳадя этарди-ю, мулла оғиз жуфтлагунига қадар жуфтакни ростларди. Тутқич берай демасди. Ҳар гал ўша Оқбердининг тўнғич ўғли яшаётган ҳовлининг чорбоғига кириб, кўздан ғойиб бўларди. Мулла Ашур унинг ортидан ҳайрат ва аллақандай ичикиш билан унсиз қараб қоларди. “У жудаям чиройли ва ёш, – дея ўйларди у ичи ўртаниб. – Элликнинг эшигини қоқаётган чолни бошига урадими?! Шунчаки эрмак қилаётгандир? Эрига кўнгли йўқдир... Нега унда, агар у чиндан ҳам Оқбердининг келини

бўлса, нега унда, тирноқقا зорман, деб ҳузуримга келди? Балки бу баҳонадир, шунчаки аёлларга хос макрдир?..” Мулла Ашур ўйлаб ўйининг тагига етолмасди. Шу қадар кўп ва берилиб ўйлардики, охир-оқибатда ҳаммаси аралаш-қуралаш бўлиб, фикрларичувалашиб кетарди. Баъзида хаёл сура туриб беихтиёр соқолини тутамлаётганини се-зид қоларди. Бир вақтлар, ҳалиги аёлдан ҳам ёшроқ вақтларида юрга таниғлик аждодларига ҳурмату эътиқоди баландлигидан, уларга тақлид қилганидан ва яна... сал салобатлироқ кўриниш истагида соқол-мўйлов қўйиб юборганига афсус ҳам қилаётгандек бўлиб қоларди. Мош-гуруч бўлиб қолган соқол-мўйлови уни янаям қаримсиқ кўрсатиши тайин-да!.. Қириб ташлашнинг иложи йўқ. Юрга қулги бўлади.

Вақт ўтгани сайин Мулла Ашур табиатида ажабтовур ўзгариш содир бўлаётганини пайқаб қолди. У энди аёлнинг шарпасини кўрган заҳоти ёки уни эслаганда юрагида пайдо бўлган ҳисни, шуурига соя ташлаётган шарпани ҳайдашга ҳаракат қилмас, ўзини хиёнаткор санаб саждага бош қўймас, бобомерос кўхна китобни ҳам қўлига олишдан тийилгандай эди. Шу билан бирга беш вақт намозини ўқиб, саждага бош урмаса, шифо тилаб келганларга ёрдам қўлини чўзмаса вужудини “босиб” турадиган аллақандай куч-кувватдан айрилганини сезмай қолди. Мудом қандайдир кўринмас куч таъсирига тушиб қоладиган вужуди фавқулодда қушдек енгил бўлиб қолганди. Анави аёл бир кўриниш бериб, табассум ҳадя этиб кетгач ҳам унинг шарпаси мулланинг ёнгинасида қолгандек, унинг ён-верида айланиб юргандек туюларди. Бу ўша баттол аёлнинг хотирасида сақланиб қолган тасвирими ёхуд бошқа нарсамиди, мулланинг идроки етмасди.

Бир куни уч-тўрт чол билан Турдибой тракторчининг худойисидан келишаётган эдилар. Хеч кутилмагандан Оқбердининг тўнғичи Неъмат муаллим яшайдиган ҳовлининг дарвозаси қия очилиб, ўша соҳибжамол чиқиб қолса бўладими? Хаёл сурин келаётган мулланинг бехосдан аёлга кўзи тушиб, юраги шувиллаб кетди. Бир лаҳза... Бир дақиқа юришдан тўхтаб, аёлга интиқлик билан тикилиброк қаради. Уни яқиндан кўриш истаги аллақачонлардан буён кўнглида ғалаён кўтараётган, безовта қилиб оромини ўғирлаган эди-да. Фақат бир лаҳза... Кейин ҳушини йигиб, олдинлаб кетаётган шерикларига етиб олиш учун қадамини тезлатди. Аёл рўпарасидаги қўшниси-никига ўтмоқчи шекилли, лекин гурунглашиб келаётган чолларнинг йўлини кесиб ўтмаслик учун ерга қараганча, уларнинг ўтиб кетишини кутиб турди. Ўзларича ниманидир баҳслашиб кетаётган чоллар йўл четида ийманиб турган аёлни пайқашмади ҳам. Улар яқинлашганда аёл... ердан кўз узмаган ҳолда пичирлагудек бўлиб салом берди. Бадқовоқ чоллар кўчада ўзларидан бошқа ҳеч ким йўқдек, вафур-вуғур қилишганча ўтиб кетишиди. Аёлнинг саломини эшитишмади шекилли, алик ҳам олишмади. Мулла Ашур эса... унинг овозини эшитди! Ҳатто кўз қири билан бўлса-да, унга қараб қўйиш, бош ирғаб саломига алик олиш имконини-да топди. Сутга чайилгандек оппоқ юз... писта даҳан... қайрилма қошлар... гилосранг дудоқ... ҳарир рўмоли остидан чиқиб, пешонаси-ю чеккаларини тутган қўнғироқ сочлар... Мулла Ашур кўз қири билан қараш асносида ҳаммасини кўрди. Фақат аёлнинг кўзларини кўра олмади. У ерга қараб турганди-да. Аммо унинг нигоҳини ҳис этган аёлнинг лоладек кизариб

кетгани мулланинг ошиқ кўнглини завқлантириб юборди. Энтикиб, чукур нафас олган мулла сал нарироқ бориб, негадир оғир хўрсинди. Ўгирилиб ортига қарагиси, аёлни яна бир бор кўргиси келди. Лекин юраги бетламади. Чоллар унинг безовталанганини сезиб қолишидан чўчида.

Неъмат муаллимнинг уйидан анча узоқлашгач, Мулла Ашур чоллардан бирига мурожаат қилди:

– Бу дейман, Оқбердининг тўнғичи бефарзандми?

– Неъмат муаллимми? Жужуқлари кўп. Иккинчи хотини уйиб ташлаган болани, – деди чол қуруққина қилиб. – Биринчи аёли фарзанд доғида куя-куя ўлиб кетган...

“Иккинчи аёли... Жужуқлари кўп...” – Мулла Ашур ҳайрон бўлди. Хаёлида бир-биридан жумбоқли саволлар пайдо бўлди: “Нега анави аёл ҳузуримга келганида бефарзандман деди? Ким ўзи? Нега мени тинч қўймаяпти?”

Мулла нажот кутгандек савол назари билан шерикларига қаради. Баҳсни тугатиб, ҳар бири ўз ўйи-хаёли билан андармон бўлиб қолган чоллар унинг ҳолатини пайқашмади.

Уйга келганидан кейин мулланинг ҳардам-хаёллиги янада ортди. Худойидан берилган ҳақни – дўппидек тугунни хотинига бериб, хосхонасига кирди. Кўрпачага чўзилди. Кўлинини пешонасига қўйганча шифтга тикилди. “Қариган чоғимда нима учун бу қўйга солиб қўйдинг, Тангрим? – илтижо қилди у. Сўнг ҳаммасига шу сабабчи дегандек пешонасига муштлади. – Гуноҳим не? Нечун юрагимга ўт солиб қўйдинг, Тангрим?” Мулла Ашурнинг мижжаларига ёш қалқиб, қулоқлари томон сиза бошлади. У анча вақт ўй суриб ётди. Сўнг уйқуси келгандек, мижжалари ачишиб, беихтиёр кўзлари юмилди...

Мулла туш күрди. Тушида у ўша сохибжамол билан кимсасиз бир ерларда күл ушлашиб (күнгил курсин!) юрганмиш. Гоҳ ёруғ, гоҳ қоронфу, вахимали йўллардан ўтишганмиш. Илон изидек бошикети кўринмайдиган, тор йўлнинг икки четидағи хароба уйларнинг синик дeraзаларидан кимлардир қараб тургандек, аллакимлар бақириб-чақириб гаплашаётгандек, яна кимлардир қаҳ-қаҳ уриб кулаётгандек туюлармиш. Юра-юра улар сокин бир гўшага бориб қолибдилар. Ям-яшил майсалар устига тиз чўккан аёл қўлидан тортқилаб, уни ҳам ўтиришга ундағи. Юраги ҳаприқиб, ҳаяжонланган мулла ботиниб-ботинмай аёлнинг қархисига тиз чўкибди. Майин қўллари билан юзларини силаётган аёл шамдай эриб бораётган мулланинг кўксига бош қўйибди... Қолганини мулла эслашга-да уялади...

Маст уйқуда ётган эрини уйғотишга кўзи қиймай боядан буён унга тикилиб ўтирган Хонимбуви ниҳоят уни секин туртди. Аввалига мулла ҳеч нарсани сезмади. Хонимбуви елкасидан тутиб, қаттироқ силтай бошлагач, мулла чўчиб кўзини очди. Хавотир билан тикилиб турган хотинини кўриб, иргиб ўрнидан турди. Негадир аёлига қарашга-да уялди.

– Овқат тайёр бўлди. Олиб келаверайми? – деб сўради Хонимбуви.

Мулла Ашур: “Шошмай тур”, дегандек ишора қилиб, эшик томон йўналди. Аъзойи-бадани бўшашиб, ҳорғин бўлиб қолганди у. Оёқларида жон йўқдек, қадам босишга мажоли етмаётгандек, имиллаб ҳовлига чиқди.

Ювиниб, поклангандан кейин ҳам негадир ўзига кела олмади. Овқатдан бир-икки чўқиниб, сочиқقا кўл чўзди. Дастурхонга фотиҳа ўқилгач,

яна ўринга чўзилди. Хонимбуви савол назари билан бир-икки қараб қўйди-ю, аммо индамади.

Шундан кейин Мулла Ашур дардга чалингандек сирқовланиб юрди. Ҳе йўқ, бе йўқ, беш вақт намозни қанда қилди. Шифо тилаб келгувчиларни қабул қилишдан бош тортди. Тўй-маъракаларга ҳам бормай қўйди. Хонимбувини лол қолдириб, тўшагини бошқа қилди: бир ўзи хосхонада ётадиган одат чиқарди. Хотини бунинг сабабини сўраганида, у қироат билан шундай деди:

– Кўнглим тинчликни тусайди.

Шу билан Хонимбувининг ҳам уни ўчди. Тақводор одамга бир нарса деб бўлармиди?

Дам олиш куни Хонимбуви қариндошлариникига тўйга кетди. Мулла Ашурни ҳам таклиф қилишганди. Унинг боргиси келмади. Мазам йўқ, дея баҳона қилди.

– Бугун укамникида ётиб қоламан, – деди Хонимбуви кетиш олдидан. – Эртага келин томонга куда бўлиб борасиз, дейишяпти.

Мулла Ашур “Хўп” дегандек кўзини юмибочди. Хонимбуви эшикдан чиқар маҳали ортига ўгирилиб қаради: эри чордона қурганча, хаёлга толиб ўтиради. Аёл унинг ўйchan ва дардчили, ҳатто қайғули қиёфасини хотирасига муҳрлаб олмоқчидек узоқ тикилди. Сўнг... кўзлари намланганча чиқиб кетди. Мулла Ашур хотинининг қараб турганини ҳам, чиқиб кетганини ҳам пайқамади.

Тун ярмидан оққанида, энди кўзи илинган муллани кимдир оҳиста туртгандек бўлди. Эриниб кўзларини очган мулла ёнгинасида ўтирган аёлни кўриб хуши бошидан учди. Ўрнидан турмоқчи бўлди. Аммо аёл: “Ётаверинг...” дегандек елкасини силаб қўйди.

Бу ўша!

Мулланинг кўзига лоладек қизариб кўринган,
ақлу ҳушини ўғирлаган соҳибжамол эди!

– Келдингми?.. – деди мулла базўр, негадир
унинг нафас олиши қийинлашиб бораётганди.

– Ҳа, – дея шивирлади аёл овозига сирли тус
бериб.

Лоҳас ётган вужудига илоҳий куч эниб, қони
гурира бошлаган мулла аёлнинг белидан қучиб,
ўзига тортди. Аёл эгилиб, мулланинг қўксига
бошини қўяркан, яна ўшандай сирли овозда ши-
вирлади:

– Олиб кетгани келдим...

...Эртаси куни кечга яқин тўйдан тўлиб-тошиб
қайтган Хонимбуви эрини жонсиз ҳолда кўриб
бақириб юборди.

О, ҲАЁТ!

Назар чол уч-тўрт кун сирқовланиб юриб бирдан кўрпа-тўшак қилиб ётиб қолди. Алишер дўхтирга югурди, кампири Ойнисахон бошида парвона, келин-неваралар ош-сувига балогардон!

Кунора маҳалладан уч-тўрт оқсоқол кириб ҳолаҳвол сўраб туришди. Назар чол яқинларининг, оқсоқолларнинг ўзларини тутиши, гап-сўзларига разм солиб, вақти-соатим етибди-да, деган хаёлга борди. Бироқ! Нега? Нима учун? Ахир бу дунёдан кетиш учун бирор сабаб бўлиши керак-ку! Бир ери қилт этмаса... Оғриқ бўлмаса, азоб бўлмаса...

Озгина беҳоллик демаса... Шу беҳоллик, ҳорғинлик уни ётқизиб қўйяпти, акс ҳолда аллақачон қаддини ростлаб, ҳовлида ғимирлаб юради. Чорбоғдаги ишлар ҳам ўлда-жўлда ётгандир. Чол тепаларида туриб ишлатмаса, қўлларини совуқ сувга ҳам урмайдиган неваралари унинг бетоблигини эшитишиб, дўппиларини осмонга отиб юришгандир.

Ўғли олиб келган дўхтирлар чолнинг дардкасалини топиша олмади. Биттаси ёшини сўраркан, “Етмиш беш!” деган жавобни олгач, Алишерга маъноли кулимсиради: қаричилик, яъни вақти-соати етибди-ку бобойнинг, демоқчи бўлди-ёв. Авваллари, ётиб қолмасидан бир кун бурун ҳам ҳали тўй деб, ҳали чаллари деб эшикма эшик юрадиган Ойнисахоннинг қадами тийилган, уч-

тўрт кундан буён ёнидан жилмайди. Кампирининг юзи бир оз изтиробли, аммо кўнгли хотиржамдек туюлди bemорга. Ҳол сўраб чиқсан қўшниларига секингина:

– Вақти-соати етган бўлса не қиласиз! Ҳаммамиз ҳам бир кунмас бир кун кетамиз-да у дунёга. Ажал келса бисмилло, энди! – деганини эшишиб қолди-ю, чолнинг бутун вужуди титраб кетди.

Наҳотки! Қандай журъат этяпти бу сўзларни айтишга?.. Ҳаяжон аралаш қўрқув таъсириданми чолнинг увишиб ётган оёқларига жон эниб, юмуқ кўзлари чақчайиб кетди. Кампир бирдан хушёр тортиб чол томон ўгирилди.

– Сув бер, – деди чол титроқ овозда.

Ойнисахон сув ичишига ёрдамлашиш учун ёстигини кўтармоқчи бўлганди, чол силтаб юборди. Бир пиёла сувни ютоқиб-ютоқиб ичаркан лоҳас вужудига куч эниб, ўзини бардам ҳис этди ва ҳаммани ҳайрон қолдириб, иргиб ўрнидан турди-ю ҳовлига чиқиб кетди.

Ҳовли-чорбог саранжом-саришта эди. Чол ётиб қолмасидан бурун неки юмушга қўл урган бўлса, барчаси ўзиникидан ҳам аъло даражада бажарилган; орқаларидан қувлаб юриб ишга соладиган неваралари елиб-югуриб бип-бинойидай ишлаб юришарди. «Мен бўлмасам бу уй, бу ҳовли ҳароб бўлади», деб ўйлаб юрган чолнинг ҳафсаласи пир бўлди. Тенгсалиб у ёқса ўтди, бу ёқса ўтди, бир эрмак тополмади. Соғайиб кетгани ҳеч кимни қувонтирмаётгандек туюлди унга. «Бақирок тудан кутиладиган бўлдик деб хурсанд ҳам бўлишгандир балки», деган ўй юрагини фижимлаб ўтди.

Аммо ўзининг қувончи чексиз эди. Майли, ҳеч ким суюнмаса ҳам, бор-йўғидан хабар олишмаса

ҳам, шу ёруғ дунёни, ҳаётни тарқ этмаса бас. Ҳеч нарса керак эмас, ҳеч нарса! Ҳаммасини бердим уларга!

Манави ҳашаматлар – ҳовли-жой, мол-ҳоли, кўр-кути – ҳеч бири керакмас. Бир вақтлар шу анжомлар учун жонини жабборга бериб ишлаган кунларини эслаб чолнинг жаҳли чиқди. Ҳаммаси беҳуда, арзимас матоҳ! Фақат яшаш, яшаш, яшаш! Қанийди мангу яшаса (хар гал шундай ўйлаши билан чолнинг юраги қинидан чиққудек дукиллаб уриб кетади), атиги етмиш-саксон йил (шунга ҳам ета олсанг!) умр бўптими? Анави токчада турган лаган чолнинг бувисига онасидан қолган, қаранг, одамзоднинг умри шу лаганча ҳам бўлмаяптида! Тахминан ёшини ҳисоблаб қўриб, чолнинг шу лаганга ҳам ҳаваси келди.

Шу ёшга кириб Назар чол кампири айтган «у дунё»нинг борлигига ўзини ишонтира олмади. Кўзини юмса бас, зимистон қоронғулик, йўқлик! Қолганини ўйлашга-да кўрқади.

Чол бундан етмиш беш йил муқаддам эмас, худди куни кеча туғилгандай оламга ҳайрат нигоҳи ила боқиб, ҳеч ундан кўнгил узолмайди. О, ҳаёт! Мана шу мислсиз ёруғлик, кенгликни ҳеч нарсага алишириб бўлмайди, ахир! Тип-тиник осмон, ям-яшил барглар, аллақандай, чол ҳатто номини ҳам билмайдиган ажойиб гулларнинг ёқимли ҳиди, ариқчада жилдираб оқаётган сув! Э-ҳе, буларни қандай қилиб кўз қияди.

Бир мунча вақт ўзини дадил ҳис этган чол чойхонага чиқиб ошналари билан чақчақлашиб юрди. Гўёки кексалик гаштини суроётгандек, аслида қариллик-иложсизлик мезони, энг ёқимсиз давр экан деган хаёлга бориб, ўқсиб юрди. Шу орада нима бўлди-ю ошналаридан бири тўсатдан

вафот этди. Жанозадан қайтишаётганда чоллар ўзаро сұхбатлашиб келишди: жаннату дўзах ҳақида, азроилу мункар-накир ҳақида, гуноху савоблар ва яна алламбалолар!

Чоллар ўта хотиржам ва ўта ишонч билан (худди бориб у дунёни ўз күзлари билан кўриб келишгандек!) гапиришар, бир-бирларининг сўзларини маъқуллаб ҳам қўйишарди. Бирортасининг юзида гумон аломати сезилмасди. Фақат Назар чолгина беҳаловат, бесаранжом!

«Йўқ, ҳаммаси ёлғон, – дерди унга ички бир нидо. – Одамлар ўлимдан чўчимаслик учун нариги, иккинчи дунёни ўйлаб топишган. Бу дунёдан ўтганимиздан кейин бутунлай йўқ бўлиб кетмас эканмиз, деб ўзларига тасалли-таскин бериш мақсадида ўйлаб топилган сафсата. Аслида! Аслида ўлдинг-ўчдинг! Тамом! Юрак уришдан, қон айланишдан тўхтадими, бўлди. Тананг ирибчириб, қурт-кумурскаларга ем бўлиб, тупроқقا қоришиб кетасан. Кулок эшиитмагандан кейин, кўз кўрмаса, онг ҳеч нарсани идрок қилолмаса, миянг ҳеч нарсани ўйлай олмаса... рух бўлиб яшагандан нима фойда! Кизик, ўлганимиздан кейин овозимиз қаёққа кетаркин? Ким кафолат бера олади ўлимдан кейин ҳам ҳаёт борлигига? Барибир бу дунёни ташлаб кетар эканмиз, нега яралдик? Тирикликни яратгувчи зот бундан бошқа эрмак тополмадими? Хўп, яратишга яратибди, тўқис қилиб қўймайдими?!”

Назар чол ўзи олишиб юрган кунларнинг бирида ўғли Алишер ҳалокатга учраб, касалхонага тушиб қолди. Чол ҳаллослаб етиб борганида ҳамма ёғи дока билан ўраб ташланган Алишер уни кулимсираб қарши олди. Ҳатто ўрнидан туришга-да чоғланди. Бу ҳаракатларни

кўриб чолнинг кўнгли жойига тушгандек бўлди:
ҳар қалай аҳволи оғир эмасга ўхшайди.

Шу оқшом у ўғлининг ёнида ўтириб чиқди.
Тонгга яқин сал кўзи илингандек бўлган экан,
аллақандай инграганга ўхшаш овоздан чўчиб
уйғонди. Қараса Алишер! Икки кўзи отасида,
нимадир демоқчи бўлади-ю, ҳеч чоғи келмаяпти.

– Уриниб қоласан, болам, гапирма, – дея зор-
ланди чол.

Алишер бир неча сония отасига қаттиқ тикилиб
турди-да, сўнг маъюс жилмайди ва беозоргина
кўзларини юмди.

Шу кўйи ўғли кўзларини қайта очмади.

Кутимаган зарба чол-кампири эсанкиратиб
кўйди. Айниқса Ойнисахон билан келини ўзла-
рини еб қўйишиди. Юзларини юлиб, ёқаларини
йиртиб уввос солишиди: “Алишер, мениям ёнингга
торт!”

Келин бир уйда бағрини захга бериб ётар,
кампири бир уйда! Иккала аёл ҳам бошдан-оёқ
қора кийимга ўралган. Кун-узукун хуш-бехуш
бўлиб ётишарди. Айтиб йиғлайвериб овозлари ҳам
бўғилиб қолди шекилли, ҳар замонда инграгандек
овоз чиқариб қўйишаради, яна хушдан кети-
шарди.

Ёлғиз Назар чол тирик арвоҳдек ҳовлида ғи-
мирлаб юрарди. У ҳам оғир аҳволда қолганди.
Ўғлини кўмсаб пана-панада йиғлаб олар, аммо ҳеч
вақт кампири, келини сингари ўзига ўлим тилай
олмасди.

Қайнона-келиннинг аҳволини кўриб, буларни
чалғитиши керак деган қарорга келди у ва ўйлай-
ўйлай ошхонага кириб, ярим бидон ёғни кўздан
пана ерга бекитди-да, Ойнисахон ётган уйга
кириб, букчайганча унинг бош тарафига ўтиб
ўтирди.

— Кампир, — деди оҳиста, — уйғоқмисан?

Ойнисахон күзларини базўр очиб чоли томонга каараркан, икки чаккасига икки томчи ёш думалаб, оппоқ соchlари орасига ёйилиб кетди.

— Эртага пайшанба! Уйга одам келади! Бир томчиям ёғ қолмабди-ку ошхонада!

— Анавиндан сўрамадингизми? — деди кампир хириллаб. — Ҳаммаси ўшанинг қўлида-ку.

— Билмайман, деяпти, — чол кўзларини пирпратиб, кампирга тик қарай олмади.

Ойнисахон юзини четга бурди.

Назар чол узум остидаги сўрида бошини кафтлари орасига олиб, мунғайиб ўтиаркан, кимдир ёнига келиб секингина “Дада” деб чақиргандай бўлди. Илкис бошини кўтарган чол қаршисида қовоқлари шишиб, юзлари тирналган келинини кўрди.

— Ошхонадаги бидонда ёғ бор эди! — деди келини ва юзини кафтлари билан яшириб ҳикйлай бошлади.

Назар чолнинг юраги ўртанди, ёмон ўртанди. Аммо ўзини босиб, дағал оҳангда:

— Ошхонангни ҳам кўрдим, ертўлани ҳам кўрдим, йўқ, — деди овозини бир парда кўтариб.

— Вой ўлмасам! Битта-яrimта пайтдан фойдаланиб қолган бўлмасин!

— Ҳа, ана энди ўзингга келдинг, келин. Уёқ-буёқقا қарасанг бўлмайдими? Эринг кетган бўлса тўртта ўғлинг бор. Яашаш керак, келин, яашаш керак, яашаш!

Келин кўзлари ғилт-ғилт ёш, мунғайибгина ошхона томонга ўтиб кетди. Тушликдан кейин Ойнисахон ҳам ҳовлига чиқди...

Ҳар қандай дарднинг давоси вақт дегандай, икки йил ўтиб-ўтмай Ойнисахон ҳам, келини

ҳам ўзларини анча тутиб олишди. Рўзгор ташвишларига андармон бўлиб, дардларини сал ортга ташлагандай бўлишди.

Ёлғиз Назар чолнинг дардига даво йўқ эди. У ҳамон ўзи билан ўзи олишиб яшарди.

Саксон бирга кирганида қаттиқ оғриб ётиб қолди. Кампири ҳам, келин-неваралари ҳам энди ўрнидан турмайди-ёв, деган хаёлга бориб, ими-жимида тадорикларини кўра бошлишди. Кампири куппа-кундузи уни ухляпти хаёл қилиб, сандиқдан бир тўп сурпни олиб чиқиб кетаётганини чол ўз кўзи билан кўрди. Бу сафар ҳеч ким дўхтирдан, касалхонадан оғиз очмади. Бир гал жони оғриб азоб чекканида, чидай олмасдан кампирининг қоқсувак сонини ўйиб олди. Ойни-саҳон қўрққанидан ўрнидан туриб кетди.

– Нима бало бўлди? – деди бир оздан кейин ўзини босиб.

– Нега дўхтири чақиртирмајсан? – деди чол қичқиргудек бўлиб.

– Ўзи айтмади-ку чақир деб.

– Айтмасам чақирмайсанми? Ўла қолсаю қутула қолсам деб ўтирибсанми? Мен ўлмайман, билдингми, ўлмайман! – чол жазавага тушиб бақира бошлади. – Мен яшайман, кўп йил яшайман! Сендан кейин ҳам юз йил яшайман, юз йил! Юз йил!

Чолнинг овози бўғилиб, нафаси сикди ва бирдан беҳол бўлиб, ўзини ёстиқقا ташлади. Қовоқ солиб, ўшшайиб турган кампири шошилиб ташқарига чиқиб кетди. Ярим соатдан сўнг худди шундай ўшшайганча қўшниси Абдунаби мол дўхтирини бошлаб кирди.

Абдунаби bemornining ўёқ-буёгини кўргач, бир парча қофозга алланималарни ёзиб берди.

– Бу қоғозингни молларга берасан! – деди чол негадир жони чиқиб. Кампирига еб қўйгудай бўлиб тикилди. – Мени аҳмоқ қилаяпсанларми? Тузукроқ дўхтири чақиришга ҳам ярамадила-рингми?

– Сиз шу дориларни ичинг, уколларни канда қилмасдан олинг, – деди Абдунаби пинагини бузмай. – Қаттиқ шамоллагансиз, ҳафта-ўн кунда отдай бўлиб кетасиз.

Дўхтири тўғри айтган экан, икки ҳафта ўтиб чол соғайиб кетди. Энди у уззу-кун ҳовлида, кўча эшик олдида айланиб юрар, узокроқقا, ҳатто чойхонага ҳам чиқмасди (Чоллар сұхбатидан юраги безиллаб қолганди). Йўлда қоқилиб кетиб, бир нима бўлиб қоладигандек жуда эҳтиёткорлик билан қадам ташларди.

– Оёқни узатиб ётса бўлмайдими? – дерди кампири ҳар замонда зарда қилиб.

Чолнинг эса уйга киргиси йўқ эди. Шу сабабли кампирининг сўзларини эшитмасликка олиб, ҳовлида юргани-юрган. Соғайиб кетганидан буён кампирига зуғум қилмай қўйган, айниқса келинга малол келмасин деб озиқ-овқат масаласида ҳам инжиқлик қилмасди. Тушлик ё кечликка чақиришганда:

– Бир бурда нон, бир пиёла чой бўлса бас, менга, – деб қўярди минфиirlab.

“Кўп емоқ ҳам кони зиён, – деб ўйларди у бир вақтлар аллақайси китобдами-журналдами ўқиғанларини эслаб. – Узоқ умр кўрай десанг кўп ема, дейилганди ўша китобдами-журналдами. Қайси китоб экан? Кимники эди-я? Луқмони Ҳакимникими?”

Чол невараларидан бирини чақириб, “Менга Луқмони Ҳакимнинг китобини топиб кел мак-

табингдан”, дея илтимос қилди. Икки кун ўтиб ўша невараси:

– Ота, мактабимиз кутубхонасида Луқмони Ҳаким деган ёзувчининг китоби йўқ экан, – деди ю, югуриб ҳовлига чиқиб кетди.

Чол хафа бўлди. Неварасидан ҳам, китобни топиб бермаган ўша кутутхоначидан ҳам кўнгли қолди. Аммо начора, дардини кимга айтсин?

Майсалар кўкариб, дараҳтлар гулга кирган кунларнинг бирида кампири ётиб қолди. Дўхтир чақиришга ҳам, касалхонага боришга ҳам кўнмади.

– Бу ёғи яқин қолди, чол, – деди у ҳансира б. – Бир кам саксонга кирдим, армоним йўқ. Сиз ҳам болаларни қийнаб нима қиласиз. Ҳеч қўрқинчли ери йўқ буни! Ахир Алишернинг олдига борамиз. Сиз шуни ўйланг, Алишерни ўйланг! – Кампирининг нафас олиши сустлашиб, қорачиғи тепага тортила бошлади. Тили каловланиб, алланималарни ғўлдирагандада, чол базур илғаб олди:

– Кўнглингизни оғритган бўлсам, кечиринг, мендан рози бўлинг, – деди-ёв.

Сўнг “пuff” этди-ю жон таслим қилди-қўйди. Оппа-осон! Хамирдан қил суғургандай!

Кампирининг ўлимидан кейин чол ўзини анча олдириб қўйди. Яхшими, ёмонми, ҳар қалай кўз очиб кўргани, жуда ўрганиб қолган экан. Айниқса, сўнгги сўзларини эсласа, аъзойи-бадани титраб кетади. “Аҳволимни сезган экан, шўрлик,” дерди-ю кўзидан дув-дув ёш тўкиларди. Ҳийла вақт гарангсиб юрди, аммо кейин ўзини ўнглаб олди. “Менинг ёшимда кўп куйиниш ярамайди, – дерди у ўзига-ўзи. – Асаб толалари ўлиши мумкин.”

Чол ҳовлида ўзини бегонадай сезарди. Аввал ўғли, кейин кампирининг вафотидан кейин бу

уйда ҳақсиздай бўлиб қолди. Фақат келини – Алишернинг аёли олтмиш беш ёшида, ертўлага тушаётиб қоқилиб кетиб ўша ернинг ўзида тил тортмай жон таслим қилгунга қадар чолнинг иссиқ-совуғидан хабардор бўлиб турди. Кирчирини ювиб, дуосини олди. Шунга довур чол ўзининг ёшини эслаб, ҳеч янгишмасдан ҳисоблаб юрарди. Келинининг ўлимидан сўнг унинг ҳаётида парокандалик юз берди. Неваралар, невара келинларнинг у билан ишлари бўлмай қолди. Гоҳ вақтида (жуда кам ҳолларда), гоҳ бевақт чойнонини бериб туришганини ҳисобга олмаганда, ҳеч ким ундан ҳол сўрамай қўйди. Чолнинг ҳам уларга кўзи учиб тургани йўғу, ҳар қалай одамгарчилик юзасидан дегандай.

Ўзларидан кўпайишиб, хона етишмай қолганида чолдан сўрамай-нетмай уни ошхона ёнидаги хужрага кўчириб ўтқазишганда ҳам у оғринмади. Аксинча, уларнинг устидан кулишга-да қудрати етди. Ҳали улар ҳеч нарсадан бехабар, ўзларини дунёга устун бўлади деб ўйлашади шекилли! Ҳа майли! Чол хотиржам, жимгина, ҳатто бир оз кулимсираганча эшикдан кирган-чикқанларни кузатиб қоларди. Зеро, тирикликтининг ўзи катта баҳт эди унинг учун. Ёруғ дунёда борлигини ҳис қилишнинг ўзи улкан қувонч бағишларди қалбига.

Кунларнинг бирида ҳовлидан қий-чув, йиғисиги овози эшитилиб қолди. Эваралардан бири оламдан ўтди шекилли! Чол тўнгич неварасининг ўғлини элас-элас кўз олдига келтириб, юраги бир ҳаприқди. Анчадан буён кўнгли бу қадар юмшамаган эди. Наҳотки ёлғизлик жонидан ўтган, яқинларининг йўқлиги билинган бўлса? Аслида у ёшига нисбатан анча дадил, ҳовлига чиқиб юришга-да қодир эди. Бироқ уни ҳеч ким на


азасига, на тўйига йўқларди. Гўё у йўқ, унунтилган! Одамларнинг эсидан чиқиб кетгандек эди гўё.

“Арзимаган майда-чуйда ташвишлар учун куйиб-ёнишнинг ҳожати йўқ, – деб ўйлади чол, аммо киртайиб, қовоқлари ичига ботиб кетган кўзларидан дув-дув ёш тўкиларди. – Ҳаммаси беҳуда!”

Чолнинг кўзлари хиралашиб қолган бўлса-да, онг-шури ҳамон теран, дераза ойнасидан тушиб турган бир тутам нур, бир парча осмонга тикилиб ётиб, ҳамон тириклик лаззатидан баҳраманд эканлигидан қалби қувончга тўларди. Яна бир мунча вақт ўтиб, Назар чол ёшини ҳисоблашдан бутунлай адашиб кетди. Тишлари тўкилиб, янги сут тишчалар чиққанига ҳам алазамон бўлган. Ундан кейин невараси оламдан ўтди, сўнг эвараси! Бошқаларини у танимайди, ҳатто исмларини билмайди. Аллақандай чорпахил йигитлар! “Нашотки шулар менинг зурёдим бўлса, – деб ўйларди у ўша чорпахил кишиларни ҳар замонда кўриб қолганида. – Эвараманинг неврасими ёки неварамнинг ўғлимикин?”

Бора-бора чол ҳужра деразасидан тушаётган бир тутам нурни кўриш имкониятидан ҳам маҳрум бўлди. Қулоғи ҳам эшитишдан чарчади.

Ҳамма ёқ зим-зиё, тун-куннинг фарқи йўқ эди. Шунда ҳам чол тушкунликка тушмади. Ундан хабар олиб турувчи кишилар ҳам аллақачон бегона одамлар! Салом йўқ, алик йўқ, бир коса ёвғонни “тўқ” этиб қўйишади, тўнғиллай-тўнғиллай чиқиб кетишади. Чол сассиқ такадай бадларига урганлигини яшириб ҳам ўтиришмасди. Чолнинг кўзи ожиз бўлмаганида, қулоғи оғирлашиб қолмаганида уларнинг ахволини кўрган, ширасиз сўзларини эшишган бўларди, аммо барибир кайфия-



тини бузмай, уларнинг ортидан тиҳсиз милк-ларини кўрсатиб тиржайганча кузатиб қолган бўларди.

Овқатдан кейин бир соатми, икки соатми, балки кўпроқ вақт ўтгач, яна бирори илимилик чой қўйиб кетарди. “Қайноқ чойни ичаман деб куйиб қолмасин дейишса керак-да, раҳма-ат”, деб ўйлашга чолнинг фаҳм-фаросати етарди.

Тимирскиланиб, бир коса ёвғонни ичиб олиб, яна жойига чўзиларди. Тирикликтининг барча воситаларидан – кўриш, эшитиш, юришдан маҳрум бўлди, энди чол ўлса керак деб ўйлашди атрофдагилар.

Баъзилар унинг бир боғлам пиёздай бўлиб ётганини кўриб: “Эй худо, намунча хўрламасанг бу бечорани, нима гуноҳи бор эдики жонини олмаяпсан, – дея нола қилишарди. – Ахир ўлон-маслик ҳам азоб-ку!”

Чол эса уларни кўрмасди, эшиитмасди, аммо гайри шуурий равишда кимлардир томоша қилаётганини сезиб қолиб, қўлига илинган нарсани – косами, чойнакми олиб, эшикни мўлжаллаб туриб улоқтиарди.

Сўнг эса аввалгидан ҳам теранроқ, аввалгидан ҳам равшанроқ мулоҳаза юритиб, кўнгли қувончга тўларди: “Мен энди ҳақиқий ҳаётимни яшаяпман! Мен яшаяпман!..”



ҚАДИМИЙ ҚҰШИҚ

“Ана у! Келяпти! Ана, анави ёқдан келяпти. Қара, қарагин. Нимага тұхтаб қолдинг? Бормайсанми олдига?

– Вой шарманда! Вой юзсиз... Анави юзсизни қара!

– Тангрига ибодат қилиш ўрнига...

– Қизим, жон қизим, иймон келтир, тавба қил. Энди у ёқнинг кераги йўқ сенга. У ёқнинг ери ҳам бошқа, осмони ҳам! Оллоҳ иймон келтирған бандаларининг гуноҳларидан кечгувчиdir. Иймон келтир, болам, иймон келтир, иймон нурига чулған-гайсан!..

– Қиёмат куни бир тарозу қурилурки, ани беадад сутунлар била барпо қилишур, Ҳар бир устуннинг узунлиги мағриб бирла машриқнинг миёнасига баробардур. Анинг ҳар бир палласи ер юзига баробардур. Бир палласи Аршнинг ўнг тарафыда турурки, анга савоб солинур. Бир палласи Аршнинг чап тарафыда турурки, анга гуноҳ солинур.

...кимнинг тарозуси енгил келса, бас, андоғ кишининг онаси Ҳовиядур.

– ...

Шивир-шивирларга тўлган олам қалбини тилиб юборган ўтли хўрси ниқни илиқ шамол олисларга олиб кетди...”

Султонмурод яна ўша таниш уй – қишлоқ чеккасидаги хароба олдига келиб қолганини майда

ёмғир томчилари юзига урила бошлаганидан кейин фаҳмлади: “Нега келдим бу ерга? Ахир энди у йўқ...”

Томчилаётган ёмғир бирдан жалага айланди. Момақалдироқ гумбурлади. Қорайган осмон бағрини чақмоқ тилиб ўтди.

Оlam шовқин-суронга, тасир-тусур товушларга тўлиб кетди.

Йигит паришонлик билан кимсасиз кўчада қақ-қайганча туриб қолди, жиққа хўл бўлган кийимлари оғирлашиб вужудини эзаётгандек, совқотиб қалтираётгандек елкасини қисиб қунишди, шусиз ҳам анчадан буён пароканда ўй-хаёллари чил-чил бўлган биллур синиқларидек ҳар томонга сочилиб кетди.

Момақалдироқ ҳамон гулдураг, тинимсиз чақмоқ чақар, олам олов ичида қолгандек эди.

Султонмурод аста ортига қайтди. Беш-олти одим юргач, қаршисидан муюлиш чиқди. Муюлиш четида улкан тош қорайиб турарди. Йигит шу тош устига чўкди. Ҳорғинлик билан нам тошни силаркан: “Қара-я, бир бечора ўтиб кетди-ю, лекин сен билан мен ҳамон бормиз, яшаяпмиз...” деб кўйди секин.

Шу ерда ўтириб у нималарнидир ўйлаб олмоқчи бўлди. Ўйлаб олиш учун бундан ортиқ қулай ва холи ер йўқдай эди. Аммо... Йигит уч-тўрт қадам нарида шу томонга қараб келаётган Холиқ амаки билан тегирмончи чолни кўриб асаби бузилди. “Шу ердаям тинчлик йўғ-а. Алламаҳалда кўчада нима бор экан бу чолларга?!“

* * *

Бу уй Абдураҳмон эшонга тегишли эди. Эшон бир неча йил муқаддам қариб-чуриб оламдан

ўтди. Ҳайҳотдек ҳовлида ундан ёдгор бўлиб иккинчи хотини Шоҳсанам қолди. Эшон бобонинг катта аёлидан фарзандлари бор, лекин улар бошқа-бошқа яшашарди. Эшон бобо диннинг барча талабларига риоя этган ҳолда, тўнгич аёлини ҳар томонлама тъминлаб қўйганди. Ёлғиз Шоҳсанам...

Дарвоқе...

Эшон бува уни – тунда қўққисдан гумбурлаган момақалдириқдан қўрқиб, юраги бесаранжом уриб қолган навниҳол қизни – аввал даволаган, етти кун етти маҳал дуо ўқиб соғайтириб юборган, кейин эса яна дуо ўқиб, уни ўзига оғдириб олган...

Ҳар қалай, одамларнинг оғзидағи гап шундай.

Бу гаройиб никоҳ ҳақида эл ичида яна бир гап оғиздан-оғизга ўтиб юрадики, буниси аввалингисидан-да жумбоқли. Эмишки, эшон буванинг дуосидан шифо топган қизнинг ўзи уни йўқлаб борганмиш...

Иложисиз қолган ота-она нима қилсин?..

Бу гап-сўзларга фақат бир йигит ишонмасди, ишона олмасди. Шу ҳақда ўйлади дегунча ўзини қўйгани жой тополмай, кенг оламга сиғмай қоларди: “Бундай бўлиши мумкин эмас! Мумкин эмас! Тўғри, унинг тобсиз бўлгани рост, лекин ҳеч қачон... Ҳеч қачон! Уни мажбурлаган бўлишлари мумкин. Чорасиз қолиб, ноилож рози бўлгандир. Аммо ҳеч қачон... ҳеч қачон! Чунки... чунки... У мени севади, мени!”

Бу рост эди. Бу ҳақда бутун қишлоқ аҳли хабардор бўлмаса-да, ҳар қалай, teng-tўшлари ивир-шивир қилиб юришарди.

Дарвоқе, бир кеч – ҳали шом тушиб улгурмаган маҳал эди – мактаб ёнидаги якка тут остида уларнинг гаплашиб туришганига Абдураҳмон эшоннинг ҳам кўзи тушганди.

— Худо хоҳласа, никоҳимизни мана шу кишига ўқитамиз, — деганди ўшанда Султонмурод ёшига нисбатан анча қорувли, кимхоб камзули ўзига ярашган эшоннинг ортидан қараб қоларкан.

Киз эса уялиб кулимсираган... Кейин тақдир чархпалаги тескарисига айланиб кетди. Султонмурод юрагини чанглаб қолаверди.

Тўйдан кейин Султонмурод уни бир марта узокроқдан кўрди. Жувон ҳам уни кўрдими-кўрмадими, билмайди, эҳтимол, кўзи тушгандир-у, ўзини кўрмаганликка олгандир.

Султонмурод эса бу кунни эслаб қолди. Унута олмади. Янгишмаса, ўша куни чоршанба эди, санаси ҳам эсида — 12 май, пешин чоғи эди... Бироқ — буни қанчалик истаётган бўлмасин — жувоннинг олдига бориш тугул, унга тикилиброқ қарашга-да ботина олмади. Нима бўлган тақдирда ҳам энди у қишлоқ аҳлининг эътиқодига сазовор бўлган тақводор одамнинг завжаси!..

Ҳамма-ҳаммасини унумтоқ истади. Бунинг йўли топилди — уйланди. Тақдир ҳазили — келин Шоҳсанамга қариндош эди.

Аммо барибир ҳувиллаб ётган кўнгил мулкига файз кирмади. Юрагини бир алам эзиб ётардики, бунга чидаб яшагандан кўра, дўзах оловида куйиб кул бўлган афзал эди. Кунларнинг бирида у барча-барчасига — уят-андиша, иймон-эътиқод — ҳамма-ҳаммасига кўл силтади. Ва...

Султонмурод ўзини эшоннинг ҳашаматли дарвозаси олдида кўрди: “Ундан сўрарим бор... Нега... Нима учун бундай қилди?”

Бироқ...

Эшикни тақиллатишга ҳам улгурмади.

Ҳашаматли эшик шиддат билан очилди.

Ва остоноада Абдураҳмон эшон пайдо бўлди.

бўлади, қайнок, бетакрор бўсалар таъмини тұяды лаблари...

Иттифоқо...

Ўша куни у ишга кечикибрөқ борди. Эрталабданоқ бошлиқдан эшитадиганини эшитди. Бунинг устига ҳисобот дафтарчаси уйда қолиб кетибди. Бошлиқдан яна насибасини олди. Бу камлик қилгандай, бошлиқ уйига бориб, ўша жин ургур ҳисоботни олиб келишни талаб қилди. Ишхонадан уйгача саккиз чақирим, кун иссиқ; бекатда ярим соат туриб улов пойлади, аммо ҳадеганда уловдан дарақ бўлавермади, асаблари ййнаган, чарчаган, бўғилган бир алфозда пойи пиёда йўлга тушди. Чамаси бирор соатлардан кейин у ўзи яшайдиган кўча бошига етиб келди. Шу ерда тўхтаб бироз нафас ростламоқчи бўлди. Аммо... Ох, меҳрибон парвардигор! – шунча ҳаракат, шунча заҳмат ва кўргуликлар ёлғиз Унинг учун, Уни кўриш учун эканлигини ўша дақиқада, ҳатто ундан олдинроқ ҳам қайдан билибди? Билганида эди эҳтимол... Ё, қодир эгам, тағин денг шундоқ рўпарасидан чиқиб қолди! Албатта У ёлғиз эмасди. Ёнида қандайдир бола кўтарган аёл... Ва атиги бир дақиқа, йўқ, ярим дақиқа, эҳтимол сониянинг аллақайси бир улушида – бехосдан уларнинг нигоҳлари тўқнашди! Ҳамроҳ бўлмиш аёл нимадир деди, лекин Шоҳсанам эшитмади. Олам сув қўйгандек жим-жит бўлиб қолганди. Кейин яна ҳаммаси аввалги ҳолига қайтди: шовқин-сурон, вағир-вуғир...

Шоҳсанам ерга қараганча ёнидан, шундоққина ёнгинасидан ўтиб кетди. Султонмурод уни анчадан буён бунчалик яқиндан кўрмаган, кўзларига термулмаган эди. Йигитнинг ҳаётидаги энг порлоқ кун бўлди ўша кун.

нимасига учди эшон бува?.. Ҳатто пиёваниям
эплаб пишира олмайдиган қўли синик-ку бу!

Султонмурод эса...

Шу “қўли синик” жувонни бир кўришга муштоқ,
раҳматли эшон буванинг кўчасидан ўтишдан
ўзини зўрға тийиб юрарди. Ахир, эҳтимол, чиндан
ҳам у уқувсиздир... Лекин... рангпар хушбичим
чехра, нозик даҳан, тик қомат, кўзлар... худди бу
оламда ўзидан бошқа ҳуриқо яшамайдигандек
чақнаб боқувчи нигоҳлар...

Буларни унутиб бўладими?

Йигит фақат бир нарсадан хавотирда эди, ҳатто
қўрқарди. Бу қўрқув туйғуси шу қадар улкан эдики,
унинг ҳайбатига бир қур назар ташлашга-да қурби
етмасди: “У мени унуган бўлса-чи?!..”

Йил сўнгида эшон буванинг руҳи-покига атаб
йил оши берилди. Шундан кейин бир ҳафта ҳам
ўтмади, бирдан совчилар ёмғири ёғила бошлади.

– Эшон буванинг ҳурматини сақлаб шунча
кутдик. Энди бир нарса де. Укам ёмон йигит эмас.

– Хўп, деяқолинг энди, илтимос. Акамнинг
шашти баланд, кўнмаса опқочиб кетаман, деяпти!..

– Бу дунёдан ҳеч ким тоқ ўтмаган, қизим.
Сенам ахир бир кун уй қиласан-да, ёш умрингни
хазон қилмасанг-чи.

– Ёлғизлик азоби ёмон. Мана, менинг амаким
ўн беш йилдан буён ёлғиз яшайди. Ўн беш йил-а!
Бечора хотини жон бераётганда бошқага уйлан-
майман, деб ваъда бериб қўйганди. Энди билсан...
босиб юрган эканман, дейди шўрлик амаким.

– Хўп деса, кафтимда кўтариб юраман, деяпти
акам. Илтимос... ҳеч бўлмаса бир оғиз гаплашиб
кўринг ўзи билан.

Дунё сўққабош эркакларга тўлиб кетгандек эди.
Бироқ!

- Худога шукр...
— Сен?!.
— Ҳа... Эрталаб... боя... эшитдим... эшитиб қолдим...

Султонмурод энди эътибор берди. Жувоннинг юзи докадек оппоқ, нигоҳлари хавотирга тўла эди. У ҳатто тузук-қуруқ ҳол-аҳвол ҳам сўраша олмади. Қаттиқ қўрқиб кетганида одам шу кўйга тушади.

— Кўрқма, — деди, дея олди Султонмурод. — Кўрқма...

Жувон бош ирғади.

Бори шу.

Кейин у узалиб, қўлидаги тўрхалтани дераза токласига қўйди-ю кетди.

Султонмурод шу куни кечгача дераза олдидан нари кетмади. У энтикарди, хўрсинарди. Касалхона дарвозаси томон кетган йўлакка унсиз тикиларди...

Шу куни у яна бир нарсага икрор бўлди: қалбига яшаётган туйғу абадиятда ҳам руҳини тарк этмайди!

— Нимага ўзбошимчалик қилиб юрибсиз? — дея сўроқقا тутди хотини Султонмуроднинг жабрланувчи сифатида даъвосидан воз кечганини эшитиб, тутақиб кетганидан сира ҳам ўзини боса олмай. — Хаёлингизга нима келса қилаверасизми? Хўп, даъво қилишдан воз кечиш ниятингиз бор экан, аввал шартингизни айтмайсизми? Жилла курса касалхона харажатини кўтарсаям ҳарна эдида!

Султонмурод хотиржам тутди ўзини. Хотини гапирганда энсаси қотмади бу гал. Ҳатто унга кулиб қаради. Хотини унинг юзи табассумдан бу қадар ёришиб кетганини яқин-ўртада кўрмаганди.

“Қанотим бўлса-ю қошингга учиб борсам!”

Улар бир неча дақиқа бир-бирларига сўзсиз тикилиб қолишиди. Эшоннинг нигоҳлари ғазаб ва нафратга тўла... Оқиш, лекин айни дамда гезарган, бўзарган чехрасида шафқатсиз ифода қотиб қолган...

Султонмурод бўшашиди. Аллақандай ғайритабиий куч қаршилигига дуч келгандай ўзини жудажуда ожиз ҳис этди. Бояги шаштидан асар ҳам қолмади.

Аста бурилиб ортига қайтаркан, алам ва изтиробдан инграб юборди...

Шу-шу бўлди-ю, йигит йўли тушган тақдирда ҳам эшоннинг кўчасини айланиб ўтадиган бўлди.

“Мана энди ундан абадул-абад айрилдим, – деб ўйлади Султонмурод. – Энди уни ҳеч қачон олисдан бўлсаям кўра олмасам керак!”

Дарҳақиқат, шундан кейин у Шоҳсанамни узоқдан бўлса-да кўришдан маҳрум бўлди. Чунки...

– Тавба қилдим, қариганда ёш хотинга уйланган эркак эсдан оғиб қоладими дейман-да, – деб қолди бир куни Султонмуроднинг хотини. – Эшонбувани айтаман-да. Остона ҳатлаб кўчага чиқсанг оёғингни уриб синдираман, дебди Шоҳсанам опамизга. Тунов куни бечора деразадан қараб турган экан, Эшонбува тоза таъзирини берибди.

Султонмурод чурқ этмади. Ичидан зил кетди. Айрилиққа, азоб-укубатларга тўла дунё қад ростлади қархисида. Бироқ йигит тишини тишига босди, чидади, чунки барбод бўлган дунё вайроналари устида шундай улуғвор кошона бунёд этгандики, бу кошонага истаган ерда, истаган вақтида киради-чиқади; бу ерда изтироблардан зада қалби ором топади, қийғос гуллаган шафтолининг ёқимли ҳиди димоғига урилгандек

Орадан кўп вақт ўтмади.

Абдураҳмон эшон тўсатдан бандаликни бажо келтириди.

Шоҳсанам бева қолди.

“Энди у ё бу ҳовлидан бош олиб кетади, ё кимгадир эрга тегади, – деган гап топиб келди Султонмуроднинг хотини уйига бориб. – Албатта, эрга тегади-да. Тегсаям тегади, тегмасаям тегади. Ахир ёш бўлса, овунадиган фарзанди бўлмаса. Тегади-да, тегмай қаёқقا борарди? Айтмоқчи, шаҳардаги амакимизнинг бултур хотини ўлганди. Ўртага тушсаммикин?”

Султонмуроднинг юраги зирқ этди.

Ёмғир фасли ўтди.

Жазира маънди.

Сокин ва осуда сунбула кириб келди ҳамки, Шоҳсанам на эрга тегди, на қишлоқдан бош олиб кетди. Эшон бувадан қолган ҳовлида ёлғиз ўзи яшайверди. Жувоннинг харидорлари кўп эди. Лекин нима учундир бирор кимса эшоннинг остонасини ҳатлаб ўтишга журъат этолмасди. Шоҳсанамнинг ўзи ҳам кўпчиликка қўшилмас, тўй-маърака тугул, ақалли, кўча-кўйга-да чиқмай кўйганди.

Тириклай кўмилгандек эди гўё.

Эшон бувадан қолган ҳовли-жойдан путур кета бошлади.

– Қаров бўлмагандан кейин шу-да! Ҳамма нарса ўлда-жўлда ташлаб қўйилгандан кейин шунақа бўлади! – дея жаварди Султонмуроднинг хотини ҳар кеч. Бева бўлиб қолганидан кейин Шоҳсанам нима учундир унга ёқинқирамай қолганди. – Эсиз... эсизгина шундай уй! Раҳматли эшон бува бўлганда... Тавба, қош-кўзини бўяшдан бошқасига ярамайдиган бу ипириски хотиннинг

— Йўқ, дедимми, йўқ! — битта сўзда туриб олди Шоҳсанам.

Сабабини сўраганларга тишини ёрмади.

— Бешёғочлик киши ёмон одамга ўхшамайди, — дея Султонмуродни янгиликлардан хабардор қиларди хотини билибми-билмайми. — Шу кишига тегса бўларди. Иккита боласи бўлса нима қипти? Тайёр дастёр-ку улар. Бошқаларни-ку писанд қилмади.

Султонмурод чурқ этмасди. Фақат юзи аввал оқаринқираб, кейин қофозга айланиб борарди...

Назарида хотини “ҳамма гап”дан хабардор — у атай Шоҳсанам ҳақида “хушхабарлар” топиб келаётгандай... Бу даҳшат! Ахир ёнингдаги одам кўнглингдан нелар кечаетганини сезиб турса... азоб бундан ортиқ бўладими...

Орадан анча вақт ўтди. Кунларнинг бирида ишдан қайтаётган Султонмуродни машина тутиб юбориб енгил жароҳат олиб, касалхонага тушиб қолди.

Шу куни эрталаб ҳаво булат эди. “Ёмғир ёғса эҳтимол”, — дея ўйлади Султонмурод зирқираётган жароҳатига кафтини босиб. У ёстиқдан бошини кўтарди дегунча дераза оша ташқарига термуларди. Ўша куни ҳам у бир муддат дераза рахига пешонасини тираб турганди. Қаттиқ ўйга толганидан вақт чошгоҳга яқинлашганини, булат кўрпаси йиғилиб, осмоннинг бир чети очилаётганини ҳам пайқамади.

Бир маҳал...

Ё раббий!

“Йўқ, туш кўряпман, бу туш!..”

Султонмурод кўзларини юмиб-очди, очиб-юмди ҳамки, қархисидаги сароб тонгги шудрингдай йўқ бўлиб кетмади. Маъюс, маҳзун жилмайган чехра...

Аммо энди у бўз йигит эмас.

Тангри ёрлақаб унда қанот пайдо бўлганда ҳам энди унинг ёнига бора олмасди. Бунга иқор бўлгани сайин ич-ичидан нимадир кўтарилиб томоғига тиқиларди-қоларди: “Тангрим...”

Шоҳсанам эса яна уйига қамалиб олган, ташқи дунё билан алоқасини узганди гўё.

Бир куни...

Хотини кечки овқатни дастурхонга қўйиб, ўзи ошхона томонга кетди. Ва зум ўтиб қўлида тугунча билан қайтди.

– Санам опамизнинг тоби йўқмиш, – деди у Султонмуроднинг саволчан нигоҳига жавобан. – Бора солиб кўриб келай. Ҳар қалай, бир илдизнинг томиримиз...

Султонмурод тахта бўлиб қолди. Оғзидаги лукмани юта олмади. Гапирмоқчи, нимадир демоқчи бўлди, лекин томоғига қилтеноқ тиқилиб қийналётгандай бўғзидан хирқироқ товуш чиқди, холос.

Хотини унга ғалати қараб қўйди-да, индамай чиқиб кетди.

Султонмурод сўри четини тутди. Кучи борича маҳкам ушлади. Ҳозир кимдир оёқ-қўлини чандиб боғлаб ташлашига-да рози эди: Йўқ! Йўқ! Бу мумкин эмас!..

Ярим соатлардан кейин хотини келди. Ранги оқаринқираган...

– Санам опамизнинг анча мазаси йўқقا ўхшайди, – деди у сўри четига ўтиаркан. – Вой худойим-эй... Дард бераман деса осон экан-да. Бечора... Адойи тамом бўпти!

Аёлнинг аёлга раҳми келдими, аҳвол жиддий!

Султонмуроднинг ичида нимадир чирт узилди. Қулоқлари шанғиллади. Хотинининг жаврашлари узоқ-узоқлардан келаётган товушдек элас-элас эшитиларди:

нарди. Султонмурод уй ичига зимдан разм солди: ҳаммаёқ шипшийдам, тахмонда тўрт-бешта кўр-па-ёстиқдан бошқа қўлга илинадиган нарса йўқ эди.

Жувон буни сезди.

– Дори-дармонга деб... Ўлсин, қанча дорини ичиб юбордим. Барibir фойдаси бўлмади.

Ўртага зилдай сукунат чўкди.

Султонмуроднинг нимадир дегиси, аёлнинг кўнглини кўтаргиси, шу билан ўртадаги ноқулайликни кўтариб ташлагиси келарди. Лекин ҳали уйидан чиқмасдан олдин ич-ичидан турган қалтироқ ҳамон босилмагани сабабли, сира ҳам гапира олмаётган эди.

– Биламан, мендан хафасиз, – деб қолди жувон бир маҳал.

Султонмурод шунча уринса-да, эплолмади – бўғзидан оғир хўрсиниқ отилди.

Аёл кўз учиди унга қараб туради. Нимадир дейиш лозим...

– Нималар деяпсан... деяпсиз... Нега хафа бўларканман?..

– Билмайман, ҳатто тушуна олмайман ўзимга ўзим... Менга нима бўлган? Худди хушим ўзимда эмасдай... Мана ҳозир ҳам... – деди аёл ўзига ўзи гапиргандай паст овозда. Бирпас жим турдида, сўнг яна деди: – Баъзида нимадандир жуда безовта бўламан. Хаёлимга нималар келмайди? Мана ҳозир яна... Мендан нафратлансангиз ҳам арзийди... Мен шунга лойиқман... О, йўқ, йўқ!..

Жувон юзини кафтлари билан тўсиб, хўнграб йиғлаб юборди. Юзи бир бурда... Бармоқлари қонсиз ва нимжон... Қоқсуяқ елкаларида аянчли титроқ...

Сўнгги бардош ҳам тугади:

— Бу деворлар соқов эмас. Ҳар оқшом улар тилга киради.

— Ўлай агар, сўзларингга тушунган бўлсам.

— Э, қўяверинг бу ёғини. Бояги гапим гап. Шундай юраверайлик. Бизни ҳеч ким, ҳеч нарса ажрата олмайди!

Йигит эътиroz билдиrmади.

“Балки у ҳақдир? — деб ўйлади ичидা. — Эҳтимол, шуниси маъқулдир...”

Биз режа тузамиз, аммо тасодиф уни барбод қиласди. Кутилмаганда фожия юз берди. Ҳа, бу — тасодиф, машъум тасодиф эди. Ҳатто ғайритабиий сир-синоат эди. Кутилмаганда содир бўлди у. Шоҳсанам ярим тунда қўққисдан гумбурлаган момақалдироқдан чўчиб уйғонди-да, чидаб бўлмас даражада санчаётган юрак хуружидан йигирма дақиқа азоб чекди-ю... омонатини топшириди-кўйди. Султонмурод довдираб қолди. У ҳеч нарсани идрок қилолмасди. Йўқ, идрок қиларди, аммо ҳеч нарсага тушунмасди. Ахир шу кеча ҳарорат қирқ даража иссик, ҳаво қуриб қолгандек нафас олиш амримаҳол, барқут осмонда юлдузлар чараклаб турар, қилт этган эпкин йўқ, лекин бутун борлиқни, курраи заминни ларзага солиб, момақалдироқ гумбурлади!..

Ё алҳазар!

Ер ёрилиб кетгудек бўлди-я!

Дафн маросимидан қайтиб, очиққанларидан шоша-пиша овқатланаётган эркагу аёл, одатда-гидек, яъни бошқа ҳамма жойда бўлганидек, марҳума ҳақида гапиришди.

— Тавба, минг марта тавба, шундай қилиб ҳам одам ўладими? Жон бериш ҳам осон экан-да. Биргина момогулдирак!..

— Йўқ, бу ерда бошқа бир гап бор.

— Ўзидан кўрсин! Ҳаммасига ўзи, фақат ўзи
Гайбдор. Вақтида эр қилганида бу азоблар йўқ эди.
Ҳали бу кунлар ҳолва. Бу ҳали азоб эмас. Ҳақиқий
азоб ҳали олдинда! Бир кунлар турибди ҳали. Қон
йиғлайди, қон!..

Хотини башорат қилган ҳалокат яқинлашиб
қолгандек Султонмуродни даҳшат босди. Кўзла-
рини чирт юмди. Аллазамонлардан буён қадам
ташлашга изн бермаётган, темир тўсиқдек йўлига
ғов бўлган куч исканжасида тўлғонди.

— Мен ўшанда айтгандим, билгандай, кўнглим
сезгандай айтгандим, — ҳамон лаби-лабига тег-
масди хотинининг. — Амакимга кўнмассангиз, ана
Тўйчи муаллимни ушланг дегандим. Ёлғиз яшаш
осон эмас. Иссиқ жон... Ўзи мени норози қилган
одам ўнгланмайди!

— Бас қил-л!.. — тишларини ғичирлатди Султон-
мурод. — Бас қил-л!..

— Ҳа, намунча...

Хотинининг гапи чала қолди. Султонмурод
кутилмаганда ирғиб ўрнидан турди-ю, сўридан
сакраб тушди ва кўча эшик томон отилди.

Тўлин ой тераклар устида осилиб турарди.
Аллақандай шовқин-суронсиз, маҳзун кеча эди.
Султонмурод шу оқшом муюлиш четида қорайиб
турган тошни кўрди. Ва анча вақтгача тош устида
хаёл суриб ўтирди. Кейин бор кучи-ю иродасини
тўплаб, эшон буванинг нураётган уйи томон юрди.

— Бу ҳаммаси... сиқилганимдан... Қўрқманг,
ўтиб кетади, — деди Шоҳсанам синиқлик билан.
Унинг юзи зарьфарон, кўзлари киртайган, озгин
вужуди ниҳоятда беҳол эканлиги шундоқ сезилиб
турарди.

Аёл ниманидир яшираётгандек ва буни кулги
билан пардалаётгандек, ҳадеб жилмайишга ури-

– Ўзингдан-ўзинг нималар деб ётибсан боядан бери, – дея гап бошлади йигит, гүё жуда ҳам оддий нарса ҳақида сўзлаётгандек. – Ҳали... ҳали шунаقا бўлмағур ўйларни ўйлаб, ўзингни ўзинг касал қилиб ётган экансан-да. Мен хафа эмишман... тўғри, бир пайтлар бўлган... шундай... Лекин кейин... билсам, сендан нафратланиш тугул, хафа ҳам бўлолмас эканман...

Бирор соатлардан кейин Султонмурод ўрнидан қўзғалди.

“Бунинг ҳаммаси ёлғизлик оқибати... Уни ташлаб қўймаслик керак!” деган қарорга келди у жувон билан хайрлашаётib.

Шундан кейин у тез-тез Шоҳсанамнинг ахволидан хабар олиб турадиган бўлди. Аёл жуда секинлик билан бўлса-да, ўзига кела бошлади. Унинг аҳвол-рухиясидаги ҳар бир ўзгариш йигитнинг назаридан четда қолмасди: “Бугун у ярим соатдан кўпроқ гапирди, ҳарсилламасдан, хотиржам сўзлади. Ҳатто кулгиси ҳам жаранглай бошлади...”

– Менга турмушга чиқ, – дея таклиф қилди у кунларнинг бирида.

– Иложим йўқ... – дея пицирлади жувон. Йигит ҳайратдан донг қотди. У аёлдан бундай жавобни кутмаганди.

– Нега? Нима учун? Мени ўйлаётган бўлсанг кўп қайғурма, ҳаммасини яхшиликча ҳал қиласман.

– Мен у ёғини ўйлаётганим йўқ.

– Нимани ўйляяпсан бўлмаса? Сени бу ҳовлида нима ушлаб турибди? На фар... Кечирасан!

– Мен бандиман...

– Тушунмадим...

– Яххиси, шундай юраверайлик.

– Сени ҳеч кимга ишонмайман. Ҳатто манави соқов деворларга ҳам...

– Шўрликнинг юраги хаста экан-да.

– Э, у бўлди-бу бўлди, нима қилиб бўлсаям эшон бува завжасини ўзининг олдига чақириб олди-да!

– Ие, уни қаранглар, парда қимиirlаяпти!

Султонмурод ортиқ дош бера олмади... Азахо-надан чиқиб кетди.

Тўшакда ажриқقا ағанагандек ухломаган йигит алламаҳалда аста ўрнидан турди.

– Қаёққа? – сўради хотин.

– Ўзим, шундай...

– Эрталаб вақтли туришингиз керак, ухласангиз бўлмайдими?

– Уйқум келмаяпти.

Эшик хиёл гийқиллаб очилиб-ёпилди.

Хотин кўрпани юзига тортди: “Тавба!”

Кеча ойдин эди.

Чарақлаган юлдузлардан ерга кумушранг ёғду тўкиларди.

Дераза ёнидан ўтган йигит бирдан тақقا тўхтади.

– Сен?!

– Ха, мен...

– Ахир, сен...

– Кета олмадим!

* * *

“Дунё шунчалар гўзал!

Яйраб нафас олиб яшаганга не етсин... Ой нурида товланаётган япроқларнинг шовуллаши қандай ажойиб...

Аммо...

Бу дунёни сиз борлигингиз туфайли яхши кўраман.

Сиз туфайли!..”

– Қаерларда юрибсиз? – сўроққа тутди хотин.

– ...

– Бирпасда йўқ бўласиз-қоласиз!

– Ёмғир ёғаётган экан. Йўл четидаги тош устида бирпас ўтиридим.

– Бирпас?! Қайси йўлнинг четидаги тош?

– Муюлишдаги...

– Муюлишда ҳеч қанақангি тош йўқ! Ёмғир ҳам ёғмаяпти! Қачонлардан бери осмондан бир томчи тушгани йўғ-у... Нега ёлғон гапирасиз? А, нега? Нима учун? Ҳеч бўлмаса ариқдаги сувга бўкиб, кейин уйга келсангиз бўларди!

– Мен ахир у ерда Холиқ амакини кўрдим. Кейин анави чол бор-ку, оти нимайди, ҳах, тегирмончи...

– Шўрим қурсин, ахир улар аллақачон ўлиб кетишган-ку!

– Сизга бир бало бўлгани рост.

– Бас қилсанг-чи!

– Бас қилмайман! Нега энди бас қиларканман? Мен ерда яшаяпман, сизга ўхшаб осмонда учиб юрганим йўқ!

– Инсоф қилгин, чарчадим, бирпас мизғиб олишга қўясанми-йўқми?!

– Боринг, дўкондан бир қоп ун опкелинг. Уйда бир ҳовуч ун йўғ-у, бу кишим!.. Қачон болам-чақам дейсиз?

– Э, бор-э!

Султонмурод уйдан чиқиб муюлишга борди.

У ерда ҳеч қандай тош йўқ эди.

Ёмғир ҳам ёғмаётганди...

“Эсингиздами, бир кеча тонг отгунча ухламасдан гаплашиб ўтирганимиз? Эсингизда, а? Билардим... Осмон бир бошқа бўлиб ёришиб кетганди ўшанда! Ой нақ тепамизда туриб олганди. Худди биздан узоқлашгиси келмагандек. Илиқ шамол райҳон ҳидини димоғимизга уради... Назаримда, кеча-кундуз ҳам, ой-қуёш ҳам, ҳамма-ҳаммасининг бизга ҳаваси келарди”.

– Чик-чак... Чик-чак...

Султонмурод чўчиб кўзини очди.

Аллаким дераза ойнасини охиста чертгандек туйилди. Ёстиқдан бошини кўтарди.

Хира ёғду тушаётган ойна ортида кимдир унга тикилиб турарди.

Йигит ихтиёrsиз суратда ўрнидан турди.

Хотини қора терга ботиб ухлаб ётарди.

Султонмурод ҳовлига чиқди. Сўнг кўчага...

Ўн дақиқадан кейин у ўзини хароба олдида кўрди.

Чироқ ёниқ турарди.

– Кеч киришини минг азоб билан кутдим... – дея шивирлади жувон унинг кўксига бош қўяркан.

– Мен ҳам адойи тамом бўлдим. Нега бунча шошилдинг?

– Ихтиёrim ўзимда эмасди.

Тўсатдан жавондаги идишлар жаранглаб кетди. Қандайдир қўринмас қўл идишларни бир-бирига уриб, чил-чил қилаётгандек эди.

Жувон хижолатли кулимсиради.

– Эътибор берманг. Мен ўрганиб кетганман...

У сўзини тугата олмади. Хонанинг аллақайси

бурсагидан эшитилган овоз жувоннинг овозини босиб кетди:

– Бадбаҳт! Ярамас! Тавқи лаънатимга учрадинг! Қиёмат куни ҳам сени кечирмайман!.. Эй, бадбаҳт! Азоб фаришталарига топширдим сени! Алар дўзах ўтидин тож кийдирурлар бошингга, қиздирилғон мисдан либос киорсан!

Жувон иккала кафти билан йигитнинг қулоқларини тўсди.

– Эшитманг!..

* * *

Султонмурод кимсасиз кўча ўртасида турар, аллақачон қоронги тушиб, ён-беридан одам оёғи тийилганини, уйига бориши лозим эканлигини фаҳмларди, ҳис этарди, аммо оёқларига тош боғлагандек уларни ердан узолмасди. Бир маҳал аллаким қўлидан тутгандек бўлди. Қаттиқ сесканди. Уй томон юрмоқчи бўлди. Шу он оқшом ҳукмига ўтган борлиқ бағридан сирғалиб ўтган бир нидо қулоқларига урилди: “Султон...”

Йигит иккиланди: бу одатдаги овозга, одатдаги чорловга ўхшамасди.

Тағин ўша овоз: “Султон...”

Йигит гарангсиган кўйи овоз келган томонга юрди: яна ўша хароба!

У таниш йўлак бўйлаб ичкарилади.

Хона зим-зиё.

Қулоқни қоматга келтиргудек сукунат.

Вақт тўхтаган, олам нафас олмай қўйганди гўё.

– Бу ёққа ўт! – деган дағал овоз гулдуради. Қоронғиликка кўника бошлаган йигит зулмат қаъридан ўзига қадалиб турган бир жуфт ғазабнок нигоҳларни ҳис этди.

Сүнг эса... шифтда осилиб турган оқиш сирт-
моққа күзи тушди.

Қалтираб кетди.

– Ўзингни ос!

Тош қотган сукунатга бирдан жон энди: хона шовқин-суронга, шивир-шивирларга, саросимали, қироатли, ийғламсираган овозларга тўлиб кетди.

– Э худойим!

– Ё раббий!

– Бояқиши ҳали ёш экан.

– Хайрият, у биздан эмаскан. Мен укам Мирзапўлатми деб ўйлаб қўрқиб кетганимдан югуриб келгандим. Хайрият!.. Анчадан буён бетоб эдида...

– Нега менга тирғаласиз ҳадеб?! Қаерга борсам кўзингизни лўқ қилиб турганингиз-турган!

– Ие, бу Искандар аканинг ўғли-ку! Вой шўрлик... Искандар акага хабар бериш керак. Тезроқ! Тезроқ!

– Вой-бўй, намунча... Мен билан кўришмаслик учун атай пойабзалингизни қўлингизга олволдингизми? Пасткашлигинги қолмади-қолмадида!

– Ўғлим!

– Болам... Болажоним... Ёш жонингга жавр қилма! Отаси, унга айтинг, бундай қилмасин... Болам!.. Дарвоқе, эшон бува... Эшон буванинг олдига боришим керак! Ё тангрим..."

– Бўлсанг-чи! Нега иккиланяпсан? Бўлақолсанг-чи!

Султонмурод тошдай оғир нигоҳларини сиртмоққа қадади, бир неча сония ундан кўз узмади.

– Бу жуда осон...

Султонмурод беихтиёр сиртмоқ томон бир қадам ташлади.

“ – Ох!

– Вой бечора...

– Э, нега дод-вой қиласанлар? Қилғиликни қил-
гандан кейин жазосини олсин-да! Бундайларнинг
жойи дўзахда!

– Дўзах шундай жойки!.. Дўзахнинг ўтидин
заррадек олиб, уни тоғ устига қўйдилар. Бас, тоғ
анинг иссиқлиғидин симобдек эриб кетди...

– Ё тавба!

– Тангрим, уни ўзинг ёрлаقا!”

Султонмурод сиртмоққа қўл узатди. Қўли ет-
мади, етар-етмас бўлиб, ҳавода муаллақ қолди.
Яна бир қадам... Бехосдан пойабзалининг учи қат-
тиқ нарсага тегди. Мункиб кетди.

– Йўқ, йўқ, – деганча ортга тисланди у ўзига
келиб.

– Кўрқма, – дея далда берди гулдураган овоз
энди бир оз юмшоқ оҳангда...

– Йўқ!

– Бу жуда осон...

Шу он бўшлиқ қаъридан сузиб чиққан алла-
қандай шарпа тап тортмасдан дорга қўлини
узатди ва... худди шундай ҳеч иккиланмасдан –
оддий юмушни бажараётгандек – сиртмоқни бўй-
нига солди. Шундоқ Султонмуроднинг кўз олдида
шарпа ўзини осди. Боши кўксига осилган... оёқ-
лари шалвираган... Юзи эса... Ҳайратланарлиси
шунда эдики, у шарпанинг юзини аниқ-таниқ
кўрди. Дарвоқе, юз... юзини қандай эди деса
бўлади? Юзи... юзи улуғ саодатга эришгандек мам-
нун ва сокин эди!

– Нега бундай қилдингиз? – дея қичқириб
юборди Султонмурод беихтиёр.

– Нима қипман?

– У ўлиб қолди.

– У ўлгани йўқ. Яхшилаб қара. Мана у ёнингда турибди.

Султонмурод кўзларини юмиб-очди: ё алҳазар! Шарпа бояги жойида ҳеч нарса бўлмагандек қақ-қайиб турарди!

Йигит ақлдан озаёзи.

– Ҳозир... Ҳозиргина у... – дея пицирлади қуруқшаган лаблари.

– У ўлгани йўқ, сираям ўлгани йўқ.

– Ақлим бовар қилмаяпти...

– Тасаввур қил, вужуд – улкан чиғанок, рух шу чиғаноқ ичида димиқиб ётган жонивор. Мана энди у озод!

Султонмурод яна сиртмоққа кўз югуртириди.

– Бу жуда осон...

– Бу жуда ажойиб...

– Бу жуда осон...

– Бу жуда ажойиб...

Таранг тортилган асаблар бўшаши.

Йигит ўзи истамаган ҳолда, лекин шунга мажбурдек сиртмоққа кўл юборди. Шу вақт...

Бирдан еру кўкни ларзага солиб, момақалдироқ гумбурлади. Чақмоқ чақди.

Шамол қоп-қора булатларни ҳайдаб келди.

Дераза шараклаб очилиб-ёпилди.

– Йўқ! Йўқ! – деган фарёд эши билди аввал.

Кейин... Ё раббий!

Чақмоқ ёруғида у кўзга ташланди. Мана у! Бор бўй-басти билан. Бу ўша!

– Йўқ! – дея такрорлади у. – Йўқ! Бундай қилманг! Бу тузоқ... Бу фитна... – жувон йигит пойига тиз чўқди. – У мени ўзи билан олиб кетмоқчи эди. У билан кетсан гуноҳлардан фориғ бўлармишман. Жаннат менинг пойимда бўлармиш! Мағфират нурига йўғрилар эмишман. Шунда буюк азоб куни

ёруғ юз билан чиқар әмишман. Акс ҳолда рухим ёруғ дунёда сарсон-саргардон изғиб юраркан... Мен шунисини танладим. Дунёни сиз борлигингиз туфайли яхши кўраман! Қаранг, шафтоли қийғос гуллабди...

Кутилмаганда хона ичи ёришиб кетди. Султон-мурод ҳайрат оғушида жувонга боқди. Сиртмоққа узалган қўллари бўшаши...

Эрталаб уни харобадан ҳушсиз ҳолда топишиди. Тушгача у қишлоқ касалхонасида ётиб, нихоят ҳушига келди. Аммо... йигит тамомила ақлдан озган, телба эди.

“ – Ё тавба, мен илгари ҳам бундай воқеага гувоҳ бўлгандим.

– Қачон?

– Миллион йил аввал...”

МУҲАББАТ ВА НАФРАТ

Январнинг охирларида бирдан ҳаво айниб, кун совиб кетди. Бу йил қиши бўлмайди-ёв, деб бемалол юрган одамлар шошиб қолишиди. Икки кун гупиллатиб қор ёғди. Куни билан ҳовлини тўлдирив, қий-чув қилиб ўйнайдиган болалар ҳам уй-уйларига кириб кетишиди. Катталар иш юзасидангина кўчага отланишган, совуқдан ҳамманинг тузи ўзгарган, юз-кўзларида ҳорғин ифода акс этиб турарди. Шаҳар одамлари шунаقا, совуқса чидамсиз бўлишади; иш бўлмаса, бўйнимга олган мажбурият бўлмаганида эди, иссиққина уйда, юмшоқ диванга ястанганча қаҳва ичиб ўтирадим, деб ўйлашади улар. Дарвоқе, уйга нима етсин. Каталакдек бўлсаям ўз уйинг бўлса, ғам-андухга не хожат...

Беш қаватли уйнинг бешинчи қаватидаги хонадонларнинг бирида муздай дераза ойнасига бошини тираб хомуш ўтирган қиз шуларни хаёлидан ўтказди. Бундан ўн йил муқаддам у “ўқийман” деб шаҳарга келиб қолганди. Тақдир кулиб бокиб, институтга қабул қилинган, тиришиб-тирмашиб беш йилни бир амаллаб ўтказган қиз қишлоққа қайтиб боришдан бош тортган, ақлини танигандан буён у шаҳарда яшашни орзу қиласади. Шу боис кетгиси келмади. “Бу ерда яшаш осон, – деб ўйлаганди у ўшанда. – Бир амаллаб уй олсан, гап меники. Эр топиш қийинмас”.

Йўлланма бўйича ишга жойлашиб олиб, “прописка” деган балодан ўтиб олганида ўзининг омадли эканига яна бир карра ишонди. Жонжоҳди билан ишлашга, пул топишга ҳаракат қилди. Бироқ олган маоши у ойдан бу ойгача озиқовқатига базўр етарди. Кийим-кечакка йўл бўлсин. Яхшиям ота-онаси ҳар замонда бўлсаям пул бериб туради. Ҳар доим улардан ёрдам сўрашга қизнинг юзи чидамайди. Ахир ундан ташқари яна саккизта жон ота-онанинг қарамоғида. Ўғингарчилик кунлари лой бўлиб кетган туфлисини иссиқ сувда ювмайди, елими кўчиб кетиши мумкин. Шунчалик авайласа ҳам бир марта ишдан шошиб келаётганда бир пой туфлисининг пошнаси тушиб кетиб, ўтган-кетгандан жуда уялиб қолганди...

Ҳамон ойнага тиралиб турган пешонасидан совук ўтган қиз бирдан ўзини тортди. Пешонасини ушлаганча дераза олдидан узоқлашди. Ошхонага ўтар-ўтмас эшик кўнғироғи устма-уст қаттиқ жиринглаб, чўчитиб юборди. Эҳтиёт юзасидан “глазок”дан қаради. Эшик ортида пешонасини пуштиранг шарф билан танғиб олган аёлни кўриб юраги шув этди. Уй эгаси! Ижара ҳақини сўраб келган. Эшикни очмасликка қарор қилиб, нафас чиқармай тураверди. Ташқаридан аёлнинг шанғиллаган овози эшитилди:

– Эшикни очинг, Дилдора! Очинг деяпман. Биламан, уйдасиз. Ҳалигина балконда турганингизни кўргандим.

“Оббо, куйдирги-ей, – деб ўйлади қиз. – Каламушга ўхшаб, ҳамма ёқдан ҳид олиб юради-я”.

Ноилож эшикни очди.

– Вой, Мавжуда опа, сизмидингиз? Китоб ўқиб ётиб кўзим илинибди.

– Ижара пулини сўраб келди, деб атайин очмадингиз-ку. Нима қиласиз яшириб? – деди Мав-

жуда опа шартакилик қилиб. Овозидан унинг ҳазиллашаётганини ҳам, жаҳли чиққанини ҳам билиб бўлмасди.

– Чиндан ухлаб...

Дилдоранинг гапи чала қолди. Мавжуда опа унинг таклифини ҳам кутмасдан остона ҳатлаб, ичкарига кирди. Кира солиб уй ичини бирмабир кўздан кечира бошлади. Энгашиб кўрсатгич бармоғи билан плинтуснинг чангини ҳам артиб кўрди.

– Бир пайтлар мен бу уйни тилим билан ялардим, – дея ҳар доим айтавериб ёд бўлиб кетган гапларини такрорлади у. – Уйимни озода тутишингизга ишониб, сизни ижарага кўйганман.

Мавжуда опанинг қизиқ одати бор эди. Гапи-раётганда ёнидаги кишининг юзига қарамас, ундан гапига яраша жавоб ҳам кутмас, шанғиллаганча хаёлига келган нарсалар ҳақида тинмай сўзлар, фақат навбат ижара ҳақига келганидагина кўзларини лўқ қилганча тикилиб тураверарди.

– Эртага берсам майлими? Илтимос, яна бир кунгина...

– Инсоф сайин барака деганлар, Дилдора. Ахир уч ойдан бери тўламаяпсиз-ку.

– Биламан, ҳисоблаб юрибман, – деди Дилдора, ўқитувчиси олдида имтиҳон топшираётган талабадек юрак ҳовучлаб. – Пулим тугаб қолди. Бугун, мана ишга ҳам боролмадим. Этигимнинг пошнаси тушиб қолиб... – Дилдора шоша-пиша эшик ортида турган этигининг бир пойини кўрсатди. – Кечга яқин бир танишимдан сўраб кўрмокчиман.

– Ҳа, сўранг танишингиздан. Сўппайиб, қуруқ қўл билан келиб-кетиб юраверадими?!

Дилдоранинг юзидан иссиғи чиқиб кетди. “Вой, каламуш-ей, ундан ҳеч нарсани яшириб бўлмайди-я?”

Мавжуда опа ошхонага ўтиб, дераза тагидаги стулга ўтиаркан, газ устида турган қозонга ишора қилиб деди:

– Ўнингизда бир мири йўғ-у, нима қилардингиз унинг учун овқат қилиб.

– Ха, энди... – дея чайналди Дилдора. – Йўқдан кўра...

– Ошми?

– Ха...

Мавжуда опа илкис-илкис гоҳ ундан, гоҳ бундан савол бериб, қизни гапга тутаркан, зимдан унга синовчан тикиларди. Кўзларида тушкунсиз бир маъно бор эди – ҳайратми, ҳайронликми?

– Ха, майли, шунчалик ўтган яна бир кун ўтар, – деди у охирида ўрнидан тураркан. – Билиб қўйинг, бир кундан ортиқ кутолмайман.

Эшик салгина зарда билан тарақлаб ёпилди. Дилдора эркин нафас олди. Бир неча сония йўлак деворига суюнганча хаёлга толиб турди-да, сўнг ўзидан икки қадам нарида турган телефон олдига борди. Гўшакни ушлаганча, бир пас иккиланди, кейин таниш номерни тера бошлади.

– Абдуллани чақирворинг, – деди у гўшакни олган кишига.

Анчадан кейин у томондан “Абдулла йўқ?” деган жавобни олиб тепа сочи тикка бўлди. “Аблаҳ. Яна эски ҳунарини бошлади”. У ошигич тарзда эшик ортида турган эски туфлисини қўлига олиб, ўёқ-буёғини кўздан кечирди. “Кийса бўлади, – деган қарорга келди. – Қорлар эрий бошлагандир”. Йўлак деворига осилган узунчоқ кўзгу олдида туриб нақ ярим соат пардоз-андоз қилди. Гоҳ узоқдан, гоҳ яқиндан кўзгу олдига келиб, ўзига тикиларкан, шу туришида ҳар қандай эркакни лол қилиб қўйишига ишонч ҳосил қилди.

“Кочиб, қаерга бораркан, – деди қиз ичида кимнидир яниб. – Ернинг тагидан бўлсаям суғуриб оламан”. У эшик олдида бир нафас тўхтаб, плаши чўнтағидаги чақаларни ҳисоблаб кўрди. Трамвайдада бориб келишига бемалол етади. Қиз зиналардан эҳтиёткорлик билан тушди. Биринчи қаватда Мавжуда опа яшайди. Унинг кўзига кўринишдан, саволларига жавоб беришдан юраги безиллади. Уч ойдан буён ижара пулини тўламагани учун еб юборгудек бўлиб юрибди ўзи. Уззу-кун Дилдорани кузатади. Худди у бир кечада кўч-кўронини ортиб, кўчиб кетадигандек ортидан пойлагани-пойлаган. Ҳозир ҳам аллақайси тиркишдан мўралаб, уни кузатиб тургандир.

Дилдора бир амаллаб зиналардан тушиб, ҳовлига чиқиб олди-ю, елкасидан тоғ қулагандек енгил тортди. Аммо Мавжуда опанинг чигиртканингдек бир бурда юзи ҳеч кўз олдидан нари кетмасди. “Бойлик, баҳт ҳусн танламас экан, – дея ўйлади у трамвайдада кетаётиб. – Омади бор аёлнинг бошига қўнавераркан”. У навбатдаги бекатлардан бирида тушиб, юргурганча йўлнинг нариги бетига ўтиб олди. Иккала тарафдан ғизиллаб келаётган машиналарнинг “бобиллаб” берган сигналларига парво ҳам қилмади. Шундоққина йўл ёқасидаги тепасига “Сартарошхона” деб ёзилган ойнаванд бинонинг эшигини очиб, ичкарига қадам босиши билан анвойи ҳидлар қоришимасидан ҳосил бўлган бўғик ҳаво димоғига урилиб, нафасини қайтарди. У ҳеч иккиланмай эркаклар бўлими томон юрди. Ичкарида калта оқ халат кийиб олган икки йигит мижозларнинг сочини тўғрилашаётганди. Учинчи кресло бўш. Демак у йўқ.

— Абдулла ака бугун ишга келмади, дедим-ку сизга, — деди йигитлардан бири унга қараб.

— Нега келмайди? Ахир бугун иш куни-ю...

— Қизчаси касал экан. Дўхтирга олиб бораман деганди.

Дилдоранинг энсаси қотди. Йигитнинг гапига ишонмаганлигини билдириш учун қошларини чимириди.

— Ҳа, майли, кеч бўлсаям келиб қолар. Кутиб тураман, — деди у ва йўлакка чиқиб, шу ерга қўйилган ўриндиқлардан бирига ўтириди.

— У бугун умуман келмаса керак, — деди ҳалиги йигит овозини сал баландлатиб гапириш асносида қизиқсиниб Дилдора томон қараётган мижознинг бошини тўғрилаб, рўпарасидаги кўзгуга қаратиб қўяркан.

Дилдора унинг сўзларини эшитмагандек, бе-парво ўтган-кетганни кузатиб ўтириди. “Ҳаммаси-нинг тили бир, — дея ўйлади қиз. — Ҳали трам-вайдан тушган заҳотим у ойнадан кўрган-у, жуфтакни ростлаган”.

Дилдора йўлакдаги ўриндиқда уч соатдан кўпроқ ўтириди. Бироқ Абдулладан ҳамон дарак йўқ. Биринчи смена тугаб, иккинчи смена бошланди. Ҳалиги сартарош йигит ҳам халатини ечиб, кийимларини алмаштира бошлади. Дилдора унинг кетиш тараддудини кўраётганини сезиб, ўрнидан турди.

— Илтимос, унга айтиб қўйинг. Бугун кечқурун уйимга ўтсин. Агар яна қочиб юрадиган бўлса уйига бориб шармандасини чиқараман, — деди у қатъий қилиб.

Йигит индамади. На “хўп” деди, на “йўқ”. “Хўп” деса Абдулла билан тили бирлигини сездириб қўяди. “Йўқ” дейишга Дилдорадан ҳайикди. Икки

йилдан буён Абдулла билан жиқиллашиб юрганидан хабардор. Бир неча марта Дилдоранинг шаллақилик қилиб, Абдуллани юмма талаганини ҳам кўриб қолганди. Шу боис миқ этмади.

Дилдора ташқарига чиқиб, трамвай бекати томон йўл олди. Унинг ранг-кути ўчган, ич-ичидан ғалати бир титроқ турганди. “Аблаҳ, – деди у ҳар галгидек бутун ғазабию нафратини шу сўзга жамлаб. – Энди бунақасини ўйлаб топибди-да. Агар озгинагина, жуда кам бўлсаям пулим бўлганида ҳеч қачон унинг ортидан қидириб юрмасдим”. Бешинчи курсда ўқиб юрганида сочини кестириш учун шу сартарошхонага келиб, аёллар бўлмаси томондаги йўлакда навбат кутиб турганида Абдулла билан танишиб қолганди. Ўшанда у қизни навбатсиз ичкарига олиб кириб, таниш сартарош аёлдан қизнинг сочини чиройли қилиб, энг сўнгги моддада кесиб қўйишини илтимос қилганди. Кейинги сафар, орадан икки ой ўтиб, у яна шу сартарошхонага келганида тағин йигитга йўлиқди. Кейинги учрашув институтда юз берди. Бу гал Абдулла уни йўқлаб борганди. Кейин эса ... улар жуда яқин бўлиб кетишли. Абдулла чиройли йигит эди. Қадди-қомати келишган, қошкўзлари қоп-қора, юзи худди тарашланган тошдек силлик. Дилдора бу кўркам йигитга қандай қилиб ихтиёрини бериб қўйганини сезмай қолди. У икки йил ҳеч нарсани ўйламай Абдулла билан учрашиб юраверди. Биринчи бўлиб Абдулла “ўйин”ни бузмаганида ҳаёти ҳалига довур илгариdek давом этаверган бўлармиди. Афсуски, Абдулла бирдан ўзгариб қолди. Уни-буни баҳона қилиб учрашувлардан бош торта бошлади. Ҳар замонда бир кўришган вақтларида ҳам ўй суришдан нарига ўтмасди. Кейинчалик умуман йўқламай қўйди. У

Йигитнинг хотини, биттами-иккитами (анигини билмасди) боласи борлигини биларди. Азбаройи уни яхши кўргани учун бу масала қизни кўп ҳам қийнамасди. Тўғри, Абдулла уйига кетган вақтлари рашк ўти юрагини куйдирган онлар ҳам бўлганди. Бироқ у кўнглини кенг қилишга ҳаракат қилар, мени деб болаларидан воз кечишини истамайман, дея ўзини ўзи ишонтирумокчи бўларди. Бунга эришарди ҳам. Эр-хотинлик муносабатлари янги бошланган пайтларда Абдулла: “Уй олиб бераман, никоҳимга оламан” деб кўп ваъдалар берганди. Муносабатлари қалинлашиб боргани сайин у йигитнинг чўнтағида ортиқча ҳемириси йўқлигини билиб олган, аммо негадир ғаши келмаганди. Аксинча, беш-ўн сўм орттирган вақтлари сездирмай Абдулланинг чўнтағига солиб қўярди.

Кутилмагандага нарх-наво кўтарилиб, унинг ахволи танг бўлавергани сайин, Абдулла ҳам ўлганинг устига тепган қилиб, алоқасини узишга ҳаракат қилиб қолди. Устма-уст телефон қилавериб, безорини чиқазган чоғлардагина истаристамай қизникуга келар, юз-кўзидан, гап-сўзларидан уни кўришга зор эмаслиги мундоқкина сезилиб турарди. Ана шундан кейингина Дилдоранинг бурнига сув кирди.

– Ие, бу қанақаси бўлди? – дея қичқирди у пировардида. – Ҳаётимни барбод қилиб, қочиб қолмоқчимисиз? Уй олиб бераман, дегандингиз? Никоҳимга оламан, дегандингиз? Қани, ўша ваъдалар? Қани?

Унинг жазаваси тутган, кўзларидан ўт чақнар, бутун вужуди иситма тутгандек титради. Абдулла миқ этмасди. Ерга қараган кўйи, оғир-оғир хўрсиниб ўтираверарди. Кейинчалик, муносабатлари сал илиқлашган пайтлари у гап орасида болалари кўпайганини, хотини пул топмаяпсан

деб жанжал қилаётганини қистириб ўтарди. Дилдоранинг унга раҳми келди. Ўзича Абдулланинг ғаригина уйини, юпунгина кийингган хотини-ю, болаларини кўз олдига келтириб кўнгли бўшади, йиғлагиси келди.

– Ҳаммасига чидайман, – дея пичирлаганди у ўшанда Абдуллани қучоқлаб. – Ҳаммасига чидайман. Фақат мени ташлаб кетмасликка сўз беринг.

Абдулла овоз чиқарип бир нарса демади. Кўзларини юмган кўйи, бош ирғади холос. Ҳақиқатан ҳам Дилдорага ҳеч нарса керак эмасди. Абдулла ёнида бўлса бас! Аммо йигит шуни ҳам эпламади. Борган сайин узоклашиб кетаверди. Охирида қочиб қолиш пайига тушди. Дилдора уч ойдан буён уни тутолмай гаранг.

Трамвай келиб қолиб, қизнинг хаёли бўлинди. У туртиниб-суртиниб, трамвайга чиқиб олди. Бўш ўриндиқлардан бирига ўтиради. Унинг рўпарасидаги ўриндиқда қорачадан келган йигит ўтиради. Дилдорага кўзи тушгани ҳамон эски танишлардек бош ирғаб салом берди. Дилдора юзини ўгириб, ойна томонга қараб олди. Кета-кетгунча йигит ундан кўз узмади. Дилдора трамвайдан тушганида йигит ҳам тушиб, изма-из келаверди. Қиз уни ўғри гумон қилиб, юрагини ваҳм босди. Қадамини тезлатди. Таниш уй олдига келиб, ортига ўгирилганда беш-олти қадам нарида турган йигитни кўриб дод деворишига сал қолди. Сумкасини бағрига босганча, югуриб зиналардан тепага кўтарилди. Кўрққанидан аъзойи-бадани қалтирди. Титроқ кўллари билан эшикни очаркан, пастдан эркак кишининг оғир-оғир қадам товушини эшитиб, баттар юраги ёрилди. Уйга кириб, титроғи босилгач секин “глазок”дан қаради. Ҳеч ким йўқ. “Ўғри изимга тушди, уйимни кўриб олди.

Энди мени тинч қўймайди”, – деган хаёл миясини пармалай бошлади. У ошхонага ўтиб стол устидаги чойнакдан чой қуиб ичди. Юраги ҳамон кузги япроқдай титраб туарди. “Шуниси етмай турувди, – дея ўйлай бошлади у. – Ҳали уй эгасига нима дейман?” Ҳалиги қўрқув устига ижара пули ваҳимаси қўшилиб қизнинг юрагини эзди. У ўзининг ночор аҳволда қолганидан хўрлиги келиб, йиғлаб юборди. Ўксиб-ўксиб узок йиғлади. “Энди мен керак бўлмай қолдими. Жанжал қиласериб, сени уйдан бездирган ёмон хотининг энди яхши бўлиб қолдими? – Дилдора қаршисида Абдулла тургандай йиги аралаш кўнглидагини тўкиб сола бошлади. – Энди нима қиласман? Қандай яшайман? Ота-онамга нима дейман? Мавжуда опани қандай қилиб тинчитаман?”

* * *

Шу оқшом у юрак ҳовучлаб тонг оттирди. Мавжуда опа кечқурун негадир чиқмади. Уйига меҳмон келиб қолганми? Унинг эри аллақайси идоранинг бошлиғи деб эшитганди Дилдора. Шунинг учунми тез-тез ўйларига меҳмон келиб туради. Дилдора уч йил бадалида Мавжуда опанинг эрини уч ёки тўрт марта кўрди-ёв. Қачон қарамасин ишда бўлади. Аммо-лекин хотинини, болаларини таъминлаб қўйган. Қўша-қўша ўйлари, машиналари бор. У курсдош дугонаси орқали шу уйни ижарага олганди. Дугонаси Мавжуда опанинг жияни бўлади. У аллақачон эрга тегиб, бола-чақали бўлиб кетди. Ижара ҳақини тўлаш муддати ўтиб кетган вақтларда Мавжуда опа йўлини пойлайвериб, безор қиласар, бўлар-бўлмас, заҳар-заққум гапларни гапириб таъбини тирриқ қиласар, аммо бирон марта уйдан чиқиб кет, деб

дўқ урмасди. Балки ўша жиянининг юзини қилар, балки шу йўсин одамгарчилик қилаяпман деб ўйлар, бу ёғи Дилдорага номаълум.

Эрталаб музлатгични (унинг бирдан-бир бойлиги) очиб кўриб, нонуштага арзигулик ҳеч вақо йўқлигини кўриб, таъби хира бўлди. Бир муддат музлатгичга тикилиб хаёл суриб турди. Сўнг бир қарорга келди шекилли, апил-тапил кийина бошлади. “Бугун дам олиш куни, – деб ўйлади қиз. – Уйига бостириб бораман...” У ҳам меҳмонхона, ҳам ётоқхона вазифасини ўтовчи (бир хонали уй бўлса!) каттагина хонага кириб, каровати тагидан оғиргина чемоданини тортиб чиқарди. Кийилавериб анча униккан кийимлари орасидан салафанга ўралган бир жуфт сочиқни олди. Ўтган йили онаси берган эди. Ишлатишга кўзи қиймай, чамадонига солиб кўйганди. Ўша сочиқларни Мавжудга опага кўрсатиш учун қўлтиғига қисиб, уйдан чиқди.

– Мана буларни сотмоқчи эдим. Балки оларсиз... – деди у минг истиҳола билан.

Мавжуда опа салафанни очиб, сочиқларни ёйиб кўрди.

– Алмисоқдан қолганми, нима бало?

– Йўғ-е, ўтган йили онам берганди. Асраб юрувдим...

– Қанча берай?

– Билмадим... ўзингиз биласиз...

Мавжуда опа ичкарига кириб кетди. Бир оздан сўнг қўлида пул билан қайтиб чиқди.

– Рози бўлинг, – деди у хушламайгина.

Дилдора пулни санаб ҳам кўрмади. Чопқиллаб ҳовлига чиқиб кетди. Мавжуда опа унинг ортидан узоқ тикилиб қолди. Ҳар доим қаҳр билан беписанд бокувчи кўзларида шафқат туйғуси уйғонгандек эди...

Эшикни ўттиз-ўттиз беш ёшлардаги аёл очди.
У оқ-сариқдан келган, истараси иссиқ эди.
Кийиниши ҳам ёмонмас, ҳар қалай Дилдора
ўйлаганчалик юпун эмасди. Аёл Абдулланинг
хотини эканлигини у дарров фаҳмлади.

– Келинг, – деди аёл ҳайрон бўлиб, унга бош-
дан-оёқ тикилганча.

– Абдулла... ака... уйдами? – дея олди Дилдора
базўр. Негадир саросималанаётганди. Бояги бо-
тирилиги қаёққа йўқолди?

– Ҳа, уйда, келинг. Ичкарига киринг, – аёл
уни эрининг мижозларидан деб ўйлади шекилли,
мулозимат қила бошлади. – Остонада турмай, уйга
киринг. Ҳозир чиқиб қоладилар.

Дилдора таваккал қилиб, ичкарига қадам бос-
ди. Шу пайт ванна томондан “Ким келди, Мав-
луда?” деган таниш овоз эшитилди. Зум ўтмай
елкасига сочиқ ташлаб олган майкачан Абдулла
пайдо бўлди. Остонада турган Дилдорага кўзи
тушган заҳоти тошдек қотиб қолди.

– Дадаси, сизни сўраб келдилар, – деди Мавжу-
да гоҳ эрига, гоҳ Дилдорага қараб қўяркан.

– Мен уйда соч олмайман, – деди Абдулла дар-
хол ўзини ўнглаб.

Дилдора тушунсин деб овозига сирли тус бер-
ди. Аммо Дилдора унга парво қилмади. Қарин-
дошининг уйига келгандек бафуржা оёқ кийимини
ечиб, йўлакнинг чап тарафида эшиги ланг очиқ
мехмонхонага кириб, уй ичини кузата бошлади.

– Кимсиз ўзи? Уйимизга нега келдингиз? –
деди Мавлуда энди саросимага тушган ҳолда унинг
ортидан изма-из юраркан. Кутимаган ташриф
уни довдиратиб қўйдичамаси.

– Ўҳ-хў, – Дилдора аёлнинг саволларини эши-
магандек унга қиё ҳам боқмади. – Хотиним уйим-

да құлға илингулик нарса йўқ деб жанжал қиласы, дегандингиз. Мана булар нима? Рангли телевизор, диван-кресло, германский гиламлар...

– Бас қилинг, – дея қичқирди Абдулла. – Эшик очиқ, чиқиб кетинг!

– Нега чиқиб кетарканман? – деди Дилдора бамайлихотир. – Бу уй менинг ҳам уйим.

– Абдула ака, у нима деяпти?

Күзлари ёшга түлган Мавлуда эри томон юзланды. Абдулла унга жавоб бермади, бироқ күзларини олиб қочди. Дилдора тұла ғалабага эришгандек эр-хотинга ғолибона қараб турады.

– Мен уни танимайман, – деди ўзига келган Абдулла. У энди ўзини тутиб олган, юз-күзларыда кинояли табассум ўйнарды. – Ҳозир шунақа аёллар чиққан деб эшигандым. Тинч ўтирган оиласарға бориб, мен эрингни ўйнашиман деб туриб олишаркан. Балога қолган эр ҳалигини тинчилиш учун пул билан оғзига ураркан.

Дилдоранинг устидан бир чөлак совуқ сув күйиб юборишгандек, бутун вужуди музлаб кетди. Томирларыда қон юришмаётгандек, оёқ-құллари жимиirlаб, увишаётгандек туюлиб, ўзини ташлаб юборишига сал қолди.

– Вой ярамас, ҳали шундай қилиб нон топиб еб юрибман, де. Ота-онанг биладими? – дея бобиллай кетди Мавлуда эшимчага құшимча бўлиб. – Уйингда ... қисиб ўтирганингда тенгингни топиб кетардинг-ку, жалаб.

Дилдора чидаб туролмади. Ҳамон қўлтиғида қисиб турган сумкасини Мавлуда томон улоқтириди.

– Ифлос, аплах, бунчаликка борасан деб ўйла-магандим, – дея изиллаб йиғлади Дилдора ва эшик томон йўналайтган эди, юзи шилинган Мавлуда йўлини тўсди.

— Жавобини олиб кетмайсанми? — деди-ю,
Дилдорага ташланди.

Кий-чув, тўполон бошланди. Бири бирини юл-
ган, бири бирининг сочига чанг солган. Бақи-
ришган, дод-вой қилишган...

Абдулла базўр уларни ажратди.

— Мавлуда, йўқол, кўзимга кўринма, — дея аввал
у хотинига бақирди. Сўнг Дилдорага юзланиб
деди: — Мана, ўйлаган ниятингизга етдингиз. Энди
жавоб!

— Бу уй, бу эр меники, иккинчи қадамингни
босма! — деб бақирди Мавлуда унинг ортидан.

Дилдора ит қувган гадойдек абгор ҳолда уйдан
чиқаркан, бор кучини, бор нафратини тўплаб
шундай деди:

— Ҳали кўрамиз кимники бўлишини...

Бир оздан сўнг эшик қарсиллаб ёпилди.

Сочлари тўзғиган, юзлари тилинган, ёқавайрон
қиз кимсасиз кўчада қаёқقا юришини, нима
қилишини билмай анча вақт туриб қолди. Қалби
хувиллаб, ўзини ёлғиз ҳис этди. Шу пайтгача у
Абдулла мени севади деб ўйларди. Шу умид, шу
ишонч унинг дардига малҳам, кўнглига қувонч
бағишлиарди. Тақдир уни шугина баҳтдан ҳам
бенасиб этди. Ўлғиз қандай яшайди?

Киз оғир хўрсиниб, ҳалигина келган йўли
бўйлаб, бекат томон бир-бир босиб юриб кетди.
Кун кеч бўлиб қолган, йўллар музлаб, изғиринли
шамол эсади. Автобуслар тирбанд. Бир бекатда
тўхташса, наригисидан ғизиллаб ўтиб кетарди.
Бекатда туравериб, совуқ жонидан ўтиб кетди.
Плаш чўнтакларига қўлини солаётib бирдан ёнида
сумкаси йўқлигини билиб қолди. Юраги шув этди.
Сочиқнинг пули сумкада эди...

Кечқурун уйга базёр етиб келган қиз эртасига тонг аzonда анча бардам уйғонди. Балконга чиқиб, ойнадан ёришиб келаётган тонгни кузатди. Кечаги воқеалар эсидан чиқмай, күнглига соя ташлаб турган бўлса-да, тиниқиб ухлаганиданми, руҳи анча тетик эди.

Кейин музлатгичда борини дастурхонга қўйиб, нонушта қилди. У ўзини ўзи қувноқ кўрсатишга, кайфиятини кўтаришга ҳаракат қилди. Ахир, яна ярим сотадан кейин ишга бориш керак. Кечаги кайфияти билан ишлаб бўлмайди. “Сумкани қолиб кетгани ёмон бўлди-да, – дея ўйлади у. – Шуни баҳона қилиб ортимдан чиқса бўларди. Яхшиям майда пулларни чўнтағимга солиб қўйган эканман. Бўлмаса ҳолимга маймунлар йиғларди”.

Шу пайт эшик қўнғироғи жиринглаб, унинг хаёли бўлинди. Ким экан? Қизнинг юраги тез-тез уриб кетди. Абдулламикин? Сумкани баҳона қилиб... Ў Мавжуда опами?.. Эшик олдига боргунча минг хил хаёл бошидан ўтди. Одатдагидек “глазок”дан қаради. Қандайдир эркак киши орқа ўгириб турарди. Дилдора иккилания-иккилана охири эшикни очди.

– Салом, – деди эшик олдида турган йигит ва оstonада ҳуши бошидан учиб, қотиб қолган қизга кулимсираб қаради. – Мени танимадингиз-а?

Қиз зўрга бош ирғади.

– Трамвайда учрашгандик, эсингиздами?

Дилдора яна бош ирғади. Унинг тили танглайига ёпишиб қолгандек, ҳеч айланмасди. Йигитнинг юзидаги табассум бирдан йўқолиб, ўрнини жиддийлик эгаллади.

– Бостириб келганим учун... узр. Бошқа... ҳеч иложини қилолмадим, – деди у тутилиб-тутилиб.

Бояги ўқтамлиги йўқолиб, ўзини ноқурай сезаётганди.

– Мен ишга боришим керак, кечирасиз, – деди ни-ҳоят ўзига келган Дилдора ва эшикни ёпиб олди.

Хаяжонланганиданми ё кўрққаниданми бутун вужуди дир-дир титрарди. У деворга беҳол суюнди. Бу қанақаси бўлди? Ким ўзи у? Нега келади? Боши қотган қиз икки ўт орасида қолди. У секин бориб яна “глазок”дан қаради. Ҳалиги йигит ҳамон эшик ортида турар, “глазок”дан кўз узмасди. У ўттиз беш-ўттиз олтиларга борган, баланд бўйли, кенг елкали, соchlари қалин ва маллага мойил эди. Ўноқ суюклари тутиб чиқиб, юзини кенг, бесўнақай кўрсатар, аммо қош-кўзининг қоралиги, бурнининг бежиrimлиги унинг бу қусурини ёпиб кетарди. Лаблари устидаги кичкина мўйлови ҳам ўзига ярашган эди. Бироқ кўзлари аллақандай эҳтиросли изтироб билан боқарди. Юзидаги жиддийлик уни хотиржамдек кўрсатса-да, кўзларидаги дардли ифода сирини фош қилиб қўйган эди. Қалин лабларида акс этган ним табассум унинг ҳолатига, турқи-тароватига ҳеч ҳам мос тушмаган эди.

Дилдора йўлакдаги кўзгу олдига келиб, бесаранжом нигоҳи сал хотиржам ҳолатга келгунча тикилиб турди. “Эшикни очишга мажбурман, – дея пичирлади лаблари. – Ишга бориш керак...” Бир оздан сўнг у ўқтам аёл қиёфасига кирди. Ва шахт билан эшикни очиб, шитоб билан йигитнинг ёнидан ўтиб кетди. Довдираб қолган йигит шошиб қизнинг ортидан эргашди.

– Сизга икки оғиз... гап... гапим бор эди, – деди у қизга етиб олиб, ёнма-ён кетаркан.

— Сиз билан ҳам, бошқалар билан гаплашишни истамайман, — деди қыз, унинг юзига қайрилиб ҳам қарамасдан.

— Бир киши ишончингизни оқламаса, бошқалар ҳам айбдор бўладими?

Йигит билиб айтдими, билмай айтдими, қизнинг жон еридан тутган эди. Дилдора таққа юришдан тўхтаб, йигитга синчковлик билан тикилди. Унинг кўзларидағи изтироб юзига кўчган, лаблари, бутун вужуди титраётгандек, бироқ йигит зўр бериб бу титроқни сездирмасликка тиришаётгандек туюлди Дилдорага.

— Ваҳоланки, сиз кўп нарсадан хабардор экансиз, шуни ҳам алоҳида билиб қўйишингизни истардимки... — Йигит унинг узундан-узун жумларини эътибор билан тинглаётганини кўриб қыз шарақлаб кулиб юборди. Кула-кула, охири гапининг давомини айтди: — Мен жуда қиммат турман.

Қиз гапирганида, йигит унга ҳайрат билан тикилиб қолганди. У гапини тугатганда ва кулиб юборганида чўчиб тушди. Қиз жиддий айтяптими ё ҳазиллашдими, фарқига бориб ўтирмади. Бурилиб, кетишга чоғланаётган қизнинг йўлинни тўсди.

— Тиллами, жавоҳирми, нимани хоҳлайсан? Тилагингни айт, — деди у овози титраб. Ва бирдан сенсирашга ўтганини ўзи ҳам сезмай қолди. — Фақат мени ҳайдаб солма!

Дилдора нима дейишини билмай, гарангсиб қолди. Сўнг ўта жиддий оҳангда деди:

— Мен ишга боришим керак. Кечикяпман...

— Шест секунд, — деди йигит кулимсираб, кўрсатгич бармоғини лабига босди. Ва тез-тез юриб катта йўлга чиқди. У ёқ-бу ёққа ғизиллаб ўтаётган таксилардан бирини тўхтатиб, қизнинг ёнига келди.

— Кетдик!

Дилдора бир зум иккиланди. Вақт зиқ эди. Кўп ўйлаб ўтирмади. Таваккал қилиб, йигитга эргашди...

Шундан кейин йигит ҳар куни келиб, эшик олдида уни кутиб турар, ишга кузатиб қўяр, кечки соат беш-олтиларда уйга олиб келиб қўяр, эшик олдида хайрлашиб кетарди. Дилдора унинг исми Пўлат эканлигини биларди холос. “Қанақа одам у?” – деган савол қизни ўйлантирап, юрак ютиб сўрашга эса ботинолмасди. Бир неча куннинг ўзидаёқ у йигитга анча ўрганиб қолганди. Бироқ аччиқ тажриба кўнглини қаттиқ қилиб қўйган, йигит олдида сира сир берай демасди.

Бир куни эрталаб Мавжуда опа шанғиллаганча ижара ҳаққини сўраб чиқди.

– Яна озгина сабр қилинг, илтимос, – деди Дилдора астагина.

Чунки Пўлат келиб уни олиб кетадиган вақт бўлиб қолганди. Мавжуда опа эса атай қилгандек сира паст тушай демасди.

– Ўмонга салом бериб, товонга қоласан деганлари шу-да, – дея дийдиё қилди у. – Тўрт ойдан бўён сабр қилиб юрган мен аҳмоқман ўзи. Хе, яхшиликни билмаган...

Мавжуда опа қарғай-қарғай зиналардан тушиб кетаётib, бирдан Пўлат билан тўқнаш келди. Ҳали келаётib, унинг овозини эшишган Пўлат тўртинчи қаватда туриб, бор гапни билиб олганди. Опа учинчи қаватга тушгунча кутиб турди-да, сўнг ҳамон остоңада тошдек қотиб қолган Дилдорага “ҳозир келаман” дегандек ишора қилиб, пастга тушиб кетди.

– Бўлди, у энди сизни безовта қилмайди, – деди бир оздан сўнг қайтиб чиқиб.

Дилдора унинг кўнгли учун жилмайди. Қалбини аввалгидан ҳам оғирроқ, залворли бир юк эзаётган, юрагини ғижимлаётган эди. Унинг мижжаларига ёш қалқиди. Бир дақиқагина йигит олдида ўқтамлиги, совуққонлиги йўқолиб, асл қиёфасига қайтгандек бўлди. Бир лаҳзагина холос... Кейин яна аввалги ҳолатига қайтди. У ҳеч нарсани ўйламасликка, эсламасликка қарор қилди. Туну-кун қайғу-ҳасратда яшагандан кўра шўр қисматни афзал билди. У Пўлат билан ёнма-ён кетаркан, алланималар ҳақида тинмай гапирав, кулар, баъзида арзимас майда-чуйдалар ҳақида ғам-ғуссага ботиб сўзларкан, ич-ичидан ҳақиқий андухи қалб тўрида унсиз фарёд чекаётганини ҳис этиб турарди. Аёл кишининг ўз софлигини сақлаб қолиши энг мураккаб иш эканлигини қайта-қайта эътироф этарди...

Одатдагидек кечки маҳал Пўлат билан ишдан қайтаркан, уй эшиги олдида Абдулла кутиб турганини кўриб, юраги орқасига тортиб кетди. Абдулланинг қўлидаги селофан сеткада нимадир бор эди. Дилдора унинг тунов куни уйида қолиб кетган сумкасини олиб келганини ички бир туйғу билан сезди. Плаш этакларини шилдиратганча унинг ёнидан безътибор ўтиб кетди. Бамайли хотир чўнтагидан уй калитини олиб, қулфни бурай бошлади. Пўлат билан Абдулла еб юборгудек бўлиб бир-бирига сўzsиз тикилиб қолишганди. Вазиятдан чиқиш учун қиз овозига қувноқ тус бериб, деди:

– Пўлат ака, уйга... Вой худойим-ей, бўла қолинг...

Бунаقا таклифни кутмаган Пўлатнинг юраги ширин орзиқди. Бир зум иккиланса Дилдора эшикни ёпиб қўядигандек шошилиб ичкарига қа-

дам кўйди. Абдулла ундан кўз узмасди. Пўлат ечиниб, меҳмонхонага ўтгунча қиз кутиб турди. Сўнг эшикни ёпиш баҳонасида ташқарига чикди. Ҳамон бир қарорга келолмай, эшик ортида турган йигитнинг қўлидан сеткани юлиб олиб, илондай вишиллади:

– Бу ерда энди қорангизни кўрмай!

– Ўйлаб иш қил, Дилдора, – дея жон ҳолатда эшик тутқичига ёпишди Абдулла. – Менга ҳам осон тутма. Бир қарорга келолмаяпман.

– Мен бир қарорга келиб бўлдим, – деди Дилдора қатъий қилиб.

Ва куч билан эшикни тортиб, ёпиб олди. Бир оздан сўнг қаҳва дамлаб, меҳмонхонага олиб кирди. Пўлат эшикка термилиб ўтирган эди. Қизни кўриши билан нигоҳини олиб қочди. Дилдора қаҳва куйиб узатганида ҳам юзига қарамади. Ўртага ноқулай жимлик тушди. Йигитнинг юраги ўртанди. Негадир ўз-ўзидан жаҳли чиқиб кетаётганди. Қаҳвани отиб юборгиси келди унинг. Аммо истиҳола зўр келиб ўзини босди. Бироқ юзи гезариб кетганди. Дилдорага қараб, кулмоқчи бўлди, лекин қаттиқ қимтилган лаблари тушуниксиз ва ўринсиз табассумдан қийшайиб қолди. Қиз ҳеч нарсадан бехабардек, бафуржа ўтиради. Қаҳва хўплаётиб, йигит уни зимдан кузатаётганини сезиб қолди. Ўзича кулимсиради. Ниманидир яширмоқчи бўлгандай кулимсиради, бироқ уддасидан чиқолмади.

– Истасангиз кетишингиз мумкин, – деди у бирдан йигитга тик қараб. Унинг юзида мамнунлик, кўзларида кибр акс этарди. – Ҳозир нимани ўйлаётган бўлсангиз, ҳаммаси тўғри. Айтмасангиз ҳам юз-кўзларингиздан билиниб турибди ва ... ва мен бунга чидаб туролмайман. Кетинг!..

Киз иситма тутгандай титради, қаттиқ ҳаяжонга тушганлигини билдириласлик ва йиқилиб тушмаслик учун стол қиррасига маҳкам ёпишиб олди. Бутун кучини, имкониятини түплаб, йигитдан жавоб кутарди, баайни ўлимга маҳкум этилган одам ҳукм ўқилишини кутгандай...

Пўлат индамай ўрнидан турди. Унинг чехрасига ифода қилиб бўлмас бир изтироб соя соглан, кўзлари маъюс ва ғамгин боқарди. У эс-хушини йўқотгандай гандираклаганича столни айланиб ўтиб, Дилдоранинг қархисига келди. Келаётиб бўш турган стулга қоқилиб кетди. Юраги қинидан чиққудек потирлаб уради...

– Сизда гуноҳ йўқ, – деди у аллақандай ҳазин товушда. – Ҳаммасига мен айборман. Мен...

Кизнинг юзидан қон қочиб, ҳаддан ташқари оқариб кетди. Пўлатнинг сўzlари олисдан, жудажуда олисдан эшитилаётгандек эди...

* * *

– Менинг тақдирим сеникидан ҳам чигал ва маънисиз, – дея гап бошлади Пўлат. Тун ярмидан оққан, улар ҳамон ўша стол атрофида ўтиришарди. – Йигирма ёшимда отам аммамнинг қизига уйлантириб кўйди. Ҳамма кўргулик шундан кейин бошланди. Хотинимга кўнглим йўқ эди. У меҳнаткаш, камсуқум, тортинчоқ қиз эди. Худди отонамнинг кўнгилдагидек! Эргадан-кечгача ҳовлида ивирсиб юарди. Онам унга кўп иш буюарди. “Келинлигимдан то ҳозиргача қўлим косов, сочим супурги” бўлиб келдим. Келин олдимми, энди қўлимни совуқ сувга ҳам урмайман”, деб кўп такрорларди. Пайт пойлаб туриб, хотинимни уйга имласам, у уалиб кетарди. Ўзини олиб қочарди. Кечаси ҳамма ёқни саранжомлаб, уйга киради

ва ўша ернинг ўзида халатини ечиб, шартиллатиб чангини бир-икки қоқарди-да, яна эгнига илиб оларди... Хуллас, уйдан қочиб кетдим. Отам излаб келиб, топиб олди. Уйга қайт, деди. Урди. Сўкди. “Оқ қиласман”, деди. Кўнмадим. Ҳаёт ҳақида менинг ҳам ўз ўйим, ўз фикрим бор эди. Бироқ ҳеч ким мен билан ҳисоблашмасди... Яхши кўрган қизим бор эди. Лекин у онамга ёқмади. “У бизга тўғри келмайди, – дерди онам ҳар доим. – Бизга оёқ-қўли чаққон, ҳар қандай меҳнатдан тап тортмайдиган келин керак”.

Отам учинчи марта келганида умидини узиб қайтди. Бу ерда озми-кўпми танишлар орттиридим. Икки марта қамалиб чиқдим. Қисқа муддатта...

Шу ерга келганда қизнинг кўzlари чақчайиб кетди, ўзини босиб туролмади.

– Нега? Нега қамашади? – деди у ранг-кути ўчиб.

– Сўрама ҳеч нарсани, сўрайверсанг, алдай бошлайман. Одатим шунаقا, – деди йигит. У оғир юқдан халос бўлгандек енгил тортиб қолганди. Кайфияти кўтарилиб, қизга тегишли: – Манави кароватга иккимиз сиғамизми?

Дилдора қип-қизариб кетди...

Улар бирга яшай бошладилар. Пўлат рўзгор-нинг кундалик ташвишларини ўз бўйнига олди, бутлади. Мавжуда опага ҳам олдиндан бир неча ойлик ижара ҳақини бериб қўйди. Йигит бу каби муаммоларни ўз ихтиёри билан ҳал этар, Дилдорани аралаштирмасди. Йигит жуда баҳтли эди. Ўзини чексиз баҳтиёр деб ҳис қиласди. Бўш қолди дегунча, бутун вужуди нигоҳга айланиб, Дилдорага тикилар, ундан кўzlарини узолмасди. “Гўзал, у жудаям гўзал”, – деб тинмай ичидаткорларди. Сиртдан қараганда, Дилдора ҳам баҳ-

тиёр эди. Аммо күнглидаги бир тугун ёнига иккинчиси қўшилганди. “Нега у қамалган? Бунча пулни қаердан оляпти?” деган саволлар хаёлида тинимсиз чарх уриб, тинчлик бермасди.

Бир куни у ишдан келаётиб, йўл устида Абдуллани учратди.

– Сизникага келаётгандим, – деди у. Силлиқ юзида аллақандай безовталик сезилар, нимадандир саросималаниб турарди. Қўлида қофозга ўроғлиқ шиша бор эди.

Дилдора уни кўрмасликка олиб, ўтиб кетмоқчи эди. Аммо йигит илдамлик билан йўлини тўсиб, ялинчоқ товушда деди:

– Дилдора, гаплашиб олайлик, азизам...

Дилдора унинг бесаранжом юзига тикилиб туриб, киноя билан деди:

– “Азизам” десам эриб кетади деяпсизми? Бир вақтлар, эсим оғиб юрганда “Белий аист”ни яхши кўраман, деганим эсингизга тушиб қолдими? Яна аввалгидек апоқ-чапоқ бўламиз деган ниятда келдингизми?

Абдулланинг ҳуши бошидан учиб, довдираб қолди. Қўлидаги шишани қаёққа қўйишини, нима қилишини билмай, гарангсиб турди-да, беихтиёр ён тарафдаги ариқчага улоктириди. Дилдора уни беписанд нигоҳ билан бошлан-оёқ кузатаркан, яна оғиз жуфтлаган эди, Абдулла чидаб туролмади.

– Ҳа, мен абраҳман, – деди у қичқириб. Унинг юзи қумдек ўчган, лаблари, лабларига қўшилиб, бутун вужуди титрар эди. – Абраҳлик қилдим. Лекин ҳали бир қарорга келганим йўқ-ку.

– Сиз бир қарорга келгунингизча, хотинингиз қаҳрамон она бўлади, шекилли, – дея узиб олди Дилдора. У жиддийлашган, хомуш ва паришон бўлиб қолганди.

Абдулланинг юзига қизиллик югуриб, кўзларини олиб қочди.

– Уни тинч қўйинг, аралаштирманг, – деди у ўзини тутиб олиб. – Мен сиз билан гаплашмоқчи эдим.

– Нимани гаплашмоқчи эдингиз, гапиринг, – Дилдоранинг юзига кинояли табассум ёйилди. У шу туришида Абдуллани эрмак қилиб, чарчамайдиганга ўхшарди.

– Жуда ўзгариб кетибсиз, афсус, – деди Абдулла ҳафсаласи пир бўлиб.

Дилдора шу гапни кутиб тургандай, бирдан портлади:

– Сиз ҳеч қачон мендан воз кечолмайди, деб ўйлагансиз. Шундайми? Унга ҳеч нарса керак эмас, у ҳеч нарсани ўйламайди, деган хаёлда юргансиз. Шундайми, жавоб беринг, – деди жазавага тушиб Дилдора. – Фаришта деб ўйлагансиз. Аслида кимлигимни билмагансиз. Сиз ҳеч нарсасиз яшай олишингиз мумкин. Аммо аёлсиз яшай олмайсиз. Мен эрсиз яшашим мумкин, лекин ҳеч нарсасиз яшай олмайман. Кейин... яна мен жуда ҳам қасдкаш ва кекчиман. Шуни ҳам билиб қўйинг. Бирорнинг ёмонлигини бир умр эслаб юраман. Яхиси, мендан нарироқ юринг. Хотинингизни олдида айтган гапларингиз ҳали қулоғимдан кетгани йўқ.

Абдулла шамдек қотиб қолди. У адойи-тамом бўлганди.

– Яна шуни ҳам билиб қўйингки, Сиз мен учун ягона эркак эмассиз! Дараҳтни силкитсан, эркак ёғилади, – деди Дилдора ва йигиттга кибр ва мазах билан бир неча сония тикилиб турди-да, уйи томон тез-тез юриб кетди.

Абдулла унинг ортидан тикилиб қолди ва алам билан тишини фижирлатди...

– Дилдора, сен билан бир нарсаны маслаҳатлашмоқчи эдим, – деди Пўлат бир куни. У одатдагидек кўра безовтароқ кўринди Дилдорага. – Менинг уйимга кўчиб ўтсанг...

Дилдора ялт этиб, йигитга қаради. Унинг нигоҳида бир олам ҳайрат, бир олам қувонч бор эди.

– Наҳотки... Уйингиз борми? Нега аввалроқ айтмадингиз?

– Кўчиб ўт, дебми?

– Йўқ. Уйингиз борлиги ҳақида нега аввалроқ гапирмагандингиз? Ахир, бу...

– Бахт, демоқчимисан? – Пўлат кулимсиради. У ўйчан боқарди. – Бошида, шу уйни олмасимдан бурун, эҳ-ҳе, нималарни ўйламаганман? Нималарни орзу қилмаганман? Уй олсам унақа, уй олсам бунақа деган ўй хаёлимдан нари кетмасди. Охири шу даражага бориб етдики, уй олган куним ўлиб қолсам керак деб ўйлагандим.

Пўлат жимиб қолди.

– Кейин-чи, кейин нима бўлди? – деди интиқлик билан Дилдора

– Кейинми,.. кейин... ҳеч нарса! Худди аввалдан шу уйда яшаб юргандек, оддийгина қабул қилдим.

– Кўйинг-е, – Дилдоранинг ҳафсаласи пир бўлиб, нари кетди.

– Кўчасанми? – Пўлат унинг ортидан борди. – Хўп десанг, эртагаёқ...

– Кейин мени ҳеч қачон хайдаб юбормайсизми? Тўғри хотин бўлишимга ишонасизми?

– Ўзимга ишонгандай...

Дилдоранинг қалбидағи хавотир тугуни ечилиб, майин жилмайди. Эртаси куни у ишга бормади. Пўлат аллақаёқдан юқ машинасини олиб келди. Улар кула-кула Дилдоранинг “кўч-кўрони”ни ортишди. Кейин Мавжуда опаникига кириб, уй

калитини топширишди, хайрлашишди. Чинданми ё күнгил учунми, Мавжуда опа кўзига ёш олди.

– Йиғламанг, – деди Дилдора хазин товушда.
– Мен йиғлаб хайрлашишга арзимайман. Адресни ёзиб қўйдим. Бориб туриңг.

...Тўққиз қаватли уйнинг, учинчи қаватидаги янги уй Дилдорага жуда ёқди. Уч-тўрт кун ичida уёқ-буёғини таъмирлаб ҳам олишди. (Албатта, Дилдоранинг таклифи билан). “Тўрт йилдан бўён ремонт қилиш хаёлимга ҳам келмабди, – деб ўйлади Пўлат ичидা. – Аёл барибир аёл-да...”

– Уй сеники, – деди бир куни Пўлат дабдурустдан, – ҳар қандай шароитда ҳам... сеники!

У негадир шошиб гапирди. Юзида оғир изтиробли бир ифода пайдо бўлганди. Афтидан, ҳали танишганимга уч ой бўлар-бўлмас, бу аёлга ишонишим шартмикин, деган хаёл кўнглининг кўчасига ҳам келмаётганди. У яна нимадир демоқчи, ниманидир тайинламоқчи эди. Аммо айттолмади, Дилдорани чўчитиб юборишдан кўркди. Кейинги куни у аzonда чиқиб кетган кўйи кечкурун қайтиб келмади. Кутиш азобини обдон татиган аёл биринчи оқшомни тишини-тишига босиб ўтказди. Иккинчи кун ҳам ундан дарак бўлмади. Дилдоранинг кўнглига шайтон ғулғула сола бошлади. “Наҳотки, у мени ташлаб кетган бўлса? – деган ўй келди хаёлига. – Шунинг учун “уй сеники” деган экан-да...” Ўз ўйидан ўзи кўрқиб кетди. Ишхонада ҳам, уйда ҳам кунни тиқ этса эшикка қараб ўтказди. Учинчи куни эрталаб эшик кўнгироғи жиринглади. Дилдора ўринда хаёл суриб ётганди, апил-тапил кийина солиб, эшик томон отилди.

Остонада Абдулла турарди!

– Кутмаганмидингиз? – деди у заҳарли жилмайиб. – Тополмайди деб ўйлагансиз...

— Нега энди? Сиздан буни кутса бўлади, — деди Дилдора ҳам киноя билан.

— Кирсам бўладими? Ахир ташқарида туриш ноқулай...

— Йўқ, — деди Дилдора ва шартта эшикни ёпиб, унга суянди. — Эрим уйда йўқ. Бор пайтида кирапсиз.

— Ўҳ-ҳӯ, эрим... — Абдулла ўзини хотиржам тутса-да, рангти докадек оқариб кетганди. — Эргизнинг кимлигини биласизми ўзи? — У муҳим янгиликни айтиши билан Дилдорани янчидан ташлайдигандек бирдан кайфияти кўтарилди. Юзкўзлари ғалаба нашидасидан ял-ял ёнарди. — Мен суриштириб билдим. Эргиз ўғрибоши экан. Учтўртта йигит билан қароқчилик қилишаркан.

Дилдоранинг оёқ-кўлидан жон кетиб, ўзини бехол сезаётган бўлса-да, сир бой бермади.

— Бу ёфи мени қизиқтирмайди.

— Унақаларнинг умри қисқа бўлади.

— Бу ҳақда тул бўлиб қолганимдин кейин гаплашармиз.

— Демоқчиманки, ҳозир ортга қайтишнинг иложи бор. Ҳали ҳам кеч эмас...

— Ортга қайтиш... — Дилдора қах-қах уриб кулиб юборди. — Кеч эмас эмиш... Ҳа-ҳа-ҳа... Кўнгиллари яна нима тусайди? Сен абллаҳ эдинг, абллаҳлигингча қопсан, — деди у бирдан сенсираб. Абдулланинг саросималаниб қолганини кўриб, яна шараклаб кулиб юборди. — Яна ўйнашинг бўлишимни хоҳяяпсанми? Овора бўласан. Ҳеч қачон сен мени ўйламагансан. Хотинингдан безган пайтингда менинг олдимга келардинг. Чарчаган вақтингда мен керак эдим. Хотининг чўнталингни қоқиб олиб, йўл кирага ҳам пулинг қолмаганида мени эслардинг. Кейин... кейин қумга сингтан томчидек йўқ бўлиб кетардинг. Мен шўрлик юрак-бағрим

қон бўлиб сени кутиб яшадим. Эшик қўнғироғи жиринг этса юрагим қинидан чиқиб кетай дерди. Балки қута-кута ухлаб қолганимда келиб, қўнғироқни жиринглатса эшитмагандирман деб ўзимни ўзим ёмон кўриб кетардим. Уй эгасидан яширинча калит ясатмоқчи бўлиб юргандим. Мени яна шу кўйга солмоқчимисан? Овора бўласан!..

Темир эшик шарақлаб ёпилди. Абдулла чўчиб тушди. Ғазабдан дир-дир титрарди. У бундай муомалани кутмаганди. Айниқса, Пўлат ҳақидаги “янгилик” аёлни довдиратиб қўйса керак, деб ўйлаганди. Шунда у темири қизифида босмоқчи, яъни ўйлаган режасини амалга оширмоқчи эди. Бу режа анчадан бўён унинг хаёлини банд этганди. Пайт пойлаб юрганди. “Лоп” этиб орадан Пўлат чиқиб қолди-ю, иши ортга сурилди. “Алаҳ, бандит, қизнинг кўнглини олишга улгурибди, – дея ўйлади Абдулла зиналардан бир-бир босиб паствга тушиб кетаркан. Кўз олдида Пўлатнинг асабий тарзда, сурбетларча тиржайиб туриши гавдаланди. Жунжикиб кетди. – Соғ одамга ўхшамайди у.” Ўйлаган режаси амалга ошмаганидан кўнгли ғаш тортди. Кўчага чиқиб, қаёққа юришини билмай, ўйланиб қолди. Бу ердан кетгиси келмаётганини ич-ичидан ҳис этди. Чуқур хўрсинди. Дилдора уйига бориб, жанжал қилиб кетгандан кейин хотини унга gox ишониб, gox ишонмай юрарди. Ишга вақтлироқ кетса ҳам, ё аксинча, кечроқ уйга келса ҳам пиchinг қилавериб жонига тегиб кетди. Шу пиchinг сўзлар сабаб бўлдими яқинда эр-хотин қаттиқ уришиб қолишид. “Мен сизга ишонмайман, ўша хотин уйга бекорга келмади”, – дерди Мавлуда ҳадеб. Охири Абдулла деворда осиғлиқ турган “Куръон”ни қўлига олди. Уч-тўрт йил бурун бир таниши: “Куръони”ни қўлингга

олиб, қасам ичсанг, аёллар лақقا ишонишади”, – деган эди. Шу усулни қўллашга мажбур бўлди. Мавлуда найдан тараляётган куйга сехрланган илондай қотди-қолди. Ҳар қалай битта ташвишдан қутилдим, деди ўзига-ўзи Абдулла фавқулодда енгил тортиб. Энди аввалгисидан ҳам мушкулроқ ташвиш ҳали олдинда эканлигини ўйлаб, анча вақт юраги зириллаб юрди. Бу ҳақда Дилдорага айтишга қўркди. У кўнмайди, деган андиша юрагини ғаш қилиб турарди. Ўртадан Пўлат чиқиб қолмаганида ҳали ҳам бир қарорга келолмай юрармиди. Дастреб, уни Пўлат билан кўрганида “мени куйдирмоқчи” деган хаёлга бориб, сир бермасликка ҳаракат қилганди. Ҳали яхши танимаган одамга ўзини топшириб, унинг этагидан тутиши, бир кунда ҳе йўқ, бе йўқ кўчиб кетиши йигитнинг хаёлига ҳам келмаганди. Ўйлайвериб, жинни бўлиб қолаёзди. Ўзича бир неча кун аразлаб ҳам юрди. Ҳар қалай, шунча йил эр-хотиндек бўлиб... Оқибат шу бўлдими? Қизнинг бу қилифи иззат-нафсига тегди. Йўқолган пичноқнинг сопи олтин қабилида иш тутди. Орқаворатдан аввал Пўлатни сўраб-сурештириди. Сўнг Дилдоранинг изига тушди. Яқингинада ундан қочиб юрган, тасодифан кўришиб қолишганда юраги зириллаб, унинг тезроқ кетишини сабрсизлик билан истаган одам энди аёлни топиш илинжида оромини йўқотган эди. “Майли, мен сенга уйланаман, – демоқчи эди у аёлга бениҳоя карам кўрсатаётгандек виқор билан. – Фақат бир шарт билан. Бу ҳақда ҳеч кимга, ҳатто ота-онангга ҳам айтмайсан. Фарзанд, деб ҳам оғиз очмайсан!” Бола туғилиши аёлнинг ҳукуқларини бир неча поғонага кўтариб юборишини у жуда яхши фаҳмларди. Ошдан чиқсан тошдек бирдан Пўлат пайдо бўлиб қолмаганида Дилдоранинг рози бўлиши турган

гап эди. Хурсандлигидан йиғлаб ҳам юборармиди. Бугун келиб күрдикى, у хато ўйлабди. Ҳалигина унга захрини сочган, мазах қилган аламзада, кибрли аёл кечагина бўйнига осилиб: “Ҳаммасига чидайман, фақат мени ташлаб кетманг”, деб ялинган қизга сира-сира ўхшамасди.

* * *

Тун ярмидан оғиб, одамлар ширин уйқуда ётган маҳал темир эшикни кимdir секин тақиллатди. Уйкуси ўчиб, алам устида ўтирган Дилдора эшик олдига учеб борди. “Ким?” деди астагина. Қаттиқроқ нафас олишга-да қўрқди.

– Мен, Дилдор, мен, – деди кимdir паст овозда.

Дилдора овоз эгаси Пўлат эканлигини дарҳол англади. Бироқ эшикни очишга шошилмади. Тутқични ушлаган қўллари титраб турарди.

– Биламан, мендан хафасан, – деди Пўлат яна паст овозда. – Сенга айтишим керак эди. Кечир мени.

– Очмайман, – деди Дилдора йиғламсираб. – Тўрт кундан бўён ўлиб қолай дедим-ку. Қаерда юрган бўлсангиз, ўша ерга боринг.

– Дилдор, мени кечир. Эшикни очмасанг шу ерда ўтиравераман.

– Ўтираверинг... Мени ким деб ўйляяпсиз? Бир оғиз айтиб қўйсангиз, ҳаққингиз кетармиди! Нега мен бошқалардан эшитишим керак? Уйимни бериб қўйиб, катта муруват қилдим, деяпсизми? Ҳозироқ чиқиб кетишим мумкин. Тўрт томоним қибла менинг. Этагимни бошимга ёпаман-у...

– Дилдора, бўлди...

– Очмайман барибир эшикни...

– Шу ерда ўтиравераман эшикни очмагунингча.

Ҳеч қаёққа кетмайман.

— Ўтираверинг!..

Орадан чамаси икки соатча вақт ўтди. Иккаласи ҳам ҳамон эшик олдида туришарди. Бутун вужудлари қулоққа айланиб, бир-бирларининг хатти-ҳаракатини эшитишга уринишарди. “Йиғла-япти шекилли, — дея ўйларди Пўлат. — Ҳақиқатан ҳам ноинсофлик қилдим”. “Ана, эшикка суюниб ўтириб олди, — деб ўйлади Дилдора. — Совуқ ўтиб кетмасайди. Чекаяпти... “Уҳ” тортди”...

Бир оздан сўнг “ширқ” этиб эшик калити буралгани эшитилди. Пўлат ирғиб ўрнидан турди. Ярми чекилган сигаретни шоша-пиша улоқтирди.

— Сенга ким хабар берганини биламан, — деди у ичкарига кирган заҳоти. — Сен ... боя ... айтганингда ... Бирдан ҳаелимга келди. Ўша! Аниқ, ўша!

Дилдоранинг қовоқлари қизариб, шишиб кетгани боис кўзлари қисилиб қолганди. Йигитнинг юзига қараёлмади. Ваннага кириб, совуқ сувга юзини чайди, қовоқлари устига юмшоқ сочиқни хўллаб босиб, бир неча сония турди. Сал ўзини босиб, аввалги ҳолига келгандан кейингина Пўлатнинг ёнига ўтди...

— Тунов куни айтгандим уйдан қочиб кетганимни, — дея гап бошлади Пўлат. У жуда асабий эди. Ҳали уйга кириб келганидан буён тинимсиз, устма-уст сигарет тутатар, бирини чекиб бўлар-бўлмас иккинчисини бошлар, кичкинагина шиша кулдон бир пасда сигарет қолдиги билан тўлган эди. — Иш йўқ, турар-жой йўқ. Бир қанча вақт вокзалда ётиб юрдим. Қаерга иш сўраб борсам, прописка сўрашади. Оддий таксичиликка ҳам олишмади. Правам бор бўлмаса. Пропискани тўғрилаб келинг, кейин гаплашамиз, дейишиди. Уйдан бир оз пул билан чиққандим. Тўрт ойга базўр етказдим. Каствомимни сотишга мажбур

бўлдим. Кейин соатимни... Охирида сотишга арзигулик ҳеч вақом қолмади. Қорни оч одамни ҳар мақомга йўрғалатиш мумкинлигига ўша пайтларда амин бўлдим. Шу... шу... йўлга кирганимни ўзим ҳам билмай қолдим. Аввалига вақтингчалик, деб ўйладим. Ҳадисини олгач, ташлагим келмади. Аммо биринчи марта қўлга тушганимда жуда қўрқиб кетганман ва йиғлаганман. Ҳа, ҳа, йиғлаганман. Қамоқхона деганда кўз олдимда даҳшатли манзаралар гавдаланарди, – Пўлат бирдан гапиришдан тўхтаб, ўрнидан турди. Унинг юзи шу қадар ўзгариб кетгандики, Дилдора қўрқиб кетди. Устма-уст чекиб, сал ўзини босиб олгунча бир оз вақт ўтди. У жойига қайтиб ўтирганда юзидағи қўрқинчли ифода батамом йўқолган, ўрнини сурбетлик эгаллаган, кўзлари такаббурлик билан боқарди. Аммо сўзлар бўғзидан базўр отилиб чиқарди. – Қамоқхонага тиқиб қўйиб, ўзларича тарбияладик деб ўйлашади-да. – У бировни мазах қилаётгандек, совуқ тиржайиб қўйди. Ҳалигина босиқлик билан равон сўзлаётган одам бирдан алаҳсираётгандек узук-юлуқ гапира бошлади. – Ақлинни киритиб қўйдик.. хуллас.. нима десам экан... энди бу ишни қилмайди деб ўйлашади. Аммо... Лекин адашишади. Жуда қаттиқ адашишади. Мен қамоқхонада... Олтмиш тийин уриб қолгани учун қамалиб кетиб, у ердан қилни қирқ ёрадиган ўгри бўлиб чиқсан одамни биламан. Лекин яхши томони ҳам борки, буни ҳеч нарса билан тенглаштириб бўлмайди. Ҳа... ҳа... бор... Яхши томон шундаки... қандай тушунтирсам экан?... Қўйиб берсанг бир-бирини ғажиб ташлашга тайёр, асабий, жулдурваки маҳбуслар ичидатепадаги ис босган туйнукдан тушаётган бир тутам нурга тикилиб ўтириб озодликни соғинасан.

Юрагинг эзилади. Эркинликнинг қадрига етасан. Қанча муддат олганигни эслайсан... ва қанча қолганини ҳисоблашга ҳаракат қиласан. Бошда бир оз қийин бўлади, худди вақт ўтмаётгандек туюлади. Кейин... қунлар ўтавергани сайин... ҳисоблаш ҳам осонлашади. Ўзингга ўхшаган маҳбуслар ёқалашиб, бошингни ёриб қўйишса ҳам унчалик алам қилмайди. Бироқ... сени одам ўрнида кўрмай, бирорта ҳайвон... ёки... ёки жирканч маҳлуққа қарагандай муомала қиладиган, сал саркашлиқ қилсанг аямасдан дўпослайдиган қоровулларни бир умрга ёмон кўриб қоласан... Нега рангинг оқариб кетди? Кўрқяпсанми? Шунинг учун сенга гапиргим келмаганди-да. Ҳозир... оз қолди, тугатаман. Биттаси бор эди. Юзидан заҳар томиб турарди. Жуда бераҳм ва бешафқат эди. Қамоқхона унинг маҳрига тушгандай тутарди ўзини. Кўп эмас-у... шу... бир-икки марта менинг ҳам ёмон таъзиримни берган. Ўзим ўлар ҳолатда ётибман-у, ҳадеб: “Шу ердан эсон-омон чиқиб кетсам бир-кунмас бир кун бўғизлаб кетаман!” дея қасам ичганим ҳеч ёдимдан чиқмайди. Уч-тўрт ой бурун шу ишни ташлайман деб, ўзимга ўзим сўз бергандим. Аммо ўзимни тутолмадим. Тўрт кун аввал яна бир ишга қўл урдим. Азбаройи... сени деб. Сени хурсанд қилмоқчийдим. Афсуски, бир шеригим чув тушириб қўйди. Яқинда бизга қўшилганди. Биринчи марта чиқиши эди... Унинг касри уриб, иккита шеригим қўлга тушиб қолишиди. Қаёққа гумдон бўлди у? Билмайман... Уч кун ўшани изладим. Осмонга чиқдими, ерга кириб кетдими... Билмайман... билмадим...

Пўлат бошини чангллаган кўйи, хаёлга толди.

Дилдора адойи тамом бўлган, стулга михланиб қолгандек қимир этмасди.

— Энди мендан воз кечасан, шундайми? — деди Пўлат титроқ овозда.

— Нега энди? — саволга савол билан жавоб берди Дилдора. — Ўғрини севиб бўлмайдими? Ўғрида юрак йўқми?

— Бор, жонидан, бор... — дея қичқириб юборди бирдан руҳи кўтарилган Пўлат. У Дилдорани даст кўтариб, чир айлантира бошлади.

— Мендан ор қилмайсанми? — дея қичқирди Пўлат чир айланаркан.

— Йўқ. Ҳеч қачон... Ҳеч қачон... Энди ҳеч нарсани ўйламайман... Ҳеч нарсага куймайман...Faқат яшайман... яшайман!

Улар қий-чув қилишганча гир-гир айланишар, бақиришар, кулишар, ўзларидан бўлак ҳаммани, ҳамма нарсани унтишганди. Ташқарида эса минг азоб билан осмон ёришиб, жимгина тонг ота бошлаганди...

Орадан бир ҳафта ўтди. Бу вақт ичида Абдулла яна икки марта келди. Дилдора билан гаплашишга ҳаракат қилди. Охирги келганида Дилдора уни қувиб солди. Шундан кейин Абдулла анча вақтгача кўринмай қолди. Дилдора унинг феълини яхши билгани учун, негадир кўнгли ғаш бўлиб юрди. “Писмиқ... Пайт пойлаб юргандир-да”, — дея ўйларди у ҳадиксираб. Нимадан ҳадиксираяпти? Ўзи ҳам буни аниқ билмасди.

— Бугун изимга тушишди, — деди бир куни Пўлат дабдурустдан. Унинг юзи ҳорғин ва ташвишли эди. — Тасодифан сезиб қолдим.

Тунов кунги суҳбатдан кейин Дилдора шундай бўлишини фаҳмлаган, қачондир, бир йилдан кейинми ёинки бир ойдан кейин, шундай бўлишини сезган ва бунга ўзини тайёрлаб ҳам келаётганди. Шундай бўлса-да, юраги орқасига тортиб кетди.

— Кўзингизга шундай кўрингардир-да, — дея олди зўрға.

— Кўзимга кўрингани йўқ. Аниқ биламан... Яхиси бу ерга вақтинча келмай тураман. Сен хавотирланма, вақт топиб хабар оламан. Айтгандай, мен унинг олдига бордим...

— Кимнинг? — деб юборди Дилдора ва бирдан гап ким ҳақида кетаётганини англаш, қизариб кетди.

— У энди сени безовта қилмайди. Эркакчасига гаплашиб олдик, — деди Пўлат ва чўнтағидан қоғозга ўроғлик алланима чиқариб, стол устига қўйди. — Кийимларимни алмаштириб олмоқчи-ман. Дазмол босганимисан?

— Ҳа, — деди Дилдора ва қоғозга ўроғлик нарсага ишора қилди. — Бу нима?

— Унинг қайчиси... Соч кесадиган... Ойнасининг олдида турган экан. Билдирмасдан олиб қўйдим. Керак бўлиб қолар...

Пўлат маъноли қараб қўйди. Дилдора унинг қарашини тушунди. Бироқ индамади. Пўлатнинг ҳозиргина ечган кийимларини йиғиштириб олиб, ювиш учун ванаҳонага кириб кетди. Пўлат унинг кўнгли оғриди, деган хаёлга борди. Рашки қўзиб, жаҳли чиқди. Аммо ўзини босди. Дилдора нотўри хаёлга бориб, мендан нафратланиб юрмасин, деган ўйда у аёлнинг ортидан борди ва оғринган алфозда деди:

— Мени қитмирлик қиляпти деб юрма тағин. Шунчаки... олгандим. Аммо шуни яхши билиб қўй, мен унга ишонмайман.

Дилдора миқ этмади. Ваннага энгашган кўйи кир ювишда давом этди. У ўйларди. Бошидан ўтган воқеаларни ўйлар, ўзича мулоҳаза қилас, ҳаммаси айқаш-уйқаш бўлиб кетган пароканда хаёлларини тартибга келтиролмай хуноби ошарди.

Ўйлаб ўйининг тагига етолмасди. “Шундай бир иш қилиш керакки...” – дерди у ҳадеб ўзига ўзи.

Аёл бир қарорга келганда тонг бўзариб қолганди.

Дилдора қўни-қўшниларга кўринмаслик учун тезроқ чиқиб кетишга чоғланаётган Пўлатни саволга тутди:

– Анави шеригингиз топилдими? Қочиб кетган бор-у...

– А, ҳа, йўқ, – дея шошиб жавоб берди Пўлат.

– Мабодо... жуда зарур бўлиб қолганида... бошқа бироннинг номини айтиб юборсангиз бўладими? Далил-исбот қўлингизда...

Пўлат ялт этиб Дилдорага қаради. Аёл ундан кўз узмай, тик қараб турарди. Пўлат унинг кўзларида куйган, ўртанган, топталган, аламзада юрак аксини кўргандек бўлди. Шу билан бирга чеки-чегараси йўқ, бепоён бир нафратланиш ҳам мужассам эдики, Пўлат дош беролмади. Индамай чиқиб кетди...

Пўлат шу кетганича қайта б келмади. Анча вақтдан кейин ёшгина бир йигитча келиб, унинг қўлга тушиб қолганини айтди. Яна бир неча кун ўтгач, ўша йигитча Дилдорага яқинда Пўлатнинг устидан олиб борилган тергов ишлари тугаб, иши судга оширилганини, у билан Абдулла деган шериги ҳам бирга эканлигини айтди. Кетар чоғида яна келиб хабар олишини, мабодо жуда зарур бўлиб қолганда, ҳа, у айнан шундай деди, жуда зарур бўлиб қолганда ўзини қаердан қидириб топиш мумкинлигини айтиб, хайрлашди. Дилдора меҳмон кетгач, у ўтирган стул устида бели боғланган бир даста пул ва бир парча қофоз турганини кўриб қолди. Юраги ҳапқириб қофозни қўлига олди. Хат Пўлатдан эди. Унда шундай сўзлар ёзилганди: “Мени кут, азизам...”

КҮЛАНКА

— **Х**ой, ким бу? Мендан бошқа биروف борми бу ерда? “Бехрузман” дейсанми? Бекор айтибсан, менман Бехруз! “Унда мен кимман?” дейсанми? Мен қаёқдан билай? Бу ер менинг масканим. Куни кеча пешинда олиб келишди мени бу ерга. Сен... Айтганча, исмингни нима дединг? Яна бир қайтар. Овозинг танишдай...

Бехруз?!

Наҳотки бу сен бўлсанг?! Бу ерда нима қилиб ётибсан?! Ахир сен сувга чўкиб кетгандинг-ку! “Оғайниларим билан муштлашиб қолганимизда улар мени бехосдан ўлдириб қўйишиди, кейин яrim кечаси шу ерга кўмиб кетишиди”, дейсанми? Қанақа оғайниларинг? Ахир сенинг энг яқин дўстинг мен бўламан-ку!

“Ишхонадаги оғайниларим билан ўзимизнинг кўлга чўмилгани борувдик!” Э-ҳа, тушундим, тушундим, ичиб ўтириб айтишиб қолгансанлар, кейин уришиб кетгансанлар, шундан кейин улар сени ўлдириб қўйганларидан қўрқиб кетиб, қабристонга олиб келишгану чуқур қазиб, апил-тапил шу ерга кўмиб кетишган... Номардлар, ҳатто дурустроқ қабр ҳам қазишмабди-да! Ҳа, тўғри, янги қабр дўппайиб турса, одамлар шубҳаланиб қолишарди. Ахир ўша кунлари сендан бошқа ҳеч ким қишлоқдан ғойиб бўлмаганди-да.

Кизик, наҳотки гўрковлар бехабар қолишган бўлса? Ахир мангу сукунат чўмган масканда тунда қандайдир безовталик бўлгандир? Ўшанда сени кўлга чўкиб кетибди, ўлиги топилмади, деган гапдан бошқа ҳеч нарса эшифтмадик.

Буни қара, наҳотки энди битта қабрда ётсак? “Бир сиқимгина суякларим қолган, сенга оғирлигим тушмайди,” дейсанми? Ҳа, ахир анча йил ўтди-да. Зах ўтиб кетгандир роса? Кечадан буён кимдир ҳадеб инграётганди. Сен экансан-да. Ёмғир ҳам тина қолмади. Шамолни айтмайсанми яна. Икки кундан буён ёмғирни бошлаб келган қаттиқ шамол эсиб турди. У вақтда мен ҳали ҳаёт эдим. Икки кун кечаю кундуз увиллаган овоз тинмади. Шамол қувиб юрган булутларнинг кўпчиган қорни Ойқортовнинг нақ киндигига текканидан кейингина бирдан ёмғир қуиб юборди. Ўзиям роса шиддат билан ёғди. Тарновлардан кўпириб кетган сув шовуллаб оқар, кўқдан тинмай жала қуяр, кўлмакларда чучвара қайнар, ҳамма ёқни ғарқ қилгудай тўлиб-тошган сув ерга сингиб улгурмасди. Кейин эса сел бостириб келди. Мени афтидан сел оқизиб кетди. Анчадан буён бетоб эдим-да. Аммо сен билан битта қабрда учрашамиз, деб ўйламагандим. Нима, тақдир ҳазилими бу? “Бу бежиз эмас,” дейсанми? Нега ахир?! “Мендан кейин нималар бўлди?” Сўраб нима қиласан? Энди ҳаммаси ўтмишга айланган бўлса... “Ўтмишда сирсиноат кўп бўлади, келажак эса ҳаммага маълум...” Ҳа, ҳаётлигингда ҳам шу гапни кўп такрорлардинг. Бўпти, ҳадеб ижиклайвермасанг, ҳаммасини бир бошдан гапириб бераман. Бу шундай бўлган эди...

* * *

Уфқ қаптар қони сачрагандай қизғиш тус олган, тонг ёришиб келаётган пайт эди. Ҳали чараклаб

улгурмаган қүёш нурлари бутунлай тарқаб кетмеган қоронғилик қаърини ёритишга ожизлик қиласарди.

Кунчиқарга қараган айвон устунига суюнганча ёришиб келаётган уфқа тикилиб ўтиарканман, түсатдан пайдо бўлган самовий йўл бўйлаб узоклашиб кетаётган шарпангни кўриб қолдим. Нимадир юз берганини англашга улгурмасимдан, чараклаб кетган нурафшон ёғду сенинг шакли шамойилингни менинг нигоҳларимдан яширди...

Ўша субҳи содикда ишга кетаётиб кўча эшик олдида турган Дилдорадан кеча эрталаб уйдан чиқиб кетганча қайтиб келмаганингни эшитдим. Унга эркак киши иш билан юради-да, деганга ўхшаш гаплар билан тасалли бериб ўтиб кетган бўлсам-да, негадир кўнглим ғаш тортиб қолди. Ишхонада ҳам шу кайфиятда юрдим. Кечқурун эса одамлардан: “Бехруз кўлга чўкиб кетганмиш!” деган миш-мишни эшитдим.

Бу хабарга бир ишониб, бир ишонмай, уйингга қараб йўл олдим.

Ўшанда Унинг аҳволини бир кўрсанг эди!

Сочлари паришон ёйилган, юzlари тимдаланган, ёқавайрон бир аҳволда ер муштлаб йиғларди.

Икки аёл унинг ёнида кўлларидан ушлаб, суюб туришар, агар ўз майлига қўйиб беришганида, У ҳеч иккиланмай ўзини ерга отиб, майиб-мажруҳ қилган бўларди.

– Сабрли бўлинг, Дилдора, – дедим секин ёнига бориб. – Ҳали ҳеч нарса аниқ эмас-ку.

Аммо у мени кўрмади, кўрса ҳам танимади...

Бир ҳафтадан кейин жасад йўқ, лекин биз аза очдик. Чунки favвослар қанча излашган бўлмасин, ўлигинг ҳам топилмади-да.

Дилдора қора кийди.
Бошдан-оёқ қоп-қора кийим.
Юзи қордай оқарган.
Мижжаларида ёш қалқиб турарди.
Бундай бўлади, деб сира ўйламагандим. Ўлим кутилмаганданда келади, деганлари шу бўлса керак.

Нима бўлганда ҳам ўлганга қийин, тириклар бир кунини кўраверади, дейишади. Бироқ тирикларга ҳам осон бўлмас экан. Йўқ, кўнгилдаги оғирликларни назарда тутяпман. Худди сенинг ўлимингга мен айбдордай, анча вақт ғалати кайфиятда юрдим. Дилдоранинг ҳам кўзига кўринмадим. Фақат белгили кунлари унинг ҳузурига бориб, барча оғирликларга тайёр эканлигимни, ортиқча заҳмат чекмаслигини айтардим.

Дилдора бўлса ҳамон ўзига кела олмасди. Яхши ҳамки ўғлинг бор. Бечора аёл эртадан-кечгача шу бола билан ўзини овутарди чамаси, негаки қачон қарасам, ўғлингни қучоғидан қўймасди.

Кунлар ўта бошлади.

Хотиним билан бир йил яшамасдан ажрашганимни тириклик чоғингдаёқ билардинг, сабабини ҳам тусмоллардинг чамамда; Муҳайёни ҳам яхши танирдинг, бир-икки марта жиқиллашиб қолганмизда унинг тарафини олиб, менга насиҳат қилгандинг; “Муҳайёга ўхшаш аёлни икки дунёда ҳам топиб бўлсан энди!” дегандинг у тугунини кўтариб чиқиб кетган куни менга. “Сизни тушунушишга ҳаракат қилдим, лекин уддасидан чиқолмадим, яххиси кета қолай...” деганди Муҳайё кетиш олдидан. Ҳа, у ҳақиқатан ҳам яхши аёл эди, қолаверса ўша вақтда ҳаммадан кўра шу аёл – Муҳайё мени кўпроқ тушунган деган фикрдаман, негаки севиб, севилмаган, муҳаббатдан баҳраманд бўлмаган кишиларда ўзгаларнинг муҳаббатини хис

қилиш кучли бўлади деб ўйлайман, қолганларига менинг ўжар қалбим сабабчи. Нима қилай, фақат бир аёлгагина тикилган, ҳаётнинг жамики қувончларини фақат унинг сиймосида деб билган эркакнинг ҳаёти ҳаёт эмас, заҳар-заққумнинг ўзи бўларкан. Сенинг вафотингдан кейин менам ёлғизлиқдан сўппайиб, ўзимни қўярга жой топмай юрган бўлсам ҳам, ҳамдард бўлишни истаб, Дилдоранинг хузурига бормадим. Ҳозир унга қанчалар оғир эканлигини ҳис қиласдим.

Аммо кунларнинг бирида Уни кўчада учратиб қолдим. Нигоҳлари қайғули, лекин аввалгида қаддини кериб, гўё бу оламда ўзидан бошқа аёл йўқдай, викор билан кетиб бораётган экан.

Анча вақт ортидан қараб турдим.

Юрагимда яна алланималар ғимирлаётган, унут ҳислар безовта қилаётган бўлса-да, ўзимни кўрмаганга олиб, ичкарига кириб кетдим. Ҳувиллаб ётган хонамга кириб девордаги соатга боқдим. Соат капгирлари икки томонга керилиб тарвақайлаганча тинмай чиққилларди. “Вақт ҳамма нарсага бурнини суқаверади, охирда ҳаммаси унутилади ва ўзгаради,” деган фикрни хаёлимдан ўтказдим ўша пайтда соат милларига тикилиб турганча.

Ҳа, мен вақт ўтишини кутардим.

Шунинг учун ҳам неча замонлардан буён сарсон бўлган туйғуларим ичимда ғалаён қилаётган бўлса-да, Дилдора билан кўришганимизда ўзимни вазмин тутардим. Кун келиб ҳаммаси ўзгаришига ишонардим; тўғри, дунёдаги нарсалар тартибини ўзгартириб бўлмайди, аммо инсон ўзгаришга мойил, айниқса аёл зоти шароитга боғлиқ ҳолда ўзгаришга, мослашишга мажбур, чунки шароит кўпинча айнан шундай бўлишни талаб қиласди.

Қолаверса, хотиралар ҳар қанча жон ўртагувчи бўлмасин, аста-секин унутилади. Фақат бу дарҳол юз бермайди.

Шу боис хонам деворидаги соатга бот-бот ти-килганча пайт пойлардим.

Кўп ўтмай унга совчилар келаётганини эшитдим. Күёвликка номзодлардан бири ҳатто мендан ўртага тушишни илтимос қиласа де. Тавба, дунёда бева эркаклар ҳам кўп экан-да!

Ўша куни қандай қилиб унинг ҳузурига борганимни билмай қолдим.

– Бирор ёрдам керак бўлса менга тортинмасдан айтаверинг, – дедим ўзимни шунчаки ҳолидан хабар олиш учун келгандай тутиб.

– Хўп, – қисқа жавоб берди Дилдора, кейин ерга қараганча миқ этамай ўтираверди.

Бир маҳал қарасам елкалари силкиняпти...

Жуда ноқулай ахволда қолдим. Ахир бунақада одам юраги сиқилиб ўлиб қолиши ҳеч гапмас.

– Хўп, мен бора қолай бўлмаса, – дедим аста ўрнимдан кўзғолиб.

Дилдора унсиз бош ирғади.

“У мени ўзига яқин олганида эшигининг турумини бузаётган совчилар ҳақида гапирган бўларди, – деб ўйладим чиқиб кетарканман. – Бундан чиқди у ҳамон менга бефарқ экан-да...”

Бироқ мантиқан ўйлаганда, совчиларнинг шашти шундай бўлса, у қачондир ким биландир турмуш куришга розилик бериб юбориши турган гап. Мен яна оғзимни очиб қолавераманми бир вақтлардагидай?!

Юрагимни аламли қизғаниш, изтиробли рашк қамради. Эвоҳ, бу туйғу аллазамонлардан буён юрагимни ўртаб, асабларимни қақшатиб келади. Аммо мен чидашга уринардим. Ва бунинг уддасидан чиқардим ҳам.

Лекин энди бунақаси кетмайди!
Шошилиш керакка ўхшайди.

Чин сўзим, дўстим, сенинг ўлимингда заррача айбим йўқ, бироқ Дилдора сени танлаганидан кейин, унинг ишқида куйиб юрган вақтларим сенга ўлим тилаганим рост. Сен бўлмаганингда Дилдора мени танлашига ишонардим-да.

Тунни қийинчилик билан ўтказдим.

Эрталаб эса унинг ҳузурига йўл олдим.

Эшик олдида эски дўстларимиздан бирини учратиб, юрагим яна ғаш тортди.

– Кўнгил сўрагани кирувдим, – деди дўстимиз мен билан қўл бериб кўришганча, сирғалиб ёнимдан ўтиб кетаркан.

Ортидан қараб қолдим.

Қизик!

Остонада Дилдорага дуч келдим.

Нигоҳлари ғамгин, аммо ҳамон кибрли.

Бир вақтлар менга унинг мағрурлиги ёқарди, лекин энди негадир ғашим келадиган бўлиб қолди.

– Иброҳим кептими? – деб юбордим беихтиёр унга кўзим тушган заҳоти.

Дилодора бир лаҳзалик сукутдан кейин жавоб берди:

– Ҳа, эrim ўлганидан буён мендан ҳол сўровчилар кўпайиб қолди!

Кейин жилмайди.

Киноя ва кибр билан жилмайди.

Тушундим.

Бирдан таъбим хиравиги олов теккан шамдай эриб кетди. Нима бўлганда ҳам йилт этган табассум унинг қайғули юзини бир лаҳзага бўлсада ёритиб ўтганидан енгил тортдим.

– Буни қаранг, – дедим бир оздан кейин хижо-латга тушиб. – Айнан менам сиздан ҳол сўрагани келаётгандим. Ишга кетиш олдидан.

— Мендан хавотир олаверманг, ахволим яхши, — деди Дилдора шунда киноядан холи, беғараз, аммо ўзига ишонган ҳолда. — Қолаверса ўғлим бор, бутунлай ёлғиз эмасман.

Шу гапдан кейин индамай кетсам бўларди, лекин чидаб туролмадим.

— Хавотир олмай бўларканми? Эшишишимча, кун-кунора совчилар келиб турганмиш.

— Эрсиз аёл кўприк бўлади, — деди Дилдора аста.

Кейин бурилиб ичкарига кириб кетди.

Остонада қанча турганимни билмайман.

Ичкаридан Дилдоранинг чуқур хўрсинганини эшийтдим. Кейин қадам саслари: шип-шип, шип-шип...

Бирдан қадам саслари эшитилмай қолди.

Юрагим хавотирли увишганча дераза олдига келиб, ичкарига мўраладим.

Дилдора деворга тақаб қўйилган каравотда ухлаётган болакайнинг ёнида тиз чўкиб турганча, унинг юз-кўзларини силарди.

Юрагимни яна аламли қизғониш, изтиробли рашк эза бошлади. Хоҳ ишон, хоҳ ишонма, ўша топда болакай кўзимга шунчалик ёмон кўринидики, агар у бўлмаганида Дилдора аллақачон меники бўларди, деган ўй кечди хаёлимдан. Ана шунда кўзимга дунёдаги энг маъсум аёл бўлиб кўрина-диган бу жувоннинг қалбини бир уринишдаёқ забт этган бўлардим.

Томоқ қириб қўйдим.

Дилдора чўчиб бошини бурди.

— Ҳали ҳам шу ердамисиз?

— Ҳа...

Дилдора бир-бир босганча дераза ёнига келди.

Бир неча сония бир-бирилизга тикилиб қолдик. Унинг бутун жозибаси кўзларида ва бўса

учун яратилгандек пуштиранг лабларида эди. Мен ундан кўз узолмай қолдим. Бир маҳал Дилдора-нинг киприклари титрай бошлади.

– Дилдора, биламан, ҳозир сизга осонмас, лекин биласизми, бу аҳволда... ўзингизни олдириб қўя-сиз.

Дилдора кафтларини юзига босди.

– Йифламанг... Яна йифласангиз...

– Йиглаётганим йўқ... Күёш нури...

– Дилдора, сиз билан очиқасига гаплашиб олмоқчиман. Агар рози бўлсангиз...

– Йўқ! – бирдан кескин жавоб берди Дилдора.

– Нега? – дедим оғриниб. Ўша вақтда дунё кўзларимга қоронги бўлиб кетди.

– Яхшимас... Ахир Бехруз дўстингиз эди!

– Лекин энди у йўқ, йўқ, тушуняпсизми? Ҳаёт эса давом этади, – дедим ичкарига бир назар ташлаб қўйиб.

Кутилмаганда Дилдора бутунлай бошқа оҳангда жавоб берди:

– Ўғлимга ёмон кўз билан қараманг, илтимос.

Ғалати бўлиб кетдим.

Назаримда бу аёл менинг ичимда ёзилганларни бемалол ўқий оларди...

Дилдора дераза олдидан узоклашди.

Ич-ичимдан аллақандай тошқин кўтарилди.

Нима бўпти, Бехруз дўстим бўлса? Нафси-ламбрни айтганда, Бехруз уйланмасидан аввал Дилдорани мен яхши кўришимни биларди, лекин у ҳеч нарсадан истиҳола қилмади-ку! Мен уни деб умримнинг энг қимматли дақиқаларини елга совуриб, тунлари болиш қучоқлаб ўтаяпман. Ҳатто бир мушфиқ аёлга шафқатсизлик қилишгacha етдим! Энди Бехруз йўқ... Агар ўғли ҳам бўлмаганида!

— Самандар ака, сиздан буни кутмагандим, кетинг, — деган овоз эшитилди ичкаридан. — Агар яна бир марта шу ҳақда оғиз очсангиз!..

Дилдоранинг сўзлари юрагимни тешиб ўтди.

Нима, менга севиш мумкин эмасми? Нега Дилдора хафа бўлди? Мен одам боласи орзу қилиши ва етишишни исташи мумкин бўлган нарсадан ортиқ бирор нимани тиламаган эдим.

“Энди ўзи чорламаса остонасига қадам босмайман!” дея аҳд қилдим.

* * *

Бироқ тоқатим икки кунга етди холос. Учинчи куни эрталаб яна унинг эшиги олдида пайдо бўлдим.

— Самандар ака! — дея қичқириб юборди Дилдора менга кўзи тушган заҳоти.

Нимадир юз берганини англадим. Отилиб ичкарига кирдим.

Каравотда Дилдоранинг ягона овунчоғи болакай, сенинг ўғлинг иситмадан алангай оташ бўлиб ётарди.

“Келганим яхши бўлган экан...”

— Ярим кечаси бирдан иситмаси кўтарилиб кетди, — дея йиғлаб гапирди Дилдора. — Шундан бүён алаҳлаб ётибди. Дорилар кор қилмаяпти.

— Дўхтир чақирдингизми?

— Ҳа, ҳозир келиб кетди.

— Нима деди?

— Шамоллаган бўлса керак, деди. Мана, укол-дори ёзиб берди...

— Буни касалхонага олиб бориш керак менимча, — дедим болакайнинг аҳволига разм солиб. — Оддий шамоллашга ўхшамаяпти.

Дилдора дархол кийина бошлади.

Мен болани күтариб олдим.

Касалхонага бордик.

Афсус...

Бир ҳафтадан кейин Дилдоранинг бир ўзи касалхонадан қайтди. Болакай терлама деган дардга чалинган экан. Дўхтирлар сақлаб қола олишмади.

– Нега бундай бўлди? Нега?! – Дилдора зор-зор қақшаб йиғларди ҳар куни. – Нега бундай бўлди? Ахир терлама аллақачон йўқолиб кетган экан-ку!

Унга таскин беришдан ожиз эдим.

Аммо нимадир дейиш керак...

– Худонинг хоҳиши шу экан, – дедим секин.

Шунда Дилдора чақмоқ ургандай қалқиб кетди. Кўзлари чақчайиб, қорачиқлари отилиб чиққудай бўлиб менга каради.

– Худонинг ишими? Шу Худонинг ишими? – дея шивирлади у телбаларча. – Йўқ, бу Худонинг иши мас. Худо сизга қараганда инсофлироқ эди! У менга ўзим истаган нарсаларни беришдан бош тортмади, аммо сиз... умр бўйи мени таъкиб этишдан чарчамадингиз! Сиз уларнинг яшашини истамадингиз! Сиз кўрқинчли одамсиз! Мен сиздан кўрқаман...

Ха, у ҳақ. Мен уни севиб қолганимдан буён худди ов пайтида изига тушган жайрондай таъкиб этиб келаман. Кўздан қочирмайман сира. Аммо бу айб ёки хато эмас менимча!

Индамасдан хонани тарк этдим.

Жазаваси тутган аёлга гап уқтириб бўлармиди?

Роппа роса икки ой ундан хабар олмай қўйдим.

Қаттиқ хафа эдим. Бироқ биламанки, ҳеч нарса, ҳар қандай хафагарчилик унинг қиёфасини кўз олдимдан нари суриб кетолмайди.

Тунларни девордаги соат милларига тикилиб ўтказардим: чиқ-чиқ-чиқ.

Бир оқшом кўчадан эшитилаётган шовқин-суронни эшитиб, сарпойчан уйдан отилиб чиқдим. Назаримда шовқин Дилдоранинг уйи томондан келаётганди.

Ички сезгим алдамаганига етиб борганимдан кейин ишондим.

– Иброҳим деганлари уйига бостириб кирибди, – деди қўшни аёллардан бири менга ўзини яқин олиб. – Ўзи анчадан бери шу ёқقا зир қатнаб юрувди. Энди эрсиз аёл бўлганидан кейин ит ҳам, бит ҳам... Тавба, эркакларга ҳам ҳайронман, битта хотинга мунча пашшахўрда бўлишмаса! Иброҳимнинг бип-бинойидай хотини бор-а!

Қўшни аёлнинг сўзларини охиригача эшитмадим. Ичкарига кирдим. Хаёлимда Дилдора хун бўлиб йиғлаб ўтиргандай туюларди.

Йўқ, у мени бутунлай хотиржам қарши олди.

– Хавотир олманг, ҳеч нарса бўлгани йўқ!

Дилдора шундай деди-да, тескари қаради.

Бу унинг мени тинч қўй, дегани эди. Аммо мен жойимдан жилмадим. Дилорадан хафа эдим ҳамон. Аммо айни дамда уни бу аҳволда ташлаб қўя олмасдим. Ахир унга қанчалар оғир эди. Осто-насига зир қатнаётган эркакларнинг худо урган энг бадбашарасини бўлса-да танламаса, аҳволи бундан бешбаттар бўлишини фаҳмлардим, лекин унга буни қандай тушунтираман?

Нима бўлса бўлар, деган фикрда индамай бориб бўш стуллардан бирига ўтириб олдим. “Энди бу ердан ҳайдасангиз ҳам кетмайман, Дилдора хоним!”

– Сиз! Ҳали ҳам шу ердамисиз? – деди у бир маҳал ортига ўгирилиб.

– Худди шундай, – дедим атай сурлик билан.

Дилдора афсуслангандай бош чайқади.

- Энди сизни ҳайдаб чиқараман шекилли.
– Кўлингиздан келса марҳамат! – дедим унинг
кўзларига қаттиқ тикилиб.

Дилдора сесканиб тушди. Безовталик билан ён-
верига қараб қўйди. Аммо тилидан учган сўзлар
ўқдай эди.

– Мендан умидвор бўлманг, Самандар ака. Ха-
вотир ҳам олманг. Лозим топган куним бирортаси-
га турмушга чиқарман.

– Лозим топмасангиз-чи!

– Бошга тушганини кўраверасиз!

– Дилдора! – ўрнимдан ирғиб туриб унинг по-
йига тиз чўқдим. – Сизни бахтли қиласман. Илти-
мос...

– Йўқ! – сўзимни шарт кесди у. – Фақат сизга
эмас!

Бирдан миямга қон тепди.

– Нега?! Нега энди фақат мен эмас?!

Дилдора ўзини четга тортди.

– Сабабини ўзингиз биласиз! Энди кетинг! –
деди тескари қараб.

– Кетмайман! Ҳайдасангиз ҳам кетмайман!
Етар, шунча вақт кутганим... Етар, шунча йил қий-
налганларим... Агар билсангиз, ўша Бехруз ҳам,
бошқалар ҳам мен чеккан изтиробларнинг лоаққал
битта учкунини ҳам...

Шунда Дилдора ялт этиб ўгирилди ва бир зум
менга тикилиб қолди. Шундоқ жаҳлсиз, хотиржам.

– Уялмасангиз ихтиёрингиз, – деди у кейин.

Иссиғим чиқиб кетди.

Дилдора шундоқ ёнимдан ўтиб, ташқарига
чикди.

Хавода ҳилпираётган этагининг эпкинини хис
қилдим.

Тиз чўккан кўйи анча турдим.

Ташқаридан Дилдоранинг ким биландир телевизонда гаплашаётганини эшитдим.

Яна миям қизий бошлади.

Ўрнимдан ирғиб турдим-у ташқарига отилдим.

Дилдора айвон устунига суюнганча телефонда гаплашарди.

– Телефонни бер бу ёқقا! – яқин бориб, унинг кўлидан телефонни тортиб олдим.

Дилдоранинг юзи оқариб кетди.

– Бу нима қилиқ? Нега сенсирайсиз?! – деди у бир оздан кейин овози ўзгариб.

– Бу шундай қилиқки, – дедим сўзларни тишиларим орасидан чиқариб. – Бундан кейин телефонда ҳам, кўчада ҳам бирор киши билан гаплашмайсиз!

Дилдора кутилмаганда кулиб юборди. Мендан кўзларини узмай кулди, кулаверди.

У менинг устимдан кулаётганди.

Коним қайнаб кетди. Йўқ, унга қўл кўтармадим. Уни даст кўтардим-у, ичкарига олиб кирдим.

Бечора шошиб қолганидан дод солишга ҳам улугурмади...

* * *

Шу кеча биз эр-хотин бўлдик. Эрталаб мен унга бир оғиз айтмасдан муллани бошлаб келдим.

Дилдора айюҳаннос кўтармади.

У жим бўлиб қолганди холос.

Мулла никоҳ ўқиб тақдиримизни боғлаб кетди. Лекин... қани энди унинг кўзларига тик қарай олсан?..

У ўзини шундай тутардики, беихтиёр ўзимни йўқотиб қўярдим. Назаримда кечаги воқеадан аввал, орзу-хаёлларимда у менга жуда яқиндай эди. Мана, никоҳ ўқилди, энди биз бир оиласиз, аммо энди у мендан қанчалар йирокда эканлигини

Хис қилардим. Бундан юрагим қоқ ёрилиб кетгудай бўларди. Ўзимни чалғитиш учун иш билан овунардим. Эркаксиз уйда эркакча ишлар қалашиб қоларкан...

Кунларнинг бирида у менга зимдан тикилиб турганини ҳис қилдим. Аммо унга қарамадим. Юрагим бетламади.

Кейин тоғорани олиб кир ювишга тутинди.

Ҳаммаси сенинг кийимларинг эди.

Дилдора ҳар бир кўйлагингни авайлаб, силаб-силаб, кейин дорга илаётганини кўрганимда ичичимдан жизғанагим чиқиб кетди. Бу нимаси, сенга бўлган муҳаббати ва садоқатининг ялови сифатида кийимларингни намойишкорона ёйиб қўйдими? Бир оздан кейин У раşкимни қўзғаш учун атай қиляпти, деган фикр аччиқ тутун бурқсиётган қалбимга таскин берди.

— Мен... бир ерга ўтиб келаман, — деди у бир маҳал ёнимга келиб.

— Тез қайтасанми? — дедим ишимдан бош кўтармай.

У жавоб бермади.

Жаҳлим чиқди.

Унинг кўчага чиқиши учун рухсат сўраганидан дилхиралигим ёзилгандай бўлганди, аммо индамагани алам қилди.

Жаҳл қилишга ҳаққим бор, деб ўйладим. Ахир... қўл текканидан кейин аёлга эгалик қилиш ибтидоси бошланади.

Дилдора чиқиб кетди.

Кўлим ишга бормай қолди.

Дилдора икки соталардан кейин қайтиб келди. Кўзлари қизарган...

Унинг ё кўлга, ёки қабристонга, боласининг бошига бориб келганини пайқадим. Балки иккисига ҳам боргандир?

Ичим ачишди. Унга оғир эди. Унинг баҳтиёр бўлиши учун ҳамма нарсага тайёр эдим. Аммо бу телба ва ўжар хотин буни ҳис қилмасди ёки ҳис қилган тақдирда ҳам ён бергиси келмасди.

Аламимни ҳам, жаҳлимни ҳам ичга ютдим.

– Чой ичасанми? – деб сўрадим ортидан ичкарига кириб.

Дилдора бош чайқади.

– Юр, шаҳарни айланиб келамиз, – дедим яна.

Дилдора шундай нигоҳ ташладики, беихтиёр нафасим ичимга тушиб кетди.

Вақт керак, вақт!

Нажот истаб хона ичидан соат қидирдим. Ҳа, мана у. Эвоҳ, девордаги соат миллари бир-бирининг устига мингашганча тош қотиб турарди! Назаримда бу ерда соат ва дақиқалар бирлашиб кетганди, вақт ўлганди...

Даҳлизга чиқдим.

Эшик очиқ қолди.

Бир оздан кейин Дилдора қўлларини кўксида чалиштирганча хонада юра бошлади.

Ўйлай бошладим, наҳотки бу аёл тақдирга тан бера олмаса? Ахир ўлган ўлди, энди ҳеч нарса, қирқ йиллик мотам ҳам, хонанишинлик ҳам ўлган одамни тирилтириб бермайди-ку. Энди унинг хотираларини эрига боғлаб турган ўғли ҳам йўқ...

Чидаб туролмадим. Ахир бундай яшаш азоб эди.

– Нега? Нега бунча ўзингният, мениям қийнайсан?! – дедим унинг қархисида пайдо бўлиб. – Мен нотўғри иш қилдимми? Айт, нотўғри иш қилдимми?!

Унга шундай важоҳатда тикилдимки, жоним ҳиқилдоғимда тургандай.

Дилдора сесканиб ўзини ортга ташлади, кейин негадир бирдан қахри кўзиб, яна бир қадам олдинга юрди.

– Ҳа, сиз нотўғри иш қилдингиз! – деди у кейин дона-дона қилиб кўзларимга тикилганча. – Сиз вазиятдан фойдаландингиз.

– Тўғри нарсалар нотўғри вақтларда юз беради, билмасанг билиб кўй! – дедим шартта.

Дилдора ҳам бўш келмади.

– Сизга ўхшаган одамлар ҳар қандай қилғиликни оқлаш учун асос топадилар.

Беихтиёр нигоҳларимни олиб қочиб, жим бўлиб қолдим.

– Мендан бир оғиз сўрамасдан никоҳ ўқитдингиз, – деди Дилдора бир пайт. – Энди эр-хотинмиз нима бўлгандаям. Мендан нимадир талаб қилаётганингизни пайқаб турибман. Майли, мен хотинлик бурчини бажаришга тайёрман, аммо шундан бошқа мендан ҳеч нарса талаб қила олмайсиз. Бунга ҳаққингиз йўқ!

Дилдора шарт-шурт гапирди-да, жой солишга киришди.

Мен бир лаҳза унинг ҳатти-ҳаракатларини кузатиб турдим. Кейин индамай ташқарига чиқиб кетдим.

Менга унинг нафратдан қимтилган лаблари керак эмас!

Ховлида узоқ кезиб юрдим.

Дилдоранинг қалбига кириш учун йўл ахтардим. Аммо қанча ўйламайин, бу қалб мен учун тақа-тақ берқдай туюларди. Ваҳоланки беш-олти йил илгари мен бутунлай бошқача ўйлардим. Учрашиб қолганимизда унинг табассум ҳадя қилишлари, астагина қўл сиқиб қўйишлари, ўқиши учун китоб сўрашлари менга пешвоз чиқсан

муҳаббатнинг ўзгинаси эди. Энди ўйласам, булар шунчаки.... нафосатнинг оддий кўринишларига ўхшайди назаримда. Мен нодон бўлсам... неча замонланлардан буён хаёлан унинг қалб ойнасига назар ташлаб, унда ўзимни кўргандек бўлардим.

“Бехрузнинг ўлимидан кейин унинг қалби муҳрланиб қолганми, нима бало? – аламли ўй кечди хаёлимдан. – Наҳотки бир одамни унтиш шунчалар қийин бўлса? Ана, у ҳам бедор. Уй ичида бориб-келяпти. Нимани ўйлайди бунча? Ахир бунақада жинни бўлиб қолиш ҳеч гапмас. Наҳотки бу аёл руҳан маскан қўйган тилсимга кириш менга насиб этмаса?”

Бир-бир босиб деразага яқин келдим.

Парда суринган, ой нури ичкарига поёндоз бўлиб тўшалган, у ана шу поёндоз устидан қўлларини кўксида чалиштирганча бир неча марта у ёқдан бу ёқقا ўтди. Лекин менинг кузатиб турганимни пайқамади. Бу хонадонга кириб келганимдан буён у ҳар куни жони битмас-туганмас азоб-уқубатга гирифтордай, шу зайл бетоқатланар, бир ерда тинч туролмасди.

Юрагим сиқилди.

Бадбин истакларим бир-бир амалга ошди, энди сен ҳам, ўғлинг ҳам йўқ бу оламда, мана, мен севган, ишқида куйиб адo бўлган аёл қаршимда турибди, аммо... баҳтдан дарак йўқ!

Бу азоблар қачон тугаркин? Наҳотки ўла-ўлгунча унинг менга насиб этган заъфарон чехрасига тикилиб, ўзимни унинг олдида айбдор санаб ўтиб кетсам?

Йўқ, интиҳосиз нарсанинг ўзи йўқ бу дунёда. Ахир бир кун келиб бу қийноқлар тугаб қолар. Майли, у ҳозирча ўзини шундай тутаверсин. Ахир кун келиб юракни сиқувчи ортиқча хуноб-

гарчиллик, қайғу, нафрат, янги қунга қулиб қарай олмаслик, буларнинг бари-бари умр заволи эканлигини англашади ва шундан кейингина бу аёл фикри-хаёлини фойдасиз дикқатбозлиқдан, кинадоватдан халос этади, ана шундан кейингина биз тугал баҳт-саодатга эришамиз.

Нихоят у ухлаб қолди.

Мен унинг диванга ўтириб, бошини орқага ташлаганини, кўзларини юмганини кўриб турадим.

Чироқнинг мисранг ёғдуси унинг ихчам ияги ва бўйнига тушиб туради. У ютинди шекилли, томоги билинар-билинмас қимиirlади.

Шунда яна бир бир ҳақиқатни тан олдим, майли, у мени тушунмаса ҳам розиман, майли, мени севмасин, жаҳли чиққанида зарда қилсин, бақирсинг-чақирсинг, нафратлансын, баҳтли бўлиш учун ўзимнинг, ёлғиз ўзимнинг муҳаббатим етиб ортади, муҳими ҳам шу.

Шу кеча мен ўз кўнглимни тубсиз жарлиқдан олиб ўтдим. Энди майда-чуйда нарсаларга аҳамият бермайман, Дилдора ёнимда бўлса бас, жимгина яшайвераман, деган қарорга келдим.

Бироқ шугина ҳам менга насиб қилмади.

– Ажрашайлик, – деди Дилдора кунларнинг бирда кўзларимга тик қараганча. – Мен бу аҳволда яшай олмайман...

– Мен эсам яшайвераман, – дедим бепарво оҳангда.

– Ичингиздаги оловга атала пишади-ю... Яшайверармиш! – кесатди Дилдора.

– Сенга шундай туюлаётгандир, – дедим жимтурмаслик учун.

– Майнавозчилик қилманг, илтимос, – деди Дилдора бир маҳал ёлворувчи оҳангда. – Нега ўзингизни бунча қийнайсиз? Биламан, бир вақтлар мени севгансиз, лекин мен...

— Бўлди, бас қил, — дедим овозимни кўтариб.
Ўзимни вазмин тутишга уринмай, негадир ич-
ичимдан совуқ ҳовур кўтарила бошлади.

— Бас қилмайман, — деди Дилдора шартта. —
Сизга ғўладай совуқ хотиннинг нима кераги бор?!

— Ишинг бўлмасин!

— Сизга фарқи йўқми?

Шу бир оғиз гап косанинг тошиб чиқишига
сабаб бўлди.

— Бу билан нима демоқчисан?! — дедим унинг
ёқасига ёпишиб. — Нима демоқчисан?! Индамага-
ним сайин ҳаддингдан ошиб кетяпсан жа!

— Ёқамдан қўлингизни олинг, — деди Дилдора
паст, аммо қатъий оҳангда.

— Олмайман, керак бўлса ҳозир...

— Қўлингиздан нима келарди?! Деразадан
улоқтирасизми? Улоқтиринг! Улоқтиринг, нега қа-
раб турибсиз?! Ёки мени кетиб қолади деб қўрк-
япсизми? Кўрқоқ, ваҳ-ҳа-ҳа! Кўрқоқ!

Билмадим, қандай қилиб унинг юзига тарсаки
туширганимни ҳали ҳам эслай олмайман.

Бир марта эмас, қайта-қайта тарсаки тушир-
дим. Ҳар тарсаки тушганида Дилдора орқага қал-
қиб кетар, мувозанатини тута олмай, гандираклар,
аммо миқ этмасди. Кўзим қонга тўлганидан,
ўзимни бошқара олмас, нималар қилаётганимни
билмасдим.

— Улоқтир эмиш! Сенга шу керакми?! Мана, бўл-
маса!

Уни даст кўтардиму деразадан пастга ташла-
дим.

— Вой!.. — деган овоз эшитилди ва бирдан олам
сув қуйгандай жим-жит бўлиб қолди...

Кейин диванга ўзимни ташладим.

Орадан бир, икки соат ўтди ҳамки, Дилдорадан дарак бўлмади. Мен унинг ичкарига киришини кутардим-да.

Бир маҳал юрагим тез-тез ура бошлади.

Ўрнимдан тура солиб, ташқарига чиқдим.

Пастда, дераза остида Дилдора ётарди.

– Дилдор... Кўзингни оч, Дилдор...

Аммо у кўзини очмади.

Кўтариб уйга олиб кирдим.

Юзига совуқ сув сепдим, елпидим, ишқилиб, хаёлимга нима келса шуни қилдим, ахир довдираб қолгандим-да.

Бироқ Дилдора хушига келмади.

Эрталаб дўхтири чақирдим.

– Комага тушиб қолган шекилли, – деди дўхтири уни кўздан кечириб бўлгач. – Касалхонага олиб бориш керак.

– Комага тушиб қолган, дейсизми? – дедим ишонмасдан. – Нега комага тушади?

– Ўзингиз айтдингиз-ку, кечаси деразадан ташлавордим деб! – заҳархонда қилди дўхтири.

– Бўлиши мумкинмас! Ахир деразанинг баландлиги бир метр ҳам чиқмайди...

– Бўлинг, тез, машина топинг!

Мен туш кўраётгандай эдим. Мана, ҳозир уйғонаман-у ҳаммаси тугайди, лекин уйғониш бунчалик қийин... нега уйғонмаяпман?

Дилдорани касалхонанинг аҳволи оғир беморлар ётадиган бўлимига жойлаштиришди. Шундан кейингина аҳвол жиддийлигини пайқадим.

Мен туш кўрмаётган эдим.

– Уйғон, уйғона қол, илтимос, – дея ҳар куни унинг юзини силардим. – Уйғона қол, илтимос.

Майли, сен айтганча бўлади, агар мен билан яшашни истамас экансан, майли, ажрашамиз. Фақат уй-гонсанг бас!

Кунлар ўта бошлади.

Ниҳоят еттинчи куни у кўзларини очди.

Бир неча сония маъносиз, бакрайган кўзларини менга тикиб турди-да, кейин яна чирт юмди.

Мен учун шунинг ўзи кифоя эди. Шу кичкина бахтнинг ўзи кифоя эди.

– Дўхтири, у хушига келди! – дея қичқириб юбордим.

Бир зумда дўхтири ва ҳамширалар уни ўраб олишди.

Мени эса йўлакка чиқариб юборишиди.

“Наҳотки мен ўзим учун жуда кўп нарса сўраб юборган бўлсам, – деб ўйладим йўлакда турганча. – Барча кўргуликлар очкўзлигим туфайли юз берган-дир? Ахир мен бахтга ташна эдим. Назаримда мендан бошқа ҳамма бахтлидай туюларди. Бир аёлни севдим, уни бахтли қилишни истадим, лекин... Бутун ҳаётим бола вақтимда қийнала-қийнала ташлаган дастлабки қадамларимдек серташвиш ўтди. Лекин энди кўряпманки, ўзимни бахтли хис қилишим учун унинг кўзларини очгани кифоя экан...”

– Бу ёқقا қаранг, – деди ҳамшира эшикни қия очиб.

Ичкарига кирдим.

– Бу аёл хотинингизми? – сўради врач.

– Ҳа... Кўнгилсизлик юз бермасдан олдин шундай эди, лекин энди...

– Гаплашиб кўринг.

Мен каравотга яқин келдим.

– Дилдора...

Шифтга тикилиб ётган Дилдоранинг қорачиқлари қимиirlади, аммо мен томонга қарамади.

— Дилдора, яхши бўлиб қолдингми?

Дилдора жавоб бермади.

Врач яна мени палатадан чиқариб юборди.

Ҳақиқий фожеадан эртаси куни боҳабар бўлдим.

— У хотирасини йўқотган, бугунги кунни буткул унуган, — деди дўхтири менга.

Етмиш икки томирим зириллаб кетди.

— Нега? Нега хотирасини йўқотади? Арзимаган зарб...

— Сиз учун арзимаган зарб бўлиши мумкин, — деди дўхтири ачитиб. — Хуллас, унга эътиборли бўлинг. Колганини кейин гаплашамиз.

Дўхтири чиқиб кетди.

Турган еримда Дилдорага разм солдим.

Бу вақтда у ухлаб ётарди. Юзида аллақандай оғриқдан азоб чекаётгандай асабий ифода қотган, мен суйган қўллар мен суйган кўкраклар устида bemажол ётарди.

— Дилдор... — дедим юрак ютиб.

Дилдоранинг киприклари титраб кетди.

Кейин оҳиста кўзларини очди.

— Сиз?! — деди у аста.

— Ҳа, мен эрингман, — дедим унинг ёноғидан ўпиш учун эгиларканман.

— Беҳруз...

Бирдан ток ургандай қалқиб кетдим.

— Нима бўлди? — сўради Дилдора.

— Ҳеч нарса... тинчлик...

— Нега унда юзимдан ўпмаяпсиз? Табриклама-япсиз! Ахир биз ўғил кўрдик! — Дилдора хиёл бошини кўтариб, ёноғини тутди.

Мен уни ўпив қўйдим.

Лекин жуда ғалати тарзда.

— Хурсанд эмасмисиз? — Дилдора қўли билан юзимни силади.

— Хурсандман...
— Бизни қачон уйга олиб кетасиз?
— Қачон истасанг шунда.
— Ҳозироқ уйга кетишни истайман. Бу ерда гүё
минг йилдан буён ётгандай, жуда сиқилиб кетдим.
Дилдора ўрнидан турди.
— Мен ҳозир... – дедим дўхтири чакиришга та-
раддуланиб.

— Ие, болам қани?!

Дилдора олазарак бўлиб, ён-верига аланглай
бошлади.

Бирдан миям тезлик билан ишлай бошлади.

— Ҳозир, бир пас кутиб тур, – дедим Дилдорага.

Нима қилиш кераклигини чўтлаб хонадан
чиқдим.

Дўхтир билан гаплашиб, туғруқхонага ташлаб
кетилган болалардан бирини фарзандликка олиш-
га қарор қилдим.

Бир ҳафтадан кейин Дилдора билан болани
уйга олиб келдим. Ўзимнинг уйимга. Менинг
уйимда, менинг соатим ҳамон чиққиллаб турарди.

Аммо энди ўз уйимда Самандар бўлиб эмас,
Бехруз бўлиб яшай бошладим. Бу бир оз малол
келарди албатта. “Бу вақтинчалик ҳол, ҳадемай
унинг хотираси ўзига қайтади, – деб ўзимга таскин
берардим. – Кейин ҳаммаси яна изига тушиб
кетади. Хотираси ўзига қайтганидан кейин у
нималар бўлганини билади, мендан хафа бўлиши
мумкин, лекин энди ташлаб кетмайди, ахир
ўртамиизда бола бор!”

Дилдора болани эмиза бошлади.

Мен ҳайратда эдим.

— Нега сариқ рангли кўйлагингизни киймай
кўйдингиз? – деб сўради Дилдора бир куни дабду-
рустдан.

Шошиб қолдим.
– Сариқ күйлак?
– Ҳа, сариқ күйлак.
– Билмадим... бир неча кундан буён тополмай юрибман, шунга ҳайрон бўлиб... сендан сўрамоқчи эдим...

– Мен бола билан андармон бўлиб қолганимдан буён жуда чарчаяпман...

– Майли, вақтим бўлганда ўзим топиб оларман бир бурчакдан.

Эртаси куни ишдан қайтишда сенинг уйингга кириб, шкафдан кийимларингни олдим... Пайпоқларинг ҳам қолмади.

– Қачондан буён ширгуруч ейдиган бўлиб қолдингиз? – деб сўради Дилдора бир кеч овқатланайдигизизда. – Ширгуруч есам, ичим ўтиб қолади, деб юрардингиз-ку!

Дилдора кулиб юборди. Самими кулди.

Унинг юзи баҳтиёрликдан гул-гул яшнаб турар, кўзлари ўт бўлиб ёнарди.

– Шунақами?.. – дея олдим зўрға. Кейин бирдан жим бўлиб қолдим.

– Мен касалхонада вақтимда борига қаноат қилган бўлсангиз керак, бечорагинам...

Дилдора ўрнидан туриб ёнимга келди.

Бармоқлари соchlаримни ўйнай бошлади.

Ё тангри!

– Агар ширгуруч егингиз келган бўлса, яна пишириб бераман, – дея шивирлади у қулоғимга, соchlари ёноғимни қитиклади, атиргул хиди димоғимга урилди.

Мен адойи тамом бўлдим.

– Йўқ, ширгуруч емайман, ичим ўтиб қолади...

Шундай қилиб, мен сенга эврилдим, дўстим.

Сени “ўзлаштириш” қийин эмасди. Ахир дўс-

тим эдинг, ҳаммадан кўра сени кўпроқ мен билардим. Ўз ролимга шунчалик киришиб кетдимки, оқибатда ўзимдан, ўзлигимдан айрилдим...

Аммо шундан кейин ҳаётим нурга йўғрилди.

Фақат қўрқинчли хавотир юрагимни ахён-ахёнда тирнаб қўярди. Умр бўйи У фақат менгагина насиб этишини, фақат менинг хоҳиш-иродамга бўйсунишини, бўса учун яралган лаблари эҳтиросли бўсаларга кўмиб ташлашини истаб яшагандим, мана орзуим амалга ошди, аммо ўзим... оҳанрабо ўзига тортган нинадай бўшлиқ қаърида осилиб қолдим... Майли, ҳар не бўлганда ҳам, энди унинг хотираси ўзига қайтмасин! Жилла курса менинг куним битгунча...

Ихлос билан тилаган эканманми, сўнгги тилағим ҳам амалга ошди. Мен Бехруз бўлиб қабрга кирдим...

Сен эса иккинчи марта ўлдинг.

Эҳтимол бир қабрга тушганимизнинг сабаби ҳам шудир?.. Ахир биз бир одаммиз!

“МОМО ҲАВО”

Ёмғир уч кундан буён тинимсиз шивалаб ёғарди. Асфалти қўчиб, ўнқир-чўнқир тупроқ йўлга айланган йўлак билч-билч лой, йўлак четидаги бетон ариқчалар лойка сувга тўлган, оловранг япроқлар оёқ остида эзилиб, лойга қоришиб кетган, оқибатда йўл сирпанчик бўлиб қолганди.

Акбар кўк бозор ёнидаги, пештоқига каттакатта ҳарфлар билан “Бар” деб ёзиб қўйилган, винога қоришиқ ёқимсиз хид анқиб турадиган кўримсиз, пастқам бинодан чиққанда вақт чошгоҳдан ўтганди. У маст эди. Маст бўлса-да, уч кундан буён ёмғир ёғаётганлиги, йўл сирпанчик бўлиб қолганлиги унинг ёдида, шу боиски бир-бир босиб пастқам бинодан узоклаша бошлади. Йиқилиб тушмаслик учун эҳтиёт бўлиб юряпман, деб ўйларди у ўзича. Аслида эса гандираклаганча йўлнинг гоҳ у томонига, гоҳ бу томонига бориб келаркан, мункиб-мункиб кетарди. У ҳозиргина қаҳвахонадан чиққан бўлса-да, энгил-боши жиққа ҳўл, соchlари ивиб бошига ёпишган, тумшуғи очилиб қолган туфлисидан муздек сув сизиб кирган, бунинг натижасида оёқлари сира исимаётган эди. Бинобарин, у одатдагидек анча вақт ахлатхоналарни титкилаган, шиша идишлар, баклашкалар қидириб топиб, уларни керакли жойга топшириб, эвазига арзимаган пул олиб, сотувчилар алдашмадимикин деган хаёлда эски, тити-

либ кетган майда пулларни қайта-қайта санаб, чўнтағига солгунча шу кўйга тушганди.

Акбар бир амаллаб катта йўлни кесиб ўтиб йўлакка чиқиб олди. Икки четини яшил девор тўсган йўлак ўнқир-чўнқир бўлса-да, ҳар қалай хавфсиз, бу ердан машиналар юрмайди ҳисоб. Лекин барибир эҳтиёт бўлиш керак, ер лой, бил-чиllаб ётибди. Яна юз қадамча юрса уйига етиб олади. Бир амаллаб иккинчи қаватга кўтарилиб, қулфи яхши ишламайдиган эшигини очиб ичкарига кириб олса бас, у ёғи бир гап бўлар. Йигит яшил деворни пайпаслаганча кетиб бораркан... бехосдан қўрқсан нарсаси юз берди, у йиқилиб тушди! Ўрнидан турмоқчи бўлиб бир-икки интилди, аммо гавдасини ердан узиб ололмади. Қолаверса, муздай ер мисдай қизиётган вужудига хуш ёқди ва у ғужанак бўлиб олди-ю, пишиллаб ухлаб қолди.

Уйига етишига эллик қадамча қолганди.

Ёмғир ҳамон шивалаб ёғарди.

Орадан қанча вақт ўтди, номаълум, ҳали уйқуга ғарқ бўлиб ётган маҳал эди. Аллақандай майин овоз қулогига чалингандай бўлди. Лекин йигит эътибор бермади, ғудранди, ғудраниш асносида оғзидан сўлак оққанини ҳис этиб, артиб ташламоқчи бўлганди, бармоқларига илашган лой юзига суркалди. Аллаким қўнғироқдек овозда кулиб юборди шу вақт. Юз-кўзига чакиллаб урила-ётган ёмғир томчилари ҳам бирдан томчиламай кўйди.

Акбар кўзини очди. Дастрлаб ихчам, ялтироқ туфлига кўзи тушди. Қовоқлари аста-секин кўтариlgани сайин шуuri ҳам тиниқлаша борди ва кутилмаганда иргиб ўрнидан тур... Йўқ, хаёлида шундай ўйлаган экан, аслида базўр ўрнидан кўзғалди.

Калта қора плаши ўзига ярашган, кўхлик жувон қўлини хиёл олдинга узатганча соябонини тутиб уни ёмғирдан тўсиб турарди.

– Келинг, ёрдамлашаман... – жувон қўлини узатди.

– Раҳмат, ўзим...

Боши лўқиллаб оғриётган Акбар ўрнидан турди. Аммо шу заҳоти яна ўтириб қолди. Вужудини иситма қиздираётган, кўнгли озаётган эди.

– Тобингиз қочиб қолган шекилли, қўлингизни беринг, нега тортинасиз, одам одамга ёрдам берса нима қипти? – Жувоннинг сўзлари ҳам, кўз қарашлари ҳам самимий эди.

Аммо барибир Акбар қўлини узата олмади. Ботинолмади, истиҳола қилди, чунки қўллари лой эди. Бор кучини тўплаб ўрнидан турди. Гандираклаб кетди. Жувон уни ушлаб қолмаганда яна ииқилиб тушарди.

– Ўйингиз шу томондами?

Жувон эллик қадам нарида қўқайиб турган тўқиз қаватли уйга ишора қилди.

Акбар бош иргади.

Жувон уни қўлтиқлаб олди. Соябонини юқори кўтарди.

Акбарнинг кайфи тарқаган, аммо бир оз шамоллаган шекилли, иситма исканжага олган, боши тарс ёрилиб кетай дерди. Сал чайқалгудек бўлса борми, боши лўқиллаб кетганидан, қадам ташлашга мажоли етмай қоларди.

– Касал аҳволда кўчага чиқиб бўлмайди, – деди жувон уйга яқинлашиб қолганларида. – Менимча, сиз тумовдан олган бўлсангиз керак. Ҳозирги тумов шунаقا экан, бош айланиб, иситма тутаркан.

Акбар енгил тортди. Жувон ҳар қалай ичганини пайқамабди. Индамаслик ноқулай...

— Кечадан буён мазам қочиб турувди, — деди у нихоят ўзини дадил тутиб. — Лекин иш деган нарса бор. Уйдан чикмасликнинг иложи йўқ.

— Тўғри, аслида шу, ҳаммамиз ҳам иш-иш деб ўлиб кетамиз.

— Яхшиям сиз келиб қолдингиз, акс ҳолда ҳозир...

— Нафасингизни иссиқ қилинг.

Подъезд эшиги олдида жувон таққа тўхтади.

— Бу ёғига ўзингиз кета оласизми? — Жувон гапириш асносида соябонини силкитди, билур томчилар сачради ҳар томонга.

— Бошим ҳалиям айланяпти, — деди Акбар. — Иситмам ҳам тушмабди. Уйда дори-пори бормиди, билмадим. Кейин қанақа дори ичишниям билмайман.

Жувон кулимсираб қаради унга.

— Ҳеч ҳам касал бўлмаганмисиз? — деб сўради кейин.

— Кўп касал бўлганман, лекин у вақтларда ойим бор эдилар. Ойим қаардилар. Энди ойим йўқ.

Жувон бошқа савол бермади. Ён-верига қараб қўйди-да:

— Кеч тушиб қопти. Ҳа, майли, юринг, сумкамда у-бу дори бориди. Шуларни сизга ичириб кейин кетаман, — деди.

Уйга киришди. Ётоқхонадаги бир кишилик каравот ва ошхонадаги юмалоқ столу атрофида тизилишган тўртта табуреткадан бошқа ҳеч вақо кўзга ташланмасди. Дарвоқе, деворлардаги гулқоғозларнинг янгилиги ва тозалигини айтмагандан... Уйнинг шип-шийдонлиги жувонни ҳайрон қолдирмади, умуман у ҳеч нарсага эътибор бергани йўқ.

— Сиз кийимларингизни алмаштиринг, мен чой дамлаб келаман, — деди жувон, сўнг ошхона томонга кетди.

Акбар каравот остидан эски чемодани тортиб чиқарди. Чемодан унга шифонер вазифасини ўтарди. Кийимлар кўп эди, лекин ҳаммаси ҳам эски-туски, алмисоқдан қолганди.

— Мана чой, мана ширингина дори, бир мазза қиласиган бўлдингиз, — деди жувон кириб келганда Акбар апил-тапил кийимларини алиштиришга ултурган, аммо ҳўл кийимларни нима қилишни билмагандек қўлида тутганча қимир этмай турагди. Гёё уй эгаси жувон-у, ўзи кутилмаганда келиб қолиб ўзини ноқулай сезаётган меҳмон.

— Кийимларингизни менга беринг, — жувон қўлини узатди. Пуштиранг кафти силлиқ ва чиройли эди.

— Йўқ, ўзим... эртага...

— Мен ҳалиям кийимларингизни ювмоқчи эмасман, — деди жувон. — Лекин бошқа вақт бўлганда эҳтимол ювиб ҳам қўярдим. Аммо ҳозир кетмасам бўлмайди.

Акбар жувондан кўз узмай турганча дорини ичди. Жувон яна битта дорини кафтига қўйди.

— Боягиси иситма туширадиган, буниси шамоллашга қарши дори, — изоҳ берди жувон.

Акбар шундай аҳволда эдик, жувон шифобахш дори эмас, заҳар тутган тақдирда ҳам индамай ичиб юборарди.

— Энди иссиқроқ ўраниб бир-икки соат ётинг. Мен кетаман. Яхши қолинг. Тезроқ соғайиб кетинг.

Жувон эшик томон юрди.

Акбар эса аёл томон интилди. Жувон буни сезмади. У аллақачон кўча эшик ёнидаги илгакдан плашини олаётган эди. Акбар унга ёрдамлашмоқчи эди, аммо улгура олмади. Жувон кийи-

ниб бўлиб эшикни очди. Яна бир оз, бир дақиқа кечикса жувон эшикни ёпади-ю, зиналардан шувиллаганча пастга тушиб кетади.

– Шошманг, – деб юборди Акбар беихтиёр.

– Мазангиз қочяптими?.. – Жувон илкис ўтирилди.

– Йўқ, ха, э, нимайди, анави, телефон номерингизни айта олмайсизми? Мабодо кечаси яна тобим қочса...

Жувон жилмайиб туриб телефон номерини айтди.

– Фақат тобингиз қочса телефон қилинг-а, – деди кейин.

– Албатта, албатта.

Жувон энди шарақлаб кулиб юборди. Анчадан буён аёл кулгусини эшитмаган деворлар зириллаб кетди.

– Нима учун “албатта” деяпсиз? Албатта тобим қочади, демоқчимисиз?

– Унақа эмас... Лекин қайдам... Аммо умид қиласманки... Эҳтимол...

– Хўп, яхши қолинг. Эшикка яқин келманг, совуқ тегади. Эшикни ўзим ёпаман.

Жувон кетди.

Ҳаммаси кейин юз берди. Акбар чексиз ҳайрат ичида қолди. “Шундай сулув жувон менга марҳамат кўрсатди, уйимга олиб келиб қўйди, дори ичирди... Унинг ўрнида бошқа аёл бўлганда балчиққа беланиб ётган чўчқага қарагандай қарарди. У эса мендан умуман жирканмади. Ё раббим, ким эди у?.. Момо Ҳавоми ё Биби Фотима!..”

Акбар беихтиёр иягини силаркан, ўсиқ соқоли кафтига тикандек ботди. Даҳшатга тушди. Ваннага югуриб кириб ўзини ойнага солди: “Уст-бошимку, майли, ёмғир, касаллигим, йиқилиб тушганим

баҳона бўлар, аммо эрталаб соқолни қиритишлаб олсам бўларкан. У бир неча марта юзимга син-чиклаб қаради, лекин шундай иркит башарадан бирор мартаям ирганмади-я...”

Акбарнинг бош оғриғи, шамоллаши, ичгани, ҳамма-ҳаммаси эсидан чикқан эди. У ювинди. Ўтмас олмос билан соқол-мўйловини қиритишлади. Ёноғини, ияги остини бир неча марта кесиб олиб, қонатди. Сўнг каравотга чўзилди. Ухлашга ҳаракат қилди, лекин ухломади. Қовоқлари қотиб қолгандек сира ёпилмасди. Бирдан уйнинг шипшийдонлиги, аёл кишининг эътиборини жалб қиласидиган жозибали нарсаси йўқлигини эслаб қолди. Онасидан қолган эски қақур-қуқурларни сотиб юборганидан афсусланди: “Арзимаган пулга сотгандим. Эсиз, тураверса бўларкан...”

Йигит шу оқшом мижжа қоқмади ҳисоб. Ахён-ахёнда кўзи илиниб кетгандек бўлар, лекин шу заҳоти чўчиб, сесканиб уйғонар, хали ювинмасдан туриб кўнглига туккан “тугун” эсига тушиб, ороми бузиларди, уйқуси қочарди. У жувонга телефон килишни ўйлаганди. Бироқ истак қанчалик кучли бўлмасин, уни амалга оширишнинг иложи йўқ эди. Ўтган йили ойлик абонент пуллари тўланмаганлиги туфайли телефони ўчириб қўйилган, кераксиз матоҳга айланган аппаратни эса у сотиб юборганди. Яна афсус-надомат юрагини ўртади.

Тонгга яқин кўзи илинди.

Уч соатлик уйқудан уйғонгач у сал бошқачароқ ўйлай бошлади. “У оққўнгил аёл. Йиқилиб ётган бир бенавога ёрдам берди, холос. Шунинг учун ҳам мендан ирганмади. Шунинг учун ҳам у бегона эркак сифатида мендан чўчимади. У шунчаки, илтифот кўрсатди, холос. Йиқилиб ётган одамнинг ёнидан бефарқ ўтиб кета олмади. Ҳойнаҳой, у

мени ўша заҳотиёқ эсидан чиқарib юборгандир.
Мен бўлсам... Эх!..."

Йигит маҳзун тортиб қолди. Анча вақтгача шу кайфият таъсиридан чиқа олмади. Қорни очганини ҳис этарди-ю, аммо иштаҳаси йўқ эди. Томоғи қуриб, чанқоқ хуруж қила бошлади. Шунда ҳам ўрнидан турмади. Лекин чанқоқقا кўп дош бера олмади. Ноилож ўрнидан туриб ошхонага ўтди. Човгумни сувга тўлдиаркан, ўзича сўзланди: "Яхшиям газ плитасини сотиб юбормаган эканман!"

Бир чойнак кўк чойни ичиб олгач яна ётоқхонага кирди, каравотга чўзилди. Бирор соат ўтиб у кўнгли озаётганини ҳис қилди. Бу очликдан эди. Ошқозонни алдаш учун ўрнидан туриб у-бу топса бўларди. Лекин у бунга ҳаракат қилмади. Ичмаса тамадди қилолмасди, бир ютум лукма ҳам томоғидан ўтмасди. Уйда эса бир қултум ҳам ичимлик қолмаган, олиш учун пули соб бўлган, кеча ҳеч илож топилмаганидан ахлатхоналарни титкилашга мажбур бўлганди. Бугун ахлатхонага боролмайди. Анави аёл учраб қолса нима бўлади?

Бироқ кўп ўтмасдан ор-номус устидан истак ғолиб келди. У ичмаса бўлмаслигини, жилла курса юз грамм ютмаса ўзига кела олмаслигини ҳис этди. Балкондаги кераксиз, сотишга арзимайдиган ашқол-дашқолларни титкилаб беш-олтида банка топиб олди. Чанг босган экан, апил-тапил қуруқ латта билан артиб тозалади. Кейин уларни йўлак эшиги олдига келтириб қўйди-да, ўзи рўпарадаги қўшнининг кўнғирогини босди. Йигирма олтиларга борган, сариқдан келган жувон эшикни очди.

— Соседка, ортиқча банкаларим бор эди, оласизми? — деди у жувонга мўлтираб қааркан. Жувоннинг жиддийлиги уни ташвишлантирди. Уларнинг ўзаро олди-бердилари бор эди. Жувон арzon-

гаровга унинг кўпгина нарсаларини сотиб олиб кўйганди. Аммо бу сафар...

– Банка етарли менда. Дазмол йўқми мабодо?

– Дазмол? Дазмол ҳам бўлиши керак, – деди Акбар шоша-пиша. – Қидириб кўраман ҳали. Лекин ҳозир вақтим зик. Пича пул керак бўлиб қолди. Ростини айтсам... бугун ойимнинг туғилган куни эди. Қабристонга бориб гул қўйиб келсанм девдим.

– Банкаларингиз қани?

– Ҳозир.

Жувон ҳисоб-китобдан ортиқчароқ пул берган экан. Кўчага чиққандан кейин билди. Хурсанд бўлиб кетди. Таниш пивохона олдига учиб келди ўзиям. Ҳозир... Мана ҳозир... Ўша зормандани бир сипқоришда ютади-ю, дунёга қайта келгандек бўлади. Остона ҳат... Йўқ, остона ҳатлаб ичкарига кира олмади, кимдир чақиргандек бўлиб ортига ўгирилди. Икки қадам нарида кечаги соҳибжамол жилмайиб турарди!

Шиша ичидан кўз сузаётган “малак” доғда қолди. Акбар ҳеч иккиланмасдан пивохонадан юз ўгириб, жувон томон юрди. Кечга бориб шу ҳолатини қайта-қайта эсларкан, ўзидан мамнун бўлди: “Демак, ҳали жуда ҳам тубан кетмабман!”

– Салом.

– Яхшимисиз? Яхши бўлиб қолдингизми?

– Тузук... Ишдан келяпсизми ё энди боряпсизми?

– Бугун кечки сменадаман.

– Айтганча, исмингизни сўрамаган эканман кеча, кейин жуда афсусландим. Агар ҳозироқ айтмасангиз бугун оқшомги уйқу ҳам ҳаром бўлади.

– Ҳай-ҳай, шаштингиздан тушинг. Исмим оддийгина. Нафосат.

– Нафосат?! Жуда топиб қўйишган экан. Исми-жисмiga монанд аёлни биринчи марта кўриб туришим.

– Ҳар қалай яхши бўлиб қолибсиз, шунисига шукр. Хўп, мен борай...

– Дарров-а?

– Вой, бу нима деганингиз?

– Энди топдим деганимда... Биласизми, нима, мен ҳали жудаям соғайганим йўқ. Аптекага дори олиш учун келаётгандим. Паришонхотирлигим қурсин, пивохонага бурилиб кетибман. Агар сиз чақириб қолмаганингизда бармендан дори сўраб, тоза шарманда бўлардим-да.

– Вой, айёр-ей, бу билан нима демоқчисиз?

– Бир оз айланайлик, илтимос. Ишингиз кечки сменада экан-ку... – Акбар аёлга илтижоли боқди, илтимосимни рад этсанг, ўламан, дегандек.

– Ие, ҳали исмингизни ҳам билмайман-ку.

– Кейин айтаман. Қолаверса, мен сизга миннатдорчилик билдиришим керак. Агар сиз бўлмаганингизда...

– Яна шу гап.

– Қайси гап? – Бирдан ҳушёр тортди Акбар. Чув тушириб қўйдимми, дегандек.

– Кечадан буён “Агар сиз бўлмаганингизда...” деган гапни юз марта такрорладингиз.

– Яна такрорлайман, керак бўлса минг, миллион марта такрорлайман.

Жувон бир муддат ўйланиб турди-да, сўнг:

– Хўп, бир оз айлана қолайлик, – деди. – Сиз тутган еридан кесадиган эркаклардан экансиз, – деб қўшиб қўйди яна.

Акбар жўшиб кетганидан жувонни ўпиб олишига бир баҳя қолди. Шу вақтгача ҳеч ким уни бунчалик мақтамаган эди.

Улар йўлак бўйлаб аста юриб кетдилар. Акбар хаёлан бирорта дўкон ё бирорта ошхона бўлмаган кимсасиз кўчани қидиради. Афсуски, ҳозирги замонда бундай кўчани топиш амри маҳол. Ахийри уйи яқинидаги мактаб ҳовлисини ўйлаб топди. Тушдан кейин у ерда ҳеч ким бўлмайди. Хушманзара, сердараҳт, сокин жой. Ўтириш учун стадиондан ўриндиқ ҳам топиш мумкин. “Лекин эртага қаердан бўлсаям пул топиб уни тузукроқ жойга овқатланишга таклиф этаман. Бугунни бир амаллаб ўтказиб олсан бўлди эди”, – хаёлидан ўтказди музтар бўлган йигит.

* * *

Эртаси куни у пул топди. Бир вақтлар жонажон ўртоғи бўлган, аммо кейинчалик юз ўгирган, айни кунларда дуч келиб қолса-да, кўрмасликка олиб ўтиб кетадиган бир ўртоғидан не-не қасаму ваъдалар эвазига қарз олди. Ва ўзи ният қилгандай Нафосатни “тузукроқ жой”га овқатланишга таклиф этди. Ушбу “кечлик” устида у Нафосат ҳақида батафсил маълумотга эга бўлди. Жувон фабрикада ишларкан. Анча йил олдин ўқиши истагида шаҳарга келиб қолган экан. Қанча ўқиб, тайёрланса ҳам институтга кира олмабди. Тирикчилик учун фабрикага ишга кирибди. Шу ерда у бир ярамас йигитнинг тузоғига илиниб қолибди. “Уйланаман” деб икки йил алдаб юриб, охирида қочиб қолибди. Ана ўшандан буён...

– Ана ўшандан буён эркак зотига ишонмай қўйганман, – деди Нафосат охирида.

Акбарнинг бирдан нафаси ичига тушиб кетди. Йўлига, иштаҳани очиш учун олинган икки қадаҳдан кейин қизиб ўтирган эди. Устидан совук

сув қуйиб юборилгандек бўлди. У бугун Нафосатни уйига таклиф этмоқчи, аёлсиз ўтказган кунларининг ҳиссасини чиқармокчи эди. Махзун тортиб қолди. Ҳатто ўрнидан туриб кетиб қолгиси келди. Назарида, жувон шунчаки вақтини ўтказиш учун, янада аникроғи, миннатдорчилигини қабул қилиш учун келгандай туюла бошлади.

– Балки мен янглишгандирман, – деди Нафосат гапини давом эттириб. – Дунёда яхши одамлар кўпдир. Мен уларни кўрмаётгандирман, ўз дардим билан овора бўлиб.

– Нафосат; – деди Акбар дангалига кўчиб. – Агар мен яхши одам бўлсан, турмушга чиқармидингиз?

– Ўйлаб кўриш керак. Кейин... Сиз жудаям ғалати экансиз. Кеча таниша солиб бугун қўлимни сўраяпсиз!

– Тўғри, кеча танишдик. Лекин мен сизни аввал ҳам кўргандайман.

– Ётоқхонамиз бу ердан анча олисда, қаерда кўрган бўлишингиз мумкин? Менимча, сизга шундай туюляпти.

– Йўқ, йўқ, мен кечадан буён ўйлаб юрибман, сизни қаердадир кўргандайман.

Нафосат бир муддат ер чизиб ўтириди-да, сўнг илкис бошини кўтарди.

– Эсладим, – деди у ҳаяжон билан. – Эсладим. Сиз ҳақсиз. Мени кўрганингиз рост.

– Ана айтмадимми, паришонхотирлигим бор-у, лекин жа унчаликмас.

– Бир марта сизнинг орtingиздан келганман уйингизгача. Ўшанда ҳам мазангиз йўқмиди, жуда ёмон аҳволда эдингиз. Тўғриси, раҳмим келди ўшандаги. Йўлда йиқилиб-нетиб юрмасин, деган хаёлда...

– Мана кўрдингизми, биз аллазамонлардан буён танишмиз-у, сиз бўлсангиз дарров қўлимни сўраяпсиз, деб домангир бўляпсиз. Хўш, рози бўлармидингиз?

– Раҳм қилинг, бир оз ўйлаб олай, – дея кулди жувон.

Бу гап, айниқса гап оҳанги Акбарни анча юксакка чиқариб қўйди. У жувоннинг, шундай соҳибжамолнинг хўжасидек ҳис эта бошлади ўзини.

– Бир ҳафта етадими?

– Вуй... намунча?..

– Кўпми? Майли, талабларга биноан муддатни қисқартирамиз. Икки кун...

– Э, боринг-е... – Нафосат кафтлари билан қизариб кетган юзини тўсди.

Акбарнинг завқи келди. У яна гапиргиси, аёлни уялтиргиси келди. Аммо уни хафа қилиб қўйишдан чўчиди. Истар-истамай гапни бошқа ёққа буриб юборди.

Кафедан чиққанларида вақт алламаҳал бўлиб қолганди. У аёлни қучоқлаб олди. Нафосат кутмаган шекилли, чўчиб тушди, силтанди.

– Ие, қизиқмисиз... қўйворинг.

– Энди ҳар доим мана шундай юрамиз. Энди ҳеч қачон сизни қўйвормайман, – деди Акбар, кейин бирдан шивирлашга ўтди: – Бугун меникида қоласиз-а, ҳа, дeng, хўп, дeng!..

– Қололмайман... Вой...

Акбар уни қаттикроқ бағрига босди.

– Хўп, демагунингизча, қўйвормайман!

– Жонимни оғритдингиз...

– Бу кам!

– Сиз... бошқачасиз... – Жувон унинг кўксига бош қўяркан, шундай деб пичирлади...

Улар таниш уй олдига келиб қолганларини пайқашмади. Бу Акбарнинг уйи эди. Уй олдидағи улкан дараҳт остида бир пас туриб қолишиди. Кейин... Кейин Акбар жувонни даст күтариб олди.

Вақт эшик ортида қолди.

* * *

Акбар ухлаётган соҳибжамолнинг ҳуснига тўйиб-тўйиб тикилмоқчи эди, афсус, у уйғоқ экан.

– Биласанми, бирдан миямга ғалати фикр келди, – деди у Нафосатга.

– Нега энди “ғалати” фикр?..

– Ўзинг мени ғалати одамсиз, дейсан-ку.

– Бошқачасиз, дейман, – Нафосат унинг юзини силади.

Акбар унинг кафтини ўпди.

– Ғалати билан бошқачанинг нима фарқи бор?

– Фарқи бор.

– Ҳа, майли, умуман олганда, ғалати-да, хуллас, шу ғалати одам бугун ўзидан-да ғалати фикрга келди. Яъни...

– Яъни?.. – Нафосат унга синовчан тикилди.

Акбар тараддулланиб бир пас жим қолди.

– Ҳа, майли, бошқа пайт... – овози ўзгарди Акбарнинг, ўрнидан турмоқчи бўлди, аммо турмади, бир қўзғалиб қўйди, холос. – Йўқ, – деди у бирдан ўзига-ўзи гапиргандек бўлиб. – Йўқ, бошқа вақт эмас, ҳозир, ҳозир айтаман, – Кейин у яна жим қолиб, чуқур нафас олди-да, давом этди: – Мен... Мен ўша куни касал эмасдим. Мен ичгандим. Мен ичкиликбозман. Мен пиёнистаман!..

Акбар ўзига тарсаки тушадигандек бирдан юзини кафтлари билан тўсиб олди. Мана ҳозир... ҳозир... Бирдан момоқалдироқ гулдирайди-ю,

ҳаммаси, ҳаммаси тамом бўлади. Алвидо, муҳаббат! Алвидо, соҳибжамол! Ал...

– Билгандим... – шикаста, паст овозда айтилган бу сўз Акбарнинг қулоғига чинни пиёла жарангидек ёқимли эшитилди. Аммо у қулоқларига ишонмади. Қулоқларим мени алдаяпти, деб ўйлади. Юзини тўсган кафтларини туширишга ҳам уринмади. Ожизлик қилди.

– Лекин... Нима учун... Мен ҳайронман... Ичган одам одам эмасми?! – Бу гап фавқулодда айтилган сўздан ҳам кучлироқ таъсир қилди Акбарга. У кафтларини туширганда... Юзи шу қадар оқариб кетгандики... Нафосат қўрқиб кетди. Сапчиб ўрнидан турди.

– Мен ҳозир, чой опкеламан!..

Бир зумдан сўнг Акбар ўзига келгандек бўлди, юзига қизиллик югурди. Аммо сўzlари узуқ-юлуқ эди.

– Мен ичаман... Мен бетайин одамман... – дерди у нафаси қайтгудек бўлиб. – Лекин... Биласанми... Мен... нима десам экан... Ҳалиги... ҳа, топдим, мен ваъда бераман. Энди... ҳеч қачон, ҳеч қачон бундай бўлмайди... Энди...

Нафосат унинг лабига бармоғини босди.

– Кейин, кейин гапирасиз. Ҳозир шарт эмас... – Жувоннинг нозик бармоқлари унинг соchlари орасида, бўйнида, юзи-ю қулоқлари атрофида кезинди. Кейин шундай ҳол юз бердики, йигитнинг назарида борлик оламдан ўтди. Уларнинг руҳлари эса аллақачон арши-аълога учиб кетганди...

– Одамлар ҳаммаси тақдирдан, пешонага ёзилганидан дейди, лекин мен бунга ишонмайман, – деда ҳикоя қила бошлади Акбар қай бир куннинг қай бир соатида. – Мактабда математикадан аълоға ўқирдим. Сендан кучли математик чиқади,

дайишарди устозларим. Шуларнинг гапига ишониб математика факультетига ўқишига кирдим. Бир амаллаб кирдим-да. У ёғини сўрама. Лекин шу ерда билдим, алданганимни. Менинг арифметика бўйича билганларим ҳеч нарсага арзимас экан. Қийналиб кетдим. Ортга қайтишга йўл йўқ. Тиришиб-тирмашиб ўқидим. Ниманидир тушунгандай бўлдим. Шу тушунган нарсамга ишониб мен аҳмоқ аспирантурага ҳужжат топширдим. Аспирантура менинг жиндайгина тушунчамни назар-писанд қилмади. Яна тиришиб-тирмашиб ҳаракат қилдим. Ўқидим. Бир нарсаларни қораладим. Йиртдим ҳаммасини. Кейин яна ўқидим, яна қораладим, йиртдим... Аспирантурани битиргандан кейинги етти йиллик умримни бағишлигаган ишимни ҳурматли устозим бир кунда йўққа чиқарди! Шу куни йўлда келяпман, фақат ичим куяди, куяди, куяди. Чанқаб кетдим, дейман ўзимга-ўзим. Лекин биламан, бу чанқов эмас. Бирдан пивохонага кўзим тушиб қолди. Яхши бўлди, чанқовбосди қиласман, деган хаёлда пивохонага кирдим. Ичдим. Бурнимдан чиққунча ичдим. Лекин чанқовим босилмади. Билардим, бу чанқовим анча-мунчага босилмаслигини. Шундай бўлса-да, пиво билан чанқовбосди қилиб юрдим. Қўлим ишга бормай қолганди. Домламнинг олдига қайтиб бормадим. “Аспирантурада қолсанг, сендан зўр кандидат чиқараман”, деган шу домлам эди-да. Мен жиндек билимимга ва домламга ишонгандим. Тақдирнинг алдови эмасми бу? Бошқалар яхши баҳо олиш учун икки юз кўкидан беришаркан. Мен эса нақ беш юз олиб бориб бердим. Ўша беш юзни топгунча тилим осилиб қолганди ўзиям. Лекин начора, домланинг ўзи тилга келиб нархини айтиб тургандан кейин...

Барибир, ҳеч ёруғлик чиқмади. Нафси ламрини жайтганда, ўша беш юзга яна озгина қўшиб тайёр “иш”ни сотиб олсан бўларди. Бирор кун эсига тушиб қолсан домламнинг ўзи чақириб қолар, деган ўйда юравердим.

Лекин домламдан хабар кела қолмади. Мен нима биландир банд бўлишга, нима биландир шуғулланишга ўрганиб қолгандим. Энди эса бекорчилигу аламдан ўзимни қўярга жой топомасдим. Коллеждаги ўқитувчилигим ҳам қўзимга бало-қазодай кўрина бошлади. Ана шунда ичишга, ростакамига ичишга ружу қўйдим. Ишдан хайдалдим. Аспирантурани битирган йилим уйлангандим, хотиним анча йил туғмай юриб-юриб, қип-қизил ароқхўрга айланганимдан кейин бир қизча туғди. Исмини онам қўйди, Яхшигул деб. Кизим тўрт ёш бўлганида ҳам юрмасди, бунинг устига, ақли заиф экан. Хотиним билан муросамиз келмай қолди. У кетиб қолди. Онам икковимиз шўппайиб қолавердик. Ичкиликка баттар ружу қўйдим. Энди ҳаммасини унутиш учун ичардим. Лекин унутиб бўладими? Мен омадсиз, баҳтиқаро одам эканман, деган фикр миямга ўрнашиб қолганди. Ҳеч нарсани унута олмадим. Ичгандан кейин маълум бир вақт ўзимни сархуш сезардим, қайғу-аламлар ўткинчидай туюларди. Лекин кейин жуда азобда қолардим. Охирги кунларда шу даражага етдимки, фақат, фақат ақлдан озиш учун ичардим. Бўкиб қолгунча ичардим, йиқилардим-суринардим, кимлардандир туртки ердим, аммо барибир уйимни топиб келардим. Уйга келишим, онамнинг қўзига кўринишим шарт эди. Бечора ойим... “Менинг шу ароқхўр боламни ўзинг паноҳингда сакла”, деб Худога илтижо қиласарди. Кўп ўтмасдан хотиним Гулшода уйга даъво қила бошлади. Уйнинг бир қисмида унинг ҳаққи бор

эмиш. Бола туфайли эмиш. Қани ўша бола?.. Уни аллақачон етимхонага топшириб юборган! Аввал ўша болани опкеласан, кейин уйнинг бир қисмiga әгалик қиласан, дедим. Уй ойимнинг номида эди. Барибир қўлидан ҳеч нарса келмасди...

Акбар жимиб қолди.

– Ҳа, кўп қийналган... қийинчилик кўрган одам экансиз, – деди Нафосат ўйчанлик билан. Сўнг ҳайратлангандек қўзларини катта-катта очиб деди: – Сиз илм кишиси экансиз-а! Мен бўлсам... Мен илмли кишиларни жудаям ҳурмат қиласман.

– Имкон берсанг, кута олсанг мен албатта яна аввалги ҳолатимга қайтаман. Ишонаманки, қайта оламан. Бу жуда эҳтимолдан узоқ, эришиб бўлмайдиган нарса эмас. Мен ичмаса қўли қалтирайдиган, кўзи яхши кўрмай қоладиган бир аҳволда эмасман. Сен ишонсанг бас!

– Ишонаман, албатта ишонаман.

Акбар жувоннинг қўлини ўпди.

Анча вақт жим қолдилар.

Акбар ҳаяжондан энтикарди. Қаршисидаги хилқат унинг кўзига битмас-туганмас шодлик, умид ва кўпдан-кўп муваффақиятлар тимсоли бўлиб кўринарди. Мана энди ҳаётда йўқотган нарсларини қайтариб олиш имкони ўз қўлида. Уни бой бергандан кўра ўлиб қўя қолган минг марта яхши...

* * *

Биргаликда яшай бошлишди.

Акбар уйдаги ичкиликни эслатувчи нарсаларни кўздан йўқотди. Ҳатто бирорта бўш шиша ҳам қолдирмади. Иш қидира бошлади. Лекин иш ҳадеганда топилавермади. Омади юришмаётган бўлса-да, сархуш юрган вақтларини эсламасликка, умуман ичкилик ҳақида ўйламасликка, у ҳакда

гапирмасликка аҳд қилғанди. Бу қийин эди. Баъзи кунлари күчага чиқиши, иш қидириш тугул, ҳатто ўрнидан турал олмай қоларди. Хумор жазаваси бутун вужудини исканжага олиб, куч-куватини сўриб оларди. Акбар ғужанак бўлиб қоларди. Юзига қараб бўлмасди шу кезларда. Лекин шунда ҳам у чидарди, чидашга ҳаракат қиласарди...

Нафосат эса аллақачон ўзини оиласи аёлдек тутиб ҳам иш, ҳам рўзғор юмушларини баҳоли қудрат тебрата бошлиғанди. У Акбарга йўл-йўриқлар бермас, ақл ўргатмас, ўз вазифаси билан андармон эди. Фақат бир марта у хавотирлангандек бўлиб:

– Гулшода жанжал кўтариб келиб қолмайдими? – деб сўраганди.

– Келса келаверсин, – деди Акбар бепарволик билан. – Энди ундан қўрқмайман. Мен умуман ундан қўрқмайман. Қолаверса, уй ойимнинг номида...

– Лекин ойингиз...

– Ҳа, тўғри, бу томонини ўйламаган эканман.

– Агар хўп десангиз, ўша қизчани уйга олиб келсак, – деди Нафосат. – У мени онаси ўрнида қўрадими-йўқми, ҳозирча бир нарса дея олмайман. Лекин қўлимдан келганча...

– Сен шусиз ҳам қўлингдан келганини, ҳатто ошириб қиляпсан. Қизим масаласида билмадим, буни ўзинг ҳал қил. Бу фақат сен туфайли ечиладиган муаммо.

– Менга боғлиқ бўлса, унда опкеламиш.

– Йўқ, шошма, яххиси, бундай қиласамиш. Уйни сенинг номингга ўтказамиш. Кейин...

– Ие, вой, нималар деяпсиз?! Ахир... Ахир...

– Ахир-пахири йўқ. Мен тутган еридан кесадиган одамман, биласан-ку одатимни! Лекин аввал никоҳ ўқитамиш!

— Хай, ўзингиз биласиз.

— Кейин ота-онангни олдига ҳам бемалол борардим.

Нафосат жавоб ўрнига ширин табассум ҳадя этди.

— Тўғри, уйим мақтандулик аҳволда эмас. Жуда кўп нарса керак ҳали. Лекин мен ҳаммасини муҳайё қиласан.

— Унчалик камтар бўлманг. Уч хонали уйингиз борлигининг ўзи бойлик-ку, — Нафосат шундай деди-ю, нимагадир ўрнидан туриб, ошхонага ўтиб кетди. Анча вақт ўша ерда ўралашиб юрди-да, кейин Акбарнинг олдига келди. Лекин энди уй ҳақида бир оғиз ҳам гап очмади.

Акбар айтганини қилди, аввал никоҳларини расмийлаштириди, сўнг уйни Нафосатнинг номига ўтказди. У аста-секин ўзига кела бошлаган, барча соғлом турмуш тарзи кечирадиган кишилар каби эрталаб нонушта қилар, тушликни ҳам ичкиликсиз ўтказар, фақат кечга бориб толикқандек бўлар ва шунда алланима эсига тушиб, безовталаниб қоларди. Шундай кезларда у қаерда бўлмасин, уйга етиб келар, кўнгли тусаган нарса билан қорнини тўйдирар, тўйдирганда ҳам унча-мунча эмас, ортиқча нарсага ўрин қолдирмайдиган қилиб тўйдирарди. Қорни тўйгандан кейин ичкиликка бўлган талаб сусаяр, уйқу элтиш асносида истак ҳам ўз-ўзидан йўқолиб-йитиб борарди.

Бир куни кечки пайт ана шундай “хуруж” тутиб қолди. Акбар истакни ўлдириш чорасини қўллаш ниятида музлатгични очди-ю... тахта бўлиб қолди. Шундоқ кўз ўнгида турли-туман егуликлар ўртасида қаҳрабодай товланаётган шиша туарди!

Акбар киприкларини пирпиратди, ютинди, шишага эътибор бермасдан (ҳар қалай ўзи шундай

ўйлади) ёнидаги егуликлардан ликопчага солди. Газга чой қўйганди, у шақирлаб қайнаб ётар, лекин Акбар буни пайқамасди. У аллақандай паришон бўлиб қолганди. Ликопчадаги егуликларга тикиларкан, уларнинг ўрнида қаҳрабодай товланаётган шиша кўзига кўринарди. Шиша ичидағи суюқлик аро Нафосатдан ҳам гўзал, ундан-да сулув бир нозанин ишва қилиб туради.

Иштаҳаси ғиппа бўғилди. Сархил егуликлар томоғидан ўтмасди. Охири чидай олмади. Музлатгич олдига қандай етиб борганини сезмади. “Озгина олсам нима қиласди? Юз грамм ичаман-у, қолганини ойнадан улоқтираман!” Йўқ, қолганини ойнадан улоқтира олмади. Журъати етмади. Кўзи қиймади...

Эртаси эрталаб Нафосат сменадан келганида Акбар “бошоғриқ” қилиб ўтиради. Аёлнинг қўлидан лиқ тўла сеткаси тушиб, мева-чевалар сочилиб кетди.

– Яна ича бошладингизми?

– Ўзинг музлатгичга кўйиб кетган экансан-ку, – деди Акбар пинак бузмай. – Мен сенга айтгандим, уйда менга ичкиликни эслатадиган стакан ҳам турмасин деб. Сен бўлсанг...

– Ахир эртага туғилган куним-ку, – деди Нафосат йиғламсираб. – Ишхонамдан қизлар келишмоқчи эди...

Акбар сўнгги қултумни юта олмади.

– Кечир, мени кечир, – деди у жувонга ёлворувчи нигоҳ ташларкан. – Энди бундай қилмайман.

Нафосат яқин келиб Акбарнинг бошини кўксига босди.

– Йўқ, сиз мени кечиринг...

Аммо ғишт қолипдан кўчган эди.

Акбар ишга кирган, құлиға түрт-беш сүм пул тушиб қолғанди. Бироқ у яна кечки пайтлар тез-тез пивохонанинг күримсиз биноси олдида пайдо бўла бошлади...

Нафосат тунги сменадаги ишига бормай қўйди. У энди тушгача, гоҳида пешиңгача ишлаб, уйга қайтар, қайтаркан, йўл бўйидаги пивохонага кириб у ерда ичиб ўтирган Акбарни етаклаб келарди. У озиқ-овқат масаласида сарф-харажатни аямасди. Акбарнинг кўнгли тусаган нарса музлатгичда муҳайё эди. Аёл яна бир фидойиликка қўл урган: Акбарнинг ногирон қизчасини болалар уйидан олиб келиш ниятида юради. Бироқ... Нима учундир Акбар кейинги вақтларда оза бошлади. Юз-қўллари, умуман бадан териси ўзгариб сарғимтир тусга кирди. Кейинроқ бориб овқатдан кейин кўнгли озиб, ўҳчийдиган бўлиб қолди. Кўп, жуда ҳам кўп сув ичарди. “Ичим куийб кетяпти”, – дерди у жоникиб. Кечаси билан қайт қилиб чиққан куннинг эртасига ишга ҳам бора олмади.

– Ичкилик сизга ёқмаяпти, энди шу зормандани ичмай қўя қолинг, – деди Нафосат.

– Ичмайман, энди ичмайман... – Акбар мажолисизликдан тинкаси қуриб кетаётган бўлса-да, жувоннинг қўлини олиб кўксига босди, жилмайди: – Яхшиям сен борсан...

– Уч-тўрт кун ишга борманг, дам олинг. Менам ишга бормайман. Ўзим парваришлийман, балки шу баҳонада ичкилик бутунлай эсингиздан чиқиб кетар.

Нафосат таниш дўхтирини чақиртирди.

– Ҳаммаси ичкилик оқибати, – деди чўққи соқолли, ёш дўхтири. Кейин бир парча қофозга бир дунё дориларни ёзиб берди. – Бир томчи ҳам ичкилики оғзингизга олманг. Мумкин эмас!

Нафосат дўхтири кузатгани чиқиб бир фурсат ушланиб қолди. Бу Акбарнинг нафсониятига тегди.

– Дўхтир билан анчадан буён танишмисан? – деб сўради у Нафосат қайтиб кирганида.

Нафосат бир зум жавобсиз қолди. Сўнг:

– У фабрикамизнинг амбулаториясида ишлайди, – деди. – Бир мени эмас, ҳамма ишчиларнинг таниши у.

– Ҳар қалай... уйга чақирсанг югуриб келадиган даражада эмасдир!

– Нимага бунча хафа бўляпсиз? – деб сўради Нафосат сал оғрингандек бўлиб. – Пулини тўласангиз бас, келаверади-да дўхтир зоти!

Акбар ўсал бўлди.

– Кечир, – деди бир оздан кейин.

– Ҳеч қиси йўқ. Сиз яхши бўлиб кетсангиз бас.

Нафосат ишга бормай қўйди. У Акбарнинг бошида парвона бўлар, аллақандай дорилар ичирап, кийимларини алмаштириб турар, инжиқликларига меҳрибонлик билан жавоб қайтарарди. У фақат ярим соатга Акбарни ёлғиз қолдираварди. Бу вақтда у нон ёки бошқа бирор зарурат туфайли қўчага чиқарди-ю, кўп ўтмасдан ҳарсиллаганча кириб келарди.

Акбар уни койигандек бўларди:

– Секин юрсанг ҳам бўларди-ку, намунча...

– Сиздан хавотирландим... – Жувоннинг гезарган чехраси, олазарак нигоҳлари мулойим табассумдан ёришиб кетарди. Шу топда унинг қараши шунчалар мулойим, жилмайиши шу қадар беғубор, самимий ва меҳрли эдики, Акбарнинг кўкси ҳайратга тўларди.

– Қушқўнмас бир дарахтга кунларнинг бирида олтин патли тустовуқ келиб қўнди, дейишса ҳеч ким ишонмаса керак!..

Нафосат унинг оқарган юзини силайди. Яна шундай – бегубор самимият билан жилмаяди.

Чамаси икки ҳафта ўтиб Акбарнинг аҳволи оғирлаша бошлади. У озиб, қуриган чўпдай бўлиб қолди. Эрининг қусигига жиндай-жиндай қон аралашиб тушаётганини кўрган Нафосат ўзини тутиб туролмади, Акбарнинг чекка томирлари бўртиб, териси қуруқшаб қолган, соchlари тўкила бошлаган бошини кўксига босганча ҳиқиллаб йиғлаб юборди.

– Касалхонага оборай десам кўнмасангиз... – деди у йиғи аралаш. – Ахир бу аҳвolda... охири нима бўлади?.. Мен кўрқиб кетяпман!..

– Нимага, нимадан кўрқасан? Ваҳима қилмасанг-чи, – деди Акбар унга жавобан. – Анави дўхтирий айтди-ку, исми Давлатмиди, хавфли эмас деб. Ҳаммаси ичкиликнинг оқибати. Ўтиб кетади ҳадемай. Мана кўрасан!

Нафосат йиғидан тўхтаб, бир неча сония тек қотди. Кейин Акбарнинг қорамтири доғ босган юзини кафтлари орасига олиб, кўзларига тикилди. Қаттиқ тикилди. Авваллари ҳеч ҳам бундай нигоҳ ташламасди.

– Мабодо... ўтиб кетмаса-чи? – деб сўради ғалати оҳанѓда.

Акбар бирдан жавоб бермади. Мажолсизлик билан бошини орқага ташлади. Нурсиз нигоҳларини шифтга қаратди. Сўнг:

– Бунинг қўрқинчли ери йўқ, – деди хотиржамлик билан. Ҳатто кулиб кўйди. – Юз йил баҳт нелигини билмай яшагандан кўра... Олтин патли тустовуқ қўниб турган вақтда қарсиллаб қулаган маъқул!..

– Топган гапингизни қаранг!..

Акбар аёлнинг кафтига лабини босди.

гарчилик, қайғу, нафрат, янги кунга кулиб қарай олмаслик, буларнинг бари-бари умр заволи эканлигини англаб етади ва шундан кейингина бу аёл фикри-хаёлини фойдасиз дикқатбозлиқдан, кинадоватдан халос этади, ана шундан кейингина биз тугал баҳт-саодатга эришамиз.

Нихоят у ухлаб қолди.

Мен унинг диванга ўтириб, бошини орқага ташлаганини, кўзларини юмганини кўриб турардим.

Чироқнинг мисранг ёғудуси унинг ихчам ияги ва бўйнига тушиб турарди. У ютинди шекилли, томоги билинар-билинмас қимиirlади.

Шунда яна бир бир ҳақиқатни тан олдим, майли, у мени тушунмаса ҳам розиман, майли, мени севмасин, жаҳли чиққанида зарда қилсин, бақирсин-чақирсин, нафратлансин, баҳтли бўлиш учун ўзимнинг, ёлғиз ўзимнинг муҳаббатим етиб ортади, муҳими ҳам шу.

Шу кеча мен ўз кўнглимни тубсиз жарликдан олиб ўтдим. Энди майда-чуйда нарсаларга аҳамият бермайман, Дилдора ёнимда бўлса бас, жимгина яшайвераман, деган қарорга келдим.

Бироқ шугина ҳам менга насиб қилмади.

– Ажрашайлик, – деди Дилдора кунларнинг бирида кўзларимга тик қараганча. – Мен бу аҳволда яшай олмайман...

– Мен эсам яшайвераман, – дедим бепарво оҳангда.

– Ичингиздаги оловга атала пишади-ю... Яшайверармиш! – кесатди Дилдора.

– Сенга шундай туюлаётгандир, – дедим жим турмаслик учун.

– Майнавозчилик қилманг, илтимос, – деди Дилдора бир маҳал ёлворувчи оҳангда. – Нега ўзингизни бунча қийнайсиз? Биламан, бир вақтлар мени севгансиз, лекин мен...

— Бўлди, бас қил, — дедим овозимни кўтариб.
Ўзимни вазмин тутишга уринмай, негадир ич-
ичимдан совуқ ҳовур кўтарила бошлади.

— Бас қилмайман, — деди Дилдора шартта. —
Сизга ғўладай совуқ хотиннинг нима кераги бор?!

— Ишинг бўлмасин!

— Сизга фарқи йўқми?

Шу бир оғиз гап косанинг тошиб чиқишига
сабаб бўлди.

— Бу билан нима демоқчисан?! — дедим унинг
ёқасига ёпишиб. — Нима демоқчисан?! Индамага-
ним сайин ҳаддингдан ошиб кетяпсан жа!

— Ёқамдан қўлингизни олинг, — деди Дилдора
паст, аммо қатъий оҳангда.

— Олмайман, керак бўлса ҳозир...

— Қўлингиздан нима келарди?! Деразадан
улоқтирасизми? Улоқтиринг! Улоқтиринг, нега қа-
раб турибсиз?! Ёки мени кетиб қолади деб қўрқ-
япсизми? Қўрқоқ, ваҳ-ха-ҳа! Қўрқоқ!

Билмадим, қандай қилиб унинг юзига тарсаки
туширганимни ҳали ҳам эслай олмайман.

Бир марта эмас, қайта-қайта тарсаки тушир-
дим. Ҳар тарсаки тушганида Дилдора орқага қал-
қиб кетар, мувозанатини тута олмай, гандираклар,
аммо миқ этмасди. Кўзим қонга тўлганидан,
ўзимни бошқара олмас, нималар қилаётганимни
билмасдим.

— Улоқтир эмиш! Сенга шу керакми?! Мана, бўл-
маса!

Уни даст кўтардиму деразадан пастга ташла-
дим.

— Вой!.. — деган овоз эшитилди ва бирдан олам
сув қуйгандай жим-жит бўлиб қолди...

Кейин диванга ўзимни ташладим.

Орадан бир, икки соат ўтди ҳамки, Дилдорадан дарак бўлмади. Мен унинг ичкарига киришини кутардим-да.

Бир маҳал юрагим тез-тез ура бошлади.

Ўрнимдан тура солиб, ташқарига чиқдим.

Пастда, дераза остида Дилдора ётарди.

– Дилдор... Кўзингни оч, Дилдор...

Аммо у кўзини очмади.

Кўтариб уйга олиб кирдим.

Юзига совуқ сув сепдим, елпидим, ишқилиб, хаёлимга нима келса шуни қилдим, ахир довдираб қолгандим-да.

Бироқ Дилдора ҳушига келмади.

Эрталаб дўхтири чақирдим.

– Комага тушиб қолган шекилли, – деди дўхтири уни кўздан кечириб бўлгач. – Касалхонага олиб бориш керак.

– Комага тушиб қолган, дейсизми? – дедим ишонмасдан. – Нега комага тушади?

– Ўзингиз айтдингиз-ку, кечаси деразадан ташлавордим деб! – заҳарханда қилди дўхтири.

– Бўлиши мумкинмас! Ахир деразанинг баландлиги бир метр ҳам чиқмайди...

– Бўлинг, тез, машина топинг!

Мен туш кўраётгандай эдим. Мана, ҳозир уйғонаман-у ҳаммаси тугайди, лекин уйғониш бунчалик қийин... нега уйғонмаяпман?

Дилдорани касалхонанинг аҳволи оғир bemорлар ётадиган бўлимига жойлаштиришди. Шундан кейингина аҳвол жиддийлигини пайқадим.

Мен туш кўрмаётган эдим.

– Уйғон, уйғона қол, илтимос, – дея ҳар куни унинг юзини силардим. – Уйғона қол, илтимос.

Майли, сен айтганча бўлади, агар мен билан яшашни истамас экансан, майли, ажрашамиз. Фақат уй-ғонсанг бас!

Кунлар ўта бошлади.

Нихоят еттинчи куни у кўзларини очди.

Бир неча сония маъносиз, бакрайган кўзларини менга тикиб турди-да, кейин яна чирт юмди.

Мен учун шунинг ўзи кифоя эди. Шу кичкина баҳтнинг ўзи кифоя эди.

– Дўхтири, у хушига келди! – дея қичқириб юбордим.

Бир зумда дўхтири ва ҳамширалар уни ўраб олишди.

Мени эса йўлакка чиқариб юборишди.

“Наҳотки мен ўзим учун жуда кўп нарса сўраб юборган бўлсам, – деб ўйладим йўлакда турганча. – Барча кўргуликлар очкўзлигим туфайли юз берган-дир? Ахир мен баҳтга ташна эдим. Назаримда мендан бошқа ҳамма баҳтлидай туюларди. Бир аёлни севдим, уни баҳтли қилишни истадим, лекин... Бутун ҳаётим бола вақтимда қийнала-қийнала ташлаган дастлабки қадамларимдек серташвиш ўтди. Лекин энди кўряпманки, ўзимни баҳтли ҳис қилишим учун унинг кўзларини очгани кифоя экан...”

– Бу ёқقا қаранг, – деди ҳамшира эшикни қия очиб.

Ичкарига кирдим.

– Бу аёл хотинингизми? – сўради врач.

– Ҳа... Кўнгилсизлик юз бермасдан олдин шундай эди, лекин энди...

– Гаплашиб кўринг.

Мен каравотга яқин келдим.

– Дилдора...

Шифтга тикилиб ётган Дилдоранинг қорачиқлари қимиirlади, аммо мен томонга қарамади.

– Дилдора, яхши бўлиб қолдингми?
Дилдора жавоб бермади.
Врач яна мени палатадан чиқариб юборди.
Ҳақиқий фожеадан эртаси куни боҳабар бўлдим.

– У хотирасини йўқотган, бугунги кунни буткул унутган, – деди дўхтири менга.

Етмиш икки томирим зириллаб кетди.

– Нега? Нега хотирасини йўқотади? Арзимаган зарб...

– Сиз учун арзимаган зарб бўлиши мумкин, – деди дўхтири ачитиб. – Хуллас, унга эътиборли бўлинг. Қолганини кейин гаплашамиз.

Дўхтири чиқиб кетди.

Турган еримда Дилдорага разм солдим.

Бу вақтда у ухлаб ётарди. Юзида аллақандай оғриқдан азоб чекаётгандай асабий ифода қотган, мен суйган қўллар мен суйган кўкраклар устида bemажол ётарди.

– Дилдор... – дедим юрак ютиб.

Дилдоранинг киприклари титраб кетди.

Кейин оҳиста кўзларини очди.

– Сиз?! – деди у аста.

– Ҳа, мен эрингман, – дедим унинг ёноғидан ўпиш учун эгиларканман.

– Беҳруз...

Бирдан ток ургандай қалқиб кетдим.

– Нима бўлди? – сўради Дилдора.

– Ҳеч нарса... тинчлик...

– Нега унда юзимдан ўтмаяпсиз? Табриклама-япсиз! Ахир биз ўғил кўрдик! – Дилдора хиёл бoshини кўтариб, ёноғини тутди.

Мен уни ўпиб қўйдим.

Лекин жуда ғалати тарзда.

– Хурсанд эмасмисиз? – Дилдора қўли билан юзимни силади.

- Хурсандман...
- Бизни қачон уйга олиб кетасиз?
- Қачон истасанг шунда.
- Ҳозироқ уйга кетишни истайман. Бу ерда гүё
минг йилдан буён ётгандай, жуда сиқилиб кетдим.
Дилдора ўрнидан турди.
- Мен ҳозир... — дедим дўхтирни чақиришга та-
раддулданиб.

— Ие, болам қани?!

Дилдора олазарак бўлиб, ён-верига аланглай
бошлади.

Бирдан миям тезлик билан ишлай бошлади.

— Ҳозир, бир пас кутиб тур, — дедим Дилдорага.

Нима қилиш кераклигини чўтлаб хонадан
чиқдим.

Дўхтир билан гаплашиб, туғруқхонага ташлаб
кетилган болалардан бирини фарзандликка олиш-
га қарор қилдим.

Бир ҳафтадан кейин Дилдора билан болани
уйга олиб келдим. Ўзимнинг уйимга. Менинг
уйимда, менинг соатим ҳамон чиққиллаб турарди.

Аммо энди ўз уйимда Самандар бўлиб эмас,
Бехруз бўлиб яшай бошладим. Бу бир оз малол
келарди албатта. “Бу вақтинчалик ҳол, ҳадемай
унинг хотираси ўзига қайтади, — деб ўзимга таскин
берардим. — Кейин ҳаммаси яна изига тушиб
кетади. Хотираси ўзига қайтганидан кейин у
нималар бўлганини билади, мендан хафа бўлиши
мумкин, лекин энди ташлаб кетмайди, ахир
ўртамиизда бола бор!”

Дилдора болани эмиза бошлади.

Мен ҳайратда эдим.

— Нега сариқ рангли кўйлагингизни киймай
кўйдингиз? — деб сўради Дилдора бир куни дабду-
рустдан.

Шошиб қолдим.

- Сариқ күйлак?
- Ҳа, сариқ күйлак.

– Билмадим... бир неча кундан буён тополмай юрибман, шунга ҳайрон бўлиб... сендан сўрамоқчи эдим...

– Мен бола билан андармон бўлиб қолганимдан буён жуда чарчаяпман...

– Майли, вақтим бўлганда ўзим топиб оларман бир бурчакдан.

Эртаси куни ишдан қайтишда сенинг уйингга кириб, шкафдан кийимларингни олдим... Пайпокларинг ҳам қолмади.

– Қачондан буён ширгуруч ейдиган бўлиб қолдингиз? – деб сўради Дилдора бир кеч овқатланаетганимизда. – Ширгуруч есам, ичим ўтиб қолади, деб юрардингиз-ку!

Дилдора кулиб юборди. Самимий кулди.

Унинг юзи баҳтиёрикдан гул-гул яшнаб турар, қўзлари ўт бўлиб ёнарди.

– Шунақами?.. – дея олдим зўрга. Кейин бирдан жим бўлиб қолдим.

– Мен касалхонада вақтимда борига қаноат қилган бўлсангиз керак, бечорагинам...

Дилдора ўрнидан туриб ёнимга келди.

Бармоқлари соchlаримни ўйнай бошлади.

Ё тангри!

– Агар ширгуруч егингиз келган бўлса, яна пишириб бераман, – дея шивирлади у кулоғимга, соchlари ёноғимни қитиқлади, атиргул ҳиди димоғимга урилди.

Мен адойи тамом бўлдим.

– Йўқ, ширгуруч емайман, ичим ўтиб қолади...

Шундай қилиб, мен сенга эврилдим, дўстим.

Сени “ўзлаштириш” кийин эмасди. Ахир дўс-

тим эдинг, ҳаммадан кўра сени кўпроқ мен билардим. Ўз ролимга шунчалик киришиб кетдимки, оқибатда ўзимдан, ўзлигимдан айрилдим...

Аммо шундан кейин ҳаётим нурга йўғрилди.

Фақат қўрқинчи хавотир юрагимни ахён-ахёнда тирнаб қўярди. Умр бўйи У фақат менгагина насиб этишини, фақат менинг хоҳиш-иродамга бўйсунишини, бўса учун яралган лаблари эҳтиросли бўсаларга кўмиб ташлашини истаб яшагандим, мана орзуим амалга ошди, аммо ўзим... оҳанрабо ўзига тортган нинадай бўшлиқ қаърида осилиб қолдим... Майли, ҳар не бўлганда ҳам, энди унинг хотираси ўзига қайтмасин! Жилла курса менинг куним битгунча...

Ихлос билан тилаган эканманми, сўнгги тилағим ҳам амалга ошди. Мен Бехруз бўлиб қабрга кирдим...

Сен эса иккинчи марта ўлдинг.

Эҳтимол бир қабрга тушганимизнинг сабаби ҳам шудир?.. Ахир биз бир одаммиз!

“МОМО ҲАВО”

Ёмғир уч кундан буён тинимсиз шивалаб ёғарди. Асфалти күчиб, ўнқир-чүнқир тупроқ йўлга айланган йўлак билч-билч лой, йўлак четидаги бетон ариқалар лойқа сувга тўлган, оловранг япроқлар оёқ остида эзилиб, лойга қоришиб кетган, оқибатда йўл сирпанчик бўлиб қолганди.

Акбар кўк бозор ёнидаги, пештоқига катта-катта ҳарфлар билан “Бар” деб ёзиб қўйилган, винога қоришиқ ёқимсиз ҳид анқиб турадиган кўримсиз, пастқам бинодан чиққанда вақт чошгоҳдан ўтганди. У маст эди. Маст бўлса-да, уч кундан буён ёмғир ёғаётганлиги, йўл сирпанчик бўлиб қолганлиги унинг ёдида, шу боиски бир-бир босиб пастқам бинодан узоқлаша бошлади. Йиқилиб тушмаслик учун эҳтиёт бўлиб юряпман, деб ўйларди у ўзича. Аслида эса гандираклаганча йўлнинг гоҳ у томонига, гоҳ бу томонига бориб келаркан, мункиб-мункиб кетарди. У ҳозиргина қаҳвахонадан чиққан бўлса-да, энгил-боши жиққа хўл, соchlари ивиб бошига ёпишган, тумшуғи очилиб қолган туфлисидан муздек сув сизиб кирган, бунинг натижасида оёқлари сира исимаётган эди. Бинобарин, у одатдагидек анча вақт ахлатхоналарни титкилаган, шиша идишлар, баклаш-калар қидириб топиб, уларни керакли жойга топшириб, эвазига арзимаган пул олиб, сотувчиilar алдашмадимикин деган хаёлда эски, тити-

либ кеттган майда пулларни қайта-қайта санаб, чүнтағига солгунча шу күйга тушганди.

Акбар бир амаллаб катта йўлни кесиб ўтиб йўлакка чиқиб олди. Икки четини яшил девор тўсган йўлак ўнқир-чўнқир бўлса-да, ҳар қалай хавфсиз, бу ердан машиналар юрмайди ҳисоб. Лекин барибир эҳтиёт бўлиш керак, ер лой, билчиллаб ётибди. Яна юз қадамча юрса уйига етиб олади. Бир амаллаб иккинчи қаватга кўтарилиб, кулфи яхши ишламайдиган эшигини очиб ичкарига кириб олса бас, у ёғи бир гап бўлар. Йигит яшил деворни пайпаслаганча кетиб бораркан... бехосдан қўрққан нарсаси юз берди, у йиқилиб тушди! Ўрнидан турмоқчи бўлиб бир-икки интилди, аммо гавдасини ердан узиб ололмади. Қолаверса, муздай ер мисдай қизиётган вужудига хуш ёқди ва у ғужанак бўлиб олди-ю, пишиллаб ухлаб қолди.

Уйига етишига эллик қадамча қолганди.

Ёмғир ҳамон шивалаб ёғарди.

Орадан қанча вақт ўтди, номаълум, ҳали уйқуга ғарқ бўлиб ётган маҳал эди. Аллақандай майнин овоз қулогига чалингандай бўлди. Лекин йигит эътибор бермади, ғудранди, ғудраниш асносида оғзидан сўлак оққанини ҳис этиб, артиб ташламоқчи бўлганди, бармоқларига илашган лой юзига суркалди. Аллаким қўнғироқдек овозда кулиб юборди шу вақт. Юз-кўзига чакиллаб урилаётган ёмғир томчилари ҳам бирдан томчиламай кўйди.

Акбар кўзини очди. Дастрлаб ихчам, ялтироқ туфлига кўзи тушди. Қовоқлари аста-секин кўтарилигани сайин шуури ҳам тиниклаша борди ва кутилмаганда иргиб ўрнидан тур... Йўқ, хаёлида шундай ўйлаган экан, аслида базур ўрнидан кўзғалди.

Калта қора плаши ўзига ярашган, кўхлик жувон қўлини хиёл олдинга узатганча соябонини тутиб уни ёмғирдан тўсиб турарди.

– Келинг, ёрдамлашаман... – жувон қўлини узатди.

– Раҳмат, ўзим...

Боши лўқиллаб оғриётган Акбар ўрнидан турди. Аммо шу заҳоти яна ўтириб қолди. Вужудини иситма қиздираётган, кўнгли озаётган эди.

– Тобингиз қочиб қолган шекилли, қўлингизни беринг, нега тортинасиз, одам одамга ёрдам берса нима қипти? – Жувоннинг сўзлари ҳам, кўз қарашлари ҳам самимий эди.

Аммо барибир Акбар қўлини узата олмади. Ботинолмади, истиҳола қилди, чунки қўллари лой эди. Бор кучини тўплаб ўрнидан турди. Гандираклаб кетди. Жувон уни ушлаб қолмагандан яна ийқилиб тушарди.

– Уйингиз шу томондами?

Жувон эллик қадам нарида қўққайиб турган тўққиз қаватли уйга ишора қилди.

Акбар бош ирғади.

Жувон уни қўлтиқлаб олди. Соябонини юқори кўтарди.

Акбарнинг кайфи тарқаган, аммо бир оз шамоллаган шекилли, иситма исканжага олган, боши тарс ёрилиб кетай дерди. Сал чайқалгудек бўлса борми, боши лўқиллаб кетганидан, қадам ташлашга мажоли етмай қоларди.

– Касал аҳволда кўчага чиқиб бўлмайди, – деди жувон уйга яқинлашиб қолганларида. – Менимча, сиз тумовдан олган бўлсангиз керак. Ҳозирги тумов шунаقا экан, бош айланиб, иситма тутаркан.

Акбар енгил тортди. Жувон ҳар қалай ичганини пайқамабди. Индамаслик ноқулай...

— Кечадан буён мазам қочиб турувди, — деди у ниҳоят ўзини дадил тутиб. — Лекин иш деган нарса бор. Уйдан чиқмасликнинг иложи йўқ.

— Тўғри, аслида шу, ҳаммамиз ҳам иш-иш деб ўлиб кетамиз.

— Яхшиям сиз келиб қолдингиз, акс ҳолда ҳозир...

— Нафасингизни иссиқ қилинг.

Подъезд эшиги олдида жувон таққа тўхтади.

— Бу ёғига ўзингиз кета оласизми? — Жувон гапириш асносида соябонини силкитди, билур томчилар сачради ҳар томонга.

— Бошим ҳалиям айланяпти, — деди Акбар. — Иситмам ҳам тушмабди. Уйда дори-пори бормиди, билмадим. Кейин қанақа дори ичишниям билмайман.

Жувон қулимсираб қаради унга.

— Ҳеч ҳам касал бўлмаганмисиз? — деб сўради кейин.

— Кўп касал бўлганман, лекин у вақтларда ойим бор эдилар. Ойим қаардилар. Энди ойим йўқ.

Жувон бошқа савол бермади. Ён-верига қараб қўйди-да:

— Кеч тушиб қопти. Ҳа, майли, юринг, сумкамда у-бу дори бориди. Шуларни сизга ичириб кейин кетаман, — деди.

Уйга киришди. Ётоқхонадаги бир кишилик каравот ва ошхонадаги юмалоқ столу атрофида тизилишган тўртта табуреткадан бошқа ҳеч вақо кўзга ташланмасди. Дарвоқе, деворлардаги гулқоғозларнинг янгилиги ва тозалигини айтмагандан... Уйнинг шип-шийдонлиги жувонни ҳайрон қолдирмади, умуман у ҳеч нарсага эътибор бергани йўқ.

— Сиз кийимларингизни алмаштиринг, мен чой дамлаб келаман, — деди жувон, сўнг ошхона томонга кетди.

Акбар каравот остидан эски чемоданни тортиб чиқарди. Чемодан унга шифонер вазифасини ўтарди. Кийимлар кўп эди, лекин ҳаммаси ҳам эски-туски, алмисоқдан қолганди.

— Мана чой, мана ширингина дори, бир мазза қиладиган бўлдингиз, — дея жувон кириб келганда Акбар апил-тапил кийимларини алиштиришга улгурган, аммо хўл кийимларни нима қилишни билмагандек қўлида тутганча қимир этмай турарди. Гўё уй эгаси жувон-у, ўзи кутилмаганда келиб қолиб ўзини нокулай сезаётган меҳмон.

— Кийимларингизни менга беринг, — жувон кўлинни узатди. Пуштиранг кафти силлиқ ва чиройли эди.

— Йўқ, ўзим... эртага...

— Мен ҳалиям кийимларингизни ювмоқчи эмасман, — деди жувон. — Лекин бошқа вақт бўлганда эҳтимол ювиб ҳам қўярдим. Аммо ҳозир кетмасам бўлмайди.

Акбар жувондан кўз узмай турганча дорини ичди. Жувон яна битта дорини кафтига қўйди.

— Боягиси иситма туширадиган, буниси шамоллашга қарши дори, — изоҳ берди жувон.

Акбар шундай ахволда эдики, жувон шифобахш дори эмас, заҳар тутган тақдирда ҳам индамай ичиб юборарди.

— Энди иссиқроқ ўраниб бир-икки соат ётинг. Мен кетаман. Яхши қолинг. Тезроқ соғайиб кетинг.

Жувон эшик томон юрди.

Акбар эса аёл томон интилди. Жувон буни сезмади. У аллақачон кўча эшик ёнидаги илгакдан плашини олаётган эди. Акбар унга ёрдамлашмоқчи эди, аммо улгура олмади. Жувон кийи-

ниб бўлиб эшикни очди. Яна бир оз, бир дақиқа кечикса жувон эшикни ёпади-ю, зиналардан шувиллаганча пастга тушиб кетади.

– Шошманг, – деб юборди Акбар беихтиёр.

– Мазангиз қочяптими?.. – Жувон илкис ўгирildи.

– Йўқ, ха, э, нимайди, анави, телефон номеринги зни айта олмайсизми? Мабодо кечаси яна тобим қочса...

Жувон жилмайиб туриб телефон номерини айтди.

– Фақат тобингиз қочса телефон қилинг-а, – деди кейин.

– Албатта, албатта.

Жувон энди шараклаб кулиб юборди. Анчадан буён аёл кулгусини эшитмаган деворлар зириллаб кетди.

– Нима учун “албатта” деяпсиз? Албатта тобим қочади, демоқчимисиз?

– Унақа эмас... Лекин қайдам... Аммо умид қиласманки... Эҳтимол...

– Хўп, яхши қолинг. Эшикка яқин келманг, совуқ тегади. Эшикни ўзим ёпаман.

Жувон кетди.

Ҳаммаси кейин юз берди. Акбар чексиз ҳайрат ичидаги қолди. “Шундай сулув жувон менга марҳамат кўрсатди, уйимга олиб келиб кўйди, дори ичирди... Унинг ўрнида бошқа аёл бўлганда балчиққа беланиб ётган чўчқага қарагандай қарарди. У эса мендан умуман жирканмади. Ё раббим, ким эди у?.. Момо Ҳавоми ё Биби Фотима!..”

Акбар беихтиёр иягини силаркан, ўсиқ соқоли кафтига тикандек ботди. Даҳшатга тушди. Ваннага югуриб кириб ўзини ойнага солди: “Уст-бошимку, майли, ёмғир, касаллигим, йиқилиб тушганим

баҳона бўлар, аммо эрталаб соқолни қиртишлаб олсам бўларкан. У бир неча марта юзимга син-чиклаб қаради, лекин шундай иркит башарадан бирор мартаям ирганмади-я...”

Акбарнинг бош оғриғи, шамоллаши, ичгани, ҳамма-ҳаммаси эсидан чиққан эди. У ювинди. Ўтмас олмос билан соқол-мўйловини қиртишлади. Ёнофини, ияги остини бир неча марта кесиб олиб, қонатди. Сўнг каравотга чўзилди. Ухлашга ҳаракат қилди, лекин ухломади. Қовоқлари қотиб қолгандек сира ёпилмасди. Бирдан уйнинг шипшийдонлиги, аёл кишининг эътиборини жалб қиласидиган жозибали нарсаси йўқлигини эслаб қолди. Онасидан қолган эски қақур-қуқурларни сотиб юборганидан афсусланди: “Арзимаган пулга сотгандим. Эссиз, тураверса бўларкан...”

Йигит шу оқшом мижжа қоқмади ҳисоб. Ахён-ахёнда кўзи илиниб кетгандек бўлар, лекин шу заҳоти чўчиб, сесканиб уйғонар, хали ювинмасдан туриб кўнглига туккан “тугун” эсига тушиб, ороми бузиларди, уйқуси қочарди. У жувонга телефон қилишни ўйлаганди. Бироқ истак қанчалик кучли бўлмасин, уни амалга оширишнинг иложи йўқ эди. Ўтган йили ойлик абонент пуллари тўланмаганлиги туфайли телефони ўчириб қўйилган, кераксиз матоҳга айланган аппаратни эса у сотиб юборганди. Яна афсус-надомат юрагини ўртади.

Тонга яқин кўзи илинди.

Уч соатлик уйқудан уйғонгач у сал бошқачароқ ўйлай бошлади. “У оқкўнгил аёл. Йиқилиб ётган бир бенавога ёрдам берди, холос. Шунинг учун ҳам мендан ирганмади. Шунинг учун ҳам у бегона эркак сифатида мендан чўчимади. У шунчаки, илтифот кўрсатди, холос. Йиқилиб ётган одамнинг ёнидан бефарқ ўтиб кета олмади. Хойнаҳой, у

мени ўша захотиёқ эсидан чиқариб юборгандир.
Мен бўлсам... Эҳ!..”

Йигит маҳзун тортиб қолди. Анча вактгача шу кайфият таъсиридан чиқа олмади. Қорни очганини ҳис этарди-ю, аммо иштаҳаси йўқ эди. Томоғи қуриб, чанқоқ хуруж қила бошлади. Шунда ҳам ўрнидан турмади. Лекин чанқоқقا кўп дош бера олмади. Ноилож ўрнидан туриб ошхонага ўтди. Човгумни сувга тўлдиаркан, ўзича сўзланди: “Яхшиям газ плитасини сотиб юбормаган эканман!”

Бир чойнак кўк чойни ичиб олгач яна ётоқхонага кирди, каравотга чўзилди. Бирор соат ўтиб у кўнгли озаётганини ҳис қилди. Бу очликдан эди. Ошқозонни алдаш учун ўрнидан туриб у-бу топса бўларди. Лекин у бунга ҳаракат қилмади. Ичмаса тамадди қилолмасди, бир ютум лукма ҳам томоғидан ўтмасди. Уйда эса бир қултум ҳам ичимлик қолмаган, олиш учун пули соб бўлган, кеча ҳеч илож топилмаганидан ахлатхоналарни титкилашга мажбур бўлганди. Бугун ахлатхонага боролмайди. Анави аёл учраб қолса нима бўлади?

Бироқ кўп ўтмасдан ор-номус устидан истак ғолиб келди. У ичмаса бўлмаслигини, жилла қурса юз грамм ютмаса ўзига кела олмаслигини ҳис этди. Балкондаги кераксиз, сотишга арзимайдиган ашқол-дашқолларни титкилаб беш-олтига банка топиб олди. Чанг босган экан, апил-тапил қуруқ латта билан артиб тозалади. Кейин уларни йўлак эшиги олдига келтириб қўйди-да, ўзи рўпарадаги қўшнининг қўнғирогини босди. Йигирма олтиларга борган, сариқдан келган жувон эшикни очди.

– Соседка, ортиқча банкаларим бор эди, оласизми? – деди у жувонга мўлтираб қааркан. Жувоннинг жиддийлиги уни ташвишлантириди. Уларнинг ўзаро олди-бердилари бор эди. Жувон арzon-

гаровга унинг кўпгина нарсаларини сотиб олиб қўйганди. Аммо бу сафар...

– Банка етарли менда. Дазмол йўқми мабодо?

– Дазмол? Дазмол ҳам бўлиши керак, – деди Акбар шоша-пиша. – Қидириб кўраман ҳали. Лекин ҳозир вақтим зик. Пича пул керак бўлиб қолди. Ростини айтсам... бугун ойимнинг туғилган куни эди. Қабристонга бориб гул қўйиб келсанм девдим.

– Банкаларингиз қани?

– Ҳозир.

Жувон ҳисоб-китобдан ортиқчароқ пул берган экан. Кўчага чиққандан кейин билди. Хурсанд бўлиб кетди. Таниш пивохона олдига учеб келди ўзиям. Ҳозир... Мана ҳозир... Ўша зормандани бир сипқоришда ютади-ю, дунёга қайта келгандек бўлади. Остона ҳат... Йўқ, остона ҳатлаб ичкарига кира олмади, кимдир чақиргандек бўлиб ортига ўтирилди. Икки қадам нарида кечаги соҳибжамол жилмайиб туради!

Шиша ичидан кўз сузаётган “малак” доғда қолди. Акбар ҳеч иккиланмасдан пивохонадан юз ўтириб, жувон томон юрди. Кечга бориб шу ҳолатини қайта-қайта эсларкан, ўзидан мамнун бўлди: “Демак, ҳали жуда ҳам тубан кетмабман!”

– Салом.

– Яхшимисиз? Яхши бўлиб қолдингизми?

– Тузук... Ишдан келяпсизми ё энди боряпсизми?

– Бугун кечки сменадаман.

– Айтганча, исмингизни сўрамаган эканман кеча, кейин жуда афсусландим. Агар ҳозироқ айтмасангиз бугун оқшомги уйқу ҳам ҳаром бўлади.

– Ҳай-ҳай, шаштингиздан тушинг. Исмим оддийгина. Нафосат.

– Нафосат?! Жуда топиб қўйишган экан. Исмийсига монанд аёлни биринчи марта кўриб туришим.

– Ҳар қалай яхши бўлиб қолибсиз, шунисига шукр. Хўп, мен борай...

– Дарров-а?

– Вой, бу нима деганингиз?

– Энди топдим деганимда... Биласизми, нима, мен ҳали жудаям соғайганим йўқ. Аптекага дори олиш учун келаётгандим. Паришонхотирлигим курсин, пивохонага бурилиб кетибман. Агар сиз чақириб қолмаганингизда бармендан дори сўраб, тоза шарманда бўлардим-да.

– Вой, айёр-ей, бу билан нима демоқчисиз?

– Бир оз айланайлик, илтимос. Ишингиз кечки сменада экан-ку... – Акбар аёлга илтижоли бокди, илтимосимни рад этсанг, ўламан, дегандек.

– Ие, ҳали исмингизни ҳам билмайман-ку.

– Кейин айтаман. Қолаверса, мен сизга миннатдорчилик билдиришим керак. Агар сиз бўлмаганингизда...

– Яна шу гап.

– Қайси гап? – Бирдан ҳушёр тортди Акбар. Чув тушириб қўйдимми, дегандек.

– Кечадан бўён “Агар сиз бўлмаганингизда...” деган гапни юз марта такрорладингиз.

– Яна такрорлайман, керак бўлса минг, миллион марта такрорлайман.

Жувон бир муддат ўйланиб турди-да, сўнг:

– Хўп, бир оз айлана қолайлик, – деди. – Сиз тутган еридан кесадиган эркаклардан экансиз, – деб қўшиб қўйди яна.

Акбар жўшиб кетганидан жувонни ўпиб олишига бир баҳя қолди. Шу вақтгача ҳеч ким уни бунчалик мақтамаган эди.

Улар йўлак бўйлаб аста юриб кетдилар. Акбар хаёлан бирорта дўкон ё бирорта ошхона бўлмаган кимсасиз кўчани қидиради. Афсуски, ҳозирги замонда бундай кўчани топиш амри маҳол. Ахийри уйи яқинидаги мактаб ҳовлисини ўйлаб топди. Тушдан кейин у ерда ҳеч ким бўлмайди. Хушманзара, сердаҳарт, сокин жой. Ўтириш учун стадиондан ўриндиқ ҳам топиш мумкин. “Лекин эртага қаердан бўлсаям пул топиб уни тузукроқ жойга овқатланишга таклиф этаман. Бугунни бир амаллаб ўтказиб олсан бўлди эди”, – хаёлидан ўтказди музтар бўлган йигит.

* * *

Эртаси куни у пул топди. Бир вақтлар жонажон ўртоғи бўлган, аммо кейинчалик юз ўгирган, айни кунларда дуч келиб қолса-да, кўрмасликка олиб ўтиб кетадиган бир ўртоғидан не-не қасаму ваъдалар эвазига қарз олди. Ва ўзи ният қилгандай Нафосатни “тузукроқ жой”га овқатланишга таклиф этди. Ушбу “кечлик” устида у Нафосат ҳақида батафсил маълумотга эга бўлди. Жувон фабрикада ишларкан. Анча йил олдин ўқиш истагида шаҳарга келиб қолган экан. Қанча ўқиб, тайёрланса ҳам институтга кира олмабди. Тириклий учун фабрикага ишга кирибди. Шу ерда у бир ярамас йигитнинг тузогига илиниб қолибди. “Уйланаман” деб икки йил алдаб юриб, охирида қочиб қолибди. Ана ўшандан буён...

– Ана ўшандан буён эркак зотига ишонмай қўйганман, – деди Нафосат охирида.

Акбарнинг бирдан нафаси ичига тушиб кетди. Йўлига, иштаҳани очиш учун олинган икки қадаҳдан кейин қизиб ўтирган эди. Устидан совук

сув қуиб юборилгандек бўлди. У бугун Нафосатни уйига таклиф этмоқчи, аёлсиз ўтказган кунларининг хиссасини чиқармокчи эди. Махзун тортиб қолди. Ҳатто ўрнидан туриб кетиб қолгиси келди. Назарида, жувон шунчаки вақтини ўтказиш учун, янада аникроғи, миннатдорчилигини қабул қилиш учун келгандай туюла бошлади.

– Балки мен янгишгандирман, – деди Нафосат гапини давом эттириб. – Дунёда яхши одамлар кўпдир. Мен уларни кўрмаётгандирман, ўз дардим билан овора бўлиб.

– Нафосат, – деди Акбар дангалига кўчиб. – Агар мен яхши одам бўлсан, турмушга чиқармидингиз?

– Ўйлаб кўриш керак. Кейин... Сиз жудаям ғалати экансиз. Кеча таниша солиб бугун қўлимни сўраяпсиз!

– Тўгри, кеча танишдик. Лекин мен сизни аввал ҳам кўргандайман.

– Ётоқхонамиз бу ердан анча олисда, қаерда кўрган бўлишингиз мумкин? Менимча, сизга шундай туюляпти.

– Йўқ, йўқ, мен кечадан буён ўйлаб юрибман, сизни қаердадир кўргандайман.

Нафосат бир муддат ер чизиб ўтириди-да, сўнг илкис бошини кўтарди.

– Эсладим, – деди у ҳаяжон билан. – Эсладим. Сиз ҳақсиз. Мени кўрганингиз рост.

– Ана айтмадимми, паришонхотирлигим бор-у, лекин жа унчаликмас.

– Бир марта сизнинг орtingиздан келганман уйингизгача. Ўшанда ҳам мазангиз йўқмиди, жуда ёмон аҳволда эдингиз. Тўғриси, раҳмим келди ўшанда. Йўлда йиқилиб-нетиб юрмасин, деган хаёлда...

— Мана кўрдингизми, биз аллазамонлардан бўён танишмиз-у, сиз бўлсангиз дарров қўлимни сўраяпсиз, деб домангир бўляпсиз. Хўш, рози бўлармидингиз?

— Раҳм қилинг, бир оз ўйлаб олай, — дея кулди жувон.

Бу гап, айниқса гап оҳангি Акбарни анча юксакка чиқариб қўйди. У жувоннинг, шундай соҳибжамолнинг хўжасидек ҳис эта бошлади ўзини.

— Бир ҳафта етадими?

— Вуй... намунча?..

— Кўпми? Майли, талабларга биноан муддатни қисқартирамиз. Икки кун...

— Э, боринг-е... — Нафосат кафтлари билан қизариб кетган юзини тўсди.

Акбарнинг завқи келди. У яна гапиргиси, аёлни уялтиргиси келди. Аммо уни хафа қилиб қўйишидан чўчили. Истар-истамай гапни бошқа ёқقا буриб юборди.

Кафедан чиққанларида вақт алламаҳал бўлиб қолганди. У аёлни қучоқлаб олди. Нафосат кутмаган шекилли, чўчиб тушди, силтанди.

— Ие, қизиқмисиз... қўйворинг.

— Энди ҳар доим мана шундай юрамиз. Энди ҳеч қачон сизни қўйвормайман, — деди Акбар, кейин бирдан шивирлашга ўтди: — Бугун меникида қоласиз-а, ҳа, денг, хўп, денг!..

— Қололмайман... Вой...

Акбар уни қаттиқроқ бағрига босди.

— Хўп, демагунингизча, қўйвормайман!

— Жонимни оғритдингиз...

— Бу кам!

— Сиз... бошқачасиз... — Жувон унинг кўксига бош қўяркан, шундай деб пичирлади...

Улар таниш уй олдига келиб қолганларини пайқашмади. Бу Акбарнинг уйи эди. Уй олдидағи улкан дараҳт остида бир пас туриб қолишиди. Кейин... Кейин Акбар жувонни даст күтариб олди.

Вақт эшик ортида қолди.

* * *

Акбар ухлаётган соҳибжамолнинг ҳуснига тўйиб-тўйиб тикилмоқчи эди, афсус, у уйғоқ экан.

– Биласанми, бирдан миямга ғалати фикр келди, – деди у Нафосатга.

– Нега энди “ғалати” фикр?..

– Ўзинг мени ғалати одамсиз, дейсан-ку.

– Бошқачасиз, дейман, – Нафосат унинг юзини силади.

Акбар унинг кафтини ўпди.

– Ғалати билан бошқачанинг нима фарқи бор?

– Фарқи бор.

– Ҳа, майли, умуман олганда, ғалати-да, хуллас, шу ғалати одам бугун ўзидан-да ғалати фикрга келди. Яъни...

– Яъни?.. – Нафосат унга синовчан тикилди.

Акбар тараддулданиб бир пас жим қолди.

– Ҳа, майли, бошқа пайт... – овози ўзгарди Акбарнинг, ўрнидан турмоқчи бўлди, аммо турмади, бир қўзғалиб қўйди, холос. – Йўқ, – деди у бирдан ўзига-ўзи гапиргандек бўлиб. – Йўқ, бошқа вақт эмас, ҳозир, ҳозир айтаман, – Кейин у яна жим қолиб, чуқур нафас олди-да, давом этди: – Мен... Мен ўша куни касал эмасдим. Мен ичгандим. Мен ичкиликбозман. Мен пиёнистаман!..

Акбар ўзига тарсаки тушадигандек бирдан юзини кафтлари билан тўсиб олди. Мана ҳозир... ҳозир... Бирдан момоқалдироқ гулдирайди-ю,

ҳаммаси, ҳаммаси тамом бўлади. Алвидо, мұхаббат! Алвидо, соҳибжамол! Ал...

– Билгандим... – шикаста, паст овозда айтилган бу сўз Акбарнинг қулоғига чинни пиёла жарангидек ёқимли эшитилди. Аммо у қулоқларига ишонмади. Қулоқларим мени алдаяпти, деб ўйлади. Юзини тўсган кафтларини туширишга ҳам уринмади. Ожизлик қилди.

– Лекин... Нима учун... Мен ҳайронман... Ичган одам одам эмасми?! – Бу гап фавқулодда айтилган сўздан ҳам кучлироқ таъсир қилди Акбарга. У кафтларини туширганда... Юзи шу қадар оқариб кетгандики... Нафосат қўрқиб кетди. Сапчиб ўрнидан турди.

– Мен ҳозир, чой опкеламан!..

Бир зумдан сўнг Акбар ўзига келгандек бўлди, юзига қизиллик югорди. Аммо сўzlари узук-юлук эди.

– Мен ичаман... Мен бетайин одамман... – дерди у нафаси қайтгудек бўлиб. – Лекин... Биласанми... Мен... нима десам экан... Ҳалиги... ҳа, топдим, мен ваъда бераман. Энди... ҳеч қачон, ҳеч қачон бундай бўлмайди... Энди...

Нафосат унинг лабига бармоғини босди.

– Кейин, кейин гапирасиз. Ҳозир шарт эмас... – Жувоннинг нозик бармоқлари унинг соchlари орасида, бўйнида, юзи-ю қулоқлари атрофида кезинди. Кейин шундай ҳол юз бердики, йигитнинг назарида борлиқ оламдан ўтди. Уларнинг рухлари эса аллақачон арши-аълога учиб кетганди...

– Одамлар ҳаммаси тақдирдан, пешонага ёзилганидан дейди, лекин мен бунга ишонмайман, – дея ҳикоя қила бошлади Акбар қай бир куннинг қай бир соатида. – Мактабда математикадан аълого ўқирдим. Сендан кучли математик чиқади,

дайишарди устозларим. Шуларнинг гапига ишониб математика факультетига ўқишига кирдим. Бир амаллаб кирдим-да. У ёғини сўрама. Лекин шу ерда билдим, алданганимни. Менинг арифметика бўйича билганларим ҳеч нарсага арзимас экан. Қийналиб кетдим. Ортга қайтишга йўл йўқ. Тиришиб-тирмашиб ўқидим. Ниманидир тушунгандай бўлдим. Шу тушунган нарсамга ишониб мен аҳмоқ аспирантурага ҳужжат топширдим. Аспирантура менинг жиндайгина тушунчамни назар-писанд қилмади. Яна тиришиб-тирмашиб ҳаракат қилдим. Ўқидим. Бир нарсаларни қораладим. Йиртдим ҳаммасини. Кейин яна ўқидим, яна қораладим, йиртдим... Аспирантурани битиргандан кейинги етти йиллик умримни бағишлаган ишимни ҳурматли устозим бир кунда йўққа чиқарди! Шу қуни йўлда келяпман, фақат ичим куяди, куяди, куяди. Чанқаб кетдим, дейман ўзимга-ўзим. Лекин биламан, бу чанқов эмас. Бирдан пивохонага кўзим тушиб қолди. Яхши бўлди, чанқовbosди қиламан, деган хаёlda пивохонага кирдим. Ичдим. Бурнимдан чиққунча ичдим. Лекин чанқовим босилмади. Билардим, бу чанқовим анча-мунчага босилмаслигини. Шундай бўлса-да, пиво билан чанқовbosди қилиб юрдим. Қўлим ишга бормай қолганди. Домламнинг олдига қайтиб бормадим. “Аспирантурада қолсанг, сендан зўр кандидат чиқараман”, деган шу домлам эди-да. Мен жиндек билимимга ва домламга ишонгандим. Тақдирнинг алдови эмасми бу? Бошқалар яхши баҳо олиш учун икки юз кўкидан беришаркан. Мен эса нақ беш юз олиб бориб бердим. Ўша беш юзни топгунча тилим осилиб қолганди ўзиям. Лекин начора, домланинг ўзи тилга келиб нархини айтиб тургандан кейин...

Барибир, ҳеч ёруғлик чиқмади. Нафсиlamрини айтганда, ўша беш юзга яна озгина қўшиб тайёр “иш”ни сотиб олсан бўларди. Бирор кун эсига тушиб қолсан домламнинг ўзи чақириб қолар, деган ўйда юравердим.

Лекин домламдан хабар кела қолмади. Мен нима биландир банд бўлишга, нима биландир шуғулланишга ўрганиб қолгандим. Энди эса бекорчилигу аламдан ўзимни қўярга жой тополмасдим. Коллеждаги ўқитувчилигим ҳам кўзимга бало-қазодай кўрина бошлади. Ана шунда ичишга, ростакамига ичишга ружу қўйдим. Ишдан ҳайдалдим. Аспирантурани битирган йилим уйлангандим, хотиним анча йил туғмай юриб-юриб, қип-қизил ароқхўрга айланганимдан кейин бир қизча туғди. Исмини онам қўйди, Яхшигул деб. Қизим тўрт ёш бўлганида ҳам юрмасди, бунинг устига, ақли заиф экан. Хотиним билан муросамиз келмай қолди. У кетиб қолди. Онам икковимиз шўппайиб қолавердик. Ичкиликка баттар ружу қўйдим. Энди ҳаммасини унутиш учун ичардим. Лекин унутиб бўладими? Мен омадсиз, баҳтиқаро одам эканман, деган фикр миямга ўрнашиб қолганди. Ҳеч нарсани унута олмадим. Ичгандан кейин маълум бир вақт ўзимни сархуш сезардим, қайғу-аламлар ўткинчидай туюларди. Лекин кейин жуда азобда қолардим. Охирги кунларда шу даражага етдимки, фақат, фақат ақлдан озиш учун ичардим. Бўкиб қолгунча ичардим, йиқилардим-суринардим, кимлардандир туртки ердим, аммо барибир уйимни топиб келардим. Уйга келишим, онамнинг кўзига кўринишим шарт эди. Бечора ойим... “Менинг шу ароқхўр боламни ўзинг паноҳингда сақла”, деб Худога илтижо қиласарди. Кўп ўтмасдан хотиним Гулшода уйга даъво қила бошлади. Уйнинг бир қисмида унинг ҳаққи бор

эмиси. Бола туфайли эмиш. Қани ўша бола?.. Уни аллақачон етимхонага топшириб юборган! Аввал ўша болани опкеласан, кейин уйнинг бир қисмига эгалик қиласан, дедим. Уй ойимнинг номида эди. Барибир қўлидан ҳеч нарса келмасди...

Акбар жимиб қолди.

– Ҳа, кўп қийналган... қийинчилик кўрган одам экансиз, – деди Нафосат ўйчанлик билан. Сўнг ҳайратлангандек қўзларини катта-катта очиб деди: – Сиз илм кишиси экансиз-а! Мен бўлсам... Мен илмли кишиларни жудаям ҳурмат қиламан.

– Имкон берсанг, кута олсанг мен албатта яна аввалги ҳолатимга қайтаман. Ишонаманки, қайта оламан. Бу жуда эҳтимолдан узоқ, эришиб бўлмайдиган нарса эмас. Мен ичмаса қўли қалтирайдиган, кўзи яхши кўрмай қоладиган бир аҳволда эмасман. Сен ишонсанг бас!

– Ишонаман, албатта ишонаман.

Акбар жувоннинг қўлини ўпди.

Анча вақт жим қолдилар.

Акбар ҳаяжондан энтикарди. Қаршисидаги хилқат унинг кўзига битмас-туганмас шодлик, умид ва кўпдан-кўп муваффақиятлар тимсоли бўлиб кўринарди. Мана энди ҳаётда йўқотган нарсларини қайтариб олиш имкони ўз қўлида. Уни бой бергандан кўра ўлиб қўя қолган минг марта яхши...

* * *

Биргаликда яшай бошлишди.

Акбар уйдаги ичкиликни эслатувчи нарсаларни кўздан йўқотди. Ҳатто бирорта бўш шиша ҳам қолдирмади. Иш қидира бошлади. Лекин иш ҳадеганда топилавермади. Омади юришмаётган бўлса-да, сархуш юрган вақтларини эсламасликка, умуман ичкилик ҳакида ўйламасликка, у ҳакда

гапирмасликка ахд қилғанди. Бу қийин эди. Баъзи кунлари күчага чиқиши, иш қидириш тугул, ҳатто ўрнидан тура олмай қоларди. Хумор жазаваси бутун вужудини исканжага олиб, куч-қувватини сўриб оларди. Акбар гужанак бўлиб қоларди. Юзига қараб бўлмасди шу кезларда. Лекин шунда ҳам у чидарди, чидашга ҳаракат қиласди...

Нафосат эса аллақачон ўзини оиласи аёлдек тутиб ҳам иш, ҳам рўзғор юмушларини баҳоли қудрат тебрата бошлаганди. У Акбарга йўл-йўриқлар бермас, акл ўргатмас, ўз вазифаси билан андармон эди. Фақат бир марта у хавотирлангандек бўлиб:

– Гулшода жанжал қўтариб келиб қолмайдими? – деб сўраганди.

– Келса келаверсин, – деди Акбар бепарволик билан. – Энди ундан қўрқмайман. Мен умуман ундан қўрқмайман. Қолаверса, уй ойимнинг номида...

– Лекин ойингиз...

– Ҳа, тўғри, бу томонини ўйламаган эканман.

– Агар хўп десангиз, ўша қизчани уйга олиб келсак, – деди Нафосат. – У мени онаси ўрнида кўрадими-йўқми, ҳозирча бир нарса дея олмайман. Лекин қўлимдан келганча...

– Сен шусиз ҳам қўлингдан келганини, ҳатто ошириб қиляпсан. Қизим масаласида билмадим, буни ўзинг ҳал қил. Бу фақат сен туфайли ечиладиган муаммо.

– Менга боғлиқ бўлса, унда опкеламиш.

– Йўқ, шошма, яххиси, бундай қиламиш. Уйни сенинг номингга ўтказамиш. Кейин...

– Ие,вой, нималар деяпсиз?! Ахир... Ахир...

– Ахир-пахири йўқ. Мен тутган еридан кесадиган одамман, биласан-ку одатимни! Лекин аввал никоҳ ўқитамиш!

- Ҳай, ўзингиз биласиз.
- Кейин ота-онангни олдига ҳам бемалол борадим.
- Нафосат жавоб ўрнига ширин табассум ҳадя этди.
- Тўғри, уйим мақтангулик аҳволда эмас. Жуда кўп нарса керак ҳали. Лекин мен ҳаммасини муҳайё қиласман.
- Унчалик камтар бўлманг. Уч хонали уйингиз борлигининг ўзи бойлик-ку, – Нафосат шундай деди-ю, нимагадир ўрнидан туриб, ошхонага ўтиб кетди. Анча вақт ўша ерда ўралашиб юрди-да, кейин Акбарнинг олдига келди. Лекин энди уй ҳақида бир оғиз ҳам гап очмади.

Акбар айтганини қилди, аввал никоҳларини расмийлаштириди, сўнг уйни Нафосатнинг номига ўтказди. У аста-секин ўзига кела бошлаган, барча соғлом турмуш тарзи кечирадиган кишилар каби эрталаб нонушта қилар, тушликни ҳам ичкиликсиз ўтказар, фақат кечга бориб толиққандек бўлар ва шунда алланима эсига тушиб, безовталаниб қоларди. Шундай кезларда у қаерда бўлмасин, уйга етиб келар, кўнгли тусаган нарса билан қорнини тўйдирап, тўйдирганда ҳам унча-мунча эмас, ортиқча нарсага ўрин қолдирмайдиган қилиб тўйдирапди. Қорни тўйгандан кейин ичкиликка бўлган талаб сусаяр, уйқу элтиш асносида истак ҳам ўз-ўзидан йўқолиб-йитиб борарди.

Бир куни кечки пайт ана шундай “хуруж” тутиб қолди. Акбар истакни ўлдириш чорасини қўллаш ниятида музлатгични очди-ю... тахта бўлиб қолди. Шундоқ кўз ўнгига турли-туман егуликлар ўртасида қаҳрабодай товланаётган шиша турарди!

Акбар киприкларини пирпиратди, ютинди, шишага эътибор бермасдан (ҳар қалай ўзи шундай

ўйлади) ёнидаги егуликлардан ликопчага солди. Газга чой қўйганди, у шақирлаб қайнаб ётар, лекин Акбар буни пайқамасди. У аллақандай паришон бўлиб қолганди. Ликопчадаги егуликларга тикиларкан, уларнинг ўрнида қаҳрабодай товланаётган шиша кўзига кўринарди. Шиша ичидағи суюқлик аро Нафосатдан ҳам гўзал, ундан-да сулув бир нозанин ишва қилиб турарди.

Иштаҳаси ғиппа бўғилди. Сархил егуликлар томоғидан ўтмасди. Охири чидай олмади. Музлатгич олдига қандай етиб борганини сезмади. “Озгина олсам нима қиласди? Юз грамм ичаман-у, қолганини ойнадан улоқтираман!” Йўқ, қолганини ойнадан улоқтира олмади. Журъати етмади. Кўзи қиймади...

Эртаси эрталаб Нафосат сменадан келганида Акбар “бошогриқ” қилиб ўтиради. Аёлнинг қўлидан лиқ тўла сеткаси тушиб, мева-чевалар сочилиб кетди.

– Яна ича бошладингизми?

– Ўзинг музлатгичга қўйиб кетган экансан-ку, – деди Акбар пинак бузмай. – Мен сенга айтгандим, уйда менга ичкиликни эслатадиган стакан ҳам турмасин деб. Сен бўлсанг...

– Ахир эртага туғилган куним-ку, – деди Нафосат йиғламсираб. – Ишхонамдан қизлар келишмоқчи эди...

Акбар сўнгги қултумни юта олмади.

– Кечир, мени кечир, – деди у жувонга ёлворувчи нигоҳ ташларкан. – Энди бундай қилмайман.

Нафосат яқин келиб Акбарнинг бошини кўксига босди.

– Йўқ, сиз мени кечиринг...

Аммо ғишт қолипдан кўчган эди.

Акбар ишга кирган, қўлига тўрт-беш сўм пул тушиб қолганди. Бироқ у яна кечки пайтлар тез-тез пивохонанинг кўримсиз биноси олдида пайдо бўла бошлади...

Нафосат тунги сменадаги ишига бормай қўйди. У энди тушгача, гоҳида пешингача ишлаб, уйга қайтар, қайтаркан, йўл бўйидаги пивохонага кириб у ерда ичиб ўтирган Акбарни етаклаб келарди. У озиқ-овқат масаласида сарф-харажатни аямасди. Акбарнинг кўнгли тусаган нарса музлатгичда муҳайё эди. Аёл яна бир фидойиликка қўл урган: Акбарнинг ногирон қизчасини болалар уйидан олиб келиш ниятида юради. Бироқ... Нима учундир Акбар кейинги вақтларда оза бошлади. Юз-қўллари, умуман бадан териси ўзгариб сарғимтири тусга кирди. Кейинроқ бориб овқатдан кейин кўнгли озиб, ўхчийдиган бўлиб қолди. Кўп, жуда ҳам кўп сув ичарди. “Ичим куйиб кетяпти”, – дерди у жоникиб. Кечаси билан қайт қилиб чиқсан куннинг эртасига ишга ҳам бора олмади.

– Ичкилик сизга ёқмаяпти, энди шу зормандани ичмай қўя қолинг, – деди Нафосат.

– Ичмайман, энди ичмайман... – Акбар мажолисизликдан тинкаси қуриб кетаётган бўлса-да, жувоннинг қўлини олиб кўксига босди, жилмайди: – Яхшиям сен борсан...

– Уч-тўрт кун ишга борманг, дам олинг. Менам ишга бормайман. Ўзим парваришлайман, балки шу баҳонада ичкилик бутунлай эсингиздан чиқиб кетар.

Нафосат таниш дўхтирини чақиртирди.

– Ҳаммаси ичкилик оқибати, – деди чўққи соқолли, ёш дўхтири. Кейин бир парча қофозга бир дунё дориларни ёзиб берди. – Бир томчи ҳам ичкилики оғзингизга олманг. Мумкин эмас!

Нафосат дўхтири кузатгани чиқиб бир фурсат ушланиб қолди. Бу Акбарнинг нафсониятига тегди.

– Дўхтир билан анчадан буён танишмисан? – деб сўради у Нафосат қайтиб кирганида.

Нафосат бир зум жавобсиз қолди. Сўнг:

– У фабрикамизнинг амбулаториясида ишлайди, – деди. – Бир мени эмас, ҳамма ишчиларнинг таниши у.

– Ҳар қалай... уйга чақирсанг югуриб келадиган даражада эмасдир!

– Нимага бунча хафа бўляпсиз? – деб сўради Нафосат сал оғрингандек бўлиб. – Пулини тўласангиз бас, келаверади-да дўхтир зоти!

Акбар ўсал бўлди.

– Кечир, – деди бир оздан кейин.

– Ҳеч қиси йўқ. Сиз яхши бўлиб кетсангиз бас.

Нафосат ишга бормай қўйди. У Акбарнинг бошида парвона бўлар, аллақандай дорилар ичирап, кийимларини алмаштириб турар, инжиқликларига меҳрибонлик билан жавоб қайтарарди. У фақат ярим соатга Акбарни ёлғиз қолдираварди. Бу вақтда у нон ёки бошқа бирор зарурат туфайли кўчага чиқарди-ю, кўп ўтмасдан ҳарсиллаганча кириб келарди.

Акбар уни койигандек бўларди:

– Секин юрсанг ҳам бўларди-ку, намунча...

– Сиздан хавотирландим... – Жувоннинг гезарган чехраси, олазарак нигоҳлари мулойим табассумдан ёришиб кетарди. Шу топда унинг қарashi шунчалар мулойим, жилмайиши шу қадар беғубор, самимий ва меҳрли эдики, Акбарнинг кўкси ҳайратга тўларди.

– Қушқўнмас бир дарахтга кунларнинг бирида олтин патли тустовуқ келиб қўнди, дейишса ҳеч ким ишонмаса керак!..

Нафосат унинг оқарган юзини силайди. Яна шундай – беғубор самимият билан жилмаяди.

Чамаси икки ҳафта ўтиб Акбарнинг аҳволи оғирлаша бошлади. У озиб, куриган чўпдай бўлиб қолди. Эрининг қусифига жиндай-жиндай қон аралашиб тушаётганини кўрган Нафосат ўзини тутиб туролмади, Акбарнинг чекка томирлари бўртиб, териси қуруқшаб қолган, соchlari тўкила бошлаган бошини кўксига босганча ҳиқиллаб йиғлаб юборди.

– Касалхонага оборай десам кўнмассангиз... – деди у йифи аралаш. – Ахир бу аҳволда... охири нима бўлади?.. Мен кўрқиб кетяпман!..

– Нимага, нимадан кўрқасан? Вахима қилмасанг-чи, – деди Акбар унга жавобан. – Анави дўхтири айтди-ку, исми Давлатмиди, хавфли эмас деб. Ҳаммаси ичкиликнинг оқибати. Ўтиб кетади ҳадемай. Мана кўрасан!

Нафосат йифидан тўхтаб, бир неча сония тек қотди. Кейин Акбарнинг қорамтири доғ босган юзини кафтлари орасига олиб, кўзларига тикилди. Қаттиқ тикилди. Авваллари ҳеч ҳам бундай нигоҳ ташламасди.

– Мабодо... ўтиб кетмаса-чи? – деб сўради ғалати оҳантда.

Акбар бирдан жавоб бермади. Мажолсизлик билан бошини орқага ташлади. Нурсиз нигоҳларини шифтга қаратди. Сўнг:

– Бунинг кўрқинчли ери йўқ, – деди хотиржамлик билан. Ҳатто кулиб қўйди. – Юз йил баҳт нелигини билмай яшагандан кўра... Олтин патли тустовуқ қўниб турган вақтда қарсиллаб қулаган маъқул!..

– Топган гапингизни қаранг!..

Акбар аёлнинг кафтига лабини босди.

этак боласи бор эди. Самандар пишиқина экан, тез орада тамаки орқасидан бойиб кетди. Мана энди унча-мунча одамни писанд қилавермайди. Аммо Исоқ чол машина сўраб борганида ҳеч ўзини тарозига солиб ўтирмасдан дарров рози бўлди) шаҳарга зир қатнади. Алал-оқибат қиз томонни кўндириди ҳам.

Исоқ чол тўйнинг барча харажатларини баҳоли-қудрат ўзи кўтарди, бировнинг олдига қарз сўраб бормади. Аёллар орасида бўладиган олди-бердига ҳам хасислик қилиб ўтирмади. Бу саховатдан катта келин Норбуви ҳам анчагина фойдаланиб қолди: келинга деб олинган сарполардан иккисини кўрсатса, бирни сандигига ташлаб қўяверди.

Ишқилиб, чол ўғлига онасининг йўқлигини билдирамади ҳисоб. Тўй — ҳаётда бир марта бўладиган савдо. Исоқ чол дунёдан ўтиб кетганидан кейин фарзандларининг ўзидан домангир бўлиб юришини сира-сира истамасди...

* * *

Тўйдан кейин келиннинг ота-онаси тоғлик қуданинг қистови ва қизлари Маликанинг ялиниб ёлворишлари туфайли тўрт кунча меҳмон бўлиб қолишиди.

Кетар чоги она қизига тайинлади:

— Қизим, ўзинг рози бўлмаганингда бошимни уриб ёрсалар ҳам сени бу ерларга раво кўрмасдим. Такдир экан, илож қанча. Энди унгин-ўсгин, кам бўлмагин. Тош келса кемир, сув келса симир. Аммо уриш-жанжалингни кўтариб оstonамга қадамингни қўйма!

“Бу ерларнинг нимаси ёқмадийкин ойимга? — дея ҳайрон бўлиб ўйлади Малика ота-онасини кузатиб қўйгач. — Ахир бу ер курорт-ку!”

Чиндан-да, қишлоқ навниҳол келинчак мисоли сўлим эди. Чор тараф паст-баланд яшил адирлар, уларнинг бағрида кўкси қон лолақизғалдоқлар жилоланиб кишини ўзига тортарди. Адирлар ортида эса найзадор учи билан осмон бағрини тешиб юборгудек бўлиб турган қўнғир-кул ранг тоғлар ястаниб ётарди. Ҳаво эса шу қадар беғубор, тиниқки, чертсанг борлиқни тўлдириб жаранг бергудек...

Ховлилар қуюқ дарахтзорлар билан ўралган. Олисдан қаралганда, қишлоқ яшил парда оғушида кўринар, бу парда ортида қиз ўзи учун номаълум ўлка мавжудлигини туйса-да, асло чўчимасди. Устига устак, сершовқин шаҳар ҳаётидан кейин овулнинг тинчлиги, осойишталиги уни мафтун этганди.

Малика табиатан таъсирчан қиз эди. Қишлоқда майсаларнинг саррин шабадада майнин тебра нишидан тортиб тонг сахарда қушларнинг бирбирига гал бермай чаҳ-чаҳлашларигача, шафтоли гулининг гўзаллигидан тортиб тирикчилик ташвишида ғимирлаб юрган қурт-қумурсқаларнинг ҳаракатигача эътибор билан қарап, беҳад завқланар эди. Шундай пайлари у беихтиёр “Мен бахтиёрман!” деб шивирлар ва кўзлари порлаб кетарди.

Малика азбаройи жўшиб кетганидан шеър ёза бошлади. Қораламаларини сиёхи қуrimай туриб эрига ўқиб берарди. Бекпўлат шеърларни миқ этмай, нафасини ичига ютиб эшитар, аммо хотинининг нима деётганига кўпам тушунавермасди. Зоро, йигитни шеърнинг мазмуни эмас, шеър ўқиётган малакнинг ўзи асир этарди. Бекпўлат сигирларни подага қўшиб келаётганида ҳам, тегирмонда чангга беланиб ишлаётганида

ҳам рафиқасининг шаҳарликларга хос рангпар чехрасини, маънога тўла чақноқ қўзларини, майин, латофатли табассумини қайта-қайта эслайверар ва эслаган сайин оғзининг таноби қочиб, маст одамдек гандираклаб юарди.

* * *

Кишлоқ одатига кўра, янги келинчакка иккичу ой қора ишлар буюрилмайди. Балки, дарров “кир” бўлиб қолмасин дейишар. Шунинг учун катта келин Норбуви ўн бир яшар қизини ёнига олиб уй ишларини эплаштириб турди, келин-куёвга кўпда халақит беравермади. Малика “чой дамла... овқатни олиб бориб бер...” қабилидаги илтимосларни адо этасолиб лип этиб уйига кириб кетаверганида ҳам Норбуви ғашлик қилмади. Умуман, қайнотасининг иссиқ-совуғи Норбувининг зиммасида эди. Тўғри, эр-хотин бирон мўмин-қобилгина, диёнатли кампир топиб, чолни уйлантириб қўйиш ташвишида анча елиб-югуришди. Лекин чол рўйхушлик кўрсатмади. Жуда сиқиб келганларида: “Олиб берган кампирларинг мендан бурун у ёқقا жўнаб қолса яна бева қоламанми!” деган ҳазил гаплар билан кутилди.

Бекпўлатни ҳоли-жонига қўймай, тўйни тезлаштирган ҳам мана шу Норбуви эди. Рўзгорнинг кўзга ташланмас майда-чуйда ташвишларидан толиққан катта келин ўзининг бағрига ҳам шамол тегадиган кунларни орзиқиб кутарди. Ҳар қалай, оёқ-қўлини узатиб бемалол дам олмаса-да, ҳеч бўлмаса қўшни қишлоқдаги ота-онасини кўриш учун ортига қарамай, бемалол кетаверар...

Ҳали субҳи содикдаёқ ҳовлида Норбувининг шанғиллаган овози эшитиларди:

— Наси, о Наси, қуриб кетгур, ҳали ухляпсанми? Тур, ҳовлини шипир. Гүштингни майдалама-симдан тур тез!

— Малика, о Малика! Кун жайилиб кетди-ку, турмайсизларми? Пода кетиб қолмасдан сийирларни соғиб ол.

— Марди, о Марди, сенга булоқдан сув опке дегандим-ку. Ҳа, юришинг қурсин! Ҳали шошмай тур, қонингни ичмасам...

Сигирлар бегона қилишдими, тек турмай, деп синавериб, соғдиришмади. Жиги-бийрони чиққан Малика қизариб-бўзариб турганда Норбуви индамасдан келиб челакни олди-да, ўтириб сигирни “пов-пов” соға кетди.

— Хамир қориб қўй, — деб буюрди Норбуви мулзам ҳолда турган овсинига.

Ошхона томон бораётган Малика қўшни аёллар девордан мўралаганича ўзини ошкор кузатоётганини кўрди, бу ҳолдан хўрлиги келди.

“Имтиёз” муддати тугади чоғи, Маликанинг ҳузур-ҳаловатли кунлари барҳам топди. У энди сахардан шомга довур ҳовли билан томорқада бўзчининг мокисидай тинмай қатнайдиган бўлди. Қишлоқда на газ бор, на водопровод. Ўчоққа таппи қалаб овқат пиширилади, қумfonда чой қайнатилади. “Оғзи осмонга қараган” тандирда нон ёпилади. Куви пишилиб, сарёғ олинади. Томорқада сабзи, пиёз кун сайин ўтоқ қилинади, боғда ўрик, олмалардан қоқи қилинади, кора кишмишни ювиб тозаланади, қуритилади...

Малика ўзини гүё бошқа оламга, ибтидоий замонларга тушиб қолгандек сеза бошлади. Аммо бутун заковатини ишга солиб, ҳеч кети қўринмайдиган бу юмушларни яхшилаб ўрганиб олишга ҳаракат қиласади.

Малика чимхўр эди. Бироқ тинимсиз жисмоний меҳнат туфайлими ёинки тоза ҳаво таъсир қилдими, ишқилиб, тез орада унинг иштаҳаси карнай бўлиб кетди.

— Ҳаддан ташқари кўп овқат еворяпман, — деди у бир куни эрига.

— Қозон-товоқ ихтиёрингда бўлса, ейвер-да, — деди Бекпўлат.

— Йўқ, кўп овқат ейиш зиён. У одамни дангаса, уйқучи қилиб қўяди, мия фаолиятини секинлаштиради.

Бекпўлат илжайди.

— Мияни ишлатиб энди олим бўлармидинг.

— Олим бўлмасам ҳам, миянинг ишлаб тургани яхши-да. Тўғриси, баъзан шунақанги ажойиб фикрлар келиб қолаяптики, афсус, ёзиб қўйишга вақт бўлмаяпти-да.

— Ёзиш... шартмикан, — деди Бекпўлат иккиланиб. — Ким ўқирди... яна... шеър бўлса...

Келинчакнинг кўнгли оғриди.

— Ўқиши... шарт эмасдир. Лекин ёзиш шарт.

Бекпўлат дарров ён берди.

— Ўзинг биласан. Ёзсанг ёзавер. Қийналиб қолмасанг бўлди...

Тўғриси, жуфти ҳалолининг баъзи қилиқлари Бекпўлатга эриш туюлади. Дейлик икки қатор нарса ёзаман деб ўзини овқатдан қисиш, мияни чарчатиш нима керак?.. Уйқудан воз кечиш... Аёл боши билан ... Зарилми? Бу ерда ҳеч курса редакция бўлсайкан, ёзганларини чиқариб турса. Район марказигача камида юз чақирим. Тоғ орасидаги дўппидай қишлоқ бўлса...

Вақт ўтган сайин Маликанинг кўнглида норозилик кучая борди. Асал ойи тугагандан буён Бекпўлат ҳам тегирмондан бери келай демасди.

Кузда шаҳарга меҳмонга боришиди. Қайнотаси икки кунга базўр рухсат берди. Ярим кунини йўлда ўтказиб борсаю... Маликанинг назарида бу ноинсофлик эди. Ахир у кузни, мана шу дамларни қанчалик интизор бўлиб кутганди. Балки шунинг учундир, борғанларининг эртаси куни Бекпўлат: “Энди қайтсан ҳам бўлар” деганида Малика ўжарлик қилиб, оёқ тираб туриб олди. Ўртага онаси тушди.

— Жон болам, иссиқ ўрнингни совутма, — деди она куёви ҳовлига чиқсан маҳал. — Бу ерда рўшнолик кўраман деб ҳам ўйлама. Отаси бошқа келин бор. Анов икковининг ғами ҳам етади бизга.

Маликанинг иккала опаси ҳам бефарзандлик туфайли эрдан ажралишиб, уйга қайтиб келишганди. Шўрлик она шуларни назарда тутмоқдайди.

Маликанинг кўзлари жиққа ёшга тўлди.

— Ойижон... у ерда яшаш қийин... У ерда вақт тўхтаб қолган...

Лекин иккала қизининг тақдири туфайли олган сабоғи онани анча қаттиққўл қилиб қўйганди. Шунинг учун шоира қизининг раъйини қайтаришга куч осонлик билан топилди.

— Шоира бўлмасанг гўрга, қизим. Бекпўлатинг ёмон йигитга ўхшамайди. Бир нарсалар ёзиб-чизаман деб баҳтингдан ажралиб қолмагин тағин...

Индамай қишлоқقا қайтишди.

— Биз чумолимиз, — деб қолди бир куни Малика эрига. — Эртадан кечгача ғимир-ғимир қилишдан мақсад битта: яъни қорин тўйдириш эканлигини ўйласам юрагим орқага тортиб кетади.

Бекпўлат хотинининг иягидан тутиб, кўзларига қаттиқ тикилди.

— Кейинги пайтларда кўп норзи бўлаяпсан-да. Нега ўзингни бунча қийнайсан? Эл қатори яшаётган бўлсак...

Малика эрининг саволига эътибор бермасдан, титроқ товушда давом этди.

— Мана, масалан, сигир соғамиз — сутини ичиш учун. Куви пишамиз — сарёғини...

Ич-ичидан қалтироқ турган Малика ортиқ гапиролмай қолди, лабини қаттиқ тишлаб, нафасини ичига ютди, қуиилиб келаётган кўз ёшлар мижжаларга қалқиб чиқмай, қиз юрагининг тубтубига сингиб кетди.

Кўнгли ғаш тортган Бекпўлат ўйчан бўлиб қолди.

— Сен нолимасанг ҳам бўлар, — деди у анчадан кейин. — Ҳар қалай, маданиятга ювуқ одамсан. Бизларди айтса бўлади чумоли деб. Эртадан кечгача чангга беланиб ишлаймиз. Газит ўқишига ҳам хафсала қолмайди.

Бекпўлат “гап қўшармикан” деган илинжда хотинига кўз қирини ташлади. Маликанинг қилт этмай, бир нуктадан кўз узмай ўтирганини кўриб яна гапиргиси келди. Шу пайтгача у сир бергиси келмаса-да, хотинининг олдида гурунглашиб ўтиришга тортинарди. “Гапга нўноқман, ўхшатолмасам Малика устимдан кулади”, деб истиҳола қиласарди.

— Менам катта ўқишлиарда ўқисам бўларди. Мактабда ўқишим ёмон эмасди. Фақат отам унча рўйхушлик бермади. «Энангни йўқлиги етади менга. Икковинг ҳам олдимда бўл. Мен ўлгандан кейин билганларингни қиласилар”, деб туриб олди. Акам қулоқ солмай Олтойга кетиб қолди.

Армияда ўша ёқда хизмат қилганди. У ёқда яхши күрган қизи бор экан. Отам орқасидан излаб бориб, сўкиб-сўкиб олдига солиб қайтариб келди. Акам уч ойдан кейин яна қочиб кетди. Бу сафар отам пишиқлик қилди. Қариндошлар билан келишиб, акамни “майиз сотгани кетган” деб гап чиқарди-да, мана шу Норбуви янгамга унаштириб, кейин бориб акамни диконглатиб ҳайдаб келди. Отамнинг қаттиқ жаҳли чиққанди. Акамни уч кун оғилхонага қамаб қўйиб калтаклади. Шундан бери акам бечора Олтой ҳақида гап очмайди. Лекин ичкиликка муккасидан кетган. Аламини ароғу винодан олади.

Анча ўзига келиб қолган Малика:

— Ҳали акайиз шунинг учун ичаркан-да? — деди.

— Мен шунаقا деб ўйлайман. Яна ким билади дейсан, — кўзларига мунг чўккан Бекпўлат жиддийлашди. Сўнг дераза оша ташқарига бирров қараб қўйди-да, чукур хўрсинди. — Бу ерларда яшаш ёмон эмас-у... аммо тоғлар орасида дунё кўрмай ўтиб кетаётганимиз чатоқ-да!

Малика эрига ачинди. Шунинг баробарида ўзини икки ўт орасида қолгандай сезди. Юрагининг туб-тубида эса бир хавотир ғимирлаб қолди: “Ҳамма нарса изига тушиб улгурган бу турмуш тарзини сал бошқачароқ қилишга уриниш бефойда шекилли...”

Малика энди вақт ҳақида, ёзиш ҳақида ўйламай қўйди. Келинчак энди... бу ерлардан кетиш режасини туза бошлади: “Касал бўлиб қолсам. Дўхтирлар унга бу ернинг ҳавоси тўғри келмайди, дейишса. Шунда сих ҳам, кабоб ҳам куймасди. Бекпўлат эса бир пасда шаҳарга кўнишиб кетади. У лаёқатли...”

Исоқ чол хонадонида кечлик дастурхонга албатта хамирли таом тайёрланади. Чол юмшоқ овқатни хуш кўради. Қайнотасининг кўнглини топишга уринадиган Норбуви учун хамирли таомлар чўт эмасди.

Ката келин... ишлаб чарчамайдиганлардан эди. Қайнотасининг бир оғиз: “Барака топ,” деган мақтовини эшитиш учун ўлиб-тирилиб ҳаракат қиласди. Болаларининг инжиқлигию эркаликларига парво қилмасди. Маликанинг дангасалиги, қўли бўшади дегунча уйга қамалиб олиши унга сира ёқмасди. “Ўлсин, эпсизлиги ўзининг бошига етсин, – деб қарғаниб кўярди у ғаши келган кезларида. – Келин зоти фақат меҳнатнинг орқасидан рўшнолик кўрган. Уч кун касалман, деб ётиб кўрчи, яхши кўриб олган эрингга ҳам ёқармикинсан? Ҳали нонни “нанна” деб юрибди бу ойимча!”

Норбуви энди ўттиз бирга кирган. Аммо мудом қаддини сал букиб юрадиган бу аёлнинг ажин босган ҳорғин чехрасига қараб, камида қирқ беш-элликни бериш мумкин. Бир вақтлар тақимини ўпган соchlари тўклилавериб бошига ёпишиб қолган, юз суяклари туртиб чиқсан, икки ёноғида чуқурча ҳосил бўлган, киртайган кўzlари тез-тез ёшланиб туради, озғинлигиданми ёки суяги қийшиқми, ишқилиб икки елкаси туртиб чиқиб туради. Аммо қачон қараманг, куймаланиб, айтганини қилмаган болаларининг “гўштини майдалаб”, “қонини ичиб” юрса-да, катта келин баъзан-баъзан кўтаринки кайфиятда, энг баҳтиёр аёлдай илжайиб қолар, афтидан, бундан ортиқ баҳтни орзу ҳам қилмасди.

– Норбуви опа, – деди Малика кечки сабзини ўтоқ қилишаётгандарида. – Сизам зерикасизми ҳеч?

Норбуви ҳайрон бўлиб овсинига бир неча сония тикилиб қолди.

— Хов, нега зерикаман? Иш бошимдан ошиб ётиби-ку!

— Мана шу ҳар кунги бир хил иш, бир хил ташвишдан безор бўлмадингизми?

Норбуви яна ишдан тўхтаб бир муддат ўйланиб қолди. Сўнг шошмасдан ўрнидан туриб, ранги андак ўчган алфозда этагидаги ўтларни уватга ташлаб келди-да:

— Безор бўлганда қайтамиз, — деди. — Одамзодники шу-да. Болам-чақам деб, ота-онам деб ўтиб кетасан.

— Унда одамлар фақат ейиш-ичиш, бола-чақа орттириш учун дунёга келаркан-да, а?

— Бўлмаса-чи. Ҳар ким пешонасида борини кўради. Бирор ундей, бирор мундай. Барибир, бир куни ўтади-кетади...

— Унда бу дунёни, бу оламни яратмоқдан мақсад нима? Масалан, мен ўлсам менинг “мен”лигим қаёққа кетади? Мен борлигим учуноқ ҳамма нарсани ҳис қилиб турибман-ку. Йўқ бўлсам-чи?

— Сен бўлмасанг болаларинг яшайди, — ёқтирироқ жавоб қилди Норбуви.

— Болалар ҳам ўтиб кетишганидан кейин-чи?

— Менга қара, ҳой тайтув, — деди Норбуви бирдан ғазабланиб. — Менинг олдимда ҳар нарсани бир нарса деб валдирайверасанми? Мен партияман! Шуни биласанми?

Малика ҳайратдан донг қотди.

— Йўғ-э?

— Ишонмаяпсанми? — Ногоҳ Норбуви сал қаддини ростлагандек бўлди. Юзида ҳам виқор аломатлари акс этди. — Биз шуйтиб, эгнимизди қисиб юри-иб ишни қип қўямында, келин!

— Сиз... сиз партияда нима қилиб юрибсиз, опа?

— Кизлик пайтимда пастки овулдаги фермада соғувчи бўлиб ишлардим. Аёллардан керак бўлиб қолган экан, ўз ҳолимга қўймай ўтказишган. Ҳали-гача партия майлиси бўлса атайин келиб бизларди обкетишади.

Борган сайин қизиқиши ортиб бораётган Малика ёш боладек чапак чалиб юборди.

— Нима қиласизлар у ерда?

— Нима қилардик? Майлис тугагунча ўтирамиз. Кейин магазиндан арzon қилиб чойнак-пиёла, чит сотишади. Шулардан олиб, қўйни-қўнжимиз тўлиб уйга қайтамиз, — деди Норбуви ғурур билан.

Катта келиннинг кайфияти жуда кўтарилиб кетганди.

Назарида, у “Мен партияман!” деган биргина гапи билан овсинини янчидан ташлагандай эди. “Бизарди жа анойи деб ўйламасин-да бу жинқарча! Ҳали эртан бир кун партком бова уйма-уй юриб, бизди аптовузда обкетганини ўз кўзиминан кўрса, тоза куйиб кетса кераг-ов!..”

* * *

Ҳақиқатан ҳам икки-уч кундан кейин, кечга яқин дарвоза олдига эски, шалоғи чиққан “Паз”ик автобуси келиб тўхтади. Ойнадан бош чиқарган тўрт-беш нафар жувон “Норбуви опа!.. Норбуви!.. Кетдик майлисга!” деб чақиришди.

Катта овсин бу галги мажлисга алоҳида тайёр гарлик кўрди. Янги келинлигига сандиққа солиб қўйган қўйлакларидан бирини олиб кийди. Рўмоллари ичидан ҳам энг оҳорлисини танлади. Қизига ўсма эздриб, қошига энли қилиб қўйди. Бостирмада бир соатча ўтириб, ёрилиб кетган

товорнларини тозалади. Бу ишларни катта келин овсинини күйдириш учун атайлабдан қилди.

Ўша кунги кечки ишлар Маликанинг зиммасига қолди.

Қоронғу тушган маҳал қайноғаси Бердибой ҳовлига чайқалиб кириб келаётганини кўрган Малика хавотирланиб, қўлидаги сўт тўла сатилни аста қозон бошига қўйди.

Бердибой тўғри юришга ҳаракат қилган ҳолда, бироқ гандираклаб келинининг олдига келди.

— Н-норбуви қ-қани?

Малика сатилни қайтадан қўлига олди-да, ёнверига аланглади.

— Мажлисга кетган, партия йиғилишига.

Бердибой шаҳодат бармоғини бигиз қилиб юқорига кўтарди.

— С-сен м-мендан қўрқ-ма? Мен маст эмасман... М-м-мен куйиб кетяпман. Ман-на бу ерпим ён-ниб кетяпти!..

Кўйлаги тутмалари узилган, соchlари тўзғиган, кўзлари қонталаш Бердибой кўксига муштлади.

— Киринг, уйингизга кириб ётинг, — дея ёлворди Малика кўрқа-писа.

— Йўқ, кирмайман, партия хотиним майлисдан келгунча шу ерда ўтираман! — Бердибой яна гандираклаб кетди, сўнг амаллаб ўчоқ супасига чўкди. Шу алпозда кўзини зўрға очаркан, имлаб Маликани чақирди. — Бу ёқقا ке, келин. Қўрқма дедим-ку. Мен маст эмасман. Сендан бир нарсани сўрамоқчиман. Мана, сен ёзувчи экансан. Сендан бир илтимосим бор. Шу... Олтинсоҳ деган қиз ҳақида бир шеър ёзиб бермайсанми?

Малика нима дейишни билмай елка қисаркан, кулимсираб қўйди.

— Ёза оласанми ўзи? Тўғрисини айт...

Шу пайт қайдандир ранг-кути ўчган Исоқ чол келиб қолди.

— Яна ичдингми? — ўдағайлаб сўради у.

— Ичдик. Яна ичамиз. Нима қипти ичсак? Хотин майлисга кетади, биз ичамиз. Биз ҳеч қаерга кетмаймиз, кетолмаймиз... — деди Бердибой отасининг кўзига тик қараб, дона-дона қилиб гапиришга уринаркан.

Малика шу пайтгача одатда камгап ва ичимдагини топ, мудом гуноҳкор одамдай чекка-чеккада бўйнини қисиб юрадиган қайноғасини бу аҳволда кўрмаганди.

— Эш-шак!

Исоқ чол ўрнидан тура бошлаган ўғлининг юзига қаттиқ тарсаки туширди. Бердибой яна супага ўтириб қоларкан, қўллари билан юзини тўсиб олди.

Исоқ чол қаҳри қаттиқлардан эди. “Мана сенга ичиш!” дедиую ҳассаси билан ўғлининг дуч келган ерига тушира кетди. Бердибой энди қўллари билан кичкинагина бошини тўсиб олди-да, ерга думалаганча, хўнграб йиғлаб, дод-вой қилишга тушди.

— Энажон, қаердасиз, энажон... Отам мени ўлдириб қўяди... энажон. Буларингиз мени ўлдириб қўяди, энажон... Энажо-он!..

Азбаройи қайноғасига раҳми келганидан юрак бағри эзилиб кетган Малика турган жойида йиғлаб юборди.

Исоқ чол тобора қутуриб борарди.

— Ичаман эмиш! Мана ичиш! Хотин майлисга боради эмиш! Мана кесатиш! Лозим бўлган ерга боради! Сенинг ишинг бўлмасин? Эш-шак! Бу ҳовлида мен хўжайнинман! Кунда ичиб келавериб, энангди суягини зирқиратдинг-ку, нокас!

— Энам мени урмасди...

— Энанг урмаса, мен ураман! Бўкирма-е, нодон!
— Исоқ чол силтаб тортиб ўғлини ўрнидан турғазди.— Бор, уйингга кириб ёт!

Чол сўкина-сўкина ўз хонасига кириб кетди. Бердибой шилқ этиб ерга қулади. Малика қайноғасининг қўлидан тортиб турғазмоқчи эди, кучи етмади. Бердибой ғужанак бўлиб, ерга қапишиб ётиб олди.

— Муллака, — деди Малика йигламсираб, — туринг, турсангиз-чи, юринг, уйга киринг энди.

Бердибой юмилиб бораётган кўзларини очиб Маликага алланечук синчков қаради-да, секингина:

— Биз шунаقا... кўрқоқмиз, — деди. — Башарамизни бузиб қўйишсаям индамаймиз. Биз шунаقا...

Бердибой кўлини бошига ёстиқ қилиб пинакка кетди. Кап-катта одамнинг... бурни оқиб, қалин лаблари устида қотиб қолганди...

* * *

Икки-уч соат ухлаб, кайфи тарқаган Бердибой мажлисдан қайтган хотинини ўласи қилиб калтаклади.

Норбувининг кўкармаган ери қолмади. Юришгаям мадори етмай икки кун уйда кўрпа-тўшак қилиб ётди. Малика энди уни ота-онасиникига жўнаб қолади, деган хавотирда эди.

Бироқ учинчи куни тонг сахарда ҳовлидан Норбуви янгасининг одатдагидек зардали “Малика, о Малика, тур, сийирни совиб ол” деган кўрсатмаси эшитилди. Шу билан, ҳеч нарса бўлмагандек, одатдаги турмуш тарзи давом этди.

Малика сигир соғиш, кир ювишдан кўра томорқада ишлашни яхши кўрарди. Ҳар қалай, бу ер

анча тинч. Сабзи пуштасигами, пиёз жўягигами ўтириб олиб ўтоқ қилаверасан, ўтоқ қилаверасан, хаёлда эса дунёниг у бошидан кириб, бу бошидан чиқсанг ҳам бўлади — ҳеч ким халақит бермайди.

Норбувининг аҳволидан қаттиқ таъсирланган Малика бир неча кун ғалати кайфиятда юрди. Овсинига раҳми келди. Эрининг юриши бунаقا бўлса. Кўнгли ҳалиям Олтойда, ҳалиги, яхши кўрган қизининг исми Олтинсоҳ экан-да. Хўш, Норбуви янгани бу ҳовлида нима, қандай куч ушлаб турибди? Ахир, яна бир марта шундай калтак еса ўлиб қолишиям мумкин-ку.

Ҳали эрга тегмасдан бурун ип-йигирув фабрикасида ишлайдиган дугонаси Маликага ёрилиб қолганди: “Эртадан кечгача тик оёқда ишлайман. Шундай чарчайманки, асти қўяверасан, бошим ғувиллаб, қулоқларим шангиллаб кетади. Кечга бориб оддий қўшув-олувни бажаришгаям миям етмай қолади. Ишламасанг бўлмаса. Битта эримнинг топгани нимаям бўларди — томоқдан ортмайди. Шундан кейин ноилож қорин бандаси бўлмасдан иложинг йўқ..”

Маликанинг кўз олдидан кундалик меҳнатдан, рўзгорнинг ташвишларидан чарчаган Норбуви янга... норбувилар ўтди. Қурилишда ишлаётган коржомали аёллар, далада, саратон тифида кетмон чопаётган аёллар... Улардан Нодира, Увайсий ёинки Маҳзунани сўраб кўринг-чи, билишармикан? Ойдин ҳақида гапириб кўринг-чи. Балки эшитишни ҳам хоҳлашмас. Лекин нарх-наво, латта-путталар ҳақида соатлаб дардлашишингиз мумкин.

Бир куни Норбуви токчада турган Достоевскийнинг китобини кўриб қолиб: “Вой-бў, отини ўқиш шунча қийин-у, ичидагини қайтиб ўқийсан!”

деганди. Ахир Норбуви янга ҳам мактабда ўқигандир, илм олгандир...

Ўйлай-ўйлай, ахири Малика бу ҳолнинг сабабини ўзича топгандай бўлди. Камбағалдан ҳеч қачон донишманд чиқмас экан шекилли. Агар Норбуви янгада, норбувиларда бу қадар кўп турмуш ташвишлари, қийинчиликлари бўлмаганида эди, эҳтимол, улар олиму шоирлар бўлишмасада, ҳар нечук фикрловчи, заковатли уй бекалари бўлишмасми? Агар Нодирабегим ҳам фақат ошқозон ташвишига боғланиб қолганида эди, қуёшни уйқудан уйғотадиган оддий аёлга айланиб қолмасми?

Малика хаёлига келган фикрлардан таъсирланиб кетди. Бирдан ёзиш истаги пайдо бўлди унда. Кўли ишга бормай қолди. Фикрларидан чалғиб кетишдан чўчиб этагидаги бегона ўтларни сабзи жўяклари устига тўкди-ю хонасига ошиқди...

* * *

Барибир, бўш вақт камлиги ўз таъсирини кўрсатди. Апил-тапил ёзиб ташланган мақола икки ҳафтада аранг оқقا кўчирилди. Саккиз сахифадан иборат битикларни тўрт буклаб, конвертга солиб, елим билан яхшилаб бекитган Малика уни қайин укаларидан бирига топшириб, почтахонага обориб беришни илтимос қилди. Бекпўлатга эса бу ҳакда лом-мим демади. Эрга текканидан буён редакция билан алоқаси бутунлай узилган. Ҳали мақола чиқадими, чиқмайдими... Чиқмай қолса, эрининг олдида изза бўлиши турган гап...

Орадан тўрт ой ўтиб кетди.

Малика мақоладан бутунлай умид узди. Ё қайин укаси почтахонага олиб бормаган, ё редакцияга етиб бормаган. Етиб борганида, чиқмаса-

да, устози, тўгарак раҳбари Темур Носир бир энлик жавоб хати юборган бўларди. Ахир Малика мақолани айнан шу кишининг номига юборгандику. Яхшиям мақоланинг асл нусхаси қолган экан. Малика уни қайтадан ўқиб чиқиб, у ер-бу ерини тузатди, ҳаяжонланиб кетган жойларини киртишлади, хуллас, олти сахифага келтирди-да, қайтадан кўчириб, конвертга солиб, энди ўзи почтахонага бориб топшириб келди.

Бу орада қор кўрпасига ўралиб қиши кириб келди. Бу ерларнинг совуғи қаттиқ бўларкан. Ҳаво илиқ бўлди деган қунларнинг ҳам шабадаси изғиринли, баданни ўйиб олади.

Малика қишин яхши кўриб қолди. Негаки, кундалик тирикчилик ташвишлари камайиб, ўқиш ёзишга вақт bemalol бўларкан.

Бир куни, пешин бўлиб қолганди шекилли, Малика бир оз мизғиб олиш учун энди ўринга чўзилганди, эшик шиддат билан очилди ва ранг-кути ўчган Норбуви кириб келди. Кўлида газета тутган Норбуви совукданми, асабийлашганиданми дағ-дағ қалтиради.

— Нима бу?! — дея Норбуви ўрнидан туришга чоғланаётган Маликанинг тепасига келиб ўдағайлади.

Овсинини бу ҳолатда биринчи марта кўраётган Малика довдираб, ўзини йўқотиб қўйди. Нима гаплиги онг-шуурига етиб бормаган бўлса-да, ёмон воқеа содир бўлганини сезиб, юраги шувиллаб кетди. Мадад кутгандай ён-верига аланглаб эрини қидирди.

Норбуви Маликанинг нақ бурни тагида газетани силкитди.

— Шарманда, шойирман, деб кўнглингга келган нарсани ёзаверсанми?

Маликага сал жон кирди.

— Мақола чиқибдими? — Овсинининг нега бунчалик дарғазаб бўлаётганини ҳалиям тушуниб етмаган Малика енгил бир ҳаракат билан унинг қўлидаги газетани суғуриб олди. — Нега хафа бўласиз, опа, — деди Малика газетанинг тўртинчи сахифасидаги ўзининг “Камбағалдан даҳо чиққанми?” сарлавҳали мақоласига кўз югуртиаркан. — Бу ерда ёмон гап йўғ-у...

— Сен мени, бизнинг оиласизни ёзгансан!

Туйқусдан янграган бу айблов Маликани ҳангманг қилиб қўйди. Аввал кулгуси қистади, айни пайтда овсинига нисбатан ғазаби ортиб бораётганини ҳис қилди.

— Нима деяпсиз, оғзингизга қараб гапиринг, нега мен сиззи, сизнинг оиласизни ёзарканман?

— Иши кўп дебсан-ку. Меҳнат одамни маймунга айлантиради дебсан-ку! Шу гапларни бир вақтлар менга айтгандинг, эсингдами, сабзи ўтоқ қилаётганимизда. Мен маймун бўпман-да меҳнат қиласвериб сенингча?!

— Опа, сиз тушунинг ахир...

— Мен иш қилсам болаларим учун қиласман, рўзғоримди бутунлигини ўйлаб қиласман, — жавага тушган Норбуви оғзидан кўпик сачратиб, йиғлаб-сиқтаб гапиришга ўтди. — Сен бизни бутун элга шарманда қилдинг. Шаҳардан келин олмай ўл, дейди энди одамлар. Ҳали отам эшитса нима дейди, шарманда! Сен барибир бизга эл бўлолмайсан. Ҳали қайнум дийирмондан келсин, айтиб, бир марта қўйдириб юбормасам!..

Айниқса охирги пўписа Маликанинг сабр косасини тўлдириб юборди. Газетани токчага улоктириб, эшик томон йўналган овсинининг йўлини тўсди.

— Кўлингдан келганини қил, олашақшақ! Сенам хотинман деб юрибсан-да бир эркакнинг умрини ўтказиб...

— Ким олашақшақ?

— Сен...

Иккала аёл ўртасида жанг бошланди. Норбуви Маликанинг юзига чанг солди. Малика унинг сочидан тортди. Норбуви Маликанинг биқинидан ўйиб олгудай чимчилади. Ўз навбатида Малика остононда ётган калишнинг бир пойини қўлга олди. Мана шу қий-чув, йифи-сифи, дод-вой, қарғишлар устига Исоқ чол ҳассасини дўқиллатиб келиб қолмаганида ким билади, жанжалнинг оқибати нима билан тугарди.

— Ўл, икковинг ҳам ўл!

Қайнотанинг зардали овози иккала аёлни ҳам дарров ўзига келтирди.

Малика лов-лов ёнаётган юзини кафтлари билан тўсганча дераза тарафга ўгирилди-ю, овозини чиқармай, юм-юм йиғлашга тушди. Норбуви уялганидан давҳлизга қочиб чиқди-да, пиқ-пиқ йиғлаганча рўмолини ўрай бошлади.

— Нима гап?

Малика жавоб берадиган аҳволда эмасди, аммо қайнотасининг овозида ўзига нисбатан хайрихоҳликни илғаб ўпкасини босди. Лекин жавоб беришга улгуролмади.

— Ота, — деди аллақачон ўзини тутиб, у ёқбуёғини тўғрилаб олган Норбуви эшиқдан бош суқиб, зеро, эри билан бўладиган доимий тўполнонлар катта келинни анчагина тажрибали қилиб қўйган ва бугунги жанг унинг учун чикора эди. — Эрталаб пўштахонага болларни пулини олишга боргандим. Шу ерда Оқилбек маллимни хотини айтиб қолди. Овсинингиз силарни газитга уриб чиқибди, деб. Келиб мунга айтсан тан олмайди...

— Уриб чиқибдими? Кимни? — Исоқ чол катта келинига ҳайрон бўлиб қаради.

— Кимни бўларди, бизди-да. Иши кўп дебди, эртадан кечгача тинмайди, дебди, пули оз дебди, камбағал дебди. Ишқиб, ҳар балони бир бало деб валдирабди. Шунга жаҳлим чиқиб кетди. Уйга қандай келганимният билмайман, ота.

Норбуви кўзига ёш олди.

Қайнотаси шундай ёмон ўқрайдик, буни кўрган Малика қалтираб, оёқларининг учигача музлаб кетди.

Исоқ чол токачада ғижимланиб ётган газетани олиб, индамасдан хонадан чиқди.

* * *

Кечки овқатдан кейин эридан қолган эски чопонга ўралиб Зилай байча кириб келди. Уйдагилар аллақачон апил-тапил оқатланишиб, хонахонасига кириб кетганди. Ичига чироқ ёқса ёришмаётган Исоқ чолгина оппоқ соқолини тутамлаб, қовоқлари уюлиб, ғамга ботган ҳолда ёлғиз ўзи ўтиради. Ҳамсоясини кўриб чолнинг чехраси хийла очилди.

— Кел, байча, бормисан бу дунёда?

— Кўзингизни шира босиб, кўрмай қолдингизми, aka? Биз ҳар куни шу ерда, юрамиз ивирсиб.

Кампир сандал атрофига тўшалган кўрпача четига омонат ўтиради.

— Мен сени чўлдаги қизингникига кетиб қолдингми, деб ўйловдим.

— Э, қиш ўчоги тор, тур уйинга бор, деган экан бир бечора. Шу паллада қизникида бало борми? Күёвни бетига қараб ўтираманми. Ўз уйимдан қолмайин, aka.

Исоқ чол бир муддат хаёл суриб қолди.

— Тинчликми? Унча шихтингиз йўқ, — машмашаларнинг бир учини эшитган, Норбувининг овсини устидан қилган шикоятини бот-бот тинглаган Зилай байча ҳар эҳтимолга қарши ўзини ҳеч нарса билмаганга солди.

— Э, Зилай байча, раҳматли Босимбой сендан олдин кетиб тўғри қилган экан, — Исоқ чол ердан кўз узмай андак сукут сақлади. Ўтган қунларни эслаб кўнгли бузилдими, пешонасидаги ажинлари янада чуқурлашди, мижжаларига қалқан ёшни эса қўшнисидан яшириб ҳам ўтирумади. — Мен кетиб, раҳматли Ойимсулов қолганида эпларди, ҳаммасини эпларди. Эркак кишига рўзгорни бошқариш ўлимдан қийин экан.

Зилай байчанинг ҳам бўғзига алланима тиқилгандай бўлди.

— Ҳар банданинг ўлчаб берилган куни бор. Кўрмасдан иложи йўқ, ака.

— Илгари битта эди. Алдаб-сулдаб, болам-бўтам деб йўлга соловдим, — дея овозини пастьтириб арзи-ҳолини бошлади чол. — Бунисининг кўзида дови борлигини бошидаёқ билгандим. Бизминан муроса қилиши қийин-ов.

Зилай байча ялт этиб чолга қаради. Бу нигоҳда бир дунё танаю маломатлар мужассам эди. Илло, эри оламдан ўтгач, Зилай байча бир эмас, икки эмас, нақ етти қизи билан бева қолганди. Ёш бўлиб ёш эмасди ўшанда, қари бўлиб қари эмас... бирда-яrim эга чиқса уй қилиш ниятиям бор эди кўнгли тубида. Қисмати шўр эканми, бирор кўнгил учун ҳам эшигини бу ниятда қоқиб келмади. Беванинг кўрган куни қурсин. Бир амаллаб қизларини вояга етказди, шуларни уйли-жойли қилсан, менинг ҳам кўкрагимга шамол тегиб қолар деган ниятда юрди. Лекин... Куйган тери ёзилмас, деганлари тўғри

экан чоғи, шүр қисмат яна уни мүлжалга олди. Қизларининг каттаси бу йил кўклам ўттиз иккига киради. Энг кичигиям йигирмадан ошиб қолди. Етти қиздан биттаси икки йил бурун турмушга чиқди. Қолган олтоби ўтирибди қозигида қариб. Қизларининг тақдирини ўйлай-ўйлай Зилай байча куйиблар кетади. Одамларнинг шафтоли қоқидай буришиб-тиришиб кетган қизлариниям эр олади. Нега унинг хусайни узумдай дириллаб турган қизларини ҳеч ким назарига илмайди? Отадан-ку қолди, онадан ҳам қолса бу шўринг курғурларнинг ҳоли не кечади? Шуларни ўйлаган сайин Зилай байча ҳар қайсими ўз қўлим билан эгасига топширмагунимча ажалга сабр бер, деб кечалари худога илтижо қилиб чиқди.

Бултур қишда уят-пүятниям сидириб ташлаб, озингни-оз демайман, кўпингни-кўп, сенам борингни қиласан, менам борини, дея энди-энди Норбувины қўлга олай деб юрган маҳаллари Бекпўлат бирдан айниди-қолди. Шундан буён Зилай байчанинг дарди ичида. Исоқ чолдан ҳам ўпкаси катта. Ахир ота-ку у, алдаб-сулдаб боласини йўлга солса бўларди. Мана оқибати... Баттар бўлсин. Зилай байча минг ҳамдард кўринишга уринмасин, ич-ичидан тантана қиласарди. Беванинг ҳам бир дегани бор, деб қўярди ўзига-ўзи.

Табиийки, оғиздан ташқи рафтторга яраша сўзлар чиқди.

— Келинингиз ҳали ёш, гўрни биладими. Жиловини ҳозирдан бўш қўйсангиз эртан бу кунлар ҳам ҳолва бўлиб қолади.

— Гапирай дейман-у, эркаклигимга бориб, оғизмдан ноқалб сўз чиқиб кетадими, деб қўрқаман, байча.

— Бўлмаса уришманг-сўкманг-да, уйдаги гапни буйтиб далага чиқарсанг, тўрт томонинг қибла, деб қаттиқ ушланг... Хай, Бек ўзи не дейди?

— Нима дерди, дийирмондан келаётиб эшитганакан. Битта-яримта суюнчи олгандир-да, бўзрайиб ўтириб овқат еди-да, уйига кирди-кетди.

— Асли ўзи эрни худо урган-да, бўлмаса-ку...

— Бу ерда ўзи тайинли бир гап йўқ, — ҳамсоғининг гапини эшитмаганга олган Исок чол кўрпача тагидан ўша газетани чиқариб, мақолага кўз ташлади. — Биздан бир кишининг отиям ёзилмаган. Лекин маънисини чақсанг...

— Ҳамма гап мана шу “маънисида”-да, — дея Зилай байча яна гапни илиб кетди. — Оқилбек маллимнинг бекорга гапирмайди. Ўзи, — шу ерга келганда байча овозини пасайтириб, сирли тарзда гапиришга ўтди: — тўққиз ой ичида юкли бўлмаган хотиндан ҳар балони кутса бўлади. Эс борида этакни ёпган маъқулов...

Исок чол юрагига наштардек ботган бу гапларният эшитмагандай тутишнинг эпини қилди.

— Ҳа, майли, — деди чол дастурхон четини қайирапкан, — сабр қилиб турайлик-чи, бир гап бўлар...

Аслида эса неча кундан бери ўйланавериб, Исок чолнинг боши ғовлаб кетганди. Ҳатто бошимни қўйсаму ухласам, ҳеч қачон қайтиб турмасам, деган шаккокона ўйлар ҳам чолнинг миясини пармалай бошлади.

Бир маҳал, ярим кечамиди, сахармиди — чол аниқ идрок қилолмади, қаттиқ-қурум гап-сўзлардан чўчиб уйғониб кетди. Чопонини елкасига ташлай солиб даҳлизга чиқди. Кулоқ тутди. Шовқин Бекпўлатнинг уйидан эшитилаётган эди. Чол секингина ортига қайтмоқчи эди, эшик шарақлаб

очилиб, тугун кўтарган Малика чиқиб қолди. Қовоқлари шишган, кўзлари қизарган Малика қайнотасини кўрди-ю, турган жойида таққа тўхтаб қолди.

Қайнота-келин бир-бирларига тикилган кўйи туриб қолишиди. Ниҳоят, Малика бўшашиб ортига қайтишга чоғланган маҳал Исоқ чол:

— Қизим, бир чойнак аччиқ чой обке, — деб қолди.

Малика тугунини ерга қўйди-да, қайнотаси ёнидан сирғалиб ўтиб, ҳовлига чиқди, ундан ошхонага ўтди.

Исоқ чол секин келиб тугунни олди. Сўнг очиқ эшикдан уни ичкарига ирғитиб юбораркан, баланд овозда деди:

— Бекпўлат, эшигинг очиқ қопти, маҳкамлаб ол. Совқотиб қоласизлар...

* * *

Ўша воқеадан кейин Малика учун азобли кунлар бошланди. Норбуви у билан умуман гаплашмай қўйди. Болалари ҳам Маликани кўрди дегунча тескари ўтирилиб олишади. Айниқса ўша, мақолани почтахонага олиб боргани кўп буровга олинганидан аламзадароқ шекилли, атайин Маликанг олдида зум ўтмай пайдо бўлади-да, оғзини тўлдириб туфлаб ўтиб кетади. Ўн яшар боланинг қилиғи Маликага қаттиқ таъсир қилди. Аммо дардини кимга айтсан? Бекпўлат ҳам ўша кунги “кетаман”дан “кет”гача борган жанжалдан кейин қовоғини очмайди. Ёлғиз Беридбой бор. Лекин уям Малика билан ҳеч қачон очилиб-сочилиб гаплашмайди, фақат мулойим нигоҳ ташлаб, ҳайриҳоҳлигини билдираётгандай бўлади.

Бундай шароитда яшаш оғир эди.

Малика эзилиб кетди.

Энди унга ҳеч ким иш буюрмас, ўзича бориб бирор юмушнинг бошини тутса, Норбувими, қизими келиб қўлидан юлқиб олиб қўярди. Мана энди қип-қизил бекорчи-ю, миясига тузукроқ бир фикр ҳам келмайди. Ёзишга-ку, иштиёқ бутунлай сўнган.

Атрофдагилар ўзаро келишиб олиб, унинг бурнини ерга ишқаб қўйишмоқчи шекилли. “Ўша куни... кетишим керак эди, — дея ўйлаб қоларди Малика тез-тез. — Отамдан ҳайиқиб... Мени бу ерда нима ушлаб турибди ўзи? Ишониб юрган эрнинг аҳволи бу: “Одамлар олдида бош кўтаролмай қолганмиш...” Ҳалиям бўлса кетиш керак... Кетиш...”

Бир куни тонг сахар турдию, қайнотасининг намоз ўқиётганидан фойдаланиб энди чиқиб кетаётган эди, ортидан етиб келган Бекпўлат шартта билагидан тутиб ичкарига судради.

— Қўйворинг! — деди Малика йиғламсираб. — Кетганим маъқул. Сиз билан барибир чиқишолмаймиз.

— Қилғиликни қилиб қўйиб, энди қочиб кетмоқчимисан?

Малика тугунини бағрига босганча хўнграб йиғлаб юборди:

— Нима қилдим ахир?! Нега мени тушунмайсизлар...

— Ҳа, бўпти, бўлди, бас қил энди, — деди сал юмшаган Бекпўлат хотинини кучоқламоқчи бўлиб.

Бироқ Малика уни итариб юборди.

— Кўзимга кўринманг! Сизни... кўргим келмай қолди.

Бекпўлат муросага келишга ҳаракат қилди.

— Сенам тушун-да мени. Эркак кишига осон-

мас. Хотини ундей қипти, хотини бундай қипти, эрини менсимаган, бўлмаса бундай қилмасди, деган гапларни эшитавериш...

— Мен кетсам қулофингиз тинчийдими, ахир?

Кўққисдан берилган бу саволга Бекпўлат дарҳол жавоб бера олмади. Пешонасини ишқаб, бир муддат ўйланиб тургач тилга кирди:

— Кетсанг, яна гап қилишади, хотинини қайириб ололмаган деб...

Малика ерга чўк тушганча изиллаб йиғлаб юборди:

— Э Худо, қандай кунларга қолдим!..

Бекпўлатнинг куйганича ҳам бор эди. Киш, айни бекорчилик эмасми, одамлар чошгоҳдан кейин кўчага чиқиб, эшиклари олдидағи қор босган ходаларга ўтириб олганларича майит чиқишини кутаётган япалоққушлардай Исоқ чолнинг ҳовлисидан кўз узишмасди. Ора-сира тунд қиёфали оила аъзоларидан биронтаси ҳовли сахнида кўриниб қолса томошабинлар дарҳол бир-бирига маънодор им қоқиб ва ўзларича ушбу хафаҳоллик ҳолатига изоҳ беришга шошишарди.

— Бу дейман, Исоқбойнинг тоби қочиб қолган шекилли, кеча мачитгаям чиқмади.

— Тоби қочса қочгандир. Қариганда қийин бўлди шўрликка. Буям ҳали ҳолва, Оқилбекнинг гапига қараганда, шу ой ичидаги текширувчилар келармиш. Камиссия!

— Йўғ-э, жуда унчалик эмасдир, — дея гурунгга пишанг беради ўтирганларда бири.

— Ҳа! — дейди нотиқ ишонч билан, худди комиссия аъзолари билан шахсан бориб гаплашиб келгандек.

— Нега шароит яратиб бермадиларинг деб ҳаммамизни тергов қилайкан.

— Ия, ҳали бизлар гувоҳликка ўтсак эди, — дея яна бирови хиринглаб кулади.

— Ўтсак ўтаверамиз-да. Лекин биронтанг Исоқбойни ёмонотлиқ қилманглар. Чол не деса шуни маъқуллаб тураберинглар...

Бу гапларнинг бир учи Зилай байча кўмагида Маликанинг қулоғига етказилганда қиз шу қадар асабийлашдики, тутқаноғи тутган одамдай тишлари тикиллаб, бутун вужуди қалтирай бошлади. Сўнг базур хонасига кирди-ю, ўринга юзтубан кулади. Шу ҳолида узоқ ётди.

Хона тўрида, сандиқ ёнидаги бир кишилик ўринда Бекпўлат мук тушиб китоб мутолаа қиласди. Малика аразлаб, ўринни бошқа-бошқа сола бошлагандан бери хотинига ёкиш учунми, Бекпўлат бўш қолди дегунча китобга ёпишарди.

Бекпўлат билган қишлоқ аёллари, янгалари сира Маликага ўхшамасди. Тўғрироғи, Малика уларга ўхшамасди. Қишлоқ аёллари билан муомала қилиш осон. Аввал уришиб-сўкиб, бир пасдан кейин яхши гапирсанг бўлди, дунёда сендан яхши одам йўқ. Малика-чи? Кўнгли шу қадар нозикки, сал ёвқарашиб қилсанг ҳам ҳафта-ўн кун ўзига келолмай юради.

Маликанинг ҳар томонлама азоб чекаётганини кўриб Бекпўлатнинг унга раҳми келарди. Ҳозир ҳам китобни ёстиқ устига қўйди-да, сассиз қадамлар билан хотинининг тепасига келди. У аввал бир лаҳза иккиланиб турди, сўнг Маликанинг елкасига қўлини қўйди. Бекпўлат шу заҳоти хотинининг бутун вужуди қалтираб кетганини сезди...

* * *

Малика бутун аламини меҳнатдан ола бошлади. Кун совуқ бўлишига қарамасдан Норбувидан

эртароқ туриб уй юмушларининг бир қисмини саранжомлаб қўйишга ҳаракат қиласди.

Бир куни у оғилхонада молларнинг тагини тозалаётганди, кўча эшик тарафдан кимдир исми ни айтиб чақирди. Малика ота-онам келдимикан деган ўйда ҳовлиқиб, қўлида курак билан кўчага югуриб чиқди. Қараса ўттиз беш ёшлардаги, юпунгина кийинган жувон совуқда титраб-қақшаб турибди.

— Аёл ночор қолгандай жилмайишга уринди.

— Сизга бир илтимос билан келувдим.

— Майли, қўлимдан келса bemалол. Қани, уйга кирайлик.

— Йўқ, йўқ, — аёл ортга чекинди. Қайнотангиздан уяламан.

Маликанинг кўнглига ғулғула тушди.

— Нима гап ўзи, тинчлиқми?

Аёл муҳим сирни ошкор қилишга жазм этган-у, айтишга қийналаётгандай иккиланиб турарди. Малика бир амаллаб жувонни айвонга бошлаб кирди.

— Бор-йўғи иккита болам бор эди, — дея гап бошлади ниҳоят аёл. — Бир ўғил, бир қиз. Кўчада ўйнаб юриб балнисанинг олдига бориб қолган. Дўхтирлар эскириб қолган дориларни ҳовлининг тўридаги чуқурчага ташларкан. Шўрлик болаларим шу дориларни конфет деб ўйлаб... — Аёл ранги униқкан рўмолчасини олиб кўзларига босди. — Бирданига икковидан ҳам айрилиб қолдик. Эрим аламига чидамай дўхтирларни судга берди. Дўхтирларни бу иши қонун бўйича нотўғри экан-у... — Аёл оғир хўрсинди. — Текшир-текшир бошланиб, балнисанинг бош дўхтири қамалармиш деб эшитиб турганимизда иш бирдан тинчилидиколди. Тураниб камисияларга бир бало бериб

Оғзини ёпган... Шундан бери ўзимни қўйгани жой тополмайман. Менинг икки бирдай норасидам ўлиб кета берса-ю, катталар даврини суриб юраверса.

— Қачон... қачон шунаقا бўлди? — деди юраги увишиб кетган Малика.

— Уч ой бўлди. Уч ойдан бери ичим куйиб юрибман. Болаларимдан айрилганим етмагандай, Тураниб очиқда лаллайиб юрганини кўрсам тово-нимгача музлаб кетаман. Пули борнинг юзи ёруғ, пули йўқнинг юзи чориқ, деб бекорга айтишмаган экан. Айланайин сиздан, — аёл Маликага илтижо билан тикилди, — шу Туранибнинг устидан ўхшатиб бир газитга ёзсангиз. Зилай хола айтди, катта-катта жойларда танишингиз бор экан... Сичқоннинг ини минг танга бўлиб, типирчилаб қолганини бир кўрай ўша чўчқанинг. Эмаса эrim касал бўлиб борсаям қарамай ҳайдаб солибди... Йўқ деманг, айланай сиздан. Умримнинг охиригача алқаб ўтаман... Жон синглим...

Малика кўзларини охиста юмди ва деворга беҳол суюнди.

Ха, энди бундан бу ёғи... азоб, азоб...

РАШК

Овулнинг энг сулув қизи Хосият кўшни қишлоқлик Донабой чолнинг тўнғичи Шералига турмушга чиққанида ўн етти яшар навниҳол қизча эди. Келинлик либослари унинг бир хуснига ўн хусн қўшиб юборди... Аҳвол шу даражага бориб етдики, ҳамкишлоқлар янги келинчакни кўриш учун келавериб Донабой чолнинг безорини чиқариб юбориши. Бунинг устига куёвтўра адабиёт ўқитувчиси эмасми, ота-онасини юз-хотир қилиб ўтирмасдан хотини атрофида парвона бўлар, ширин сўзларини аямас, иложини топса, унинг қўлини совуқ сувга урдирмасам дерди. Бу қилиқ айниқса онага ёқмас, ғаши келар, баъзан-баъзан жуда энсаси қотиб кетган маҳаллари чолига қараб: “Шу боламиз тозагина чуччи чиқди-ёв”, деб кўярди.

Аммо...

Кетма-кет туғилган уч бола Хосиятни ўзгартириб юборди. Хосият келин озиб кетди, ёноқ суяклари туртиб чиқди, юзига ажин тушди, негадир чакка соchlари эрта оқара бошлади. Аввалги назокатларидан-ку, асар ҳам қолмагандек. Ўзиям эрта-кеч тинмайди-да. Бош келин эмасми, рўзғорнинг бутун оғирлиги унинг елкасида. Қайнилари ҳали ёш, қайинсингиллар эса эрга тегиб кетишган. Эрталабки соат тўртдан юмуш бошланарди: сигир соғиш, ҳовли супуриш, нон ёпиш, уй тозалаш, тушлик овқат, кечки овқат, молларнинг тагини

тозалаш, тезагини йифиб таппи қилиш... Хосият келин ўзига енгилроқ бўлсин, дея аввалига фақат сигирларнинг тезагини таппи қилас эди. Бир куни қайнонаси таҳорат олишга ўтаётиб, кўйларнинг кийи қўшиб қилинса, таппи яхши чиқишини писанда қилиб қолди...

Донабой чолнинг қорамоли кўп эди. Кўз-қулоқ бўлиб туради деб оғилхонанинг орқа тарафига катта қопағон бир итни боғлаб кўйганди. Янги келинлик даврида ит Хосият келинни кўрди дегунча ипини узгудай вовулларди. Кейинчалик ювинди-чайнди бериб ўзига ўргатиб олди.

Катта рўзғорнинг ташвиши ҳам катта бўларкан. Хосият келин бир пас чўзилиб дам олишга зор эди.

Бир куни эри дабдурустдан унга:

— Хоси, сал ўзингга қараб юрсанг бўлмайдими? — деди.

— Энди мени келин қилишармиди? — деди Хосият келин бепарво оҳангда.

Шерали унга ғалати-ғалати қараб кўйди.

Яна бир куни Шерали унга:

— Тузукроқ кўйлагинг йўқми? Эгнингдагининг ранг-рўйи қолмабди-ку, — деди.

Бу сафар овози баландрок, жеркиброқ чиқди.

Хосият келин бир зум кулимсираб турди-да сўнг:

— Атлас кўйлак кийиб, мол тагини тозалайманми? — деди.

Эри миқ этолмай қолди. Кўзларини олиб қочди. Хосият келин ўзича: “Бопладим, — деб ўйлади. — Иккинчи менга бу ҳақда гапирмайдиган бўлди”.

Бироқ кўп ўтмай яна шу ҳақда гап очилди.

Ўша куни эрининг бироз кайфи бор эди. “Кўлингдан таппининг ҳиди келаяпти, бор, яхшилаб ювиб ке”, — деб кечаси хотинини ҳовлига чиқариб юборди. Хосият келин кир совун билан уч-тўрт марта ювса ҳам қўлидан ҳид кетай демасди. Охири

чорбоғдан ўтадиган ариқ бўйига бориб, қўлларига лой чаплади. Анча вақт шу кўйи ўтирди. Сўнг ювиб ташлаб, ортига қайтаркан, хўрлиги келиб кўзларига ёш тўлди. Келин бўлиб тушганидан бери биринчи марта йиғлаши эди. Олма дараҳтига суяниб ўксисб-ўксисб, узок йиғлади. Ўзини босиб, юзини ариқда оқаётган лойقا сувга чайиб, уйга кирганида эри аллақачон ухлаб қолганди.

Эртасига эрталаб у: “У ёқ-бу ёққа чиққанда киярман” деб сандиққа солиб қўйган охорли кўйлакларидан бирини кийиб, пардоз-андозини ўринлатиб ҳовлига чиқди. Бостирма тарафдан таҳорат олиб қайтаётган қайнотаси ҳайрон бўлиб келининг қараб қўйди. Хосият келин буни сезди ва ўнғайсизланганидан югуриб ошхонага кириб кетди.

Донабой чол уйга кириб, кампирга шипшиди:

— Туриб хабар ол, келининг қаёққадир отланяпти-ёв?

Тўладан келган Рисолат кампир лорсиллаб ҳовлига чиқди. Ошхонанинг очиқ деразасидан келининг хамир қораётганини кўриб, секин ортига қайтди.

— Орқасидан пойлаб юраманми, ўзи айтар-да керак бўлса, — дея ўзича ғудранди.

Хамир юки қўлини ювиш учун чиққанида ҳовлида ўйнаб юрган қайни укалари югуриб келишиди.

— Янга, қаерга борасиз? Бозорга борсизми? — дея чувиллашди.

Хосият келин жуда ноқулай аҳволда қолди. Ўзини меҳмонда юргандай ҳис қилди. Ҳеч бир ишига укуви келмасди. Шу куни ёпган нони тагини бермай, парча-парча бўлиб чиқди. Тушликда шилпилдоқ сузаман деб, қайнонасининг хитой чиннисидан ясалган лаганини синдириб қўйди. Лаган Рисолат кампирнинг келинлигидан қолган эсдалик эди. Роса жифи-бийрони чиқди.

— Сен, — деди у келинига қўлини бигиз қилиб, — қош-қўзингни бўягунча ишингга пухта бўл!

Хосият келиннинг юзидан олов чиқиб кетди. “Лип” этиб уйига кирди-ю, кийимларини ечиб, ҳар ёқقا ота бошлади.

Бир неча кун ўтгач, Хосият келин кичкина қизини эмизиб ўтирган чоқда эри дабдурустдан шундай деди:

— Хоси, анави музқаймоқчи хотин бор-ку, магазиннинг ёнидан дўконча очиб олган, ўша жувонга қараб туриб, ҳайрон қоламан-да. Тонг саҳардан шаҳардан етиб келади. Кун бўйи қўли-қўлига тегмай савдо қиласди. Қош қорайганда яна шаҳарга жўнайди. У ёқдаям уй иши бўлса керак. Шундаям ҳеч ўзини олдирмаган. Жа-а олифта бўлиб юради. Қанаққиб улгуаркин-а ўзига қарашга?..

Хосият келин жавоб бермади. Лабини тишлаб, бўғзига тиқилган ўкирикни базур қайтарди. Шерали хотинининг ҳолатини сезмади. У аллақандай ёқимли кайфият оғушида маст эди.

Кунлар ўтган сайин Хосият келин эридан тортина диган бўлиб қолди. Шерали уйда вақти ёнида ўтиргиси келмас, рўзгор юмушлари билан ўзини чалғитиб, ҳовлида ивирсиб юради. Аёлнинг ҳеч кимга айтмаган бирдан-бир орзуси бор эди. Упаэликни, атиrlару тақинчоқларни эри совға қилишини жуда-жуда хоҳларди. Атиrlари шу қадар кўп бўлишини истардики, ҳеч қачон адo бўлмаса. Ўзидан таппи эмас, атиргул ҳиди анқиб турса... “Ёнимдан ўтган кишининг мастиликдан бошлари айланиб кетса”, дея орзу қиларди.

Аёл киши минг қилгандаям, тежамкор бўлади. Шу арзимаган атирга ҳам фалон сўм тўлайманми, деб кўзи қиймаслиги турган гап. Рўзғорида бирон камчилик сезилса, дарҳол ўзига нисбатан сахийлик қилиб юборганидан пушаймон бўлади. Эркакларнинг йўриғи бошқа, улар шартта кўзни

юмади-ю, олади-күяди. Кейин ҳеч қачон пушаймон ҳам бўлишмаса керак. Тағинам ким билади? Эри ундан гўзаллик талаб қиласди-ю, бироқ... Кўнғизда ҳам кўнгил борлиги эсигаям келмайди.

Хосият келин ўзини тортган сари эри ҳам ундан узоклашиб бораради. Мактабда дарси тугагандан кейин ҳам аллақаёқларда санғиб юрар, уйга кеч қайтар, баъзан овқатлангиси ҳам келмай, ухлаб қоларди.

Кунларнинг бирида Шерали уйга ҳовлиқиб келди:

— Бўлди, Хоси, ўқитувчиликни ташлайман, — деди у. — Шунча йил ишлаб, бирим-икки бўлмади. Савдо билан шуғулланаман.

— Ўқитувчилик яхши эмасми, тинчгина...

— Э, фирт бош оғриқ десанг-чи. Кечга тузукроқ овқат қилиб қўй. Мехмонлар келишади. Эр-хотин. Боғдаги олмаларга харидор топдим.

— Ие, нима деяпсиз, — ҳуши бошидан учди келиннинг. — Отам рухсат бермайди.

— Отам билан ўзим гаплашаман. Сен айтганимни қиласвергин.

Кечки пайт кўча эшик олдига яп-янги “жигули” келиб тўхтади. Ундан эр-хотин эмас, уч киши, икки аёл, бир эркак тушишди. Хосият келин меҳмонларнинг бири “музқаймоқчи хотин” эканлигини дарҳол англади. Аммо нохуш ўйларга бормади. Елиб-югуриб хизмат қилди. Шерали негадир безовта эди. Меҳмонлар олдида ўтиrolмай, ҳали уни, ҳали буни баҳона қилиб, туриб кетарди. Меҳмондорчиликдан сўнг меҳмонлар чорбоқقا ўтишди. Шерали ҳам уларга эргашди. Оғилхона ёнидаги боғлоқлик ит бегона кишиларни кўриб ҳуравериб, кулоқларини қоматга келтирди.

Хосият келин қозон-товоқларни ювиб олгач, сигир соғиш учун оғилхона тарафга ўтди. У сигирларнинг олдига кундуз тайёрлаб қўйган ем-

ларни қўйди-да, елинини сийпалаб, ийдира бошлади. Шу пайт оғилхонанинг тўридан, туйнук очилган тарафидан эркак кишининг зардали овози эшитилди. Хосият келин овоз эгаси эри эканлигини сезди. “Савдоси келишмаяпти-ёв”, деб қўйди ўзича. Бир оздан сўнг аёл кишининг: “Нима қипти? Нима қипти келсам?!.” дегани эшитилди. Хосият келин қизиқиши устун келиб, соғиши бас қилди, чеҳакни сигирдан узокроқ ерга қўйиб, туйнук томон юрди. Ташқаридан кўриб қолмасликлари учун энгашиб, деворга яқин ўтириди.

— Одамни нокулай аҳволга солдингиз, фақат иккаласи боради дегандингиз-ку, — дерди Шерали ўпкалаб.

— Нега нокулай бўларкан, — аёлнинг қувноқ овози эшитилди. — Хотинингиз қанақалигини билмоқчи эдим, холос.

— Ниятингизга етдингизми?

— Ҳа, лекин ёқмади, жуда-а... тўпори экан. Эрини бегона аёллар сўраб келганини кўриб, рашк ҳам қилмади-я...

— Сизни меҳмон деб ўйлаяпти-да. Юринг, анавиларнинг ёнига борайлик-чи.

— Сиз қўрқманг, улар айтган нархингизга олишади. Фақат... эссиҳ, шундай йигит хотинга ёлчимаган экансиз. Эрим мени ташлаб кетгандан кейин, роса уч йил иккинчи хотинини “шантаж” қилганман. “Музқаймок” дўконини очиб бериб кутилди шўрлик.

Аёлнинг ҳиринглаб кулгани эшитилди.

Хосият келиннинг оёқ-қўлидан жон кетиб, деворга суюниб қолди. Ҳаёлида: “Анави мегажин эримни йўлдан уряпти”, — деган ўй чир айланиб, хеч қўним топмасди...

Келин сут челагини кўтариб оғилхонадан чиққанида, шом туша бошлаганди. Меҳмонлар ҳали

чорбоғда айланиб юришар, қопағон ит баттар авжига чиқан, аккилайвериб, ҳамманинг жонига текканди. Пешайвондаги сўрида чорбоғдан кўз узмай ўтирган Рисолат кампир ҳам ниманидир сезгандай бўлди. “Ит акилламагандага мөхмонларнинг гап-сўзларини эшитиб олардим,” — деб ўйлаб хуноб бўлиб ўтиради. Келинининг сўлжайиб ошхона томонга ўтаётганини кўриб, секин имлаб чақирди.

— Анави овозинг ўчгурни сал кўздан панароқقا бойлаб қўй, — деди зорланиб.

— Хўп, — деди Хосият келин эшитилар-эшилмас овозда. Унинг ҳуши ўзида эмасди. Бутун вужудини ғашлик қамраб олганди. Юрагида музқаймоқчи аёлга нисбатан ҳали ўзи ҳам тўла тушуниб етмаган адоват пайдо бўлганди. “У мени эримга ёмонлаб, уни тортиб олмоқчи... Мени тўпури деди-я? Э, худо, энди нима қиласман? Қандай кунларга қолдим? Дардимни кимга айтаман?” Хосият итнинг олдига етгунча титраб-қақшаб борди. Қопағон ит уни кўриб тинчлангандай бўлди-ю, аммо тортинишини қўймасди. Аёл занжирни ечиш учун қозиқ ёнига ўтиаркан, зимдан олмазор тарафга қараб қўйди. Эр-хотин мөхмонлар ҳовли томонга қайтишаётган эди. Эри эса музқаймоқчи хотинга олмаларни кўрсатиб, алланималарни вайсар, бироқ аёлнинг иккала кўзи Хосият келинда эди. У қандайдир мазахомуз қараб тургандек туюлди Хосият келинга. Итни чорбоғдан ташқарига олиб чиқиб, боғламоқчи эди, ўтаётуб яна бир маротаба қаради, қалбида алам ва нафрат туйғуси қоришиб кетди, кўзларида қасос ўти аланга олди. Ва “бехос”дан қўлидан занжир тушиб кетди. Ҳамон жазавага тушиб, хураётган ит “ошиқ-маъшук” томон югуриб кетди. Бир лаҳза ўтар-ўтмас аёл кишининг жон ҳолатда қичқиргани эшитилди.

КУЙГАН ШАҲАР

“Худойим бир шаҳар яратмиш
икки жаҳон орасинда...”

Хожи Байрам

Кампир етмишларга борган, чўпдай озғин, ияги эртакларда тасвирангандан ялмоғиз кампирнинг иягидай олдинга тутиб чиқсан, лаблари хаётнинг шўриш азобларини татиб кўраверганидан тиришиб-буришиб қолгандай сўлғин ва қурук, бурни сўппайган, киртайган кўзлари чуқур ботган – маъюс боқар, аммо жаҳли чиққанида нафакат кўзлари хунукдан хунук чақчаяр, балки бутун юзида қўрқинчли ифода пайдо бўларди, қоқсувкагавдаси эса хиёл эгик, лекин жуда серҳаракат ҳамда чаққон, кийимлари эса ҳамиша тоза ва оҳорли эди.

У фира-шира қоронғида ачиған-чириған ҳидлар ўрнашиб қолган мева-чева бозорига одатдагидай ҳаммадан олдин келди. Бир қўлида кўш термос ва бошқа қақур-куқурлари ортилган яп-янги аравача, иккинчи қўлида каттагина тўрваҳалта. Тез юрганидан ҳарсиллаб нафас оларди. Кампир аравачани тортиб келаркан, қадди янада эгилар, шунинг учун ҳам кўйлагининг олд этаги узунроқдай кўринарди.

Кампир етиб келганида олтмишларга борган, соч-соқолига оқ оралай бошлаган қоровул энди-гина катта жигарранг темир дарвозани очиб, атрофни күздан кечираётган эди. У тонг ёриш-масдан бозорда пайдо бўлган кампирга кўзи тушиб, норозилик билан ғўлдираб қўйди:

– Саҳарлаб бало бормикин бу қари қарғага?!

Яхши ҳамки кампирнинг қулоғи сал оғирроқ, акс ҳолда бечора қоровулнинг соч-соқолидан асар ҳам қолмасмиди? Бироқ кампир қоровул билан сўрашмасдан ўтмайди.

– Яхши юрибсанми, Болтавой? Бола-чақанг омонми?

– Ҳа, омон, омон. Омон бўлмай нима... – ёқтири-майроқ жавоб берди қоровул. – Фақат сиз қачон менинг исмим Болтавой эмаслигига аҳамият бе-паркинсиз?

– Менинг уйчам ҳам омонми, Болтавой?

– Омон, омон. Ана қўққайиб турибди. Эшик-де-разалари беркитилган бўлса, ким ҳам тегинарди?!

– Ҳа, яхши...

Кампир бир оз юргач, чапга бурилиб, гира-ширада оқаринқираб турган уйчага яқин келди.

Қишида қалин палтосининг, ёз бўлса кўйлаги устидан мудом кийиб юрадиган енгил камзули-нинг чўнтағидан калит чиқариб, эшикни очди, ичкарига кирди.

Зум ўтмай, худди кампир келишини кутиб тур-гандай бозор бирдан жонланди. Дарвозадан турли кишилар, сотувчилар, ошхона эгалари, бозор хо-димлари кириб кела бошлади. Кечаси уюм-уюм қоплари устида тунаб қоладиган дехқон-сотувчи-лар негадир ҳар доим ҳаммадан кейин, бозорда шовқин-сурон қўпганидан сўнг эринибгина уйғо-нишади.

Бу вақтда кампир бирига чой, яна бирига аччиқ қаҳва дамланган термослари ёнида кела-келгунча

шақир-шуқур қылган чашкаларини чайишга улгурғиб, ҳар доимги мижозларини кутиб олишга шайттарарди.

– Розияхон, мана қаҳвангиз, – кампир қайноқ ховур күтарилаётган чашкани қирқ беш-эллик ёшлардаги аёлга узатди. – Кеча бундан кейин сал қуюқроқ дамланг, дегандингиз, мана, айтганингиздай дамладим.

Картошка-пиёз қопларининг устида ўтирган Розияхон деганлари – унинг исми аслида Салимахон, лекин кампир уни ҳар доим Розияхон деб атайди, у тўладан келган, билаклари лорсиллаган, ойтовоқдай юзида кўзлари бир чизикдай билиниб-билинмай турган, шартакироқ аёл, – ёйилиб илжайганча кампирнинг қўлидан чашкани оларкан:

– Ўзимнинг ақлли опокимдан айланай! – деди гўё қаршисида етмиш яшар кампир эмас, етти яшар бола тургандай эркараб. – Ох, ох, ҳидини қаранг, ҳидини... Эртага яна шунақасидан бўлсин, хўпми?

– Хўп.

Салима-Розия чойчақа узатди.

– Энди борақолинг. Сиз билан валақлашишга вақтим йўқ.

Кампир бениҳоя хурсанд бўлиб пулни олди, санамасдан чўнтағига солиб қўйди-да, аравачасини судраб йўлида давом этди.

Икки-икки ярим соат ичида мижозларини чой ва қаҳва билан сийлаб чиққан кампир чошгоҳгача – яна чой тарқатиш вақти бўлгунча бекор турмаслик учун ўзига иш қидира бошлади. Ахвол деярли ҳар доим шундай: сотувчиларни чой ва қаҳва билан сийлаб бўлгач, у аравачаси билан бирорларнинг юкини ташийди, картошка-пиёз саралайди, жуда бўлмаса сомсапазларга ёрдамлашиб, чойчақа ишлайди. Ёки бир чеккага ўтиб иштиёқ ва диққат билан аравасини тозалаб, у ер-

бу ерини кўздан кечирган бўлади. Ишқилиб бекор турмайди-да.

Фақат чошгоҳдаги “чайпитье”дан кейингина кампир бир оз нафас ростлаш ва гурунглашиш учун таниш мижозларидан бирининг олдига келиб дардлашиб ўтиради.

– Уф, чарчадим, Жамила, жудаям чарчадим... – дея зорланди у одатдагидай ҳорғинлик билан. – Болаларим қачон катта бўлишаркин-а?! Ишонасанми, кечқурунлари оёқларим шунаقا қақшайдики! Айниқса бошим шундай оғрийдики, худди қизилиштон тумшуғи билан дарахтни тўқиллатиб ургандай бир шовқин қулокларимда ғувиллаб кетади...

Савдо тиғиз бўлишига қарамай, кампирни эшитиш учун ҳамиша вақт топадиган, кўнгли бўш, раҳмдил олма сотувчи аёл – дарвоҷе унинг исми Сожида, лекин кампир унга Жамила деб мурожаат қиласди, – ачинаётганини сездирмасдан:

– Кизингизнинг бўйи чўзилиб қопти, худо хоҳласа ҳадемай ёнингизга киради, – деди хайриҳоҳлик билан. – Кўпам ўзингизни уринтираверманг, чарчаб қоласиз.

– Чарчасам гўрга, – деди кампир. – Чарчасам нима бўпти, бир юмалаб ухлаб олсам, ҳаммаси ўтиб кетади. Мендан кўра, болаларимга қийин. Улар менсиз қийналиб кетишли. Ахир ўзингиздан қиёс-да, тонг саҳарлаб бозорга келиб, қош қорайгандা уйга борасиз. Бола бечоралар нима еб, нима ичиб ўтиришибди... Бир ерлари оғриб қолса, кимга айтишади... Ким уларнинг жонларига оро киради?.. Кеча кенжатойим Фаррухнинг қорни оғриб қопти. Бечора болам тушгача тўшакда буралиб ётибди... Мен бундан бехабар...

– Ноила қарамабдими укасига? – сўради Жамила-Сожида.

– Қараган. Қизим боёқиши укасига меҳрибон.

Дори берибди, қорнини жун рўмол билан боғлаб кўйибди. Лекин Фаррух тинчланавермагандан кейин укасига қўшилиб йиғлабди-да бечора...

– Ҳа, тирикчилик-да энди... Илож қанча...

– Тирикчилик ҳам ўлсин. Эртадан кечгача бозорда изғиб юрганимга яраша, дурустроқ топсам эди.

– Сиз яхши топасиз, опоқи. Ҳадеб ўзингизни қийнайверманг.

– Бе, қаёқда... Кеча кун бўйи паттачилар қувғинида юрдим. У ёққа ўтсам ҳам, бу ёққа ўтсам ҳам кетимдан қолишмади. Охири бозордан ҳайдаб чиқаришди. Қанақадир текширувчи келармишми-ей. Сиз эшитмадингизми?

– Йў-ўқ... Эшитмадим...

– Сизга яхши, ҳар қалай бозорда ўз жойингиз бор. Шунинг учун ҳам сизга индашмайди. Бизга ўхшаганларни эса кун бўйи ортимиздан қувишади, ярамаслар.

– Сиззиям уйчангиз бор-ку...

– Бе... Бу уйчани Наримон бойвачча инъом қилган. Савоб учун дегандир-да. Лекин у ерда ўтиргим келмайди.

– Сизлар ҳам патта олсангиз яхши бўларди.

– Бе, ўзи арзимаган чойчақа ишласам, бу пулга патта оламанми, рўзгорга ишлатаманми?

– Ҳа, майли... Ҳали ҳаммаси яхши бўлади, куйинманг.

Кампир бир лаҳза жим қолди. Сўнг маҳзун оҳангда деди:

– Ҳа, яхши бўлиб кетар. Лекин унгача ета олармикинмиз?.. – кампир чуқур хўрсинди. Мунғайиб қолди. Шундай кезларда у аллақачон умрини яшаб бўлган, куриб-қовжираган бўлса-да, дараҳт шоҳида илиниб, амал-тақал жон сақлаб турган япроқка ўхшарди.

— Худо хоҳласа ҳаммаси яхши бўлади, — деди Сожида-Жамила.

Кампир Жамила-Сожида билан хайрлашди.

Чунки вақт тушга яқинлаб қолганди.

Бозорда кампирнинг чой ва қаҳвасига ўрганиб қолган сотувчилар анча-мунча эди. Улар кампирнинг ўзидан кўра, ёшини хурмат қилишар, аллақандай тушуниксиз, қачонлардир бўлган-бўлмагани номаълум воқеалар ҳақидаги ҳикояларини сабр-тоқат билан эшитишар, эски-янги пул аралаш қайтим қайтарганида индамай олишар, Сожида-Жамилага ўхшаганлар кампир йиғлаганда қўшилишиб йиғлашар, бошқа одамга, яъни неча йиллардан буён кампирнинг хотирасидагина яшаётган, ҳозирда бор-йўқликлари маълум бўлмаган одамларга эврилганларидан оғринишмас, лекин ҳеч қачон насияга чой ҳам, қаҳва ҳам олишмасди. Мободо насияга чой ёки қаҳва сўрагудай бўлишса, улар қанчалик қадрдон бўлиб қолганларига қарамасдан, кампир бунга асло рози бўлмаслигини жуда яхши билишарди.

— Хафа бўлманг, синглим, мижозим бўлсангиз ҳам насияга беролмайман. Уйда учта болам очдан оч ўтиришибди! Мен уларни мана шу чойчаقا билан боқишимни била туриб, насияга сўрагани уялмайсизми?! — дея бобиллаб берарди кампир насия сўровчининг кўзига тик қараб.

Баъзида у бирдан бозордан ғойиб бўлиб қолар, орадан уч-тўрт соатлар ўтгач, гоҳ маҳзун тортган, гоҳида йиғлаб, кўзлари қизарган ҳолда яна пайдо бўларди.

— Холиданинг аҳволидан хабар олгани бордим, — дерди у доимий ҳамсухбати Сожида-Жамиланинг олдига келиб. — Бечора бир аҳволда ётибди... Ачиниб кетдим... Ўлиб қолса, болаларининг аҳволи нима бўлади?...

Кунларнинг бирида эса...

– Холида шўрлик оламдан ўтибди! – деган хабар билан келди юраги ёрилгудай бўлиб. – Э худойим!.. Энди нима бўлади? – Кейин бирдан қони қайнаб кетди: – Ҳаммасига эри Шокир пиёниста айбдор! Уни суд қилиш керак! Осиш керак уни!

Бозорда янги пайдо бўлган кишилар дастлабки кунлар чой сотиб тирикчилик қиласидиган кампирнинг бип-бинойидай усти-бошию ҳорижий арава ва термосларига қараб туриб ҳайрон бўлишади, бу номутаносибликтининг тагига етгандаридан кейингина кампирга ҳам, унинг алмойи-алжойи гапларига ҳам ортиқча эътибор бермай қўйишади.

Аммо бу ердагиларнинг ҳаммаси ҳам гўё ўтмишдан тушиб қолгандай кечгача бозорда тентираб юрадиган, ҳеч ким мушугини пишт демасада, мудом паттачилардан ўзини олиб қочишга уринадиган, бозор мутасаддилари у билан хушмуомалада бўлишса ҳам негадир улардан норози бўлиб, бир нималар деб қарғаниб юрадиган, аллақандай тушуниксиз, қачонлардир бўлган-бўлмагани номаълум воқеалар ҳақида гапиравериб чарчамайдиган кампирни ҳурмат қиласи деб бўлмасди. Уни ёқтирмайдиганлар – айниқса овозини узоқдан эшитиши билан асаби бузилиб кетадиганлар, кўзини шамгалат қилиб, устидан куладиганлар, ортидан тош отадиганлар ҳам талайгина эди.

– Зарилга зарил, анави шумкампирга нима зарил экан, жонини бунча қийнаб?! Уйида мазза қилиб ўтирмайдими?! Агар менинг ўғлим амалдор бўлганидами!

Ҳали айтганимиздай, кампир бундай ивиршивирларни ҳадеганда эшитавермайди, аммо эшитиб қолса борми, ҳеч кимни аяб ўтирмайди. Унинг тили заҳар эди:

– Ҳа, оғзингдан қонинг келгур! Мен билан нима ишинг бор?! Нима, бозор сенинг маҳрингга

тушганми ёки уни Наримон бойваччадан сотиб олганмисан?!

Гап отган одам вазминроқ бўлса яхши, кампир кўп шанғилламайди, айтадиганини айтади-да, аравачасини судраганча йўлида давом этаверади. Лекин рақиб асабийроқ, жанжални пулга сотиб оладиганлар тоифасидан бўлса борми, бозорга ўт кетди дейверинг.

– Нималар деб валдираяпсиз? Наримон бойвачча деганлари ким ўзи? Бозорком Содиқ бойвачча-ку! Сиз қайси замонда яшаётганингизни биласизми ўзи?!

Жанжалкашнинг шу уч оғиз гапи етарли, кампир бирдан қутуриб кетади.

– Хой манжалаки, нима, мени эсдан оғиб қолган деяпсанми?! Бозорнинг хўжайнини Наримон бойвачча эканлигини билмасанг, юр, ўзим кўрсатиб қўяман!

Кампир аравачасини улоқтириб юборадиу, жанжалкаш томон ҳезланади.

Аллакимлар ҳай-ҳайлашиб, уларни ажратиб қўйишса олам гулистон, бир зумда кўзлари қонга тўлган кампир ҳансирай-ҳансирай нари кетади. Акс ҳолда у йиқилиб қолгунча, эркак-аёл демасдан ёқасига чанг солиб, айюҳаннос кўтариши турган гап. Аллакимлар бозор маъмуриятига кампирнинг устидан шикоят ҳам қилишади, лекин у ердагилар негадир минғирлашдан нарига ўтишмайди. Кампирнинг танобини тортиб қўйиш эсларига ҳам келмайди. Қай бир йили эса... ҳе йўқ, бе йўқ, бозор маъмурияти кампирга бемалол ўтириб савдо қилиши учун барча шароитлари муҳайё бўлган уйча совға қилди. Аммо кампир уйчада бир соат ҳам ўтириб савдо қилмади.

Шунинг учун ҳам бозордагиларнинг кўпчилиги кампирдан безиб қолишган. Айримларнинг уни

кўргани кўзи йўқ. Баъзилар ундан очиқдан очик нафрлатанишади.

– Тур, йўқол, эси паст кампир! Ким сени чақириди бу ерга?! – деб ҳайдашади улар тап тортмасдан.

Аммо кампир ҳам индамай кетадиганлар хилидан эмас.

– Оғзингдан қонинг келгур, нега мени ҳайдаб соляпсан?! Нима, сенга ҳалақит беряпманми? Ё олдингдаги ошни олиб қўйдимми?!

Шундай кезларда қаердан бўлса ҳам етиб келган Сожида-Жамила кампирнинг жонига оро кирап, уни бу ердан узокроқقا олиб кетарди.

Бир куни бозордагилар – афтидан улар янги сотувчилар эди – кампирни роса майна қилишиди. Чунки у бир замонлар золим подшоҳ зулмидан қочиб, ғорга беркинган ҳамда тангрининг амри билан уйқуга кетган ва уч юз йилдан кейин уйғониб, бозорга чиққан садоқатли ва дунёбехабар йигитларга ўхшаб, аллақачон муомаладан чиққан эски пуллар билан савдо қилаётганди-да.

– Даққионусдан қолган пулларни бошимизга урамизми?! Бу кампирнинг томи кетиб қолган. Уни аллақачон жиннихонага топшириб юбориш керак эди!

Кампирнинг ғазаби қайнаб кетди. Тожи юлиб олинган хўроздай жаҳд билан олишувга шайланди. Лекин “...жиннихона” деган сўзни эшитиб беихтиёр қалтираб кетди ва шаштидан тушди.

– Бу одамлар ақлдан озиб қопти... – дея ғудранди у йўлда кетиб бораркан.

Кейин ажабланганча Сожида-Жамиланинг олдига борди.

Сожида-Жамилагина кампирниг қалбига йўл топа олади, у пул алмашганини айтганидан кейин кампир бир нималарни фахмлагандай бўлиб:

– Э-ҳа, гап бу ёқда экан-да, – деб қўйди. – Мен дунёбехабар...

Кампир жимиб қолди.
Лекин зум ўтмай Сожида-Жамилани саволга тутди:

— Пул қачон алмашди ўзи?

Бундай кезларда нима дейишни яхши била-диган Сожида-Жамила шу заҳоти жавоб берди:

— Куни кеча.

— Ҳа, шунақа денг.

Кампир бир зум ўйланиб турди, сўнг афсусла-ниб:

— Кеча телевизор кўрсам бўларкан... — деб қўйди.

Сожида-Жамила индамади.

Кампир яна бир зум ўйланиб турди-да, сўнг:

— Ҳозирги одамларнинг шунчалик қаҳри қат-тиқ-ки, бу ахволда йигирма йилдан кейин нима бўларкин?.. Билмадим... — деди аста ўзига ўзи гапиргандай.

Сожида-Жамила изтироб ичида:

— Аллақачон йигирма йил ўтиб бўлган-у... — дея шивирлади.

Кампир ўртоғининг гапини англамади.

— Келинг, бир пас дам овлолинг, — Сожида-Жамила кампирнинг ҳалидан буён қаршисида тик турганига аҳамият бермаганидан хижолат тортиб, унга жой беради.

Шунда кампир бирдан ўзига келиб дейди:

— Вой, безовта бўлманг, ўргулай. Ўзингиз бема-лол ўтираверинг жойингизда. Мен қариб боряп-манми? Энди элликнинг бошини тутган одамга бу юришлар нима!

Баъзида, дардлашадиган мижозлари бозорда кўринмай қолса ёки тайинли бир иш тополмаган кунлари кампир зерикканидан одамларнинг аса-бига тегиб, кечгача бозорда беҳудага изғир, ҳеч ерда тўхтамас, аравасини шалдиратиб судраганча гўё бир нарсани қидираётгандай расталар ора-

сида айланиб юраверади, юраверади; савдо тифиз пайтлари оломон уни у ёқдан-бу ёқقا суреб ташлар, бирвлар атай туртиб ўтар, лекин кампир хеч нарсани сезмас, кўзи кўр, қулоғи кар, ўз маромида давом этаётган ҳаётни ҳис қилмас, қаердадир узокда, ҳаммадан, ҳамма нарсадан узилиб қолгандай, гангираганча кезиб юраверади; гоҳида эса дуч келган одамнинг ишига бурнини тиқар, суҳбатларига аралашар, ораларида гап қочганидан кейин худди бу ердагилар уни бозордан сиқиб чиқаришга уринаётгандай туюлиб, қаттиқ жаҳли чиқиб кетар, кейин хато устига хато қилиб кўяр, онгини қуршаган зулмат пардасига тобора чуқурроқ кириб борарди... оқибат шу даражага етадики, ҳеч ким кампирни эплай олмай қолади; кампир ўтмишда ҳеч қачон журъат қила олмаган ишни қилар, исён кўтарар, ниҳоят қидириб юрган одамини топгандай, ўзи итдан ҳам баттар ёмон кўрадиган бирорта паттачининг юзига боплаб тупурар, йиллар давомида ўзини эзив ташлаган оламжаҳон беъмани сўзлар уюмини юрагидан итқитиб ташларди. Бундай кезларда унинг телбадан фарқи қолмасди.

Шунда кимдир кампирнинг уйига хабар беради шекилли, ўн дақиқа ўтар-ўтмас етиб келган “жип”дан иккита барваста йигит тушадиую жазаваси қўзиб, айюҳаннос кўтараётган кампирни авайлаб икки қўлтиғидан олишиб, бозордан чиқиб кетишади...

Йўқ, у телба эмасди. Унинг хотираси инқизорзга учраган, неча йиллардан бўён кўрлик дунёсидан ҳам баттарроқ бир зулмат ичида, оламдаги ўзгаришлардан бехабар, на кечанинг, на бугунниниг фарқига бормасдан, ёлғиз, ҳаттоки ёлғиздан ёлғиз, ҳудудсиз зулмат ичида яшарди. Онг-шуурида ҳаётининг фақат энг оғир дамлари – йигирма йил муқаддам, бозорда чой сотиб тирик-

чилик ўтказган даври – худди ҳалокатга учраган вақтнинг бир парчасидай қотиб қолган; ёши бир ерга борган, рўзгорнинг барча ташвишларидан қутилган бўлса-да, ҳамон илгаридаи, яъни оиласнинг бутун ташвишлари ўз гарданида бўлган вақтлардагидай куйиб-пишиб юрар, ҳолдан тойиб ётиб қолгунча бозордан бери келмас, лекин ҳеч қачон бирорвнинг молига кўз олайтирмас, ўзи ўқимаган ва онгига сиғдира олмаган сонмингта дунёвий қонунлардан фақат биттасини – “Ҳалол яша”, деганини жуда қаттиқ ушлаб олган, худди битта тўғри чизиқ бўйлаб тинимсиз бориб-келаётгандай яшар, келажак эса... назарида жуда узоқда, ҳеч етиб бўлмайдигандай туюларди; жисми кундан кун қуриб-қовжираб борар, гўё тириклайн мурдага айланганди, аммо бир кун бозорга чиқмаса фарзандлари оч қоладигандай мудом қўрқиб яшарди, ваҳоланки ўзи қўрқсан даҳшатли нарса аллақачон юз берганини, у бозорда юрганида уйи ёниб кетганини, қизи билан кичик ўғли олов ичида қолиб нобуд бўлганини, фақат бир ўғли омон қолганини, дугонаси Холида пиёниста эрининг калтагидан кейин ўнглана олмай, жиннихонада ётганини, қўшнилари унинг болаларини етимхонага топшириб юборишганини эслай олмасди...

Хуллас, кампирнинг хотирасида на ўтмиш бор, на келажак.... фақат бугунни – бир лаҳзалик умрни яшаб қолиш билан чекланарди.

Гоҳида эса беихтиёр эски уйига бориб қолади.

Ёниб кетган ҳовли қайта таъмирланган, лекин энди бу ерда бегонадан бегона кишилар яшайди, улар кампирга яхши муомала қилишади, гўё муруват кўрсатаётгандай унга уй ичига киришга рухсат ҳам беришади. Кампир нега бу ерга келганини, нима мажбур қилганини сезмаган, англамаган ҳолда хоналарни бир-бир айланади, ҳар

Сибир хонанинг ҳар бир бурчаги кампирнинг хотираларини ўзида сақлайди, зеро хотиралар ёнмайди, аммо бу хоналар кампирнинг ўзи сингари қизғанчик, хотираларни унга бермайди, бироқ у кетаётганида ортидан мунғайиб қараб қолишади...

Кампир яна хотираларининг синик парчалари сочилиб ётган бозорга қайтади.

– Ернинг қоқ қиррасида турганга ўхшайман, – дейди у ўйчанлик билан шу куни Сожида-Жамилага. – Ернинг қоқ қиррасида. Пастга энкайсам тамом... ҳаммаси тугайдигандек... Нега бундай, билмайман.. Ўлай агар билмайман. Сенда бунақа бўлмайдими сира?

Сожида-Жамила маҳзун бош чайқайди.

Кампир муштини иягига тираганча жим қолади. Шу туришида у нақ қари қарғанинг ўзгинаси эди.

Аллаким, бу сотувчими ёки харидорлардан, номаълум, – ўтиб кетаётиб тасодифан кампирни туртиб юборади, кейин шоша-пиша узр сўрайди, аммо у аллақачон гишт қолипдан кўчганди, кампирнинг чатнаб турган асаблари ўт тушган қуруқ гиёҳдек бирдан пов этади...

* * *

Тинчлантирувчи уколдан кейин кампир одатдагидай уч-тўрт соат донг қотиб ухлади. Сўнг ҳеч нарса бўлмагандай, тиниқиб уйфонди. Уйфондию соатга қаради, кейин шоша-пиша ўрнидан турди.

– Ўлсин... Ухлаб қопман...

Кампир ғудранганча даҳлизга чиқди.

Бу ерда унга ўттиз ёшлардаги жувон пешвоз чиқди.

– Яхши ётиб турдингизми, ойижон?

– Роса ухлабман-да ўзиям, – деди кампир унга жавобан. – Сал вақтлироқ уйғотсанг бўлмасмиди?

- Яхшилаб дам олволинг дедим-да...
- Дам олмасам гўрга, дарров термосга чой дамла.
- Ойи, кеч бўлиб қолди...
- Кечки бозорга чиқаман.
- Ойи... илтимос, бугунча чиқмай қўя қолинг.
- Нега чиқмайман? Оёғимни узатиб уйда ётсам, тирикчилик нима бўлади?
- Эртага чиқа қоласиз. Ҳали Розия опоқи айтди, бугун бозор вақтли тугабди. Қандайдир текширувчилар келармишми...

Кампир бирдан ҳушёр тортди.

— Текширувчилар?

— Ҳа.

Кампир ўйланиб қолди.

— Розия бежиз хабар бермаган. Яххиси чиқмай қўя қолай. Сенам уйингга кета қол, Манзура. Қайнонангдан балога қолма тағин.

— Қайнонамнинг зуғумидан қочиб келиб сизникида яшаб юрибман-ку, қаёққа бораман?

— Ҳа, айтганча... хаёлимдан кўтарилибди... Қайнонанг ўлмади, сен кутилмадинг.

— Овқат тайёр, сузаверайми?

— Ноила билан Акбар қани? Фарруҳ ҳали мактабдан келмадими?

— Улар ошхонада, сизни кутиб ўтиришибди.

— Менам ҳозир бораман.

Кампир ҳовлига чиқди.

Нақшинкор панжарали, мармар зиналардан бир-бир босиб тушаркан, атрофга ҳайрат билан бокди.

Ҳовли жуда ҳашаматли эди. Бундай уйларда факат министрлар яшаши мумкин...

Аммо кампир ҳеч қачон бу ерда ўзини ўз уйда яшаётгандай хис қиласди. Бу уйдаги ярқироқ ҳаёт унинг кўзларини қамаштирас, гўё келажакка сайёҳат қилгандай, баъзида ёқимли туш кў-

раётгандай бўларди холос. “Қачон ўз бошимга уй битадио, бу ердан тезроқ даф бўларкинман?..” – деб қўярди у гоҳида сиқилиб кетганидан. Ўзининг бундай ҳашамат ичида яшаётганининг сабабини гоҳида бозорком Наримон бойваччанинг илтифоти сифатида қабул қиласарди, гоҳида эса ижарада турибман, деб ўйларди.

Атрофидаги нарсаларга тикилиб ўтириб кампир гоҳида бирдан ўзини кўланкалар водийсида юргандай ҳис қиласар, ғалати кайфият чулғаб олар, ҳаётининг оғир дамларини қайта ва яна қайта яшаётгандай алланималар таниш туюлар, лекин мавжуд олам билан ўзи ўртасида қандайдир ўтиб бўлмас тўсиқ бордай, тўсиқ оша назар ташлашга нимадир изн бермаётгандай, аллақандай шарпалар кўз олдидан бирма-бир ўтишга шайланиб тургандай бўлар, юраги санчиб кетар, ўзини чукурга тушиб кетгандай ҳис қиласар, мудом ғувиллаган шамол эсиб турадиган чукур... кампир чукур деворларига тирмасиб, юқорига чиқишга уринар, аммо ғувиллаган шамол овозига қўшиб, уринишларини ҳам аллақаёқларга олиб кетар, кампир эса чукурда тиним билмай айланаверади, айланаверади, худди бозорни айлангандай, лекин кўп ўтмай эртанги тирикчилик ҳақида ўйлаб дарров ўзини алаҳситар, аммо нима учун безовта бўлганидан сира ҳам ташвишланмас, қўрқувга тушмас, қалби даҳшатли ёнғиндан кейин қуриб-қақшаб ётган қўрғондай яна ҳувиллаб қоларди. Ким билсин, эҳтимол у озгина бўлса ҳам қўрққанида, сергак тортганида, ҳаётга қайтармиди, лекин у қўрқмасди, таажжубланмасди, ҳатто ўйлаб ҳам қўрмасди, – худди ерга уруғ сочиб қўйгану, лекин кейин ҳаммасини унугланган дехқондай, – афтидан шунинг учун ҳам тобора зулмат қўйнига кириб борарди...

Ярим соатлардан кейин кампир намхуш юзини силағанча ошхонага кириб келди.

– Ура, бувим келдилар!

Саккиз ёшлардаги болакай югуриб келиб кампирни құчоқлаб өлди.

– Буви, дейсанми, Фаррух? Қачон ақлинг киради сенинг? – кампир енгилгина танбек берди болақайга.

Кейин бириң-кетин салом берган қызча билан йигитчага қараб:

– Ноила, бугун ёпган нонинг тандирдан тушиб қолмадими? – деб сүради.

– Йўқ, мана, кўринг, бугун жуда чиройли нон ёпдим... о-ойижон... – қызча кўзлари жавдирағанча бир жуфт нонни узатди.

– Ҳа, яхши, анча қўлинг кеп қопти. Энди бозорда шошилмасдан, хотиржам юрсам бўларкан. Сен-чи, Акбар, Самаднинг дўконидан ун олиб келдингми?

– Ҳа, олиб келдим, – деб жавоб берди Акбар четга қараганча.

– Дуруст...

Шундан кейингина кампир набиралари, э, фарзандлари билан ўтириб овқатланди. Кейин болалар телевизор кўришди. Телевизорнинг экрани жуда катта, уйдаги бошқа жиҳозлар каби жуда ҳашаматли ва ноёб эди.

Кампир юмшоқ диваннынг чеккасида ҳашамату бойлик ичра бир сиқимгина бўлиб ўтиаркан... яна ўзини бегона уйга кириб қолгандай ва қоронғида – бир вақтлар орзу қилган, лекин етиша олмаган нотаниш буюмлар ичida туртиниб-суртиниб юргандай ҳис қилганча эртанги бозор ва тирикчилик ҳақида ўйларди: “Манзура энди қайнонаси镍ига кетмайдиган бўлса, ундан фойдалансам нима бўпти? У ҳар куни сомса ёпиб бераверади, мен чой ва қаҳвага қўшиб сотовераман.

Ахир энди оиласиз анча каттайди, униям боқишим керак-ку! Лекин уни бозорга йўлатмайман!”

Тонг отмасдан кампир яна бозорга отланди.

– Ойи, энди шу ишни бас қила қолинг, илтимос.

Кирқларга борган, башанг, уйда ҳам галстук тақиб юришни унутмайдиган, басавлат йигит энгашиб шошилганча термосларини аравага юклётган кампирнинг олдига келди.

– Мени ойи дема, деб неча марта айтганман, Даврон! Барибир ўғлим бўлолмайсан, – кампир ишидан бош кўтармай жавоб берди. – Яххиси уй топ. Қачонгача онанг жияним бечорани хўрлайди, азоблайди!

– Яххиси сиз дам олинг, ойи! Агар хоҳласангиз, шу бугуноқ санаторийга юбораман.

Кампир ўз машғулотидан бир лаҳза ҳам чалғимаган ҳолда тўнг жавоб берди:

– Мен ҳали оёғимни узатиб, дам оладиган кунларга етганим йўқ.

– Етгансиз, ойи. Етгансиз! – бақириб юборди йигит изтироб ичида.

Кампир илкис бошини кўтарди. Нигоҳлари қаттиқ, лекин маънисиз эди.

– Менга бақирма! – деди у кескин оҳангда. – Мен одамларнинг калтагини ейиш, ҳақоратларини эшитиш учун туғилмаганман!

– Ойи!.. – Йигитнинг юзи қорайиб кетди.

– Ақл ўргатавериб тоза жонимга тегиб кетдинг. Яххиси хотинингни олиб уйимдан чиқиб кет! Қачонгача сенлар учун ҳам ижара пули тўлайман?!

Кампир шундай деди-да, аравасини судраганча кўча эшик томон йўл олди.

Йигит бир зум ўйланиб турди, сўнг икки ҳатлашда кампирни қувиб етди ва уни даст кўтарганча хонага олиб кирди-да, эшикни қулфлади.

– Эшикни оч! Оч деяпман! – эшикни муштлаганча бақирди кампир. – Агар ҳозироқ очмасанг,

Наримон бойваччага айтиб, уруғингни қуритиб юбораман ҳаммангни! Оч! Оч, деяпман!

Кампир қўлига илинган нарсани эшикка ура бошлади.

Йигит қулокларини бекитганча, эшикка суюниб турар, кўзлари жиққа ёш эди.

– Кўйинг, уни қийнаманг, – деди хотини яқин келиб. – Ойим шу ҳолича яшасагина ўзини яхши хис қиладилар.

– Ўйлаб гапирияпсанми?

– Хотираси ўзига қайтса, нима бўлади, биласизми?

– ...

– Ноила билан Анвар қани, деб сўрасалар, нима деб жавоб берасиз? Уларни топиб бероласизми?

– Ўчир!

Жувон жим бўлди.

– Жонимдан тўйиб кетдим! – шивирлади йигит асабий тарзда. – Бозордагиларнинг шикоятидан жоним ҳиқилдоғимга келди! Қачонгача уларнинг олдида тилим қисиқ, илтимосларига йўқ деёлмай яшайман!?

– Начора... Лекин...

– Бир ҳафта уй қамоғида ўтирсалар, бозорни эсларидан чиқариб юборадилар. Бор, сен ишингдан қолма.

– Эсларидан чиқармайдилар, касал бўлиб қоладилар!

– Нима бўлса бўлар!

Хотин нари кетди.

Йигит ичкарига қулоқ тутди. Кампир бирдан жимиб қолганидан хавотирланди.

– Ойи...

Ичкаридан жавоб бўлмади.

Йигит бир зум иккиланиб турди, сўнг аста эшикни очди. Деворга қапишиб турган кампир шу заҳоти ўзини эшикка урди.

Кампирнинг бундай шумликларига ўрганиб қолган йигит ҳам бўш келмади, эшикни ёпиб, кулфлашга улгурди.

– Мени қўйиб юбор! Қўйиб юбор! – жазава ичидаги қичқирди кампир ўғлига ёпишиб. – Агар ҳозироқ қўйиб юбормасанг, болаларимнинг увотлига қоласан!

– ...

– Агар эшикни очмасанг, ўзимни деразадан ташлайман, – кампир дераза томон юрди.

– Билганингизни қилинг.

Йигит пайтдан фойдаланиб ўзини ташқарига олди.

Яна эшик қулфланди.

Зум ўтмай кампир шундай айюҳаннос кўтардики, анча-мунча одамнинг асаблари дош бериши қийин эди. Аммо йигит чидади, стол қиррасини маҳкам ушлаганча, бир нуқтага тикилиб тураверди.

– Акбар! Мени кутқар, болажоним! Улар мени ўлдириб қўйишади! – қичқирди кампир эшикни муштлаб. – Мени кутқар, Акбар! Ноила, қаердасан, Ноила?!. Улар мени ўлдириб қўйишади... Тириклай кўмиб юборишади... Онангдан айрилдинг, болам...

Бир чеккада турган жувон чидай олмай эшикка яқин келди.

– Агар эшикни очсанг! – йигитнинг кўзлари таҳдидли бокди.

– Қанақа одамсиз... Ахир бунақада...

Йигит жаҳл билан хотинининг устига бостириб келди. Жувон кўркқанидан ғужанак бўлиб олди. Лекин зум ўтмай қаддини тиклаб, эрига лабларини қимтиганча қаҳр билан қаттиқ тикилди.

Йигит унга қўл кўтармади. Аммо...

– Менимча ойимни ҳаддан ортиқ эркалатиб юбордим. Кўнгилларига қарайверганим учун ҳам ўғлим бор экан, нимаики қилмайин одамлар кўта-

раверади, деган фикрга келиб қолганлар. Етар, шунча вақт одамларга масхара бўлганлари!

Жувон эрини биринчи марта кўриб тургандай ҳайрат билан бокди.

Кейин:

– Шу гапларни сиз гапиряпсизми, – дея эътиroz билдириди. – Қанақасига... ойим сизни ўғлим дейди? Ахир у киши сизни танимайдилар-ку!

– Йўқ, – кескин бош чайқади йигит. – Одам ақлдан озган тақдирдаям бунчаликка бормаслиги керак. Ахир онамни қанча даволатдим. Вақт ва тиббиёт ҳаракатга келтира олмайдиган хотира бўлмаслиги керак!

– Бўлиши мумкин...

– Менимча ойим атай қиласидилар... Ўз касалига боғланиб қолганлар.

– Ё тангрим, – деб юборди жувон беихтиёр.

– Ахир қачонгача, она ўз ўғлини танимайди?

– деди йигит кутилмагандага йиғламсираб. – Ахир қачонгача... Қачонгача... ўтмиш бизни таъқиб қиласиди?! Ахир ҳаёт бир одамга шунчалик ҳам азоб берадими?! Кеча йўқ... Эрта йўқ... Фақат бугун билан одам қандай яшайди? Бугун кўриб турганларига қараб қандай хулоса чиқаради? Ахир қачонгача худди актёрлардай ўз уйимизда роль ўйнаймиз?! Мен Акбарман, лекин Даврон деган йигитнинг ролида чиқишим керак ҳар куни, ҳар сонияда саҳнага! Бу азоб-ку, азоб! Бу аҳволда қандай яшайди одам?! – йигит деворни муштлади. Унинг юзи қордай оқариб кетганди.

– Ойим яшаяптилар-ку...

– Мен яшай олмаяпман! Мен! Мен! – йигит бошига муштлай бошлади.

Жувон югуриб бориб стаканда суюқлик олиб келди.

– Ичиб олинг. Тинчланасиз...

Иигит стаканни бир кўтаришда бўшатди. Зум ўтмай у сал ўзига келди.

Бироқ...

Кампир энди дод солишга ўтди.

– Ҳой одамлар, ёрдам беринглар! Сизларда инсоф борми ўзи?! Бир бечора аёлни хўрлаётган золимдан шунчалик ҳам қўрқасизларми?! – кампир кўча томондаги деразага тирмашар, уни очмоқчи бўлар, алҳол очарди ҳам, лекин... энди темир панжараага урилган бармоқлари зириллаб кетарди, бироқ кампир бунга парво қилмас, у жони оғриётганини сезмасди. – Бир бечорага ёрдам берадиган мард борми бу дунёда?! Золимларнинг дастидан куйиб адо бўлдим-ку...

Эшик барибир очилмади.

Кампир эзилиб йиғлай бошлади...

* * *

Кампир касал бўлиб қолди. Уй қамоги унинг асабларига ёмон таъсир қиласди. У ўзини эшикдеразаларга ура-ура, ниҳоят ҳолдан тойган, афтангорига қараб бўлмасди. Қўллари шилинган, юзи, пешонаси моматалоқ бўлган...

Энди у ўзини у ёқ-бу ёққа урмасди, фақат дераза олдига бориб қўлларини икки ёнига керганча дарахтга айланарди.

– Қарға... Қарға... Ке, шохларимга қўнсанг-чи, – кампир ўзини улкан дарахтдай ҳис қиласди. – Кела қол. Нега жим туриб қолдинг? Ке, кела қол... Лекин билиб кўй, бошимга қўнмайсан!

Кампир хиёл эгилди, гўё шохларини пасайтирди. Аммо кутилмаганд... қарға унинг шохларига эмас, миясига кириб олди.

– Ҳа, ярамас! Яна эски жойингни топиб олдингми? Кишт! Кишт... Оббо, яна қағиллашни бошлади! Мана бу еримда қарға қағиллаяпти, – кўрсатгич бармоғини чеккасида айлантириб, фуд-

ранганча уй ичида юра бошлади кампир. – Қарға... Қарға... Йўқ, мен қарғаман... Мен қарға... Худди эртаю кеч дарахтда қимир этмай ўтирадиган қарға... Ўзича ҳаммага керакман, деб ўйлайди. Аслида ҳамманинг жонига тегиб кетган! Ҳе, ношуд... Намунча қагиллайсан?! Бунақада миямни тешиб кўясан-ку!

Кампир ўрнидан туролмай, ётиб қолганидан кейин эшик очилди. Жувон унга ғамхўрлик қила бошлади.

Аммо кампир ҳадеганда ўзига келавермагач, дўхтир чақиришди.

Уни кўрдию кампир яна шайтонлай бошлади:

– Вой-дод! Анави алвости сочимни олгани келди. Кийимларимни ечиб, калта халат-иштон кийдиради. Мени яшириб қўйинглар! У мени опкетиб қолади! Тезроқ яшир мени, бекит. Кўзга кўринмайдиган ерга бекит! Қариганда шарманда бўлмай-ин... – кампир ёстиқ билан бошини бекитди.

– Ойи... – йигит онасига яқин келди.

Кампир кутилмаганда иргиб ўрнидан турдию хона ичида чир айланиб қоча бошлади, ҳеч ким – на доктор, на... Йифламоқдан бери турган ўғил уни тутишга жазм этишди.

Аммо кампир барибир хонани гир айланиб югураверди, югураверди. То ҳолдан тойиб қолгунча... ва узун кўйлагининг этакларига ўралиб ииқилиб тушмагунча...

– Илтимос, мени касалхонага опкетманг, – дея ялина бошлади у ерда чўзилиб ётганча дўхтирга қараб, кўзлари қопқонга тушишдан хавфсираётган жониворнинг кўзларидай така-пука эди. – Мен жинни эмасман. Ақлим жойида. Лекин Холиданинг аҳволи оғир. Сиз ўшани олдига боринг. Уни даволаш керак...

– Майли, Холиданинг аҳволидан хабар оламан, – деди дўхтир неча марта айтган сўзларини

яна такрорларкан. – Йўл-йўлакай Қодир аравакаш-
ниям кўриб ўтаман.

– Барака топинг, илойим...

– Лекин аввал сизга...

– Йўқ! Йўқ! – докторнинг қўлидаги шприцга
кўзи тушган кампир типирчилай бошлади.

– Ойи! – йигит кампирнинг билакларидан маҳ-
кам тутди.

Кампирнинг юзи аянчли буришиб кетганини
кўрган жувон уни қучоқлаб олди. Кейин эрига
ёвқараш қилиб деди:

– Жони оғриб кетди ахир!

Йигит ичида қаттиқ ўқинди, қўлини сал бў-
шатди, лекин гап оҳангини ўзгартирмади:

– Агар ҳозироқ укол олишга рози бўлмасангиз,
ўзим касалхонага обориб ташлайман! Тушундин-
гизми, ойи?! – йигитнинг изтироб тўла нигоҳлари
онасининг маъносиз нигоҳларига қадалди.

Бир лаҳза... атиги бир лаҳза кампир қўланкалар
водийсидан қайтгандай бўлди, ҳозирги аҳволидан
уялгандай ўғлига хижолатли назар ташлади. Сўнг...

– Укол олсам, обормайсанми? – деди боягидай
ялинчоқ оҳангда.

– Йўқ.

– Алдаяпсан! – кампир қаттиқ силтаниб қўлини
тортиб олишга уринди.

– Ойи!!! – йигитнинг нафақат қўзларидан, бал-
ки баданидаги ҳар бир мўйидан учқун сачраб кет-
гандай бўлди. – Ойи, ҳаммамизни қийнаб юбор-
дингиз-ку! Бўлди-да энди! Сизнинг дастингиздан
қачонгача юзим шувит бўлади?!

Кампир бирдан ғалати бўлиб кетди. Ҳатто ток
ургандай сескаинб тушди.

– Қийнаб юбордим?.. – такрорлади у йигитга
қараб. – Нега?... Сизларни қийнаб юбордимми?..
Ахир мен эртаю кеч... бозорда юрсам... ишлаб...
пул топиб... Ўйловдимки... ҳеч кимга оғирлигим

тушмайды... Ё ўзим сезмаган ҳолда юзингизни шувит қилиб қўйдимми?.. Лекин нега...

– Бас қилинг, ойи! Бас қилинг. Сиз топган пулларнинг кераги йўқ! Эшитяпсизми, кераги йўқ! Моғор босган пулларингиз ана, ҳамёningизда турибди аллақачонлардан бери...

– Нега?.. – кампир ажабланди. – Яна пул алмашдими?

– Ойи! Агар ҳозироқ бас қилмасангиз... ўзимни бир бало қилиб қўяман!

Кампир қўрқиб кетди. Қаршисидаги йигитга қўрқинч ичида бир неча сония тикилиб турди. Нимадир ўз маромидан четга оққанидан йигитнинг қаттиқ жаҳли чиқаётганини илғагандай бўлди, аммо нима? Кампир зўр бериб ўйламоқчи бўлди, лекин ҳеч нарсани англай олмаётганидан қийналиб, юраги сиқилиб кетди.

Кейин ҳиққиллаб йиғлаганча:

– Акбар... Ноила... Фаррух... – дея болаларини йўқлай бошлади.

– Ойи! Улар сизнинг набираларингиз! Нега тушунмайсиз?

– Набираларим?! – кампирнинг кўзлари чақчайди. – Набираларим... – дея такрорлади кейин. – Менинг болаларим қани унда? Акбар... Ноила...

– Ойи!!!

Йигит бутунлай ўзини йўқотиб қўйди, у нима қилаётганини билмас, ўзини бутунлай жаҳлнинг ихтиёрига топширган, ҳадеб кампирни силталар, бир нималар деб бақиради.

Жувон чидаб туролмади, эрини итариб юбордию жон ҳолатда кампирга ёпишиб олди.

Дўхтир шоша-пиша яна битта шприцни дорига тўлдирди.

– Ойи, ойижон, бизни кечиринг, – деди жувон кампирни қучоқлаб. – Бизни кечиринг... Биздан хафа бўлманг...

– У хафа бўлмайди, – деди йигит хирқироқ овозда. – Хафа бўлишни билмайдиу..

Жувон шаҳд билан эрига тик қаради:

– Ойим идрок қила олмаслиги мумкин, лекин хафа қилишганда кўнгиллари оғрийди. Ахир у кишида ҳам юрак бор!

– Э, юрак ҳеч қачон ақл беролмас экан! Мана, исботи... – деди йигит тўнғиллаб, у яна асабийлаша бошлади.

Шу чоғ дўхтири гапга аралашди:

– Тўғри, юрак ақл бера олмайди, аммо мия ҳам юрак бўлолмайди.

Йигит индамади. У дераза олдига бориб орқа ўтириди.

Доктор кампирга юзланди.

– Тайёрмисиз, онахон?

Ўзини ҳаётга боғлаб турган нарса чил-чил бўлгандек, паришон тортиб қолган кампир аввал ҳаммага бир-бир қараб чиқди, бесаранжом, безовта нигоҳлари бир муддат ўғлига тикилиб қолди, кейин индамай билагини тутди.

Нихоят у тинчланди, лекин дарров ухлаб қолмади. Бир муддат қўлларини кўксисда чалиштирганча, шифтга тикилиб ётди, сўнг қорачиқлари секин ёнга эниб, яна йигитга қадалди ва астасекин киприклари жиплаша бошлади, лекин кўзлари бутунлай юмилмади, худди кўз қири билан ўғлига қараб тургандай қотиб қолди... Аммо йигит онаси томонга қайрилиб қарамади.

– Акбар Турдиевич, – деди кекса доктор дориларини сумкасига жойларкан йигитга зимдан қараб. – Нима қиласиз, ўзингизни ҳам, кампирни ҳам қийнаб? Яхиси кампирни касалхонага ётқизиш керак.

– Йўқ!

– Тушунмайман, нега... Нима учун... ҳар доим...

— Онамни бир марта касалхонага ётқизишган, — жавоб берди йигит. — Ўшанда сочини олмоқчи бўлишган... ва яна... Мен у вактларда ёш бола эдим... Шундан бери онам касалхонадан кўрқади.

— Энди... ундай бўлмайди. Ваъда бераман...

— Йўқ!

— Биласизми...

— Доктор, — сўзни кесди йигит. — Нега бундай, а? Нега?.. Наҳотки хотирани қайтариб бўлмаса?

— Бу саволингизга тиббиёт нуқтаи назаридан жуда кўп марта жавоб берганман, — деди доктор. — Аммо айтилмаган бир гап қолди.

— Хўш?

— Ҳаёт ҳаддан ташқари чидаб бўлмайдиган дарражага етганида, тангрининг ўзи бандаларига мурувват кўрсатади...

— Мурувват?! Ҳали бу... мурувватми?! — йигитнинг юзига заҳарханда ва истеҳзога тўла таббассум югурди.

— Телбалик ҳам инсонни кўп азоблардан қутқарди.

Йигитнинг юзида азобли ва истеҳзоли таббассум янада бўртди:

— Аввал хароб қилиб, кейин...

Дўхтири кетди.

Йигит каравотга яқин келиб, пишиллаб ухлаётган кампирнинг қўлини қўлига олди.

— Ойи... Ойижоним-а...

Тонгга яқин кўзи илинган йигит бехосдан уйғониб каравотга қаради. Кампир у ерда йўқ эди.

Йигит алам билан пешонасига муштлади.

Кампир шу куни ҳам, эртасига ҳам уйига қайтмади.

У гойиб бўлганди...

Қидиувлар натижа бермади.

Кампир йўқолган хотираси сингари изсиз йўқолганди...

МУНДАРИЖА

Хикоялар

Аёл	3
Тафаккур	14
Ажал чорлови	85
О, ҳаёт!	104
Қадимий қўшиқ	116
Мұхаббат ва нафрат	139
Кўланка	175
“Момо Ҳаво”	201
Келин	227
Тўхтаб қолган вақт сувратлари	253
Рашк	286
Куйган шаҳар.....	293

— Оқиши бир Адабий-бадиий нашр
тэй, — жоштой бүрдэл фестиваль, — Узбекистонда олжаск-
иңи бүлгөнгө түшүнүү болуп калып, —
жем Борчан Зулфия Қуролбой қизи

АЁЛ

Негизги мөхиттөрүк мактаптардың барынан
— Ву сакчының түшүнүүсүнүүн иззарынан
жуда күп маддига жароо Ҳикоялар

Алдан риториягатын бир газетчиче.

— Жаңы мактаптардың түшүнүүсүнүүн иззарынан
Мұхаррир Санжар Турсунов
Бадиий мұхаррирлар Мурод Бурхонов,
Камолиддин Нурманов
Техник мұхаррир Хосият Ҳасанова
Сахифаловчи Ҳилола Шарипова

2019 йил 18 ноябрда босишига рухсат этилди.
Бичими 84 x108 $\frac{1}{32}$. «PT Serif» гарнитураси.
Офсет босма. 16,8 шартли босма табоқ.
11,84 нашр табоғи.
Адади 5000 нусха. 291-ракамли буюртма.
Баҳоси шартнома асосида.

Ўзбекистон Республикаси Президенти Администрацияси
хузуридаги Ахборот ва оммавий
коммуникациялар агентлигининг
Фафур Ғулом номидаги нашриёт-матбаа
ижодий уйида чоп этилди.
100128. Тошкент. Лабзак күчаси, 86.
Телефон: (371) 241-25-24, 241-83-29
Факс: (371) 241-82-69
www.gglit.uz e-mail: info@gglit.uz

22,300 c.

Аёл

Зулфия ҚУРОЛБОЙ қизи

16+



ISBN 978-9943-5953-2-3

9 789943 595323